



# Âteşpâre

## Muallim Nâci

PDF'leştiren

Târık İleri

[tarikileri@gmail.com](mailto:tarikileri@gmail.com)

[www.ayferaytac.com](http://www.ayferaytac.com)



بسم الله الرحمن الرحيم

۲۰۲

معلم ناجی

# آتشپاره

ویردم آتش دلاره سوز دل آواره دن  
ایلدن ایجاد بیک یانغین بر آتشپاره دن

معارف نظارت جلیله سنک رخصتیه طبع اولمشدر  
رخصتنامه نومروسی ۴۶۷



(مهران) مطبعه سی - باب عالی جاده سنده نومرو ۷

۱۳۰۱

## توحید

—

الله که موجد جهاندر  
بيک درلو نقابدن عيادر

.....

.....

بولز او تجليات غایت  
اعداد نصل بولور نہایت؟

توحیدی سور اوخالق الروح  
بردر بر اوبی نیاز سبح!

یوق شرکہ اگرچہ اعتباری  
توحیدہدہ یوقدر افتقاری

تعریفہ کیتماکدر اولی  
تعریفہ کلیری هیچ مولی؟

الله نہ در؟ دینجہ غافل  
الله دیوب خوش اولوردل

عاقبل بیلیمور کہ وار بر الله  
ماہیتی آکلاشلیمور آہ!

اولز می خرد کداز امت  
 پیغمبری لال ایدن حقیقت؟

.....

.....

.....

.....

معنای وجود، رب اعلی

الله بیلیر عظیم معنی!

باق صنعتنه نه عالم آرا!

باق قدرته نه حیرت افزا!

باق ملکنه واری انتهای؟

باق ذهنه صیغاری کبریایی؟

دور ایتمده دست قدرتمند

یوزیک کره ملک حکمتنده

ایتش تن زاری خاکدانی

قیلش دل پاکی آسمانی

تن مرتبط اولسده زمینه

جان چیقمه ده رب عالمینه

تن طورمه ده آشیان ایچنده

جان اوچمه ده غیبیان ایچنده



ای طائر غیب صانک الله!

پروازیکه بیک تبارک الله!

سیاره ارضی تارک اولدک

یو کسکاره طوغری سالک اولدک

ناسوت ایدی بر زمان مقامک

لاهوته می شمدی اعتراضک؟

شوقک کیمه؟ طور میوب کیدرسین

اللهیمی جست وجو ایدرسین؟

کوز نوری کبی سمایه چیققدک

باقی باق! نه کوزل فضایه چیققدک

چیق چیق! که بو خاکدان تنکدر

اوچ اوچ! که جهان جان سنکدر

سیاره حدود انجنده محبوس

یوقدر هاله سنجه حد محسوس

یارب بو نه مطلبمجه رفعت!

یارب بونه مشربمجه وسعت!

عالم قالیر اورته سنده ارزن

جولانکهی بویله ایسترم بن

اولسه مده محیطی آسمانک

البته محاطی یم خدانک

آغوشمه صیغسه ده سماوات  
 یاننده وجود اولنمز اثبات  
 اولسه هم ایکی عالمک امیری  
 امرم ینه بر شهك اسیری  
 بر او یله ملیکه ای اسیران !  
 حریم اولسونمی قربان ؟  
 عفوایله خطا ایدرسه کاهی  
 بر جذبه لی شاعرک الهی !  
 عشقکله نوای دلنشین  
 رقصان ایدیور موحدینی  
 سندن بو نفس، دهن ده سندن  
 شاعر ده سنک، سخن ده سندن .

قصیده (\*)

بر لطف ایله شهر یار دوران  
 قیلدی ینه اصد قایی شادان  
 بیلم نه طورر سخنسر ایان ؟  
 واجیدرا و لطفه عرض شکران .

(\*) برلین سفیری دولت او سعید پاشا حضرتلرینه در .

آثارینه ذات پادشاهی  
توجیه نگاه دقت ایتدی  
صاحب شرف وزارت ایتدی  
بر ذات رشید خیر خواهی

هرایشده وزیر و پادشاهک  
بر اولی فکر مستطابی  
تجیل اولنور بو انتخابی  
شاهنشده معدلت پناهک .

عند العرفا کمالی پیدا  
بین السعدا همالی نابود!  
کیمدر او یکا نه مرد مسعود؟  
فخر الوزرا سعید پاشا!

طبعنده کی رشد واستقامت  
علویتنه ایکی نشاندر  
ادراکی اولانلره عیاندر  
فکرنده کی جودت وسلامت

مجلوب مزاجیدر معالی  
علویت آنکله مفتخردر  
علویله ایچنده مشهردر  
مفتون خصالیدر اعالی

منظـوریدر اذ کیای امت  
انظاری ترقیاته معطوف  
افکاری جهات خیره مصروف  
مقصودی عمومه حسن خدمت

بر بویله وزیر لایق الحق  
بر او یله خیر پادشاهه  
چیقسون بودعا قبول کاهه  
قیلسون هر ایشنده حق موفق!

قامم سوزه شاعرانه او هام  
یوقدر او جهنجه بیج و تاجم  
حقکولغه واردر انتسابم  
معلومی نه لازم ایتک اعلام!

عندمه مدیحهل سرفیدر  
مدوح دکله مدحه احرا  
مدحکده سخنسر الق اما  
ناجی ایچون الک بیوک شرفدر.



## کبوتر

—

او چد قجه خیال یار د کوزده  
آرامه بولوب مدار سوزده

شهدانه دیده ترمه  
مشغول اولورم کبو ترمه .

بر او یله انیس جان بولمز  
اما اوده هر زمان بولمز

ترك ایلش ایشته آشیانی  
خانی ایکن اولش آسمانی

پیرودر او وحشت اعتیاده  
نور نکهتم او چار هواده .

هر هانکی طرفده اولسه مطلوب  
اولزمی نظر اوسویه مجلوب ؟

انظاردن آرزو عیاندن  
افکاره دو دیده ترجاندن

عرض ایلور اول لطیف پیکر  
هر بر سوز یلشده لطف دیگر

دل شوق ایله اوینایور یرندن  
 آواز لطیف شهپرندن  
 اوچسون دیم ایستم که اینسون  
 انسانه فرشته ایندی دینسون!  
 وار وجهی اکر دیسه مایکدر  
 اما شوده وار که پک دونکدر!  
 کل دانه قاجمه ای کبوتر!  
 حیرانکی صانمه دام کستر  
 اولدک ینه بغتة پریده  
 بوندن نه حیقار؟ آ نور دیده!  
 دانه سنی صید ایچون دکدر  
 کل کل! بو بر آرزوی دلدر  
 دوشسهک بيله دامه ایلر آزاد  
 بر بشقه روشده در بو صیاد  
 کوکلم سکا بسته اولدی بی دام  
 صیادسن اولدک ای خوش اندام!  
 سن اولمدن آشیان رسیده  
 کوکلم نصل اولسون آرمیده؟  
 آتش کبی سومه اعتلا بی  
 کل اوله آ سودیکم هوایی!

بالاره طوغری ائمه پرواز  
 تا اولیه سین دوچار شهباز  
 آلچقده ده پک طولاشمه زیرا  
 ایلر ایکی صاحمه عمرک افنا.  
 قوندی سربامه بارک الله!  
 تکرار هوالنیرسه ایواه!  
 اوچمق ایچون اولسون بهانه  
 کاهی او باقشیر آسمانه؟  
 ای صنع صفا فزای بیچون!  
 دل اولدی تنزلکله ممنون  
 ارباب حقیقتک هماسی!  
 سودالی طبیعتک صفاسی!  
 بدن متوحش اوله اويله  
 کل کز آزاجق یانمده شويله  
 طبعمه کی ذوق وشوقی تام ایت  
 مفتون خرامکم خرام ایت!  
 اولدم بن او خوشخرامه مائل  
 طاوسه طوتاریم ممائل؟  
 بر کره باقک نصل سبکروح!  
 معذورم اولورسه بنجه ممدوح

سیرایله شو کردن بلندی  
 سومزمی کوکل بوشهلوندی؟  
 رفتارینه دقت ایت نه موزون!  
 شاعر بوکا اولسونمی مفتون؟  
 تو یلرده باقک شو انتظامه!  
 شایسته دگلی ایتلامه؟  
 توزلق ایله توز مشارک اولمش  
 پوشیده پای نازک اولمش!  
 فیضیله طبیعتک طونانمش  
 هر بر تویی نور ایله بویانمش!  
 صباغنه صد هزار تحسین!  
 الله! نه در بو نور رنگین!  
 باقدیمی رفیقه سنده نازه؟  
 باق باق بریکنده اهترازه!  
 مردانه مروره باق یانندن!  
 باقر بیله کچه چاق یانندن  
 اما متعاقباً نه ناچار  
 سودازده وار بردونش وار!  
 یاره طوقنور خدانکرده!  
 بالکنه سورورسین او یله پرده؟



شوق اولمیدر سبب بو حاله  
 توزلاندی، یازق اوپرو باله !  
 ارباب نظر سووب اوپرل  
 برلده سورنسون اوپرل !  
 سیر ایله ترقی نشاطی !  
 کوسترمه ده سر ارتباطی  
 هو هوویه کیرشدی عاشقانه  
 قیدنده دکدر آشیانه  
 مادام که مطلق العناندر  
 آواره یه هر یر آشیاندر .  
 هو هو-ولری آه پک درونی !  
 عاشق بکنیر بو ارغونی !  
 باقدقجه اوصنع بر کاله  
 شاهین قضا کلیر خیاله  
 کوکلرده کزن اوبال منقوش  
 بر کون اوله جق زمینه مفروش !  
 خشنود میسین بو ابتلادن ؟  
 بیلم نه اوصانده انزوادن ؟  
 بر بیضه ایچنده خیلی ایام  
 تنهجه قپانده ایتده آرام

آه اولسه ایدم شو سره واقف  
 زدن کیروب اولدک آنده عاکف؟  
 چیقدک بیویوب فضای فیضه  
 خاطرده می تنکنای بیضه؟  
 که آرقداشکله کاه تنها  
 حرم دیهرک اوچارسین اما  
 کاهی اونکاه وحشت آثار  
 حس ایتدیر بیورکه برغمک وار  
 ایتش سنی ده قرین حیرت  
 حریت ایچنده براسارت!  
 باقسهک کورینور بودار عبرت  
 صیاد ایله صیددن عبارت!  
 کوردکی بو دامکهدده آزاد؟  
 بر دامک اسیری صید وصیاد.  
 عالم بو طریقّه منسلکدر  
 یکدیگری صیده منهمکدر  
 برکک آکا کلدی اولدی جلاد  
 او بککرایکن آواولدی صیاد!  
 بر بشقه جهان اولنسه ابراز  
 ایتسهک شورادن سنکله پرواز!

دنيا نه در آكسه ق او نو تسه ق  
آواره يز آشيانه طو تسه ق !



## قوزی



پيلسه م شو قوزی نه دن غم آلمش  
هر ناله سی قلبه داغزندر !  
فرياد ايدهر ك قوشار نه دندر ؟  
سودسز می رفيقسز می قالمش ؟

ای سودقوزیسی ! نه در بونالاش ؟  
کیم اولدی سبب بو انفعاله ؟  
مادر ویرهرك سكا نواله  
پهلوسنی ایتیمور می بالاش ؟

یوقسه سوریدن جدای قالدك ؟  
فرقتی بو اضطرابی داعی ؟  
قالمشلره باقیور می راعی ؟  
بی همره وبی نوامی قالدك ؟

بیهوده می بویله ترکتنازک؟  
 واردر بوملال ایچنده امید  
 مادردر ایدن امیددی تولید  
 کچمزمی او مهربانه نازک؟

امید ایله در بکای اطفال  
 سود و یرمهده بی املی مادر؟  
 هر کس بر امیده خدمت ایلر  
 امید ایله درجهانده هر حال!

سن اولسهك ای خیال امید!  
 قابیلدر ازدیاد عمرم؟  
 سایه کده در امتداد عمرم  
 بیکریشا ای نهال امید!

کل کل! قوجاغنده ایله آرام  
 اما سنی والدهكده بکدر  
 بیهوده می چکدییکی امکدر؟  
 قوش قوش! آنی باری ایله خوشکام.

ظنم ممه بی دهانه آلدی  
 زیرا ایشیدلر اولدی افغان  
 شاد ایلدی دردمندی درمان  
 فریاد ایده جک دهانه قالدی؟



زانورین ایلش نہادہ  
تسہیل رضاع ایچون زمینہ  
پستاندہ کی شیر شکرینہ  
فطرت آنی ایلش فتادہ .

ایلر ممہی باشیلہ تہزیز  
دنبالہ ایسہ ہمیشہ جنبان  
طویمز بونی سیرہ چشم انسان  
یارب بونہ وضع حکمت آمیز!  
سیرایت شوتلاشی باق شوشوقہ!  
شادی دم وصالدر بو!  
ای کور بہ قوزی! نہ حالدر بو؟  
الغبطہ شو حالتہ شو ذوقہ!

لکن! بو ضعیف پاکزادہ  
قصاب نصل قییار بیلنمز!  
اسرار خفیہ وار بیلنمز  
اطوار تصرف خدا دہ!

انسان کبی وارمی ہیچ غدار؟  
غدارلق اولسہ ایلر احیا  
دم اورمہدہ مرجتدن اما  
یانندہ رحیم کرک خونخوار!

بیل قدرینی ای غریب معصوم!  
 عمرکده بو اک کوزل زماندر،  
 قصاب فلک عدوی جاندر،  
 ایلر سنی عن قریب معدوم!

بیلیم کیم اولور بنم شفیقم؟  
 بن شمدی سنک شفیقک اولدم،  
 القصه سنک رفیقک اولدم،  
 کوی عدمه چیقار طریقم.

قربانکه کهنه در بو عالم  
 قان ایچمدیکی زمانی کوستر!  
 کیم یاپدی بو خاکدانی؟ کوستر!  
 حیرت زده اولسونمی آدم؟

دوشمنز بو قیوده قلب آگاه  
 مادام که عاقبت فنادر،  
 عندمده خدا یلیر فدا در  
 بر لحظه صفایه ماسوی الله!

## قلندر

—

۱

كلفت اقبالدن آزاده‌يم  
 رتبه شناس روش ساده‌يم  
 كيمسه يه يوق ناز و نياز منم  
 اويله اسارت نه مه لازم بنم!  
 آير بليم بيك در يكدانه دن،  
 آيريله من سيرت مر دانه دن  
 ترك حقيقت ايدن اولر مني پست؟  
 اولميان انساني حقيقت پرست؟

بن نه مسيحي نه مسيحا دم  
 ذوق حقيقتده آرار آدم.

۲

خيلي زمان عالمي دور ايلدم  
 خلقه دكل كننده جور ايلدم  
 آكلادم احوالي انسانلرك  
 سومدم اطواري فتانلرك

صورت وسیرتده کی ضدیتی  
 فهم ایله سلب ایلمدم امنیتی  
 عقله موافقمی که اولسون نفاق  
 حاکم آفاق طوررکن وفاق ؟

بن نه مسیحی نه مسیحا دم  
 ذوقی حقیقتده آرار آدم.

۳

وار آرا برمشتی مرده هوش  
 آلداده مزسین بنی حکمتفروش !  
 دیکله مم ای منشی سطحی سخن  
 هر سخنک بنجه گان لم یکن  
 سوبله ای شاعر کذب اتصاف !  
 دیکلیه مم اوپله مداهنجه لاف  
 کیت ! بنی ارشاددن امیدی کس  
 کندیکه کل ! شیخ مسیحا نفس !

بن نه مسیحی نه مسیحا دم  
 ذوقی حقیقتده آرار آدم .

۲

ظلمت‌ه اصحاب عی بنده در  
 نور ایسه یناره تابنده در  
 اولمه ده کیتد کجه درخشنده تر  
 فکر منور بکا رهبر یت  
 مهلك ایسه بن اولیم هالکی  
 بشقه طریقك اولم سالکی  
 اولسه جهولانه جهان دشمن  
 منقلب اولز ینه فکریم بنم!

بن نه مسیحی نه مسیح - دم  
 ذوق حقیقتده آرار آدم.



شام غریبان

—

که بر اووده سفر کز ینم،  
 بیکانه سی شاخ سایه پرور.  
 که بر لب جوده خوش نشینم،  
 پرورده سی بید سایه کستر.

جول کبی سو بسورواندر،  
 بیلم نه زمان مقیم اولوردل !  
 نقاد غرائب جهاندر،  
 حکمت کوره رک حکیم اولوردل.

کاهی چیقور بوفق دلخواه  
 بر شهر جسیه شاهراهم،  
 آقشام اولیورده اولیور گاه  
 بر قریه مصادف نگاهم .

انای سفرده چشم امغان  
 کورد کجه مواقع لطیفه  
 بولرمی طبیعتنده انسان  
 بر خواهش جلسه خفیفه ؟

برطاغ اتکنده شویله طوردم،  
 چکمشدی کناره شمسی کهسار  
 سودم او کوزل یری اوطوردم،  
 تشکیل ایدیوردی برچنزار .

دوشمشدی شوا حق جبالك  
 تا نصف فضایه دك ظلالی،  
 حالا او جبالك، اول ظلالك  
 پیش نظرمدہ در خیالی !

ایلدی کذر کهن زر اندود  
 بر یر کورینن ضیای موج،  
 آهسته روشله ظل ممدود  
 بر یاندن آئی ایلردی تاراج .

ایتدکجه لطافتن تماشا  
 قالسون دیر ایدم احوال، جاوید  
 چوق سورمدی اول نظاره حیفا  
 کیتدکجه آزالدی نور خورشید !

تنها براقوب بنی نهایت  
 مهر اولدی نهان صولر قراردی،  
 اطرافنی قاپلاینجیه ظلمت  
 سیاح غریب فکره واردی .

محفوف غم اولدی شاد کوکلم،  
 ابر آلتنه کیردی آفتابم  
 یاراننی ایتدی یاد کوکلم،  
 اولدی متزاید اضطرابم .

چوقدن بری دل مثال صیاد  
 آواره دشت ایتلادر،  
 وارمی عجبا بنی ایدن یاد ؟  
 یاران دیدیکم ده بی وفادر !

دوشسهك دخی بر رفیق خاصه  
ایلر سنی داغدار فرقت،  
عالمده قصورسز خلاصه  
انسانه کمال ایدر رفاقت .

بیك قصه بی کسان یازلسه  
بیلز بونی شخص خانه پرورد،  
بریت ادب نشان یازلسه  
آکلار آنی عارف جهانکرد .

تنهای سیاحتم ؟ دکلدر  
وار برده رفیق ترزبانم،  
کفتاری گزیده، طبعی نادر،  
کیمدر ؟ قلم دقیقه دانم !

قالسه نه زمان حزین و بی یار  
تنشیط دله عنایت ایلر،  
ویرد کجه دماغه حدت افکار  
بن سویلرم، اول کتابت ایلر.

فخر عجمانه دن مصوندر  
ابراز حقیقت ایتک ایستر،  
بیلکسه غرض نه ارغنوندر  
الحانه دقت ایتک ایستر !



## فرقت (\*)

آلینه بر محنت نا که ظهور!  
 بن بیلیم بخت غم ایجاد می،  
 ایلدی ویران دل آباد می  
 زلزله فرقت نا که ظهور.

بیلیمور آرام نه دریا که خواب  
 عشق ایله بیلیم که بیلشمش کوکل،  
 بلای که بر زلفه ایلشمش کوکل،  
 بی سبب اولمز بوقدر پیچ و تاب.

کوکلی ایلدی ینه محزون زمان  
 کریه ویرر سیر چن چشمه،  
 عارضکی غائب ایدن چشمه  
 معرض غمدر صفحات جهان.

عاشق آلام نصیبك ینه  
 اولدی دوچار صدمات محن،  
 یانه دن اولسون سنی بولش ایکن  
 هجرته مجبور غریبك ینه؟

خیلی دم اولمش ایدی صحرانورد  
 ملعنت طالع مردود ایله،  
 اشك روان ودل پردود ایله  
 اولمه ده در شمعی ده دریا نورد.

ایتسه م اقامت اولورم مبتلا  
 شدت سودا دینیلن آفته،  
 مغترب اولسه م دوشرم محنته،  
 بنجه سفردرد، اقامت بلا!

ذهنه کلیر فکر سعادت می وار؟  
 کلسه ده امید وصالک کلیر،  
 پرسش احواله خیالک کلیر،  
 خسته کی یوقسه کیم آرار کیم صورار؟

آه او عتاب، اول سخن شکرین  
 بزم وصالکده نه دولت ایدی!  
 حین وداعده نه حالت ایدی  
 آه او تغیر، اونگاه حزین!

کرچه طولاشمقده یم آواره وار  
 دوغندی منہاج سدیدم ہنوز،  
 سوغندی مصباح امیدم ہنوز  
 کرچه اریندی تنی روزکار .

دلہدہ وفا فطرتی باقی اولور  
 کرسہدہ ہجرانک ایلہ سرسری،  
 برکون اوامید پرستک یری  
 صدر طربکاه تلاحی اولور !



### تلاحی {۰}

( عاشق و معشوق آردہ سندہ محاورہ در )

—

۱

م — ساکت نہ طور رسین ای وفا خواہ ؟  
 بر سوز صابیلیری یوقسہ بر آہ ؟  
 آہ ایلہ جک زمانمیدر بو ؟  
 حاشا دیہم دکلسین آکاہ  
 بر بویلہ سکوتی سومن اللہ  
 بیلم بنی امتحانمیدر بو ؟

(۰) ساقزدن عودتہ سونمخشد .

۲

ع — آزادهٔ فکر اتمام  
 برحسك اسیر در جنانم  
 عشق اولدی مدار اشتهالم.

اولز اوده شمدی ترجانم  
 لازمی که سو یلسون زبانه؟  
 انطقمی دکل لسان حالم؟

۳

م — هم مجلس شوق ایکن جوانلر  
 دمبسته طوررمی خوشزبانلر؟  
 عشقک بوده می غرابندن؟

صوفی کورینورمی نکته دانلر؟  
 تفریق اولنورمی صکره آنلر  
 عاشق کرمک مصاحبندن؟

۴

ع — ویردک بکا بر غریب حالت  
 دل بغتهٔ اولدی وقف حیرت  
 سن منکر مدعا دکلسین.

حاکمک ایدرمی عقل و حکمت  
 بر دلدۀ که عشق ایدر حکومت؟  
 سن سویله که تر جان دلسین .

۵

م — اوقاتی نه یولده ایتدک امرار؟  
 یازدکی قلندرانه آثار؟  
 ارباب قلم طوررمی خالی؟

الله ایچون اولدکی هشیار؟  
 اولق نه ایچون بور تبه سرشار؟  
 طبعک نه قدرده لا ابالی !

۶

ع — آسانمی کچر عذاب نیران؟  
 دل خوف ایله اولسونمی لرزان؟  
 حالا او تأثرات، باقی .

سوزان اولورم دیدکجه هجران  
 مسعود ایمشم که بولدی پایان  
 اولدم متشرف تلاق .

۷

م — ای نو سخن بلاغت آرا!  
 قدر ادیبی ایتدک اعلا،  
 فیض آور یسین سخنورانک!

هر بر نکه کرده کیزلی سودا،  
 هر بر سخن کنده عشق پیدا،  
 سرمایه شو قیسین جهانک!

۸

ع — مألوف اولوب صباو تمدن  
 هیچ اولدی فارغ الفتدن،  
 عاشق بکا عشق خانمانسوز!

کیم کورسه بیلوب نخواستدن  
 نومید اولیور افاقتمدن،  
 مهلاک کورینور بودرد جانسوز!

۹

م — اولق نیچون اویله یأسه مائل؟  
 فرقت ده اولا مشمی زائل؟  
 حالکده غرابت اولدی پیدا!

حالا آرمزده وارمی حائل؟  
 آغلارمی اولان وصاله نائل؟  
 یارب بونه حال حیرت افزا!

۱۰

ع — وصلکدر اکرچه روحپرور  
 هجر کرده وار صفای دیگر  
 وصلکده کوزل، غمکده محبوب!

کیم عاشقه بویله حرمت ایلر؟  
 الله! نه در بو عاطفتلر!  
 کوکلم سکا قالمسونمی مجلوب؟



میخانه ده برسویلنش

—

عشق فتانه انتساب ایدهلی  
 آه ییلسهک نه بی قرار اولدم!  
 فرقتک اشکمی شراب ایدهلی  
 شارب اللیل والنهار اولدم!

ايچسه آقشامدن صباحه قدر  
 اومديغم نشوه طوغمورميدن،  
 بكا بوزكه درد و يردى قدر،  
 غم اكسلز اولدى هي هيدن.

فصل اولمز جهانيان حيران  
 طبعمك بى قرار لقلرينه؟  
 كوره مزل سبب غلط ينان  
 سينه مك داغدار لقلرينه.

كلك اى اهل ابتلا ايچهم!  
 نه ايچون جامه وار ميور الكز؟  
 صرديكز مي؟ بردها ايچهم،  
 ديكله يك! سويليندر اكلكز!

بندي اولكي كوستش ساقى!  
 يابويكانه لك نه دن شمدي؟  
 يتيشير بكله دك، يتش ساقى!  
 بنى ده اتمه نعره زن شمدي!

قالقكز اى رفيقلر كيدهم!  
 اوبتك وار هزار دم سازی،  
 پاره مزله نيچون نیاز ايدهم؟  
 چكيليرى بو كافرك نازى؟



کیمه سویلرسین آه! طالمشله!  
 کیمی بن شمدی همزبان ایدیم؟  
 نه قدر بی مجال قالمشله!  
 براقوب بونلری نصل کیدهیم؟  
 آرقداشله! صباح یاقلاشیور!  
 خوش اولوردی کیدلسه خانه له،  
 بزه پیرمغان بیله شاشیور!  
 ویرمز اولدی قولاق ترانه له.

رفقصادن قالیر یرم یوقدر  
 کیده مم شمدی خانه م اولسه بیله،  
 بیکه اوستنده قالدیغم چوقدر،  
 بن ده یاتسه می بر بهانه ایله؟

نرده سین مفعجه! شراب کتیر،  
 سکا دوشمز بو رتبه استغنا  
 نه قدر ایچمشز؟ حساب کتیر،  
 اوده اولمش غنوده، واویلا!

بر جوان اولسه، بر کان اولسه  
 ایتسه طبعجه بر کوزل تقسیم!  
 بر طرفدن پالاله طواسه  
 او زمان کیم آرادی بشقه ندیم؟

نه جوان وار، نه ده کان، نه طویان!  
 بن نه بی آشنا غریب ایمشم!  
 او یو یور مغیچه، دیدکجه او یان!  
 نه مسلمان بی نصیب ایمشم!

بو جهان کدورت آبادک  
 کرچه یوقدر صفا اسانده،  
 ینه شکر ایلرم که زهادک  
 دکم حلقه ریاسنده .

ایسته هم او یله همنشین که ایدر  
 یاد اولندکجه باده استغفار.  
 بو بزم فرقه بشقه یولده کیدر،  
 آرده بر بیوک تخالف وار!

نیلسون بویله رند خوشمشرب  
 خود نمالله روح وریحانی؟  
 بکا ترفیق ایدر میسین یارب!  
 بر ریاکار سجده کردانی؟

بنی آت نهر خیره جنتده  
 ایدهیم شوق ایله شنایورلک،  
 قالمسون سرخوشک منلده،  
 سکا قالدی غریب پرورلک!

اكتفا ايلرم شراب ايله بن  
جمله نعت بهشته بدل .  
نه مه لازم نهور ماء ولبن!  
ايسته صوفيلر! ايسته نهر عسل!

آفرين مغچه هم! اوياندكي؟  
بزي لايقي كيمسه سز براقش؟  
چوقچه مي سويلدك؟ اوصاندكي؟  
آني ايمما ايدر بو اكري باقش!

بنی ایتدك سیاه مست جنون  
اوتغافل پسند كوزلره .  
سن نیچون بدن اولدك ممنون  
بو قدر دلفریب سوزلره ؟

هله طولدر شو جامی بر کره!  
شمدي تجديدنشوه فرض اولدی .  
ديکله باری رجامی بر کره!  
يوقی رحك؟ قاچنجی عرض اولدی؟

بر صبو حکله جان مخموری  
نشوه یاب ایلدك، سقاک الله!  
ینه طولدر شو جام بلوری!  
حامی نشوه سین، حاک الله!

غم آید بهر کجاکه روم  
جز خرابات کز منست آباد.  
تا نغیرم جدا ز می نشوم،  
من و میخانه هر چه باد آباد!

می پرستم، مقیم میکندیم،  
لامکانیلرک بودر وطنی.  
نه ایچون متصل می ایچمه دهیم؟  
کتیرندن صورك جهانه بنی!

### فریاد

وولقانیسین ای دل هوا خواه؟  
آتشکده اولدی سینه، سندن!  
طورمز نه یانارسین؟ الله الله!  
یادم سنی شعله بار ایدندن!

بر شعله مزاج دلفروزک  
نار هوسیه مشتعلسین،  
افکار شبک، خیال روزک  
بردر، هپ آنکله مشتعلسین

اولسه كه ده كهی نهان، اولورسین  
صبرك طوتشجه آتش افشان،  
یان، طورمه كه بر زمان اولورسین  
منظور حقیقت آشنا یان .

ای لمعه خوش بروز! سنسین  
نو آتشی دودمان عشق!  
ای برق جهان فروز! سنسین  
مشعلکشی کاروان عشق!

حیرته بو عشق بی سکوندن  
اک جاذبه لی بتانی شهرک!  
خشیتده بو جذبه الجنوندن  
اک جذبه لی عاشقانی دهرک!

آکدم ینه بی وفا وطنده  
آواره لك ایتدیکم زمانی،  
یوقدرکه بر آشنا وطنده  
بیت الحزن اولسون مکانی!

ظن ائمه که چله طولدی شمدی،  
دلخونز اکرچه مختفی یز.  
جانان ده مهاجر اولدی شمدی،  
اثر نبوی به مقتفی یز!

بولدم اوتساليا دلبرنده  
 اول قطعه به خاص بر ملاحظت،  
 انسان کوزلی دیسه م یرنده،  
 تشبیه وتکلفه نه حاجت !

شیرین گلانی شعره زیور،  
 موزون حرکاتی شاعر آشوب!  
 هر نظره سی قلبه لرزه آور،  
 هر جلوه سی عقله دار آشوب!

سنبله بنفشه یی کورر دون  
 اول کا کلی ایلین تماشای،  
 اولسه م ده تخیلیله مجنون  
 زنجیر دیم اوزلفه، حاشا !

بیلم نه دیسه م که ایتسه ایما  
 حال دل حسرت آزمایی!  
 بر حالده درکه ایلر ابکا  
 بر کریمه ایله پیک آشنایی!

مخصوص آکا تصوراتی،  
 محرم کورینن دکادر آگاه.  
 بهوده دکل تأثراتی  
 لیکن کیمه آکا درسین؟ ایواه !

بولسه‌م اوسوزی که ایتسه ابقا  
 دنیاده بولندیغم زمانی،  
 اخلاف کزین ایدردی ایفا  
 دمبسته‌سی اولدیغم فغانی .

مشرجه بر آشنا بولنمز،  
 دنیا نه غریب غربت آباد !  
 درد اهلنه ملتجا بولنمز،  
 برپاره‌یه صد هزار فریاد !



### بهارشباب

۱

یکسان نظر مده صیف و سرما،  
 اندوه ایسه اسم بی سما،  
 شوریده نشوه شبایم .

اولزسه ده باغ نزهت افزا  
 فکرم یتیشیر بکا طربزا،  
 مستغنی نغمه ربایم .

۲

کو کلمه صفا، دهنده خنده،  
 مزوج ایکی خنده بر سخنده،  
 یانمده اوکل بدن خرامان !

بر تازه بهار وارکه بنده  
 یوق بیکده بری آنک چنده!  
 بهوده نه فخر ایدر گلستان ؟

۳

وار دلده بر آرزوی جاوید  
 اشواقی ایلمکده تزئید،  
 عاقل آکار بطقلب ایدندر.

یلسهك نه قدرده طاتلی امید!  
 یاننده فسانه ذوق جشمید :  
 اکمال سعادت وطندر !

۴

شهرم نعمات دلستاندر،  
 رقص آور نور سید کانددر،  
 آنلر آره سنده وار رواجی.



آگاه تجدد زماندر،  
فکرم ده بنم کبی جواندر،  
پیران ایله یوقدرامتراجی .

بهارا یچنده خزان

— یاخود —

یأس مهاجرت

—

یوق ایدی کرچه منتظم خانهم  
بکا روشن کلیدی ویرانه م  
ایندی غدر زمان بنی اجبار،  
ایلدیم آه ترک دار و دیار !  
بنی آواره قیلیدی ریب منون !  
خاننام خراب، بغرم خون !  
همرهم اولدی بر غریب ملال،  
آنی تعریف بنجه امر محال !  
بنی سویلتکه نه حاجت وار ؟  
ایشته کوزیاشی ! ایشته جسم نزار !  
دل مضاهین غمله طولشدر،  
پیکرم ترجمان اولشدر .

گرچہ فصل بہارہ دوشدی سفر  
 رنگ رویم خزان حزن آور !  
 بن آچلم جنانہ دونسہ جہان،  
 کلاستان درون خزانستان !  
 موج موج چن کوزمدہ دکل !  
 فوج فوج سمن کوزمدہ دکل !  
 قولاغمدہ کمال یاسمدن  
 قوشلرک صوتی نوحہ شیون !  
 آغلامہ، ای ہزار خوش نغمہ !  
 مرحمت یوقی داغدار غمہ ؟  
 بودہ بر ابتلائی حیرتزا :  
 دل جہانندن وفا اومار حالا !  
 روش عصرہ ناموافقدر،  
 کورمامشکن وفایہ عاشقدر !  
 کوردیکم شخصی مہربان صانیرم،  
 آجیور حالمہ جہان صانیرم۔  
 یوادمہ کاهی کہ ہمنشین بولورم،  
 آئی بندن بتہ حزین بولورم۔  
 اودہ دشت بلادہ سرگردان  
 آرایور کندی دردینہ درمان !

هله شکوامی دیکلیور طاغالر،  
 عکس آهله ایکلیور طاغالر!  
 اوزادقجه وطن غریب ازیلیر،  
 کربت غربتی غریب بیلیر.  
 کیجه قالدیم شو غمغزا درده،  
 وطنم زده آه! بن زده؟  
 بر طاشک آشناسیدر باشم،  
 کلسه اویقو اولوردی یولداسم.  
 ایتدم اختر شمار چشم تری،  
 بوشبک یوقیدر عجب سحری؟  
 آتار آتمز شفق قپاندی هوا،  
 اولدی بر چوق بولوت سما پیا.  
 اوده اولمش وطن جدا سیار،  
 نه حزین آغلابور شو ابر بهار!  
 بولودک کوکده اویله آغلایشی  
 صولرک یرده بویله چاغلایشی  
 ایدیور انکسارمی تزیید،  
 ایلیر انتظارمی تشدید.  
 چاره سز قالدی منکسر کوکلم،  
 مرده موته منتظر کوکلم!

کرچه هر روز قطع راه ایدرم  
 بیلم اما نه وقته دك كیدرم !  
 خانه بردوش سینه چاك بنم !  
 انزوا خواه زیر خاك بنم !  
 كیدرز ای دل رضا مسلك !  
 بو كیدشله عدم دیار یته دك !  
 اولیورسین نیچون بكا مدفن ؟  
 زده سین ؟ ای خرابه زار وطن !  
 وطنم یوق جهانده غیری بنم ،  
 عدم آباد ! زده سین ؟ وطنم !  
 ای کج اندیش وغافل انسانلر !  
 زده قالدی بونجه خاقانلر ؟  
 سزده ادراك یوقیدر ؟ نه روا  
 پنج روزه حیات ایچون غوغا !  
 بونه انجاسی یوق تغابندر !  
 بشره شان ویرن تعاوندر .  
 سفك دم ایتمهك نه لذتی وار ؟  
 حسن آمیز شك نه هجنتی وار ؟  
 جمله نوع بشر برادر ایکن  
 بویله یكدیكریله جنك نه دن ؟

قالسوغنی عقول حیرته ؟  
 بوده می وارایمش اخونده ؟

.....

.....

یر یوزین طومش اولسه ده ظفرک  
 آخر اولمزی طوپراق آلتی یرک ؟  
 بونه دن ؟ سویله ای حکیم زمان !  
 قوجه دنیا یه صیغمیور انسان !  
 نه اولوردی جهانیان یارب !  
 اولسه یکسر بخله هم مشرب !  
 نه جدال ایسترم، نه جاه آرام،  
 دیدیکم یولده انتباه آرام !  
 بنده شمدی دکشدی حب وطن،  
 حازم موطن بقایم بن .  
 اولسون شاد خصم دلشکنم،  
 نه آنکدر بومزبله نه بنم !  
 آنک اولسون اولورسه بن کیدهیم،  
 یتیشیر چکدیکم محن کیدهیم !  
 تارک این وان دهر اولهیم،  
 بر معاد اتسز وطن بولهیم .

## مہتاب — یاخود — عالم آب

جویندہ صدر مجلس اولم  
 سہبان کی اولسہ ارتجالم  
 پرکولر ایلہ موانس اولم،  
 وحدتہ صفا بولور خیالم .

مفتونم اورندہ کیم مکمل  
 مست اولسہ دہ عارفانہ سویلر،  
 یوق اویلہ سی شمدی، وارمش اول،  
 عارف صانیلان فسانہ سویلر!

برنو سخن لطیف مشرب  
 قالسونی رفیق نکتہ دانسز؟  
 برتازہ زبان عشقی یارب!  
 اولدرده براقہ ہمزبانسز!

منطیق وحکیم برانیسک  
 هر صحبتی بر مفید حکمت!  
 مکشیر و ذمیم بر جلیسک  
 غیبوتی بر عظیم نعمت!

ساغر کبی بر ندیم وارکن  
 همدم آرایشده وارمی معنی ؟  
 بر هرزه و کیلی دیکله مکدن  
 تنها و طورش دکی اولی ؟

ای هرزه و کیلی کائناتک !

حالا هذیانہ قائم دکی ؟

جان صیقہ ایچونمیدر حیاتک ؟

الویردی ! هنوز اوصاف دکی ؟

سودا ایله واردر ایتلافی،

طبعم سویور ظلام لیلی .

چشمده شبک سواد صافی

مجنون نظرندہ زلف لیلی .

دوندرسه علی الخصوص مهتاب

سیماب جهاتنه جهانی

اولزمی کوروب کوکل صفایاب

یکپاره کومشدن آسمانی ؟

برشب که مهاجرات افکار

اولمشدی تحملمدن افزون

باقدم که هواده انجلا وار

اولدم بالکرجه خانه بیرون .

ایندم کیدہ رک کنار بحرہ  
مینا بعلمدہ، الدہ ساغر،  
ہر موجہ بیقرار بحرہ  
مہتاب اولیوردی زیور آور .

کیفیتی آب آتشینک،  
نورک صو یوزندہ اہترازی،  
نور ایجرہ نمایشی زمینک  
شاد ایلدی رند پا کبازی .

ساحلدہ ترانہ ساز اولوردی  
امواج پیایک ورودی،  
سرمستنه دلنواز اولوردی  
قانون طبیعتک سرودی .

باقدقجہ او طالعہ طالعہ نورہ  
طبعم متہالک می اولدی،  
مستغرق اولوب کوکل سرورہ  
کیتد کجہ قدح پیایی اولدی .

آرام ایدہ مم اولنجہ ہشیار،  
آرامکھم جہان مستی!  
پیوستہ یانمدہ جام سرشار،  
آنسز چکیلیری دردہستی؟



نوش میه اولیه ایتدم اقدام  
 کیم قالمدی الده اختیایم،  
 بیکانه یه دوندی عقل خود کام،  
 بی غائله قالدی جان زارم .

بیلرزدی خرد که فیض میدن  
 ساغر نه ضولرده؟ شیشه نرده؟  
 قالمشی براز شراب؟ دیر کن  
 بخود دوشه قالمشم اویرده !

اغرب متعبد خدایم !  
 محیی ایالی شرابیم .  
 شا کرد طبیعت آشنایم،  
 همواره کشاده در کتابیم .

عقل او یکانه ماهوشده،  
 فکرم طرب دمادمنده .  
 عالم ینه اسکی کشمکشده،  
 کوکلم ایسه کندی عالمنده .

هر مصطفیه سنده بر صفا وار،  
 عالم بکا بر کوزل خرابات !  
 کوکلم قدر اولمد قجه بیدار  
 کیم واقف اولور بو حاله؟ هیهات !



## دره دن تپه دن

اولمقده نکاه بیقرارم  
جوش آور طبع جذبه دارم.

که چیمه ده قارلی کوهساره،  
گاه اینمده بوزلی جو یساره.

باقمده ایکن شو قارلی طاغہ  
آهسته نکاهم ایندی باغہ.

منظورم اولان بهار کتمش،  
ازهار نظر شکار بتش.

ای عاشقی اولدیغم نهالان!  
اورا کزلی کیم ایتدی تالان؟

ای یرلی قاپلایان نباتات!  
سزدن ده نشانه یوقی؟ هیهات!

قار دوشمده ارضه پاره پاره،  
دونمکده فلک شکوفه زاره.

هر پارچه سی بر کوزل چیچکدر!  
شاعرده چیچک ائک اتکدر!

سیرایت! بوش-کوفه سماوی  
 بر معجزه بی دگلی حاوی؟  
 بلبل! نه چکدک آشیانه؟  
 طبعکده تو کندیمی ترانه؟  
 خواننده کاستان ایدک سن،  
 وجدآور عاشقان ایدک سن.  
 اول رخلری ایتدی دل تخیل،  
 کلر آره سنده قالدی بابل.  
 بن اولمه دهیم هزاره ثانی،  
 دینسون بکا بلبل خزانی!  
 ایلر بنی طور میوب زیارت  
 بیت الحزنمده یک مسرت!  
 دائم نظرمده سور و ماتم  
 همدم بکا هم سرور هم غم.  
 یارب نه غم مسرت آمیز!  
 یارب نه صفای محنت انکیز!  
 ذوق، کدرم دوامسزدر،  
 هر عالم انتظامسزدر.  
 افکارم اگرچه نظمه مائل  
 حالم دکل انتظامی قابل.

پیرانه نصیحت ایتسه لرده  
 بن زده یم؟ اختیار زده؟  
 کوکلمجه تبسم اولدی معتاد،  
 چشممده جهان تبسم آباد!  
 کوکلم کبی کائنات یکسر  
 قارشده حزن حزن کولسر!  
 حرم ده اسیری یم غرامک،  
 بن عاشقی یم بوابتسامک!  
 کل موسمی کلاستانی سودم،  
 کلدکجه خزان خزانی سودم.  
 قوتلیدر التهاب طبعم،  
 شدتلیدر انجذاب طبعم.  
 مفتونلغمی نگاه سویلر،  
 بن سویلسم ده آه سویلر!  
 طاقت کتیش هجوم عشقه  
 بکمشکل اولور کتوم عشقه.  
 دل حاصلی قالدی شوقه مجلوب،  
 شبل الاسد اولدی بیره مغلوب.  
 بیچاره اسیر خلقت اولمش،  
 سودا زده طبیعت اولمش.

بیگانه سیدر فراغ حسنک،

پروانه سیدر چراغ حسنک.

یوق کرچه کشایش ربیعی

سویلمته ده جوشش طبیعی.

طبعم کبی عندلیب، نادر،

عندنده خزان، بهار بردرا!

کیتدکجه غریب مشرب اولدم،

عالم نظرنده اغرب اولدم.

وسعتلنیور تصور اتم،

شد تلنیور تأثر اتم.

برشاعره صورمه مذهبندن،

شرم ایله علو مشربندن!

طبعمه جهان جهان معانی!

خامه مده نوای آسمانی!

اینسیدی بو نغمه آسماندن

لیک چیقاردی هر دهاندن!

مادام که بتیور حیاتم

ظن اتمه ییتر تر نجاتم.

حسکده نه رتبه وارسه دقت

اول رتبه ویرسرور ورقت.

بر یتم ایدرسه حزنی دعوت  
 بر دیگری بخش ایدر مسرت.  
 احوالی آکلامفسه مطلوب  
 کل، اول جذباته سنده مغلوب!  
 الفاظه صیفشیمور معانی،  
 دریایی آلیرمی هیچ اوانی؟



ساقزده بر خرابه ده بر سودازده



« کندی کندیته »

ای خرابه مطاف آهسین  
 مرکز حیرت نگاهسین  
 منزل آخرین ماهمسین  
 جسم جانانه مدفن اولشسین !

بر زمان جلوه گاه ایدک یاره  
 فخر ایدردک کلکله کلزاره  
 جای شادی ایدک دل زاره  
 شمدی مأوای شیون اولشسین !

« کوزلی سرر شک آلود اطرافه باقه رق »  
 جنت آباد کوردیکم یرلر  
 دودکاه جحیمدن بدتر  
 بر یانار طاغ دو کنتیسی هر یر  
 بو بر انموز ج قیامتدرا!

« خرابیه اعاده نظرله »

شو کزن کیم؟ خیالی! یاردکل  
 بر بهار اورنکی! بهار دکل  
 دیدیکم یار غمکسار دکل  
 بلکه شد تفرای حسرتدر!

« متفکرانه »

ایکیدر قبله گاه جان و تم  
 بریسی سودیکم، بری وطنم!  
 نه ایشم وار جهانده غیری بنم؟  
 سودیکم قز نهان، وطن ویران!

کوردیکم خانه لکه ویراندر  
 هپ نهانخانه شهیداندر  
 شمدی انقاض ایچنده نهاندر  
 نظرمدن صاقدیغم جانان!

« کریان »

یا نصل آغلام؟ اوکلسیم

اولدی افتاده مغاک فنا

دوشدی اطلاله قارشی کریه بکا

نه سهر روز روزکار اولدم!

« اطرافه اماله نکه ایله »

بویله مبذول ایکن وسائل مرک

متوالی ایکن قوافل مرک

بن نیچون اولدمده نائل مرک

زار زار خرابه زار اولدم؟

« بو ائنده یانه کلن رفیقنک بویننه صاریلهرق »

کور یورسین بنی ازن محنی

طایبرم مرجتشعار سنی

ملک الموتم اول، یاشاتمه بنی

قورتار الله ایچون حیاتمدن!

« رفیق کذلک کریان »

بیلیم ماجراکی، محزونم

بن ده بر بشقه درلو مجنونم

بن ده سندن زیاده دلخونم

خبرک یوقی واقعاتمدن؟



## « گریه‌سی آرتار »

صور میورسین که دادرم زرده ؟  
 پدرم زرده ؟ مادرم زرده ؟  
 همسر حور پیکرم زرده ؟

اولدیلمر پرده پوش سنک و تراب !

## « مایوسانه »

تسلیت بخش آرادی قلب حزین  
 بولدی بر عاشق خرابه کزین  
 که آرار سرعت هلاکه معین

ای اجل ای اجل ! شتاب شتاب !

## « سودازده — مشفقانه نظاره »

بنده یوقدر حیاته عائد امید  
 اولیور سندهده او حال پدید  
 ایلدم حزن و درد کی تشدید

زده دن کلدک ای رفیق شفیق ؟

« آغلار »

« رفیق — کمال یأس و کریه ابله »  
 خانه کوکلم کبی خراب اولدی  
 یاشادانلر بنی تراب اولدی  
 یاشامق اک بیوک عذاب اولدی  
 بزه اولمکدن اوزکه وارمی طریق؟

« تکرار یکدیگره صارلدقلری صروده شدتلی بر حرکت  
 وقوع بولور، خرابه ده قالمش اولان دیوارک انهدامیله آلتنده  
 قاهره وفات ایدرلر »



سرزنش



اوله جق یرده مفخر الاحرار  
 ینه ای دل اسیر عشق اولدک!  
 یوق سنک مرتبه کده جذبه شعار،  
 طویدی دنیا، شهر عشق اولدک!

بو کیدشله وخیم اولور آتی،  
 اولدی حدتفرزا شراب سکا.  
 اولدک آواره بر خراباتی،  
 یازق ای خاتمان خراب سکا!

بتسه ده باده ک ای خدایی مست!  
 سنی سرخوش طوتارتماشالار.  
 بتیورسین سن ای جال پرست!  
 نه ایچون بتیور بو سودالار؟

بنددن بنده انتقال نه دن؟  
 باری بر زلفه باغلانوب قالسه ک!  
 ای هزار ابتلا! بو حال نه دن؟  
 صاتسه لرده براز ثبات آله ک!

نه چکرسین جوانلرک غنی؟  
 کوره مزسین وفا قیامته دک.  
 چکمه نامهر بانلرک غنی،  
 شو بلاییه غیری خاتمه چک!



## دجله

—

وطنم‌دن تباعد ایتش ایدم،  
 صورمه اما نصل تباعد ایدش!  
 صکره بغداده طوغری کیتش ایدم،  
 اونودلز او عاشقانه کیدش.

اشک حسرت اثرنمای خروش،  
 سره‌وادار، سینه غم پرور،  
 دل خیال وطنده، لب خاموش،  
 ینه اما قلم نغم پرور.

بادك اول سويه اوغراد قجه ره‌هی  
 کسلیلر سطح دجله محشر موج.  
 سدره اولق ایستد کجه که‌هی  
 جنک ایدر سنکله لشکر موج.

جوشه باشلار کورنجه سیل دلم  
 لا ابالی روشلی انهاری.  
 آقار انهاره ماء میل دلم،  
 سورم سرخوشانه رفتاری!

یر کلیر، شویله بر لطیف دوزر،  
 کیده من هپ بر استقامتده .  
 هردونش عرض ایدر جهان دکر،  
 هر جهان بشقه بر لطافتده !

نه درای جوی خوش روش بوشتاب ؟  
 عجبا بصره کورفرزنده نه وار !  
 طورمه، کیت کیت که ایتدی خالق آب  
 بحری نهر روانه جای قرار .

بنده بر بشقه جوی جوشانم،  
 نیجه وادیدن ایلدم جریان،  
 فرقت بحر ایله خروشانم،  
 بنده سندن زیاده در فیضان !

فیضانک تزیاید ایتدکجه  
 طونه جوش ایلور خیالده !  
 طونه لشدک کوزمده کیتدکجه

. . . . .

. . . . .

آه ممدودم اولدی همراهک .  
 یا طبیعی دکلی آه ایدیشی  
 آتی یاد ایلین دل آگاهک ؟

عجبا هانگی عصرک آثاری؟  
 نه بو ویرانه لر سواحلمده ؟  
 اولدی نقشی خیالنه ساری،  
 قالدی بر بر یر خرابه لر دلدہ !  
 اولسه کاشانه لر کنارکده ،  
 تازه لنسه امید استقبال !  
 اولسه معموره لر جوارکده ،  
 نه کوزل آرزو! نه طاتلی خیال !



### نصیبین جوارنده بر وادی



ینه راهی بزم سوارانک  
 طوتدی دامان کوهساران،  
 هله منظورم اولدی پایانی  
 بونجه کون کزدیکم شو صحرانک!  
 وسط آسمانده مهر بهار  
 عظمتله ضیا نثار اولمش،  
 کوه ودشته اشعه بار اولمش،  
 ایلش کائناتی شعله زار!

دامن کوهه طوغری کیتدکجه  
برکندر که کوردی نورانی ،  
کلیور بانک آب جوشانی  
کوش تحسینه دقت ایتدکجه.

آقیور نور، کوردیکم دره دن  
آب واشجاری برق برق اولمش،  
زیر و بالاسی نوره غرق اولمش،  
وادی ایمن اولسون کورینن !  
بومیدر وادی شریف طوی ؟  
او نمایش کیمک تجلاسی ؟  
بوایسه زرده شمعی موساسی ؟  
یاد کلسه نه در او نور هدی ؟

یووه لرده طورر ایکن خاموش  
کله رک شوق تازه مرغانه  
باشلامش عاشقانه الحانه،  
ینه طوتمش جهانی جوش و خروش !

فرش اولتمش کنار نهره چن  
یکی چیمش شکوفه لر یریر،  
کورینور هر برنده رنگ دکر،  
ایدیور خنده روی دهره چن !

ایدیور مشق سایه اندازی  
تازه اوراق سبزی اشجارک.  
آره ده اهترازی انوارک  
ایلیور عرض نقش پردازی!

جولانیله آب خوشچر یان  
ایکی اوچ جدول ایلش پیدا،  
بولنور کاه، کاه اولور یکتا  
ایدهرک نور شمس ایله لمعان!  
صو لطافتله سیم صاف آسا  
قیادن متصل آقوب شارلار،  
صانکه زنجیر نورددر پارلار،  
اولور ارباب عشقه جذبه فزا!

ماء جاری طرف طرف چاغلر  
باد خوشبو اسر خفیف خفیف،  
چاغلادقجه صولر لطیف لطیف  
ایکی یادن صدا ویرر طاغلر!

وجدده غرق ابتدی قلب حساسی  
بو تماشاری بهارا نک.  
حسی بیدار اولنجیه انسانک  
غلیان ایلزمی سوداسی؟



کیدرم شعرخوان اولوب ایدهرک  
عکس نغمه‌مله طاغلری کویا،  
لحن داودی آکدیرر بو صدا،  
بویله وادی‌یه بر کلیم کرک!

بخودانه موافقت ایدیور  
«اوبی» امرینه هنوز جبال،  
دره آهنگیزله مالامال،  
بر حلاوتلی نغمه‌در کیدیور!

او صفاسز، صوسز بوادیدن  
کرچه کچمش ایدک مثال صبا،  
کچمکه تشنه اولسه‌ده رفقا  
کچه‌م بن قولای بو وادیدن.

صیغیور جسمه‌جان صفاسندن،  
بو نه آهنگ روح‌پروردر!  
بیلسه ذوق نه ذوق خوشتردر  
رقص ایدردی جهان صفاسندن!



## ویقتور هوغو

— ر کوچک چوجفک قبری اوزرنده محرردر —

ای سالخورده صارماشیق! ای نوجوان چن!  
 ای درلو درلو تازه نباتات موجزن!  
 ای معبد آله که اولدک خدا نما  
 فیضکله عقلی ابتدک الوهیت آشنا!  
 ای ناله زن مکس که اولورسین صدارسان  
 ازهار ایچنده اویقویه طالمش ایکن شبان!  
 بیچاره نك معارض اولورسین فراغنه،  
 سویلرسین آکلاشلیه جق سوزقولاغنه.  
 ای باد! ای قوافل امواج بیقرار  
 ای کائنات ایچنده کی اخان بیشمار!  
 اورمان! که هپ کلوب کچن ارباب اتبناه  
 بر فکر ایله ایدرسنی آرایش نکاه!  
 ای میوه لکه ولوله روزکار ایله  
 ایلر سکز سقوط یره انکسار ایله!  
 ای آسمان طرفه نمادن ایدریب شتاب  
 بر طرزدل فریب ایله ساقط اولان شهاب!

ای نو بهار شوقی ایله ایلوب ظهور  
 آفاقی درلو نغمه ایله ایکله دن طیور!  
 ای کهنه حائطك آره سندن چیقوب مدام  
 انسانده وهم و وحشتی مز داد ایدن هوام!  
 ای متصل یتشدیروب اطرافدن هوا  
 امواج بی نهایتی بی جوشان ایدن فضا!  
 ای خوشه لر یتشدی ریجی خاك فیضناك!  
 ای اینجیلر نثار ایدیجی بحر سینه چاك!

. . . . .  
 . . . . .  
 . . . . .  
 . . . . .

یا پراقلر! ای شکوفه لر آچش غصون تر!  
 دالر ایچنده قوش بیودن آشیانه لر!  
 آرتق کسك کورلتی بی طالسون خیالنه!  
 بر پارچه ترك ایدك چوجنی کندی حالنه!

راحتسز اولسون، او یوسون طفل ناتوان!  
 مادرده اشك دیده سنی ایلسون روان!

## بارنی (\*)

مرثیه

تنها، ابدی خوابگهی دلبرك ايشته!  
 کيزلنديکي مأوی او کوزللکرك ايشته!  
 ممکنمی دینلک مه تابان کبی کچدک؟  
 ای نور نظر برق شتابان کبی کچدک!  
 دنیا کورینور چشمه ظلمتکده تنک،  
 یومدردی کوزل کوززیکي مرک سهرنک.

ای شعرترم، اشکم ایله همجریان اول!  
 سینه مده کی نیران غمه رشحه فشان اول!

سوداسنه بیکلرجه اسیر ایتدیکي دللر،  
 تلطیف ایله، احسان ایله سیر ایتدیکي دللر،  
 سیر ایلدیلر قارشیدن آسوده فنانسن،  
 هیچ آلدیلر یاده نه حسنن نه عطاسن.  
 برآه بیله چکمدیلر موتی ایچون آه!  
 تا تسلیتیمچون اوله اول روح ایله همراه.

ای شعر ترم، اشکم ایله همجریان اول!  
 سینه مده کی نیران غمه رشحه فشان اول!

(\*) مرثیه کولقده تمیز ایتمش بر فرانسن شاعریدر.

عاشق‌قلری خرم ینه، یارب بونه عالم!  
 برکون ده دوام ایتدیمی ساخته ماتم؟  
 قبرک جه‌تندن اولیور منصرف ابصار،  
 کندک کی عاشق‌قلریکی صاعه وفادار!  
 هجرانک ایله بن کی فریاد ایدن اولمز،  
 فریاد نه‌در؟ نامکی ده یاد ایدن اولمز!

ای شعر ترم، اشکم ایله همجریان اول!  
 سینه‌مده کی نیران غمه رشحه فشان اول!

اما بنم اولمقده‌در آهم متصاعد،  
 اولسه‌م اولهم خواب‌که‌کدن متباعد!  
 آلامی تزید ایدیور نوری نه‌ارک،  
 احزانتی تعریف نه ممکن شب تارک!  
 مستقبلیم اشک خروشان ایله فجرک،  
 دوندردی ایکی چشمه‌یه چشمانمی هجرک!

تخفیف الم ایتدک ای شعر روانم!  
 سن طور، یور یسون دمع دمام جریانم!

## لوحه (\*)

يور يوب اوستمه حريصانه  
يار املر قو پارديلر او دمی .  
حقلي يم باشلامقده افغانه  
دو کدم بن يا ! دو کدیلر سودمی !

وار میدربویله کورك ایچنده ملک ؟  
بکسیر هر کورن او کر کدیمی !  
بردها سود دو کر میسین ؟ دیهرك  
قور قارم والدم دو کر کدیمی !  
سن کتیردك طاوقلری، هادی کیت !  
ایسته مم کله، کل خروس بکا !  
صویه طال، بشقه رده وار ذوق ایت،  
شاشقین اوردك ! بوایش دوشرمی سکا ؟

سودمی ایستك ایدرسکز همکز ؟  
کیدیکز، شمدی نرده وار یغما ؟  
بر اورشده کیدرسکز همکز،  
قاشیغم وار المده باقسه کز آ !

(\*) «مرآت عالم» ده مندرج کوچک برقیق تصویرینک لساندن سويلنمشدر  
که برالنده کی قابك ایچنده بولنان سودی دو کر، دیگر النده کی قاشیغی محافظه  
ایدر. بر طرفدن کدسی دو کیلن سودی ایچر، دیگر طرفدن اوردك،  
خروس و طاوقلر اوزرینه هجوم ایدرهك کندیسینی قور قودرلر .

زده سین آئه ! یوقی امدادك ؟  
 یسه جككر بنی بو ملعونلر !  
 اولیور هیچ نفعی فریادك،  
 اومماجی اولسون صاقن بونلر ؟  
 کلیورلر، نصل قرار ایدهیم ؟  
 قاچه جق یر آرار ایسه هم یریدر .  
 آچ که آغوشکی فرار ایدهیم،  
 چوجغك ملتجاسی مادریدر .

مانار (\*)

« بر سرخوشك كتابه سنك مزاری »

مثلی نابود بر خراباتی  
 ایلشدر بوقبری مرکز خواب .  
 متصل نوش ایدردی باده ناب،  
 بویله لکله کچردی اوقاتی .  
 حقدن ایتشدی کسب آکاهی  
 بر بیلیردی خدایی هر یرده .  
 اولور اما یاشار کک و کلرده  
 . . . . .

(\*) بر فرانسه شاعریدر .

آنی بر کون نصلسه بر نادان  
 آتیو پردی شو کوردیکک نهره .  
 ایتدی سرخوش وداعنی دهره ،  
 صو قاتلدی شرابنه اوزمان !

### آلفره دو موسه

قومشومك پرده سی

قومشومك پرده سنده لرزش وار ،  
 پكده آهسته اوینایور، آنجق  
 بن خیال ایلمکده یم که نکار  
 آچه جق روزنی، هوا آله جق .

بنی کورمکیدر مرادی عجب ؟  
 اولیور پنجره کشاده، امان !  
 یوزینی بر کوررمی یم؟ یارب !  
 دل بیتابی آلدی بر خلجان !

بونه رؤیا ! بکا او یار دکل ،  
 آنی سومکده بر ثقیل حریف .  
 پرده بی قالدیران نکار دکل ،  
 روزکار اوینادر خفیف خفیف !



## اخطار

شومنظومه لر ترجمان حقيقت غزته سيله، آفاق كې  
مجموعه لرله نشر اولنان اشعارمك بر قسميدر .

بونلري اخوان كرامدن عثمان وصادق بك افنديلر  
طويلاديلر، طبع ايتدرديلر، بومجموعه ميدانه كلدي .  
آثاري پراكنده براقماق آرزوسنده بولنه رق  
بويله براثر انسانيت كوستردكلري ايچون كنديلرندن  
متشكرم .

دها بويله برقاج مجموعه تشكيل ايده بيله جك  
آثارم واردر . زمان مساعد اولورسه ان شاء الله  
آنلرده پريشانلقدن قورتيلور .

معلم ناجي



# محاضرات

مقتطفات

نومرو ۱ برنجی جلد ۱ ربیع الاول

بسم الله الرحمن الرحيم

حمد و ثنای جناب خدا و صلاة و سلام حضرت  
رسول کبریا و اثنیہ آل و اصحاب شفیع روز جزائی ادا  
و وجیہ دعای خیر خلافت پناهی یی ایفا یدرک  
مستعیناً بالله مباشرت قلندی

فؤاد عارفی و صاف

علم

الجهل یخفض کل مرفوع الذری  
والعلم یرفع کل من لم یرفع

ارباب فضل و عرفان علمی صور متنوعه و مختلفه ده  
تعریف و بیان ایلشردر . بو تعریفاتی ذکر و اتیان برطالم

مباحث حکیمیه بی تجدید ایتکدن بشقه فائده بی موجب  
اوله مامقله برابر شو مختصر مزده ایرادی ممکن اوله میه جق  
تفصیلاتک اختیارینی استلزام ایده جکدر. زیرا تعریفی  
- له وعلیه لرنده اولان تعریفات و دلایلی، محاکات  
و مضالعاتی درج ایتکسزین - ساده جه یازمش اولسه ق  
بلکه مجموعه مزک بر جز وندن زیاده یازی یازمغه مجبور اوله جغز  
حالبوکه بویله سطحیاً در میان اولنان تعریفاندن هیچ فائده  
بوله میه جغز. بناء علیه انلری بوراده تکراردن امتناع  
ایتدیکمز کبی اقسام علومی دخی مفصلیتی جهته ایلروده  
بیانی تصمیم ایلدک. یالکمز بوراده فضائل علم و عرفاندن  
بحی التزام ایدیورز. اوت فضائل علیه، محسنات فیه  
هر زمانده، هر یرده معلومدر؛ اما آنلری کلمات جلیله  
و محاکات جلیله ایله اخطار فوائد متعدده بی موجب  
اوله جغی بدیهی و آشکاردر. البته تکرار خیر احسن  
اولدیغی وارسته ایضاح و تذکاردر. او یله ایسه مقصده  
شروع ایده لم:

علم، فخر کائنات علیه افضل التحیات افندمزک «علمی  
تحصیل و تعلم ایدیکز زیر اجناب عالم حقیقی آنی او کر نمی  
محض حسنات و طلبنی عین عبادات و مدارس سنی تسبیح  
و مباحثه سنی جهاد و تعلیم و تلقینی صدقات و اهلنه بذل

و صرفنی مدار تقربات عدایلمشدر» مدح جلیلننه مظهر اوله رق « علما ايله مذاکره جهلا ایچون هدایتی ایجاب ایدر» و « علما ايله هم مجلس وهم مشورت اولیکز و کلام حکمایی استماع ايله تشریف صماخ ایلکز زیرا جناب حق قلوب میتهدی نور حکمتله احیا ایدر نصلکه ارض میتهدی ماء مطرله سقی ایلر» توصیفات نبویه سیله تبجیل بیورلمشدر. بونلردن بشقه مدایح علم و عرفانی احتوا ایدن نیجه نیجه احادیث نبویه موجود اولوب از جمله « عالمه اکرام ایدن بکا اکرام و بنی تکریم ایدن جناب حق تکریم ایتش اولور» و « علم و ظلم بلاد و مداینده، نعمت و جهل ایسه قراده متحصلدر؛ برکت علم نعمتی مداین و بلادده و شوم جهل ظلمی قرایه جلب و جذب ایدر» و « ایمان عریان اولوب لباسی تقوی، زینتی حیاء و ثمره سی ایسه علمدر» کبی احادیث جلیله فضائل علومی تبیین ایلمشدر. باخصوص حضرت افصح العرب صلی الله علیه وسلمک شو حدیث جلیلی دخی فضل و علمک مزیاتنی ایضاح ایلدکن بشقه امت ناجیه ایچون رهنمای سلامت اوله حق نصایحی شاملدر یعنی « افضل اعمال اوچدر برنجیسی طلب علم، ایکنجیسی جهاد فی سبیل الله، اوچنجیسی عیال ایچون کسب مال حلالدر؛ زیرا طالب علم حبیب الله، غازی ایسه ولی

الله، عیالی ایچون کسبه چالیشانلر صدیق الیهدر» حکم جلیلی  
 جمله مز ایچون رهبر سعادت وانمودج فیض وسلامت  
 عد واتخاذینه شایاندر. بویولده دها چوق اقوال مستحسنه  
 ونصایح جمیله موجود اولوب بز آنلردن بر قسمنی مجموعه مزك  
 هر نسخه سنده مقتطفات منظومه و منشوره میاننده  
 بولندیره جعز؛ آنلردن بشقه اوله رق علمه اختصاص ایدنلری  
 دخی ایشته بویله طو پلیمه عرض و بیان قصدنده  
 بولنیورز. ان شالله کله جك نسخه لرده ینه بویله مقاله لر  
 منظور قارئین هدایت قرین اوله جقدر.



— ❧ — مقتطفات منشوره ❧ —

امام قشیری (اسماء الحسنی) شرحنک اسم رازق بخشنده  
 شویله دیور:

مشاهیر واصلیندن جناب شبلی رحمة الله علیه زمانی  
 اغنیاسندن برینه کندیزی ایچون براز دنیالق کوندرمسنی  
 تحریراً بیلدیرمسی اوزرینه «مولا کدن طلب ایله» جوابنی  
 الدقه «دنیا حقیردر، سنده حقیرسک؛ بن حقیری حقیردن طلب  
 ایدرم؛ مولا مدن مولا مک غیرسنی دیله مم» دیه مقابله ایتشد.



## کتاب الشفاده شویله یازلمشدر

جعفر الخلدی ابو عبدالله دن نقلا دیر که بر کون بر آدم  
 حضور حسن بصری به کلوب قیزینک کیجه کوندوز  
 اغلامقندن خالی قلمدیغنی وحتی بوندن طولایی کوزلی کور  
 اولدیغنی بیان ایتسی اوزرینه فاضل مشارالیه قیزک نزدینه  
 غزیمتله «ای قیز! اغلایه رق کوزلی یکی نه ایچون کورایتدک!»  
 دید که «ایکی سبیدن خالی دکلدر: شو کوزلر جناب رب  
 عزتی یارؤیت ایدر یا ایتز؛ اکر ایدرایسه بونلر کی بیکلرجه  
 کوزلر رؤیه الله ایچون فدا اولسون! اکر بوسعاده  
 مستحق دکلسه الله کندینی رؤیه مستحق اولیان کوزلی  
 کور ایتسون!» جوابی النجه «ناصر وطیب اوله رق  
 کلدیکم حالده ناصر وطیبی بولدم» دیمشدر.

حسن بن علی رضی الله عنهما نکلچنه شونلر محکوک  
 ومکتوب ایش :

الرزق مقسوم، والحریص محروم، والخیل مذموم،  
 والحاسد مغموم .

موسیٰ علیہ السلام « بن غریب و مریض و فقیرم »  
 دمسیلہ جناب قادر مطلق « یاموسی ! مریض بنم کی  
 طبیبی، فقیر بنم کی مجیبی، غریب بنم کی مونس و حبیبی  
 اولیٰاندر » بیورمشدر .



یوسف علیہ السلام داخلندہ بولندیغی محبسک قاپوسنہ  
 شودرت کلمہ بی یازمشدر :

منازل البلوی(\*) {قبورالاحیاء، شماتۃالاعداء، تجربۃ

الاصدقاء



حضرت علی کرم اللہ وجہہ



« ظالم ایچون اوچ علامت واردر : مادونندہ کنی غلبہ،  
 مافوقندہ کنی حیلہ و مفسدت ایلہ دوچار مصائب ایلر؛  
 ظلمہ یہ معین و مظاهر اولور » دیمشدر .



(\*) بانک قحیلہ ( بلوی ) و ( بلو ) بانک کسریلہ ( بلوۃ ) بلا،

زحمت، تجربہ، و امتحان دیمکدر .


## مأمون دیمش

« اخوان اوچ درلودر . بری غدا کبیدر، کندندن  
استغنا ممکن اولمز؛ بری دوا کبیدر، ارده محتاج اولنور؛  
بریده سم کبیدر، کندیسنه محتاج اولق شویله طورسون  
اجتناب لایقدر . »



## بعض حکما دخی شویله دیمش

« نوع بشر اوچ قسمه تقسیم اولنه بیلبر . برنجیسی غدا  
مقوله سیدر، انلرسز یاشامق ممکن اولمز، ایکنجیسی کیف  
وتریاق منزله سنده در، ازقه مخصوصه ومواطن متعدده  
احتیاج کورولور؛ اوچنجیسی مرض و علت مقامنده در .  
بونلردن تباعد موجب راحت ومفارقت باعث صحتدر،  
شاید القلرینه ابتلا حاصل اولورسه علاج مدارا ایله دفع  
لازمدر . »




## ادینی یلیورز حکمادن بری سویلش


« ادمک علمیله غروری جهالت ، عقلیله غروری




حاجت، ماليله غرورى سفاهت، طاعتيله غرورى عصيان،  
جاهيله غرورى طغيان، حسنيله غرورى نقصاندر . »



قادينلر خيمه نشين قبائل عنمدنده ذبح ايجون آماده  
ايدلش قويون، اهالى بلاد شرق عنمدنده امتعه ييت،  
فرنكلر نژندنه اناسنه باباسنه نازلانوبده اذا وجفا وايدن  
صبيان كيدرلر .



هرشيئي طلب وارزو بياغى جنت، اعتدال ايسه حقيقه  
بركنز كال وفضيلتدر . »



﴿ مقتطفات منظومه ﴾

—

ابن راوندینک :

سبحان من وضع الاشياء موضعها  
وفرق العز والاذلال تفریقا  
کم عاقل عاقل اعیت مذاهبه  
وجاهل جاهل تلقاه مرزوقا

هذا الذي ترك الاوهام حائرة  
وصير العالم النحرير زنديقا



بوکا جوابا دنیلمش : (\*)

کم من ادیب فهم قلبه  
مستکمل العقل مقل العدم  
ومن جهول مکثر ماله  
ذلک تقدیر العزیز العلیم

شوده کتاب الشفاده مندرجدر وابن راوندینک سوزینه  
حقیقه برجواب حکیمانهدر :

اعجب من ربی وربی حکیم  
قد حرم العاقل فضل النعم  
ما ظلم الباری ولیکنه  
اراد ان یظهر عجز الحکیم



(\*) بوبیت فخرالدین رازی حضر تلتینک ایش .

شویت ابوالسعود افندی مرحومه ایراد اولمش

محض ثقتله ثقلت محضك  
 لطف ایدوب فرقنی بیان ایلهك  
 مشار الیه حضرتلریده بویله جواب ویرمش :  
 محض ثقتله ثقلت محضك  
 فرقنی یلماك جهالتدر  
 یلچك ینه اتمك استفسار  
 خفت محض محض خفتدر



جناب عرفی شو مربعی حالت نزعده سویلش  
 ای مرك مرا زیار شرمنده مكن  
 نومیدم ازان کوهر ارزنده مكن  
 یار آید و جان رود خدایا نفسی  
 مهلت ده در قیامت زنده مكن



سلطان سلجوقی آلب ارسلانک وزیر شهری نظام الملک  
طوسی نک بغدادده انشایتدیردیکی مدرسه نظامیه ده خیلی  
مدت تدریس علوم ایش و سلاجقه اعصاری علماسنک  
برنجیلرندن بولمقله شهرت المش اولان ابواسحاق ابراهیم  
ابن علی فیروز آبادی سویلشدر:

سئلت الناس عن خل وفي  
فقالوا ما الى هذا سبيل  
تمسك ان ظفرت بود حر  
فان الحر في الدنيا قليل

حقیقت دنیاده محب و فاشعار بولمق نه مشکدر! هله  
زمانمزمده بایکه مستحیلدر دیر ايسهك وجداناً اولسون مؤاخذه  
ایدلیز صانیرز. البت جناب متنبینك:

ما اخل الامن اود بقلب  
واری بطرف لایری بسوانه  
یتیله تعریف ایتدیکی دوستلق یوق کیدر.



عبد الله ابن عباس رضی الله عنهما بیورمشدر؛

اذا کثر الطعام فحذرونی

فان القلب یفسده الطعام

اذا کثر المنام فنبهونی

فان العمر ینقصه المنام

اذا کثر الکلام فسکتونی

فان الدین یمهدمه الکلام

اذا کثر المشیب فحزونی

فان الشیب یتبعه الحمام

یعنی: یمکی چوق یرایسه بنی منع ایذیکز؛

زیرا چوق یمک قلبی افساد ایدر؛

چوق او یورسه او یاندیر یکز؛

زیرا چوق او یقو غمری تنقیص ایلر.

چوق سویلر ایسه صوصدیر یکز؛

زیرا کثرت کلام مدار انهدام دیندر.

چوق اختیارلر ایسه تحریک وایقاظ ایذیکز؛

زیرا اختیارلقده اولوم یقیندر.




بر جاريه نك صاچني تراش ايدوب فاتحك و زراسندن  
واخص ندماسندن عاشق احمد پاشايه شربت  
ويرديرلر؛ پاشا جاريه يي او حالده كورنجه يت آتي يي  
بالبداهه سويلر :

زلفن كيدر مش اول صنم كافر لکن قويمز هنوز  
زناريني كشمش ولي داخی مسلمان اولماش



بوده مشاراليه احمد پاشانكدر :

مشكل بودر كه هر كيمه بن حالم اغلاسه م  
عشقك يولنده اول دخي بندين بتر چيقار  
احمد عجب مي جنت كويكدن اولسه دور  
بيلمزلك ايله آدم النندن نه لر چيقار



محيانك :


اوشه حسن ايدر سينه مه كولمكدن عار  
خبري يوق كه انك جانم ايچنده يري وار



طالب مرحوم کدر :

هر باده که سنسز ایچرم بزم بلاده

خوناب اولور البته چیقار دیده لرم دن



اشارة الكلب

من كتاب كشف الاسرار عن حكم الطيور والاذهار

مترجدر (\*)

قابونك او كنده طوروب پنجره دن آتیلان شیلری

(\*) شو مقلمه وقتيله شمروخ نامنده بر مجموعه ده درج ایدلمشیدی بو جهته شمدی تکرار بورایه درجی عبث کی کورنیور فقط دکلدر زیر بو بر مقاله در که کرچکدن ناصحانه کرچکدن حکیمانه یازلدیغی برنجی نشرنده دخی پک چوق ذوات کرام طرفندن اعتراف بیورلمش و عربلرله غریبلرلرک شو یولده اولان آناری بیننده کی فرق کلی بی ارانه و حق رجحانک عربلرده قالدیغی اثبات ایدلمدی تصدیق ایدلمشیدی او یله اولنجه بو قدر اهمیتلی بر اړک ایکی دفعه نشری دکل دهها زیاده نشری بیله عبث اولمز . بر ده بز بونک صاحبی طرفندن یازلمش دیگر بعض آثار مقبوله بی دخی ترجمه و مجموعه مزه درجی تصمیم ایلش اولدیغی مژدن هپسنی بر مجموعه ده بولندیر مغه مجبور اولدق و بناء علیه تکرار نشرینی عبث اولسه بیله طبیعی کوردک .

طوبلا مقده اولان برکلبك اولك ايچنده بولنان ذاته خطايدر:  
 اي اوده مصطبه نشين استراحت، اي اسبابه تشبثده  
 بي قدرت، اي تحف لباسلرله پريزنت اولان كشي! بنده كي  
 آداب ايله نأدب ايت زيرافعل جميل هروقت بنم معتادمدر.  
 نفسكي بنم اخلاق ومشرمله اصلاح ايله! كندى  
 فراستمن وسنك اوزرينه اولان حسمدن سكا سويليه جكلريمى  
 ديكله!

بن صورتده حقيرم؛ سن بنى معنا دخى فقير كوررسك .  
 اوت بن افنديلريمك قپوسنده طورر بر فقيرم اما افنديلكه  
 خواهش ورغبتم هيچ يوقدر . عادتدن دونم . اونلردن  
 مطالباتجه قطع اميد ايتيم . قوغوليرم كيدرم ينه عودت  
 ايدرم طارلام . حب وودادده، عهد وميثاقده ابراز ثبات  
 ومثانت ايلرم . هر كس اويوركن قالقار اونلري حفظ  
 وصيانت ايدرم . مال معدودم، سماء ممدودم، رباط معهودم،  
 مقام محودم يوقدر . ويررسهك شكور، ويرمزهك صبور  
 اولورم . خسته نلورسه مداواة ايسته م . اولورسه م  
 تابوتله طاشنم؛ غائب اولسه م كسه عودتمى تمنى ايتز؛  
 اولسه م چوجقلم اغلامز . يوله چيقسه م يوللق طاشيام .  
 نه مالم واردركه حق وراثتى بولنسون . نه ترلالم واردركه



حراثت اولنسون . غائب اولديغم وقت بكا اغلام رقلری  
کبی بولنديغم وقتده کسه یوزیمه باقر .

اشته بو حاللرله برابر ینه بن عالمک اطرافنی جایه دن  
واونلر حقنده کی وفای ادا مه دن کری طورم ؛ مزبله لرنده  
اعتکافه قناعت ایدرم .

امدی اطوار وعاداتمی بکنندک ايسه بو یوله تمسک  
ایت ! مسلکمی طوت ! اخلاقله متخلق اول ! حفظ  
محبتی بدن اوکرن ! احوالکی بنم احوالمه ، اطواریکی بنم  
اطواریمه اویدیره رق علویته تمسک ایت ! بن قدر حقیر  
برکلبم ؛ لکن غل وغشدن آزاده برقلب صاحبیم .

جوارمه بولنان قومشولری محافظه ده ثابت قدم .  
کیجه لریده آنلری جایه عادتدر . بنی هر عسرویسرده  
هر حاله شا کر وصابر کوررسین . آچلقدن اولسه م ، مصائب  
کونا کون ایچنده ایکلیوب قالسه م ینه کسه قولاق آصمز .

جناب حق بنم کسه دن شکایتیم اولمديغنی بیلیر زیرا  
امورمه کنديسنه توکل ایدرم . عرضمی صیانت ایچون  
هر حقارته تحمل کوستیرم . رزالت سؤال دن دخی قاچارم .



# محاضرات

مقتطفات

نومرو ۲ برنجی جلد ۱۵ ربیع الاول

شام شریف افاضل علماسندن منیر زاده شیخ  
صالح افندی طرفندن سویلنیلان

تقریضدر

قداطلعت علی هذه الفریدة السنیة \* المجلدة البدیعة  
البیہ \* المسماة (محاضرات ومقتطفات) فوجدتها بماتقربه  
الاعین زاهیة زاهره \* و بماتشیه الانفس باهیة باهره \* رقت  
ورقت \* و علی اقرانها فاقت \* فقلت :

انظروا هذی الزوايا الفاخره  
قدغدت فیها الخبايا ظاهره  
جمعت من کل معنا باهره  
فاغنموا مما استهیتم زاهره  
فلقد انشدکم تاریخها  
انها مقتطفات باهره

۱۳۰۰



علم

شرف بالعلم راتب      شرف یسمو المراتب  
لا تمل للجهل اصلا      فهو داع للشالب

علم که حائز و صاحب لری ( عالم لره عالم اولیانلر مساوی اولور لرمی ) مفاد نص جلیلی ایله ممدو حدر لر انسانک نفس و خلقنده انیس و رفیق و حالت یأس و خرماننده دلیل و معین صدیقیدر . علم ایله عبد حر منزله سنه ، احرار ابرار مرتبه سنه ایرر . خبرده وارد اولمشدر که ناسک درجه نبوته اقرب اهل علم و پرده اهل جهاددر . کشف مرحوم ابن عباس رضی الله عنهم اذن نقل بیان ایلر که حضرت سلیمان علیه السلام علم و مال و حکومت بیننده مخیر براغلدیغی حالدله علمی ترجیح و قبول ایتمسایله مال و حکومتله دخی تبجیل بیورلمشدر . علم خیر المواهب جهل ایسه شر المصائبدر . علماء کرامک رکن دنیا اولدقلری احادیث نبویه ایله ثابتدر . علمک امام انعم اولدیغی اشرف انبیا علیه افضل الصلوة و التحایا افندمز بیان بیورمشدر . حضرت داود علیه السلامه دمیردن نعلین کیه رک دمیردن عصایه طیانهرق تحصیل علوم ایچون تا اونعلین و عصایار یلوب قیریلنجیه قدر طولاشمق امر بیورلمشدر . باخصوص بزلر که امت محمددن اولقله شرفیابز علمی چینه اولسه تحرییه مأمورز . بزه تحصیل علوم و معارف هر وقت ، هر زمان فرضدر . امام علی رضی الله عنهمک شو قطعده سی :

العلم زین للفتی      والعقل طوق من ذهب  
والصدق نور واضح      والكذب نار من لهب

وامام شافعی رحمۃ اللہ علیہ شویبتی :

حیات القلب علم فاغتمه وموت القلب جهل فاجتنبه

برشاعر ماهرک :

العلم ماء قد جرت والوقت سيف قاطع  
ان لم يقلد بالعمل فالعلم در ضایع

کلام حکیمانہ سی فضائل علم و عرفانہ دال، انی  
تخصیک الزمیتی مشعر، وعلک عمل ایلہ تقیید و تشییدینی ناصح درلر .  
( معارف و تقوانک اوج علای فضل و کمالہ ترفیع و اعلا ایلدیی  
کامل متقی هیچ بروقت تأثیر فقر و بیکیسی ایلہ حسیض اسفل حقارت  
و ذلتہ هبوط و سقوط ایتمز . فستق و فجورک، جهل و نادانینک قعر دنائت  
و مذلتہ القا ایلدیی بدبخت ایسه ثروت بی انتها و یاعزت اقارب  
و احبا ایلہ هیچ بروقت درجہ علیای شرف و حرمتہ عروج و صعود  
ایلز . چونکہ : علوم و معارف احوال انسانی اصلاح خصوصندہ  
برپدر، فسادینی صلاحہ تبدیل امرندہ بلکه دہہ پدردن دہا مقدم،  
دہا غیور، دہا شدید الاثر در؛ چونکہ : دیانت و تقوی نفع حسبیلہ  
شفقتی بر مادر، بلکه دہہ مشتاق و منقادینی اغوش مرحمت و مروندہ  
حفظ و صیانتہ مادردن دہا زیادہ خواہش کردر . اشته شو فضائل  
عالیہی، شو محسنات جلیلہی، پیش نظر دقت و اہمیہ آلودہ  
معارف و تقوادہ کسب کالاتہ چالیشمالی و لذایذ علم و عرفان ایلہ  
شیرین مذاق اولی و مکارم اخلاق ایلہ اتصاف ایتمی؛ تاکہ جناب رب  
رحیم نعم خیریه ورفاہ و راحت کاملہ احسان پیورسون ) .



## مقتطفات مشوره

امام جعفر صادق حضرتلری شوبش صنف کسان ایله  
اختلاط اصلا جائز اوله من ديه رك انلرله الفتى منع بيور مشلردر :  
كذاب خانه خراب، احق خيره سر، بخيل مستحق  
التذليل، بدخوى تيره دل، فاسق بى حاصل .



سيد الطائفه حضرت جنيد « فاسق نيكوخوى ایله  
صحبتى عالم بدخلق ایله الفتى ترجيح ايدرم » بيور مشلردر .



امام اعظم حضرتلری برکون شاگردانيله برابر قيره  
کيتمشلردی ؛ برادنده اونلرله برلکده بولنش وطنبورینی  
برابر المشدی . شاگردان طنبورى قيرمق لزومى درميان  
ايلديلر ؛ بونك اوزرينه استاد افخمليله شويله بر مکالمه  
وقوع بولدى :

امام — نه ايچون قيراجقسکز ؟

طلبه — آلت فساد درده اندن ايچون .

امام — سزك هيپكزده بررالت فساد واردر او نلريده كسك .

طلبه — يا امام اونلردن هم صلاح همده فساد حاصل

اولور .

امام — اویله ایسه طنبورک تئکنه سیده آلت صلاح  
اوله بیایر.

بونک اوزرینه امام اعظم حضرتلری امر بیوروب  
طنبورک یالکز تلارینی قوپارتدیردی تئکنه وچوینی  
قیردیرمدی.



حکما اهل کرمی درخت بارداره وسائری هیزم  
کوهساره تشبیه ایتشلردر؛ چونکه اهل کرمدن هرکس  
منتفع اولور.



افلاطون دیمش :  
خلق اوچ قسمدر . بری اعالیدر ، حجت والزام ایله  
ضبط اولنور؛ بری اواسطدر ، اکثر امورده ترغیب  
واستمالته استخدام ایدیلور؛ بریده اسافلدر، ترهیب وتهدید  
ایله ضبطی ممکن اولور . بو اوچ قسمة متساویاً عنف  
مجرد ایله حکومت مشکلدر .



— هلك المتسوفون (\*) —

(\*) معلومدرکه متسوف تسوفدندر تسوف ایسه تأخر دیمکدر.

مهمات کلیه نك تأخیرنده نیجه مخافات ، بوکونکی ایشی  
یارینه براقعه هزار آفات واردر .



شهرت ذاتیهی منافع عمومیه ترک وفدا صفات  
مدوحه و مقبوله دندر .



ارسطو دیمش :

خیر ، فضیلت هیچ بروقت صاحبی محو و خراب ایتز ؛  
عدالت هیچ بر اداره ایچون سم هلاک و مصیبت اوله مز .



اطبادن مرضی ، احبادن ضرری کتم ایدن نفسنه  
خیانت ایتش اولور .



مروت جمیع محاسنی جامع براسمدر .



حکما دیرکه محبت عدالتدن افضلدر ، زیرا وحدت  
طبیعی به مشابه و مشکالدر ؛ عدالت ایسه وحدت صنایعی به  
مائلدر . هیهات که طبیعی صنایعی کبی اوله !.



نفس حسیس و شخص خبیثه مروت ایتک دامنده خار  
و کر بیانده مار بسملک کیدر .



شو بش شیدن فائده میسر دکدر :

قول بی عمل ، مال بی خرد ، علم بی صلاح ، صدقه  
بی نیت ، زندگانی بی صحت .



عفو ایوری اصلاح ایتدیکی درجه ده کوتوری  
افساد ایدر .



عابد ادای فرائضه مداومت قیلان ، زاهد قسمت  
الهییه راضی اولان در .



احبادن برینه شخص بیگانه دن جفا و اهانت  
صدورنده سکوت ایله معامله ایدیلوب مدافعه و مقابله  
تصدی اولنمرسه دعوای محبت لغو محض اولور .




الفت و صحبت مراد اولنان کسه ده شواوچ فضیلت  
بولملیدر :

عقل وهوشمندی ، نیک خوئی وحسن شیم ، دیانت  
وتقوی وصلاح .



مجموع بنی آدم بر یردن عزم سفر ایلش بر نیجه یاروهمدم  
منظره سنده در .






مدنیت هیچ بروقت تولید مضرت ایلر چونکه عارضی  
 دکل طبیعیدر، زیرا انسانلر مجتمعاً و مختلطاً یاشامق  
 وتمدناه عمر سورمک ایچون خلق ایدلمشدر . مدنیتده  
 بعض احوال غیر لایقه و قواعد غیر مفیده کورو یور  
 ایسهک بونلری اوندن متولد صائمق خطاسنده بولنمیهلم .  
 فنالغک منبعی مدنیتده دکل بزده، هوا و هوسمزده، دهها  
 طوغری هوا و هوسمزی سوء اداره مزده در .



بقراطدن انسانیت نه در دیه صورمشلر؛ اوده شویله  
 جواب و یرمش :

« زمان اقبال و دولتده تواضع، یوقسوللق ایله برابر  
 سخا، منتسز عطادر . »



عقل انسان ایچون وزیر رشید، ظهیر سعیددر؛  
 اکا اطاعت ایدن فلاح و نجات بولور، عصیان ایدن ایسه  
 محو و خراب اولور .




حکمای قدیمه دن بری دیمش :

« انسان ! نه دن شکایت ایدیورسک ؟ مدت العمر  
 دوام ایدن نزاع و جدالدمی ؟ او یله ایسه ایتمه ؛ زیرا

شو جهان فانیده شرط غلبه و ظفر بودر . یوقسه ظلم  
وغدر دمی؟ اگر اوندن ایسه ینه اینه؛ زیرا عالم بقاده  
یاشامق سعادته نائل اولمق ایچون شو محنت خانه فناده  
اکمال انفاس معدوده په چالیشانلره ظلم واعتسافک نه تأثیری،  
نه حکمی اوله بیلیر؟! یوقسه اولومدن می شکایتک وار؟!  
صاقین، صاقین! او مخلص معنوی اولان اولومدن  
شکایتده بولنمه، بولنمه که سنیده، بنیده، جله ییده شو مضیق  
سفالتدن، شو تنکنای جهالتدن خلاص ایده جک  
او اولومدر؛ اوت یالکز اولومدر .



عصمت، سید شریف قولنجه «عندنده معاصی به اقتدار وار  
ایکن اجتناب ایلک ملکه سندن عبارتدر» جلال دوانی قولنجه  
«حق تعالی عبادده ذنب و عصیان خلق ایلامکدر» فلاسفه  
اعتقادنجه «فجوره مانع ملکه ملکیه در» .



### مقطعات منظومه

شاعر الوزرا، وزیر الشعرا ابوالفتح البستی مرحومک  
اثار برکزیده سندن اولان (قصیده الحکم والامثال) در:  
زیادة المرء فی دنیاہ نقصان و ربحه غیر محض الخیر خسران  
وکل وجدان حظ لا یثبات له فان معناه فی التحقيق فقدان

یا عمر! الخراب الدھر مجتهدا      بالله هل لخراب انعم عمران  
و یا حریصاً علی الاموال یجمعها      انسیت ان سرور المال احزان  
دع الفؤاد عن الدنیا و زینتها      فصفوها کدر والوصل هجران  
و أرفع سمعک امثالاً افصلها      کما یفصل یاقوت و مرجان(\*)

انسانک دنیا جہ تزیاد ایام و زمانی نقصان، محض  
خیردن غیر ی قازانجی خسراندر . دوام و ثباتی اولیان  
حظ و نصیب، صورتده موجود و حرزجان ساده دلان،  
اما حقیقتده مفقود و منفور عاقلاندر .

ای شو خرابه دهری اعمار جهد و اهتمام، سعی  
واقدام ایدن بوالهوس ! الله ایچون سویله خراب عمر  
ایچون امکان عمران وارمیدر ؟

ای جمع اموال و ادخار نقوده حریص اولان آدم !  
مسار اموال محض ا کدار و احزان دکلیدر ؟

شو جهان دون، انده کی تزیینات کونا کون سنی  
فریفته و مقنون ایتسون؛ واقعا انلردن افتراق و محرومیت  
مورث کدر و خرمان کورونور، اما حقیقتده انلره وصال  
و نائلیت موجب الم و هجراندر .

اوله ایسه یاقوت و مرجان کی اثار و تفصیل ایده حکم

(\*) مابعدی دیگر نسخه ده در وادیب مشار الیهک سائر بعض

اتار مقبوله سنک دخی مجموعه مزه درجی مقرر در .

حکم وامثالی جان قولاغیله دیکله ! « زیرا بونلرک هر بری  
 حرزجان ایدلمکه سزا برر الماسپاره بی بهادرلر . »



محمود ابن الشیخ فخرالدین قدس سره : (\*)

لنقل الصخر من قلل الجبال احب الى من من الرجال  
 يقول الناس کسب فيه عار فقلت العار في ذل السؤال  
 « بنجه طاغ باشلرندن قوجه قوجه طاشلری طاشیق  
 خلقه منت ایتکدن ایودر . خلق بویله قازانجی تعیب  
 ایدرلرسه اصل عیب ذل سؤالی ارتکابدر جوانی ویریرم . »



عرب که خلیفه عباسی مأمون مشهورک جاریه  
 ومحبوبه سیدر مشار الیه خطاباً شویله سویلش : (\*)

وانتم اناس فیکم الغدر شیمه  
 لکم اوجه شتی والسنة عشر  
 عجبت لقلبی کیف یصبو الیکم  
 علی عظم ما یلقی ولیس له صبر

(\*) بعض نسخه لرده ده بویت حضرت علی کرم الله وجهه نکدر

دینلشدر .

(\*) بو وام النهارک بیت زهنی افندیکن ( مشاهیر النساء ) نام

اثر معتبرلرندن مقتطفدر .

(آه ارککلر ! غدرو جفاسزه خوی اولمش ! برچوق  
یوزیکز، اون درلو دیلکز وار! کوکله تعجب ایدی سورم که  
بونجه آلام واذایا ایله برابر ینه سزه فصل میل ایدیور.)



ام النهاء نامنده اندلسی بر شاعره ماهره نکدر:

یا عین صار الدمع عندك عادة!

تبکین فی فرح و فی احزان!

(ای کوز! اغلامغی عادت ایدنمشک! اوان فرح  
وانبساطدهده اشکر یزان، زمان احزان و آلامدهده کریان  
اولیورسک!.)



ایا ابن آدم لایفرک عافیه


علیک شامله فالعمر معدود

مائات الا کزرع عند خضرته

بکل شیء من الآفات مقصود

فان سلمت من الآفات اجمعها  
فانت عند كمال الامر محصود

ای ابن آدم! دوام کمال عافیته مغرور اوله؛ زیرا  
انفاس حیات معدود، مدت عمر محدوددر. سن اول  
مزروعات کبیسک که یشیل ایکن بیک درلو آفات  
ومہالکہ اوغرامسی ملحوظدر؛ او آفات ومہالکک  
هپسندن قورتلش اولسهک بیلہ نہایت برکون اولور کالہ  
ایرر، حصاد ایدیلورسک.




صائبک :

« آہ اگر مستی نمودی هر حرامی چون شراب »  
« آن زمان معلوم کرد در جهان هشیار کیست »



منشدینی بیلورز :

« آنکہ شیرانرا کند روبہ مزاج »  
« احتیاجست احتیاجست احتیاج »



« ای برادر برکریز از یاربد \* یاربد بد تر بود از ماربد »

« مار بد تنها ترا بر جان زند \* یار بد بر جان وهم ایمان زند »



اشهر العشاق سید نسیمی :

« زاهدك بر پار ماغك كسكك دوزر حقن قلچار »

« کور بومسکین عاشقی سرو پا صویار لر اغلامز »



چغال زاده رستم پاشا حقنده سویلنمشدر :

اولیجق بر کشینك بختی قوی طالعی یار

کلهه سی داخی محنده انك ایشه یارار



آغوش خیالنده ایکن مسکنی هرشب

کورد کجه فهمی ینه بیکانه لك ایلر



نه سیم وزر نه بیم صرف نه ده اندیشه امساك

باقلسه دیده امعان ایله راحتده مفلسلر



« آه دیرسهم بيله آه ایتکه باشلار کوهسار »  
 « آه دیر آه ایشیدر کوه بلاده دل زار »



### اشاره الجمل

« من کتاب کشف الاسرار عن حکم الطیور والازهار »  
 مترجدر

بر دوده شو یولده خطاب ایتدی :  
 ای طریق فیض و رفعتی سلوکه راغب اولان مکسه !  
 فقر و تواضعی کلبدن او کرندیکک کی صبر و متانتی ده بندن  
 او کرک ! زیرا بالین فقره باش قویانلر ایچون متین و صابر  
 اولق کر کدر؛ متین و صابر بین الاکابر هر وقت مقبول  
 و بنام و مشار بالبناندر .

بر کره بکاباق ! نه قدر آغیریوک یوکلنیر، نه قدر چوق  
 مراحل قطع ایدر، بیک درلو زجتره تحمل ایلر، هر کونه  
 مزاجه قاتلانیرم؛ ینه هیچ اوصانام، هیچ بیقمام؛ هیچ  
 مأیوس و ملول اولمام .

« احواله عطف نظر امعان ایله ! ایسته دیکم وقت



الك جسور آدملره بيله قارشى قويمغه مقتدر ايكن براوفاق  
 چوجوغه دخى يون اكرم؛ اويله رزيلانه شوکا بوکا  
 صالديرمام؛ يوكى طاشمقله مثلنذ اولورم؛ اصلا خيانت  
 ايتم؛ هراوکه کلانه، هر يتشديکم شيئه طوقنام؛ ايشي  
 يتيردکن صکره صاحبم يولاريمى اوزريمه آتار، بنده  
 قيرلره چيقار ککش ککش اوتلارم؛ سوروجيک سنى  
 ايشمديکم کي يانه ياقلاشير، يولاريمى تسليم ايدرم امرلرني  
 انفاذ ايچون بويى اوزاتيرم؛ يوليمى بيلز وياولدن چيقار  
 ايسهم کندينه انقيادم اولان آدم يولاريمى طوتار، يوليمى  
 کوستر، بنده اکا اصلا مخالفت ايتيه رک اطاعت ايلرم؛  
 آجيقير وياصوصار ايسهم صاحبه خبر ويرم ازه قناعت  
 ايدرم . »

« حاصلی بن سزک اک کوچک بر اشارتکزه بيله مسخرم؛  
 يوکلريکزی يوکلترسکز، قونه کوچه منزل مقصوده قدر  
 کيدرز . »



## محاضرات

مقطعات

نومرو ۳ برنجی جلد ۱ ربیع الآخر

### اسلامیتده

( امر سعی . نبی بطانت )

ان الله یکره العبد البطل

واقف حقائق دنیویہ و اخرویہ اولان جناب رسالت  
پناه صلی الله تعالی علیه وسلم افندمرك سرنامہ مقال  
اتخاذ ایلدی کمز حدیث جلیلی و (اشقی الاشقیاء من اجتمع  
علیه فقر الدنيا والاخرة) بیان صدق نشانی سعی و غیرت  
مدح و ثنا و تنویری و بطانتی ذم و تقیح مقصد  
حقایق ینانه سیمله سانحه پیرای صدور اولمش اولدیغی کبی عم  
زاده اشرف انبیا حضرت مرتضی رضی الله عنہک  
(من مات تعباً من کسب حلال مات والله عنه راض)  
قول جیلی اوامر رسالت پناه یی مؤیددر و بونلردن  
بشقه خبر شریفده ( احث لدنیاک کأنتک تعيش ابدأ .  
واعمل لاخرتک کأنتک تموت غداً ) وارد اولمشدر .

برنجیسی یعنی فاتحہٴ مقالہ من اولان حدیث شریف  
 (عبد بطل عندالله مستکره) اولدیغنی مبین و حدیث ثانی  
 ایسه (برآدم ایچون اشد شقاوت کندیسنده فقر دنیا  
 و آخرتک اجتماعیدر) مضمون منیفنی محتویدر . قول  
 مصدق مرتضوی دخی (کسب حلال تعب و مشقتیه  
 اولن اولسون خالق مکونات آندن راضی اولور) معنای  
 شریفنی متضمندر . صوکنجیسی (دنیا که الی الابدیاشایه -  
 جق کبی چالیش، سعی و عملده بولک آخرتک ایچون یارین  
 اوله جک کبی اوغراش متبصر و حاضر اول) امرینی  
 ویریور .

نیجه نصوص جلیله، نیجه احادیث نبویه، برحق  
 اخبار خیریه وعلیه واردرکه هپسی محمدیلری سعی وکو-  
 ششه سوق ایده یور؛ هر خلیفه، هر ناصح متصح  
 مسلمانلری بطائدت منع ایتشددر . «دنیاک ایچون، آخرتک  
 ایچون چالیش طورمه سعیک قدر بولورسک» امرلری  
 هر خطبه ده ویرلشددر .

تواریخ اسلاف اسلامه مدنظر ایدیکز! غلغه  
 عظمت اسلامیه نک آرزمان ایچنده هر طرفی قابلامسنه  
 باشلوجه سبب غیرت اولدیغنی کوررسکز!  
 مطلق و محقق درکه هیچ بر دین بو قدر چابوق توسع

ایتماش، بوقدر چابوق نشر فضائل ایلامشدر . کور-  
مز میسکز که اراضی حجاز یه ده طلوع ایدن آفتاب اسلامیت  
نه قدر آز وقت ایچنده نه قدر چوق پرزی ظلمت جهالتدن  
قور تارمشدر .

حیرت رس افکار اولور بوسرعتک سبی آیاندر؟!  
ایلك مسلمانلرك برانده سیف شجاعت، او برانده قانون  
عدالت اولدیغی حالدده هر طرفه اعلان مکنسته، نشر معدلته  
غیرتلی دگلی؟

دوشونهلم! ظهور اسلامیتدن ده یارم عصر کچمه دن  
مسلمان یکلرینک اطهره ولوله انداز دهشت اولسی،  
عرب آتلورینک استانبوله صولت دلیرانه سی، غلطه ده  
مؤذنان اسلامک (الله اکبر) صدای بلندینی کوکلره  
چیقارمسی نه سایه سنده ایدی؟ غیرت وسعی و همت سایه سنده  
دگلی؟

تأمل ایدهلم! غازیان اسلامک صمصام جلادت و غیرتی  
بر یچق عصر ایچنده تا (پره نه) طاغلرنده، (چین) سر-  
حدلرنده یلمان کوسترمسی، کندیلرندن یوز درجه بیوک  
اولان ایران اردولرینک طارمه طاغنیق اولسی، اعداده  
فکر مقاومت قلمامسی نه اثری ایدی؟ هب غیرت مردانه،  
هب همت عادلانه اثری دگلی؟

هم مسلمانلر الدقلری امر غیرت، نهی بطائت تأثیراتیله  
 یالکز سیف شجاعته دایانه رق، رماح بسالته کوهه نرک  
 اثبات مکنت وقوت و کسب شان وسعادت ایتدیلر؛  
 غضنفرانه ضبط ایتدکلری بلده لری عادلانه همتلریله بر  
 کاشنسرای سعادت، سطوت انداز مواصلت  
 اولدقلری خرابه لری سعی و کوشش لریله بر رشکوفه زار بهجت،  
 قوه انبایه دن محروم صاییلان طاغلری حراثت وزراعت  
 جهد و غیرت لریله منبع فیض و برکت، یشادقلری  
 هر شهری مجمع ارباب معرفت حالته قویدیلر. مدارس علوم  
 وفنون ایله تولدی. بلخده، هراتده، نیشابورده، بغدادده،  
 سوریه ده، مصرده، افریقاده، اندلسده علم و فضیلت،  
 صنعت و تجارت مدنیت اسلامییه اساس متین ایدی .  
 خرسیتیانلر بطائت و تعصب ایچنده سفیل و سرگردان،  
 خائب و حیران یشارلر ایکن، مسلمانلر غیرت و کوششله دنیانک  
 الک صنعتلی، الزنکین، الک مسعود، الک قوتلی خلق اولدیلر؛  
 آثار صنعت و معرفت لری بقایاسی حالا کورنلره حیرت ویره یور؛  
 تاریخک اثبات ایتدیکی قدرت و سطوت لری هر کسی مبهوت  
 ایده یور . مسلمانلردن غازی، قاضی، عالم، متقی، حکیم،  
 ادیب هپسنک دیناً مکلف اولدیغی وظائف منافع عامه یه  
 خدمته منحصر ایدی: ارباب سیف صولت جهانگیرانه

ایله توسیع ملک ایدرلر، حکام عدالت عدل مدققانه  
و حقایق عالم پسندانه ایله سعادت عامه یی تأمینه چالیشورلر،  
حقیده موفق اولورلردی؛ علما، فقها، حکما، ادبانشر  
انوار علم و حکمت، ترقی فضل و معرفتیه صرف قدرت  
وقوت ایلرلر ایدی .

اشته بویله موفقیات لائحی مجرد زیور فاتحه مقال  
ایلدیکمز مثللو وارد و صادر اولان اوامر، وصایا و نصایحه  
تمامیله امتثال و آنلری بیلرک و موجبلرینه توفیق حال  
و مشوار ایدرک بطائندن قطعاً اجتناب، سعی و غیرته جداً  
تمایل و انهماک سایه سنده ایدی .



— ❧ — مقتطفات منثوره ❧ —

امام ابوحنیفه رحمه الله علیہک خاتمه شو:

« قل خيراً والافاسکت »

یعنی خیر سوبله یا خود سکوت ایت .

امام شافعی رحمه الله علیہک خاتمه شو :

« الراحة فی القناعة »

یعنی راحت قناعتده در .

امام محمد رحة الله عليك خاتمه شو :

« من صبر ظفر »


یعنی صبر ایدن موفق اولور .

امام یوسف رحة الله عليك خاتمه ده شو :

« من صمت نجا »

یعنی صمت وسکوت ایدن نجات بولور .

کلام حکمت انسجامی مکتوب ومحکوک ایمش .



ابن عباس رضی الله عنهما بیورمش :

مؤمن ایچون علم خلیل، عقل دلیل، حلم وزیر،  
عمل قائد، رفیق والد، لین برادر، صبر امیر لشکر در.



حضرت علی رضی الله عنه بیورمش :

ادب زنکینلکده زینت وحلی، عندالحاجه برکنر لایفنی،  
مروت ایچون معین وشفیق، مجالسده مصاحب ورفیق،  
وحدنده مونس صدیقدر؛ آنکله قلوب واهیه عمارت

نامه، عقول میته حیات تازه بولور؛ طلاب الباب آنکله  
هر حقایق دراک وصاحب فکر چالاک اولور.



استاذ حکما الشیخ الزیئس ابن سینا حکمتی مجمل  
شویله تعریف ایلشدر : (\*)

حکمت، علی قدر طاقه البشریه تصور امور وتصدیق  
حقایق نظریه وعملیه ایله نفس انسانیه بی استکمالدر .



ابو عبدالله سائلی دیمشدر :

صواب وخطای اکلایه میهرق دوچار اشتباه وتردد  
اولدیغک وقت هوا وهوسنه اقرب اولان جهته باق  
آندن اجتناب ایت، ابعدا اولان جهته انهمالك وآنی  
ترجیح ایله.



فیثاغورث دیمش :


ای کنج! تعب تعلم ومشاق تحصیله طاقت کتوره -  
میورسهك شقای تحمل کداز جهله دایان.

---

(\*) استاذ مشارالیه حکمتک تعریف واقسامنی مبین وموضع  
بر رساله مرغوبه سی دردست ترجمه اولوب رساله منزه درج  
اولنه جقدر .



صاحب استیانه جناب رب عزت، مونس استیانه  
فرقان پریمین و مسعدت، واعظ استیانه موت پر عبرت،  
کنز بی‌نهایه استیانه قناعت کفایت ایدر؛ بودرده رضا  
کوسترمیانک حقندن ایسه آتش کلیر.



کوز نظره، یرمطره، عالم اثره، سائل سؤاله، حر یص  
ماله، بحر آبه، نار خطبه طویمز.



ناس درت قسمدره :

بر طاقی بیلز، بیلدیکنی ده بیلز، بونلر احق‌لردر  
کنسیدیلرندن اجتناب ایدیکز؛ بر طاقی بیلز، بیلدیکنی بیلیر،  
بونلر جاهل‌لردر کنسیدیلرینه تعلیم ایدیکز؛ بر طاقی بیلیر،  
بیلدیکنی بیلز، بونلر نائم و غافل‌لردر ایقاز ایدیکز؛ بر طاقیده  
بیلیر، بیلدیکنی ده بیلیر، بونلر عالم‌لردر آنلره اتباعه چالیشکز.



افلاطون دیمشدرکه :

برایشده اختیار و طلب سرعت موافق عقل و حکمت  
دکلر؛ عقول و فراست کامله اربانه لازم اولان برایشک  
حسن و نفاستنه دقت ایلکدر، زیرا خلق آنک نه قدر  
مدته بتدیکنی صورمز، دوشمنزل بلکه نفاست وجودته  
عطف نظر دقت ایدرلر.



حضرت علی رضی الله عنه بیورمشدر

رفق تواضعده ، ریاستی علمده ، کرامتی تقواده ،  
مودتی صدقده ، نصرتی صبرده ، عبادتی ورع وعفتده ،  
غنائی قناعتمده ، شکری رضاده ، راحتی ترک حسدده ،  
فراغت غیبتی خلوتده ، انسی تلاوت قرأنده ، ثقل میرانی  
ذکر اللهده ، برکتی سخاذه بولدم .



علمی تعلیم ایچون تحصیل عمل ایچون تحصیلدن  
دها افضلدر .



غریب ضیافت نون اضافت کیدر .



— ❧ مقطعات منظومه ❧ —

شاعر الورزاء، وزیر الشعراء ابوالفتح البستی رحمة الله  
عليه ( قصیده الحکم وامثال ) ندن مابعد

احسن الى الناس تستعبد قلوبهم فطالما استعبد الانسان احسان  
يا خادم الجسم كم تسعى لخدمته اتطلب الربح فيما فيه خسران  
اقبل على النفس واستكمل فضائلها فانت بالنفس لا بالجسم انسان  
من كان للخير مناعاً فليس له على الحقيقة اخوان واخذان  
وان اساء مسي فليكن لك في عروض ذلته صفح وغفران  
وكن على الدهر معواناً لذی امل يرجو نذاك فان الحر معوان

ناسه لطف واحسان ايله كه جلب قلوبه موفقیته  
شرفیاب اوله سڭ زيرا انسانى جلب واستعباد ایدن  
انجق عاطفت واحساندر؛

ای خادم جسم اولان انسان ! جسم وجسدیک  
خدمتنه سعی ایدیورسڭ، آیا کنیدیسنده خسران وفنا  
اولان شیدن انتفاع امیدنده می بولنیورسڭ؟

نفسکه قارشى طور، آنک فضائلی استکماله چالیش،  
زیرا سن جسماً دکل نفساً انسان سڭ .

برآدمکه مناع الخیردر محب صادق و اخوان وفاداری  
بولنق حقیقه غیر ممکندر .

فنا آدمدن سکا فئالق کلدکه عفو و صفح ايله  
معامله ایت .

سندن طلب معاونت ایدنلره معین ونظیر اول ! زیرا  
اعانت ومظاهرت کار احرار یعنی شیمه جلیله کرام  
وکباردر .



امام علی رضی الله عنه بیورمش :

اقدم استاذی علی والدی فقد      تضاعف منه الفضل والطف والشرف  
وذاك من الروح والروح جوهر      وهذا من الجسم والجسم كالصدف

استاذی والدیه تقدیم ایدرم زیرا آندن کله جک فضل  
 وشرف مزید و متضاعفدر؛ چونکه استاذمر بی روح، روح  
 ایسه جوهر پرشرف؛ اما پدر مر بی جسم، جسم ایسه  
 مثال صدف در.




میرزا مهدی :

مانده دو مصرع یک بیت ماوتو  
 در صورتیم اگر چه دو در معنی ایم فرد




ملهمی :

هر زمان کریه برنگ دیکرم می آید  
 بس که رخسار تو هر لحظه برنگ دیکرست



ابن کمالک :

عالمک فضلی دکلدر جاه ایله جاه ایله کلمر فضیلت جاهله  
 جاهل اولان پیر نابالغ اولور جهل کیتمز چهل ایله پنجاهله



نابی :

سرترفع صاتار اما که کله بنجه سیره بنه محتاج عطای قدم اولزده نولور



ابن کمال :

مطبخ دهر ایچنده آج اولسه کسه نک نعمته ایتمه حسد

رزق ایچون فی الحقیقه غم یمه کیم ضمن الله رزق کل احد



شوده ابن کمالک اوقطعه سی کبی ناصحانه  
وحکیمانه در وانشادی حضرت علی کرم الله وجهه ید اسناد  
اولنشدیر :

کن غنی القلب واقنع بالقلیل مت ولاتطلب معاشاً من لئیم  
لاتکن للعیش مجروح الفؤاد انما الرزق علی الله الکریم (\*)



ابن کمال :

بنی ذم ایتمه دن حسوده چه سود کدینک زشت خوئی ظاهر اولور  
ذم اولند قجه نشر اولور هنرم از سه لر مشکی بویی ظاهر اولور  
متنبیده بویله دیمش :

واذا اتتک مذمتی من ناقص فهي الشهادة لی بانی کامل  
یعنی ناقص وجاهلک بنی مذمتی فضل وکماله دلالت  
وشهادت ایدر .

ابن معتز دخی بویله دیمش :

ما عا بنی الالحسو دولتک من احدی المناقب  
یعنی بنی انجق حسود تعیب ایتدی اشته بوده مناقب  
فضل و عرفانک بر یسیدر .



(\*) غنی قلبی اول، آزه قناعت ایله، اچلقدن اول، فقط مدار  
معیشتنی شخص لئیم دن طلب ایتمه؛ زیرا هر کسک رزقنی انجق کریم  
اولان جناب حق ویرر .

## بر پدرك نصیحتی : (\*)

راحت روح، دلده فتوح \* او غم نوح، بعد سلامی  
 دیده نورم، دلده سرورم \* ای بنم عرم، اكله كلامی  
 قره العینم، قوه یدنم \* عزت وزینم، دكله كلامی  
 علمه حریص اول، شغله انیس اول \* اهل جلیس اول، كورمه ملای  
 صورمغه ای یار، ایلد كل عار \* آكله نه کیم وار، علم تمامی  
 فارسی بی ییل، اهلن آرا بول \* افصح ناس اول، عرب و عجمای  
 وقت نماز ایت، حقه نیاز ایت \* خالق یاد ایت، كوزله امامی  
 عاقله یار اول، صالحه جارا اول \* دینده وار اول، بول اولو نامی  
 علمی مکرر، ایله مقرر \* صکره محرر، تم كلامی

خير الناس من ينفع الناس

شر الناس من يضر الناس



## اشاره الفرس

(من کتاب کشف الاسرار عن حکم الطیور والازهار)

مترجدر

بر فرسده شو یولده خطاب ایتش :

ای راغب حسن افعال، طالب خیر آمال اولان فقیر صابر !  
 حصول مقصد وار بک ایچون حسن ادب و صدق طلبی بندن  
 اوکرن ! بن صاحبی صرتمه الدیغم، یوله روان اولدیغم وقت

(\*) بونک نظمی ابوالسعود افندی مرحومه استاد اولنمقده در.

قوش کبی اوچار، سیل کبی اقام؛ هجوم لیل کبی مهاجمده بولور،  
اوزرمده کی آدمک طلبی ادراک ایله آنی البته منزل مقصودینه  
ایصاله موفق اولورم؛ تعقیده روزکارله یاریش ایدرجه سنه  
قوشار، فرارده زمان تیر کذار کبی قاچارم؛ قووالایانلر آنجق غبار  
قدیمی کورلر، مبهوت وحیران قالورلر.

معاومک اولسونکه دوه صابر مجرب ایسه بن شاکر مقرب،  
اوقاصد لاحق ایسه بنده جاهد سابقم. کلب محافظ صدقنشان ایسه  
بن مخلص فلکز دکانم، اومتبصبص قناعت کار ایسه بنده برخادم  
صاحب وقارم.

ایفا واستیفای حقوق ایدن انجق وفاکارلر، سهولته قطع طریق  
ایلیان انجق سبکبارلر اولدیغنی کوردیکم ایچون یوم مسابقه یی  
درخاطر ایلینجه تشمیر ساق غیرت ومیدان مسابقنده اثبات رجحان  
ومزیه صرف سعی وهمت ایلرم.

شراب غفلتله مست ویم-وش، کمال عیش وراحتله عظمت  
فروش اولانلره دیرمکه: ای مردود الامل، مطرود الطراد! عالم  
وجوده عطف نظر دقت، فهم مقصوده حصر همت، نفسی تربیه  
وتحدید واعضای تأدیب وتقیده غیرت خصوصنده آیانه ایچون  
تجويز مسامحه والتزام بطائت ایلورسک؟ زمان حیاتک  
محدود، انفاس عمرک معدود، یوم موعود اجلک مطلق  
الورود اولدیغنی دوشمورمیسک؟ اوکابوس مهیب موتدن  
قورقورمیسک؟ دوشون! قورق! چالیش! غیرتلی اول! بدن  
عبرت آل! باق بکا که معاونتمه، غیرتمه نه قدر آولر آولانیر! نه درلو  
یازیشلر قازانیلیر! نصل خانلر طوتیلور! نصل مظلوملر قورتیلور!

نیجه عشاق تیز زمانده واصل محل ملاقات یار اولور. تیز رولکم  
سایه سنده نیجه صعب المرور جبال و صحرا قولایقله پکیلور!



ابن کمال مرحومک آثار جلیله سندن

مترجمدر

طبقات الفقهاء

فقها یدی طبقه در :

برنجیسی

مجتهد فی الشرع اولانلردر؛ ائمه اربعه وکرم فروع وکرم  
اصولده برینی تقلید ایتیمه رک ادله اربعه دن - یعنی کتاب و سنت  
واجماع و قیاسدن - استنباط احکام فروع و تأسیس قواعد اصولده  
ائمه مشار الیه هم مسلکته سالک اولان ذوات کرام کبی .

ایکنجیسی

مجتهد فی المذهب اولانلردر؛ ابویوسف و محمد و سایر اصحاب  
ابی حنیفه کبی . مشار الیه هم استاذ افخم ابوحنیفه نک تقدیر ایلدی  
قواعد اوزرینه ادله مذکوره دن استخراج احکامه قادر اوله رق  
بعض احکام فروعه جناب استاذه مخالف فقط قواعد اصولده  
مقلد اولملر و بوضورتله - فروعه امام اعظمه مخالف و اصولده غیر  
مقلد اولان - امام شافعی و امثال مخالفین مذهب دن تفارق و تمایز ایلملر در.

اوچنجیسی

صاحب مذهبک روایتی اولیمان مسائله مجتهد اولانلردر؛



( خفاف ) ( ابو الجعفر الطحاوی ) ( ابو الحسن الکوفی ) ( شمس الائمة الحلوانی ) ( شمس الائمة السرخسی ) ( فخر الاسلام البرزوی ) ( فخر الدین قاضیخان ) و سائر لری کبی . مشارالیه اصول و فروعده جناب شیخه مخالفته مقتدر اوله میوب انحق امامک بیان ایلدیکی مسائله مشار الیهک وضع و تقدیر ایلدیکی اصوله و بسط و تمهید ایندیکی قواعد مقتضیاتنه استناد ایله استنباط احکام ایلرلر .

### در دنجیسی

مقلدیندن اصحاب تخریج اولانلردر؛ بزازی و اخوانی کبی . بونلر اصلاً اجتماعه مقتدر اوله مامقله برابر صاحب مذهبدن و یا خود اصحاب اجتماعدن منقول اولان محتمل الامرین حکم مبهمی و ذوالوجهین قول مجلی - اصوله و قوف کاملری و ضبط مأخذده رسوخ و کاملری بولنق جهتیه - کندی رایلرینه کوره و اصوله نظراً و فی و عده امثال و نظاً . ژینه بالقیاس تفصیل و ایضاحه قادر اولمشلردر؛ هدایه نک بعض مواضعنده بولندیگی کبی . ( تخریج الکوفی ) ( تخریج البرازی ) دخی بوقیلدندر .

### بشنجیسی

مقلدیندن اصحاب ترجمچدر؛ ابو الحسن القدوری، صاحب الهدایه و امثالی کبی . بونلر بعض روایاتی بعض روایاته « بو اولادر، بو اصحدر، بو قیاسه دهه مطابقدر، بو احوال ناسه دهه موافقدر » دهرک ترجمچ و تفضیل ایدرلر .



# محاضرات

مقتطفات

نومرو ۴ برنجی جلد ۱۵ ربیع الآخر

## پیرما گفت خطا بر قلم صنع نرفت آفرین بر نظر پاک خطا پوشش باد

فاضل بی مدانی « جلال دوانی » معدن لطائف روحانیه، مخزن معارف سبحانیه، شمس الائمه والدين مولانا « محمد جافظ شیرازی » رحمه الله علیه شوییت حکیمانه سنی تشریح و توضیح مقصده ترتیب ایلدیی رساله مرغوبه ده مضمون بیته سهولت اطلاعی استلزام ایده جگنی در میان ایله درت مقدمه تحریر و مقصد اصلی اولان شرحه صکره شروع ایلشدر .

بزه بوراده مقدمات مذکورہ بی تلخیصاً ترجمه و بیان و تشریحات استاذی بعده تسطیر و اتیان ایده جگز . ومن الله التوفیق :

### برنجی مقدمه

خطا و صواب کاه صفت اقوال، کاه صفت افعال اولور . مثلاً بریسی « براییکینک یاریسیدر » دیسه طوغری، بونک خلافنده سو . یلر سه یا کاکش سویلدی دیرلر؛ کذلک بریسی بر فعلده بولنسه بوفعلی منسلخته موافق اولدینی تقدیرده صوابه، مخالف اولدینی تقدیرده خطایه نسبت ایدرلر و اوایشک فاعلنه تقدیر اولده مصیب، تقدیر نایده محطی نامی ویرلر . بویله اولنجه اقوالده صواب و خطا

واقعہ مطابقت وعدم مطابقتدن، افعالده ایسه مصلحتہ موافقت و مخالفتدن عبارت دیمکدر .

### ایکنجی مقدمه

ارباب بحث وبرهان واصحاب کشف وعیان اتفاق واطباق ایشلردرکه ایجاد ممکنات وبویمکناته افاضه کمالات خصوصاًتندہ جناب حقدن غیرى فاعل حقیق یوقدر . بوقاعدہ عقائد اهل سنت وجاعته مبنی اولوب موافق حق وحقیقتدر وفرقه ناجیه اشاعرہنک کتب کلامیه سنده مثبت ومصرحدر؛ عرف زمانزجه اشراقیان دینیلان اساطین حکما دخی بوبادہ فرق ناجیه ایله متفقدر؛ انجق اشیا ع مشایندن نزد متأخرینده مشهور اولانلر حکمانک اثبات ایلدکلى ترتیب سلسله وجوددن استنباطاًره ناصواب خلافده سالک وطریق مشوشه خطایه زاهب اولمشلر ایسه ده بونلرک محققینى دخی مخالفت مذکورده بولنمیوب اهل سنت وجاعتک رأى صابننى قبول وتصدیق ودلائل باهره بسط وایرادیلہ قاعدہ صحیحہ موحدینى تحقیق ایشلردر . حتی مشایلرک محیی مراسم علومى اولان شیخ الحکما ابن سینا کتب فنک اشهر واطولى اولان (شفا) نام کتانبده حقیقت مجهوثى تصریح ومشار الیهک (عمرالخيام) و (بهمنیار بن المرزبان) کبى شاگردانى دخی تصریمحات استاذى برقات دها توضیح ایشلردر . (عمرالخيام) بوبادہ برساله دخی تصنیف وتسطیر ایدوب متأخریندن (فاضل طوسى) رساله مذکورہ اوزرینه تحقیقات وتلفیقاده بولنمشدر .

حضرت شارع علیه افضل الصلوات والتسلیمات افندمرک امر جلیلى مقتضاسنجہ بوامتک مجوسیى مقامنده اولان طائفه معتزله عبادى بالاخیار خالق افعالى طائیفله مجوسیلره مشابه اولمشلردر؛

زیرا مجوسیلر ایبی فاعل حقیقینک وجودینه زاهب اولوب مبدی\* و موجد خیر اولان برینه (نوروزدان)، فاعل شر اولان دیگرینه (ظلت و اهرمن) دیرلر. طائفه معترله هرکسی خالق افعالی طانور مجوسیلر فقط ایبی فاعل اولک وجودینه قناعت کوسترر؛ بناء علیه ارباب اعتزالک مسالک و مذهبی افحش مذاهب اولمش و امت محمد کندیلر یله اختلاطدن حدیث شریف صحیح ایله منع و تحذیر ایدلمشدر.

**اوچنجی مقدمه**

افعال ربانیه هر تقدیر حکم و مصالح جلیله دن خالی دگمسه ده غرض ایله معلل اولممن. بوبابده فئمه فائزه اشاعره ایله حکما متفق وهم رأی اولوب ارباب اعتزالینه وادی خلاف و خطایه صابشلردر (\*). مذهب حقلک دلیلی شودر:

(\*) افعال الهیه اصحاب ماتریدیه عندنده حکمله معلل اولوب اشاعره بوکا مخالفت ایتشلردر اما غرضله معلل اولمادیغنده متفقدرلر. حکمله معلول اولمسنده کی اختلافلری دخی حکمی هر - برینک بشقه معنایه تلقیسندن ایلر و کلمشدر؛ زیرا حکمت، امام همام ابو منصور ماتریدی عندنده عاقبت حیده معناسنه اولوب امام اشعری عندنده ایسه فاعلدن قصده صادر اولمقدر. ارباب اعتزال بتون بتون غیریری فکره دوشوب حکمتک یا ذاتی و یا غیر یحون منفعت اولدیغنه زاهب اولمشلردر. افعالک غرضله معلل اولدیتنی اعتقاد ایدنلرده طائفه معترله در. بونلر اهل سنتک «افعال ربانیه غرضله معلل اولممن زیرا جناب فاعل حقیقی اغراضدن منفعل اولمق لازم کلور بویاسه باطلدر» یولنده کی مسرودات حقائق پینانه لرینه مقابل «غرضله معلل اولمیان افعال عبث اولور افعال الله عبث اولمق باطلدر بناء علیه افعال بالغرضدر» کی مقابلهیه تصدی ایتشلر

غرضدن مراد بر امر در که آنی تصور فاعلك فعلده بولنسنی باعث و موجب اولور؛ یعنی بوامر ( غرض ) فاعلی فاعل قیلار . بوحالده فاعل ناقص بالذات مستکمل بالغیر اولمق لازم کلور . فاعل حقیقی ناقص و مستکمل بالغیر اوله من اولیه فاعلیتی قادر مطلق حضرتلرینه اسناد محال و باطلدر . دلیل معروضک صورت تامه ده تدقیقات و تحقیقاتنه وله وعلینده کی اقوال و مطالعاته و قوفی آرزو ایدنلر کتب کلامیه و حکمیهیه مراجعت ایتسونلر؛ هر حالده ثابت و محققدر که افعال حق غرضدن منبعث دکلدر لکن یوقاریده ده اشارت ایدلدیکی اوزره حکم دقیقه و مصالح انیقہ یی مشتملدر . اوحکم و مصالح انفاق و انفسی تابع و دقائق علم تشریح و منافع اعضا و حقائق هیئت و غرائب افلاک ایله تفاسل و اوجاع سماوی یی تدبیر و تفحص ایدرک برنبذه معلوم اوله بیلور ایسه ده معلومی برجزو لایجزاسی منزله سنده اولوب تماماً و قوف و شمول واحاطه خصو . صنده عقول بشریت عاجز و قاصر در . مذکور مصالح و حکمی اتم و اکمل و جهله یالکز علم الهی محیط و شاملدر . همه بوندن . ناشی فاعلیت فاعله مؤثرک وجودی لازم کلز و شو حقیقت تمثیل ایله دهها قولای روشن و عیان اولور :

باغبان براغاجی میوه سی ایچون دیگر مع هذا بواغاجک میوه دن  
غیری - سایه و پرکندن انتفاع کبی - فوایدی اولدیفنی بیلور

ایسه ده اهل حق بونی رد ایچون « عبث غرضدن خالی اولان فعل  
دکل حکمت و مصلحتدن خالی اولان فعلدر و افعال ربانیه حکم  
و مصالح جلیله و عدیده بی محیط و شامل اولدیفنی اجلدن عبث اولمقدن  
قطعا بریدر بناء علیه اعتقاد و ادعا کز باطل و عاطلدر » جوابی  
و بر مشلر و حقا که ایضاح و اثبات حق ایشلدر .

اماغرسنی باعث وموجب یالکز میوه در . کند یسنه مجهول اولیان  
فوائد سائرہ دکلدر .

اشته بونده کی فوائد سائرہ باغبان ایچون حکیم ومصالح منزله .  
سندہ در ومعلوم الترتب ایسه ده باعث فعل غرس دکلدر .

درختست این جهان ومیوه مائیم  
که خرم بر درخت او برائیم

( مابعدی صکره )



❧ مقتطفات مشورہ ❧

حضرت فخر عالم صلی الله تعالی علیہ وسلم « قضا  
کلدکده بصر، غضب کلدکده عقل، کبر کلدکده دین،  
فقر کلدکده حیا کیدر » و « فقر تلخناک و مر المذاق،  
غربت موجب سر فرو وتذل اعناق، سخاوت مکرمت  
اخلاق، صدقه نافع یوم تلاق در؛ نته کیم رازق الارزاق  
« ما عندکم ینفد وما عند الله باق » بیوردی « بیورمشدر .



ینه سید کائنات علیہ افضل الصلوات بیورمشدر :

اذا اراد الله بقوم اشمسهم نهارا وامطرهم ليلا

مضمون حدیث شریف :

(حق تعالیٰ ہرچیز پر قومہ احسان ایلسہ  
کیجہ یغور کوندوزندہ آفتابی کوندرد)



عبد اللہ ابن مسعود رضی اللہ عنہ :

النه کچن شیئی طوق قارننه طولدرمق، تارک مصاحب  
صالحین اولق، ذنوب و معاصی ماضیه یی اونوتمق،  
بیوک بیوک ارزو واملارده بولنق ظلمت قلبدن، هر بولدیغنی  
قارننه قویماق، صالحلرله مصاحب و مشاور اولق،  
ذنوب و معاصی سابقه یی اونوتماق، آمال و مقاصد معتدله ده  
بولنق نور قلبدن نشأت ایدر.



بایزید بسطامی رحمة الله علیه :

کمال شرفه نائلیت ارزو سنده بولنا نلر فقری غنایه،  
آچاغی طوقلفه، آلچقلاغی بو کسکلکه، مذلتی عزته، تواضعی  
کبره، حزنی فرحه، موتی حیاته مرجع بیلیدرلر.



زینت رجل اسلام، زینت اسلام عقل، زینت عقل  
علم، زینت علم عمل صالحدر.



منبها تده شويله يازلمشدر:

علامت اشقيا درتدر؛ جناب حقا نزننده محفوظ  
و معلوم اولان ذنوب و معاصي سابقه يني نسيان، قبول  
ويارد ايدليكني بيلديكي حسنة يني تذكار و درميان، دنيا ده  
كنندن عالي اولانه عطف بصر، دينده كنندن عادي  
اولانه حصر نظر ايتكدر.

علامت سعادده درتدر؛ يعني سوابق ذنوبي دائما  
در خاطر، حسنة يني واقع يني فراموش ايتك، دنيا ده  
كنندن اشاغيسنه، دينده كنندن يوقاروسنه باققدر.



محفوظ بن محمد طرفندن سويلنديكي تفحاته  
مندرجدر:

دائما محاسن نفسي كورنلر خلق مساوي حالي رينه  
آگاه ايتش و كندي معين يي نلر ايسه او فلاكتدن  
مصون اولمشدر و ناسك الك خيرلوسي مسلمين حقنده حسن  
نظرده بولنلردر.



ناس بش قسمدر:

. بر طاق ي كريمدر، يميز ديرر؛ بر طاق ي سخيدر، ير



ویدیرر؛ بر طاقی بخلیدر، یر اما یدیرمز؛ بر طاقی لییدر؛  
نه یر ونه یدیرر؛ بر طاقیده ذلیل و حقیردر، یمز ویدیرمد کدن  
بشقه یدیره نه ده مانع اولور.



عمده ده شویله یازلشدر

ادب هر درلو خطا دن اجتناب و احترازی بیلکدن  
عبارتدر؛ بعضلک بیانته کوره، حضرت فخر عالم صلی الله  
تعالی علیه وسلمک عمر نه بر کره اولسون ایشلیدیکی شیر



امام همام ابو حنیفه رحمه الله علیه اسمی  
تلامیدی شونلردر

ابو یوسف، محمد بن حسن، حسن بن زیاد، زفر، ابو الحسن  
القدوری، ابو الحسن الکرخی، محمد بن شجاع بلخی، داود  
طائی، عبدالله المبارک، سفیان ثوری، ابو عاصم بلخی، محمد  
بن سلمه، ابو حفص کنز بخاری، ابو بکر رازی، ابراهیم بن  
رستم، محمد بن مقاتل الرازی، اسد بن عمرو، بشر الحافی،  
بشر بن غیاث، بشر بن زهری، اوزاعی بغدادی  
رحمهم الله.



امام قشیری رحمة الله علیه اسماء الحسنی شرحنک  
 ( اسم خالق ) بحثنده ذکر ایتشدر :  
 برسنی ایلہ بر معتزلی ییشنده مسئله قدر اوزرینه مناظره ومباحثه  
 وقوعبولدی . اهل اعتزالدن اولان اغاجدن بر الماقوپاروب  
 سنیہ «بون قوپاران بن دکلیمی» دیمسیله سنی طرفندس «اگر  
 بو المایی قوپاران سن ایسهک آنی ینه برینه اسکیدی کبی  
 ربط ایت» جوانبی النجسه مبهوت وساکت اولدی .  
 بر شیئی ایجاده مقتدر اولان قدرتک انک ضدینی ایجاده  
 دخی مقتدر بولتمسی واجزایی تفریق ایدن قوتک اول  
 اجزایی وصل وجعه قادر اولمسی لازم ولابد بولندیغندن  
 معتزلینک آلدیغی جواب اوزرینه سکوتی مجبوری ایدی .  
 جناب حقک خلق واججاده متفرد اولدیغنی معترف اولانک  
 کسب عبدی حجد وانکار ایتامسی مقتضیدر .



مطالبات عبید زاکانیدن :

(مظلوم) کوتوبر برک الینه دوشن . (ماتم سرا)  
 مسافری چوق خانه . (دوزخ) ابله لرله صحبت . (بیمار)  
 تحته مشق حکیمان . (فلاکت) نتیجه کتخدایی . (آفت

سمای ( سوزاره سنده سوز . ( جنون ) مقدمه جیش  
عشق .



احد نامنده براعرابی بیلدیکی برقادینک خانه سنه کیرر؛  
قادین بوکا چکیل کیت معناسنی اشراب ایدن ( انصرف )  
کله سی ایله ( انصرف انت اجنبی منی ) دیهرک بالعتاب  
طرد ایتک ایستر . او آدم بوکا جواباً ( بنم اسمم اجددر  
احدده غیرمنصرفدر ) دیر اما قادین ( طوغری معرفه  
اولورسه اولیله لکن نکره اولورسه منصرف اولور ) جوا-  
بیله اعرابی اسکات و طرد ایلر .



مقطعات منظومه

شاعر الوزراء، وزیر الشعراء مولانا ابوالفتح البستی  
رحمة الله علیہ ( قصیده الحکم والامثال ) ندن مابعد :  
واشد دیدیک بحبل الدین معتصماً فاند الرکن ان خانتک ارکان  
من یتق الله یحمد فی عواقبه ویکفه شر من عزوا ومن هانوا  
من استعان بغیر الله فی طلب فان ناصره هبجز وخذلان  
من جاد بالمال مال الناس قاطبة الیه والمال للانسان فتان  
من سالم الناس یسلم من غوائلهم وعاش وهو قریر العین جذلان  
من مد طرفاً بفرط الجهل نحو هو ی اغضی علی الحق یوماً وهو خزیان  
حبل متین دینه صیقی صیقی صارل ! زیر ادیکر ارکاندن

فائده كوره مدك ايسه ده دين ركن قويدر، اكا استنادك  
سنى سعادت كامله يه مظهر ايدر .

جناب حقه توكل واستناد ايدنلرك عواقبي محمود  
اولور، چونكه حق تعالى انلرى تغلب وتغزز ايله اهانت  
ايليانلرك شرندين وقايه ايلر .

حضرت معين مطلقك غيريدن استعانه ايدنلرك  
معين وناصرلرى انجق عجز وخذلاندر .

مال ايله سخاوت كوستره نه هر كس ميل ايدر، زيرا  
مال خلقي جلبه واسطه در .

هر كسه حسن الفت ايدنلر خلقك غوائلندن امين  
وسالم اوله رق كمال مسار وشادى ايله امرار روز وليال  
ايلرلر .

فرط جهالتله هوا وهوسنه مائل اولانلر بركون  
حقندن عدول ايده جكلرنندن دائما ذاييل وحقير اولورلر .



حضرت ابى بكر رضى الله عنه بيورمشد

الموت باب وكل الناس داخله ياليت شعرى بعد الموت مالدار  
موت برقا بودر كه هر كس اندن كيره جكدرك؛ آه موتدن  
سكره نصل برخانه بولنديغنى بيلسه م !

حضرت عمر رضی اللہ عنہ دے بیورمش:

الدار دار نعيم ان فعلت بما يرضى الآله وان خالفت فالنار  
جناب حقك رضا سمنه توفيق حركت موصل جنت،  
خلافته جرأت ايسه موجب جهنم وعقوبتدر.

حضرت عثمان رضی اللہ عنہ دخی بیورمش:

هما محلان مالراء غيرهما فاختر لنفسك اى الدار تختار  
انسان ايجون انلردن بشقه خانه يوقدر كوكل  
هانكيسنى اختيار ايدىيور ايسه اكا كوره افعالده بولنمالى.

حضرت على رضی اللہ عنہ بیورمش:

ماللعباد سوى الفردوس منزلة وان هفوا هفوة فالرب غفار  
عباد صدق نهاد ايجون مسكن دار الجناندر اما  
بعض كونه تقصيراته بولنمقاله بوسعادتن محروميت  
لازم كلز زيرا جناب حق معين وغفاردر.



شيخ الاسلام اسبق عارف حكمت بك مرحوم امام  
شافعى حضرتلرينك مرقد مبارك رينى زيارت لرنده  
سويملشردر:

آيت لقبر الشافعى ازوره فعارضنى فلك وما عنده بحر  
فقلت تعالى الله تلك اشارة الى ان هذا البحر قد ضمه القبر

یعنی حضرت امام شافعیؒ نیک قبرینی زیارتده اوکه  
برفلکه (۱) چیقیدی حالوکه اوراده دکردن اثر یوق،  
بو حالی کوردیکم کی ( تعالی الله مطلقا بوفلکه بحرك  
قبر ایچنده بولندیغنه اشارتدر ) دیدم .



خیالك في عيني وذكرك في فمي    وحبك في قلبي فاين تغيب  
یعنی خیالك کوزمده، ذكرك دیلده، محبتك قلبه  
اولدقجه نزمیه قاجارسك !



(کلم همدانی) نك قصیده نعتیه سندن منتخب  
ابیات لطیفه در :

بی نصیب از مادر کیتی زمر دی کشته ایم  
زان که مادر بیشتر سامان بدختر میدهد  
ارکک اولدیغیز جهنمه مادر کیتی دن بی نصیب قالدق؛ زیرا مادر  
مالنک چوغنی قزینه بخش ایدر .  
وقت مر دان میرسد چندی صبوری پیشه کن  
دخترانرا روزگار آخر بشوهر میدهد  
براز صبرایله که ارککلر کده نوبتی کلور؛ زیرا زمان قبرلری نهایت  
قوجهیه ویرر .

(۱) امام مشارالیهک مرقدینک قبده سی اوزرنده اوافق  
برصندال نمونه سی موجود ایمش .

کرفلک بعد از شکر زهرت دهد ازوی مرغ  
چون بتلخی میرد شیری که مادر میدهد

فلک سنی نعم والطف شکریله شیرنیکام ایلدکدن صکره زهر  
مصائبه قلحکام ایلرایسه آندن اینجمنه؛ زیرا والده لر بیله چو جقلرینی  
طاطلی سوددن آجیلقله کسرلر.

ارزوی برتری کم کن که کردون چون سحاب  
هر که را بالا برد در نیمه ره سرمیدهد  
آرزوی اعتلادن فراغت ایله؛ زیرا کردونده سحاب کی بالایه  
چکدیکنی یاری یولده اشاغی آتار.



ینه مشار الیهک ابیات منتخبه سندندر .

از خیر زندگی چون مو برونه میکشند  
توهمین موی سفید از ریش میسازی جدا

خیر حیاتدن سنی قیل کی چکیورلر؛ حالبوکه سن حالا صقالیک  
آققرینی آیققله اوغراشورسک .

یک شبان روز است ای دل مدت شیب و شباب  
شب بمستی رفت و روزش در خجاری وای ما

ای دل مدت شیب و شباب بر کجه کوندوز دیمکدر؛ کجه مستلکه  
مرور، کوندز ایسه خبار ایله گذار ایلور . یازیق بزه !




### ○ فصیحی ○

بنی تیغی کی بند میانی ایتدی جانام  
بلی یاندهیم اما که قیل اوستنده در جانم



### ○ بلیغ ○

تن بیماری غم او یله خیال ایلدی کیم  
کندمی کورمک ایچون کوزلکه محتاج اولدم



### ○ لادری ○

هب جهله چیقدی علم ورسومک نتیجه سی  
سرمایه جسارت ایش کار صاندیغم



### ○ حلیم کرای ○

سکوتم جهله، بی پروالغه محمولدر نطقم  
ادب کج فهمه نسبت معصیت عرفان قباحتر



### ○ سنبلزاده وهبی ○

زیور ذات کرک یوقسه قالور عریان تن



جاهلک چیقسه اوزرین قبا دوشندن



— ابن کمال مرحومک آثار جلیله سندن —

طبقات الفقهاء :

النجیسی

اقوی وقوی بی، اضعف وضعیفی، ظاهر روایتی، ظاهر مذهبی،  
روایت نادره بی فرق وتمیزه قادر اولان مقلدیندر؛ متأخریندن  
متون معتبره اصحابی و صاحب الکثیر صاحب المختار، صاحب الوقایه،  
صاحب الجمع کبی . اقوال مردوده و روایات ضعیفه بی کتابلرنده  
نقل و بیان ایتمک بونلرک شانلندر .

یدنجیسی

غث و سمینی یعنی ضعیف وقوی بی، حق و باطلی، شمال و یعنی  
یعنی خطا و صوابی فرق وتمیز ایدهمیه رک حاطب لیل (\*) کبی  
بولدقلرینی جمع ایدن مقلدلردر . یازیق بونلره و باخصوص بونلری  
تقلید ایدنلره .

والحمد لله اولاً و آخراً و ظاهراً و باطناً

(انتهی)



(\*) حاطب اودون جمع ایدن اودونجی به دینور و عربلر ( هو  
حاطب لیل ) دیرلر ( محلط فی کلامه ) معنائنه یعنی کیجه قرانلغنده  
اودون دوشیرن کسه الننه پکرسه الدینی کبی بودخی خلط کلام  
ایدوب لسانه رطب ویابس نه کلورسه آنی تفوه ایدر و حاطب  
اسماندر؛ ( حاطب ابن ابی بلتعه ) اصحابندر . ( قاموس ) .

## محاضرات ❧ ❧

مقطعات

نومرو ۵      برنجی جلد ۱      جمادی الاولی

حافظ شیرازی مرحومک بریتنی شرح ایچون  
(جلال دوانی) حضرتلری جانبندن تألیف اولنش  
رساله ترجمه سندن مابعد:

### دردنجی مقدمه

عنایت صمدانیه جله عالمک نظامنه من حیث الکل متعلقدر .  
و مصالح جزویه مصلحت کلیه راجعدر؛ معمار بر بنای انشا  
ایده جکی وقت من حیث المجموع اول والیق اولسنی نظر اعتباه  
الدیغی واول بنا - هر جزوی آرو آرو نظر دفته النجه الیق  
کور غمزه سده - من حیث المجموع معمارک تعیین ایلدیکی صورته  
لایق و مناسب اوله جغی کبی قدرت ربانیه عالمی طرح و ایجاد  
تعلق ایلدکده عالم - اجزاسنه خاصه نظر اولنجه خلافه الیق  
کورینور سده - ینه من حیث المجموع انسب واصلح اولشدر .  
ائمّه کشف و شهود عالمک اصلح صورت اوزره بولندیغی اثبات  
وایضاح ایچون دیمشدر که نظام کل عالمده واقعدن الیق بروجه  
ممکن اوله ایدی البته عالم اولصورت ووجهده اولوردی . ممکن  
ایکن اولماسی ایسه ایکیدن خالی اوله من یعنی اولوجه الیق واصلح  
حق تعالی به یا معلوم ایدی یا دکل ایدی؛ معلوم اولماق ممکن اوله من

زیرا عالم هر حقائق اولان جناب قادر مطلقه اسناد جهل لازم  
کلور حق تعالی جهلدن منزهدر، معلوم اونجه خلق و ایجاد  
ایلامسی یا قادر اوله مامسندن و یا خود اسیر که مسندن ایلر و کلک  
طبیعیادر قادر اوله مامسی صیجز، اسیر که مسی بخلدن جناب حق بونلردن  
قطعیاً منزهدر .

### «تعالی الله عما یقول الظالمون علواً کبیراً»

بو بر دلیل متین و برهان مبیندر که حجة الاسلام امام غزالی  
رحمة الله علیه بعض مصنفاتده بیان بیورلمش واکا برائمه کشف  
و شهود جانبندن بغایت تحسین ایدلمشدر .

اشته بومقدمات صحیفه خاطره منقوش اونجه شرحی صدندده  
بولندیغیز بیتک معناسی حجاب خفادن کمال سهولتله منصه ظهوره کلور؛  
زیرا ایکنجی مقدمه دن معلوم وهویدا اولدیکه ابتداسی اولان  
هر فعل حضرت حقه مستندرر و اوچنجی مقدمه دن تعین و تحقق  
ایلدیکه افعال ربانیه مصالح و حکم کلیه یی متضمن و شاملدر و در دنجی  
مقدمه دن ثبوت بولدیکه عنایت صمدانیه کل عالمک نظامنه من حیث  
الکل متعلقدر .

ایمدی هیچ بر فعل خطا اوله مز؛ چونکه افعالده خطا مخالفت  
مصلحت دیمکدر دنیاده هر نه که وارد نظام کل عالمده متضمن مصلحت  
و حکمتدر . نعوت مصلحت جزویه نظر دفته التدقه غیر مناسب  
کورینورسده مقصود بالذات مصلحت کلیه عالم اولوب هر فردک  
تربیتی اول نظام عالمه مناسب صورتهدر و افرادک من حیث الخصوص  
صلاحی مقصود دکلدر بلکه اول افراد مائل مصلحت کل در .  
بویله اونجه کافر مفلس مثلاً بوصفته بولنیمه ایدی نظام عالمه خلل  
طاری اولور ایدی و هر فرده هر وقت بصورتله اعتبار ایتک لازمدر .

بو وجهله هرنه كه موجود در صورت مشروحه اوزره اولمى  
لابدر غایت امر اونك كیت و كیفیتی احاطه دن عقول بشرک  
عجزینه دالدر هر حالده سر قدرت نظر انسانیدن حجاب عزت  
واختفاده در و بومباحثه نك محصول ( والله خلقكم و ما تعلمون ) مضمون  
جلیل مقتضاسی اوزره حق تعالی دن غیرى فاعل حقیق موجود  
اولدیغنی مبتدر .

در کون و مکان فاعل مختار یکست

در مشهد عاشق دل و دیدار یکست

از روزن عقل اکر بیرون داری سر

روشن شود و کین همه انوار یکست

ایمدی هر فعل که ممکناند در حق تعالی نك مخلوقیدر و من حیث  
الكل متضمن صلاح کلدرد و بوحیثیله صواب اولوب بناء علیه  
افعاله نسبت خطار هین جواز اوله من اشته حافظ مرحوم بوحقیقی  
بیان ایچون :

پیرما گفت خطا بر قلم صنع نرفت

دیمشدر . یعنی : ( هرنه شیکه خامه صنع ایله لوح وجوده نقش  
و تسطیر بیورلمشدر البته متضمن مصالح و حکم و موافق نظام کل عالمدر  
و البته صوابدر و خطایه نسبتنده کی امکانسزلق بی شک و یرار تیابدر ؛  
زیرا صانع حقیق جل و علایه اسناد خطا لازم کلور بونك بطلائی  
ایسه ظاهر و باهر در ) حقیقتی بیان قصدیله خطانك افعاله نسبتی  
نی ایتمشدر .

مادامکه فاعل و صانع یالکز حق تعالیدر اقواله دخی نسبت  
خطا جائز اوله من ؛ زیرا فاعل حقیق یره اسناد خطا لازم کلور

بولنده بردغدغه ده بولنلور ايسه بونی (خلق کذب کذب دکدر  
(\*) بناء عليه حضرت موجد حقیقی به نسبت نقص لازم کلمز ) جوابيله  
رد ایدرز .

هیچ شبهه یوقدرکه عالمده اقوال کاذبه بی ایجادک نظام کله سائر  
افعال موجودات کبی دخلی واردر اويله اونجه ایجاد عین صوابدر  
بو حالده خطا یعنی واقعه عدم مطابقت صفت قول اولمش اولور .  
بونک ایچون شاعر، خامه قدرت نقش خطیئات ایلدیکنی بیان ايله  
افعاله نسبت خطا ایلان نظر قاصر اربابی ایقناض ضمنده مصرع  
اولی انشاد ایلش وبوحقیقی رؤیت ایدن نظر پاک اصحابی تحسیناً  
دخی :

### آفرین بر نظر پاک خطا پوشش باد

دیشدر . یعنی : ( برطاق دیدۀ ادراکی غشاوۀ تقلید ايله مستور  
قالمش کوتاه بینان فاعل حقیقی به اطلاعدن ومصالح کلیه نظام عالمی  
احاطه دن قاصر ايسه لوده هرشیئی فعل فاعل حقیقی وموافق  
مصلحت کلیه نظام عالم اوله رق صواب بولندیفی کورنلرک نظرلری  
خبار کدورتدن پاکدر، خطا پوشدر . یعنی : انظار قاصره به  
کورینان خطا حقیقت بینان نظرندن پوشیده در ) بیورمشدر .  
بعض انظار قاصره اصحابی شوایی مصرعک مفهوملری یکدیگره  
مغایردر؛ زیرا برنجیسندن خطانک اولدیفی اما ایکنجیسنندن اولدیفی

(\*) کتب کلامیه وحکمیّه مطالعه سیله اشتغال بیورانلره معلو .  
مدرکه اراده رضایی استلزام ایتمدیکندن خلق کذب کذب اولماز .  
وکذلک کذب، واقعه غیر مطابق خبردر یاخود خبرک واقعه عدم  
مطابقتدر شو حالده مؤلف رساله نک بیان ایلدیکی کبی خطای قولی  
دیملدر .

تفہم ایدلیور دیشلر ایسده اصلا مغایرت یوقدر؛ چونکہ ایکنجی مصرعده مذکور اولان خطادن مراد دیدہ ظاہرینہ کورینسان خطادر . خطای واقع وجدی دکلدر . بونک ایچون او خطای صوری بی کورمیوب حقیقی رؤیت ومشاهده ایدن نظر پاک وصف وشنا ایدلشدر . نظر پاک ہرشیئی حقیقی اوزره کوراندرا کر حقیقہ خطا اولہ ایدی و آنی نظر پیران کورماش اولہ ایدی اول نظر پاک اولہ مز ایدی .

اللهم ارنا الحق حقاً وارزقنا اتباعه وارنا الباطل باطلاً وارزقنا اجتنابه والحمد لله جداً كثيراً وعلى النبي صلاةً وسلاماً

( انتہی )



### مقتطفات مشورہ

جناب رسالت صلی اللہ علیہ وسلم افندمزا « جاہل سخی ، عابد بخیلدن عنداللہ دہا مقبول ومحبوبدر » مآلندہ کی حدیث شریفی ابوہریرہ وحضرت عائشہ و « کذب رجالک حیضی ، استغفار طہارتیدر » مآلندہ کی حدیث شریفی حضرت سلمان و « کذب رزقی تنقیص ودعا قضایی ردایدرا » مآلندہ کی حدیث شریفی دخی ابوہریرہ رضوان اللہ تعالیٰ علیہم حضراتی روایت ایلشلردر .



فخر کائنات علیه افضل التحیات افسدمزك بعض احادیث شریفه سی «چوق سویلیانك خطاسی چوق، خطاسی چوق اولانك کناهی کثیر، کناهی کثیر اولان دخی مظهر عذاب سعیراواور» مألنده در بوحالده برآدم برسوز سویلیه جکی وقت دائماً ذکر الله بولنان و امر بالمعروف ونهی عن المنکر ایده جك کلاملری اختیار وانتخاب ایتلی، کندوسنه لازم اولیه جق ومناسبت آلیه جق سوزی سویلیکدن اجتناب ایللیدر. سوزی یواشجه سویلیك لازمدر؛ زیرا سسلرك اك فناسی باغر مقله حاصل اولور حتی جناب حق فرقان کریمنده (واغضض من صونك) الایه بیورپور.

جارالله الزمخشری رحه الله علیه دخی اطواق الذهب فی المواعظ والخطب نام اثر برکزیده سنك آلتنجی مقاله سنده شویله دیور:

سنجه انجق ایشلدکدن صکره معلوم اواه بیلان اعمال و افعالك - آنلره دها میدانه کلدن سندن ایو وتمامیله خیر اولان - جناب حق ایچون دکل می؟ استدک، استمدک شیلر حقنده ایتدک دعا - استدکنه استمدککه سندن ایو واقف اولان - مجیب مطلق ایچون دکل می؟ یا اوایله درده نه یه دوهلر کبی

باغریورسین؟ بیلزمیسین که باغرمق صاغیره خطاباً لازمدر؛  
 سمیع وعلیم اولان رب العالمینه قارشو هیچ اویله باغریورمی؟  
 اویله ایسه صوص، باغیرمه! آغزینی مهرله؛ زیرا  
 دوه‌ک ایوسی سس‌سز، اوقک ایوسی صداسز؛ مکتوبک  
 خیرلیسی، فائده‌لوسی مهرلی اولور؛ ایچله‌جک شیئک  
 مقبول ونافعی وتمیزی قبالو قابده طورور.



حضرت علی رضی الله عنه :

ملایمتله سوز سویلیانلر شایان محبتدر؛ بر اثر محو  
 وهلاک اولسه بيله ینه قدری یلنور. هرشی ایچون  
 برقیمت اولدیغی کی انسانک قیمتی ده حسندر؛ سؤالی  
 استدککن ایت؟ زیرا اونک عبدی، احسانی دیله‌دککه  
 ايله! زیرا اونک امیر و مالکی اوله‌جقسین.



مولانا عبد الرحمن جامی قدس سره العالی رساله نوربخش  
 توحیدده ذکر ایلشدر:

معلومک اولسونکه دین محمدی شریعت، طریقت  
 وحقیقت ايله تمام اولور حتی جناب رسالت صلی الله علیه  
 وسلم «شریعت اقوال، طریقت افعال، حقیقت احوال،  
 معرفت رأس مالم در» بیورمشدر.





امام قشیری اسماء الحسنی شرحنک (اسم ملک)  
 بخشنده ذکر ایتشدر:

امرادن بری صلحادن بر ذاته «دیه بندن نه دیلرسک»  
 دیمسی اوزرینه «سن، بنم مملوک و مغلوب اولان ایکی  
 شیئک مغلوب و محکومی اولدیغک حالده بکا بویله  
 بر سوزی نصل سویلیه بلیورسک» خطابه مظهر  
 اولمش و او ایکی شیئک نه اولدیغنی سؤال ایتسی اوزرینه  
 «بونلر حرص و هوا درلر بن آنلره غالب حالبوکه انلر سکا  
 غلبه ایلشدر و بن انلره مالکم حالبوکه انلر سنی تصرف  
 ایتشدر» جوابنی آلمشدر.



کتاب الشفاده محرردرکه ابویزید بسطامی علیه رجه  
 الباری برامامک ارقه سنده نماز قیلش و نمازدن صوکره  
 امام جناب بسطامی به «سَنک رزقک نره دن کلور» دیه  
 صور مسیله حضرت مرشد کامل «او یله ایسه سنکله  
 قیلدیغیم نمازی اعاده ایدهیم» دیمش و امام سبّینی صور دقده  
 «زیرا سن رازقنی بلیورسک رازقنی بیلیمانک ارقه سنده  
 صلوّه جائز اولمز» جوابنی ویرمشدر.



## ﴿ مقتطفات منظومه ﴾

ابو الفتح البستی مرحومک قصیده الحکم والامثالندن  
( مابعد )

من كان للعقل سلطان عليه غدا      وما على نفسه لحرص سلطان  
من عاشر الناس لاق منهم ونصباً      لأن سوسهم وبغى وعدوان  
ومن يفتش عن الاخوان قلبهمو      فجل اخوان هذا الدهر خوان  
من يزرع الشر يحصد في عواقبه      ندامة ولحصد الزرع ابان  
من استنام الى الاشرار نام وفي      قصصه منهمو صل وثمان  
كن ريق البشران الحر همته      صحيفة وعليها البشر عنوان  
عقله حكم ونفوذ قصدنده بولسانلر زبون حرص  
وشهوت اوله رق نفسلرينه غلبه وتحكم اقتدارندن محروم  
قالورلر .

خلق ايله اعتياد معاشرت موجب ابتلاى كدر  
ومصيبتدر؛ زيرا اكثر ناسك طبيعى مائل بغى وعداوت در.  
قلوب اخوان دهري تفتيشه قالقشانلر اكثرنده  
خيانتك مضمير اولديغنى كوررلر .

زارع شر عاقبت بر كون حاصد ندامت اولور .  
اشرار ناسدن تغافل ايدنلر كوملكنده ييلان چيان  
اولديغنى حالده او يخويه وارمشله بكررلر .  
مسرور و مبتهيج كورنمكه سعى ايله؛ زيرا كريم الشيم

اولانك عنوان صحيفه همتي سرور و بهجت در .



حضرت علي كرم الله وجهه حضرت فاطمه رضي الله عنهماك قبر سريفي زيارتنده شوي له سويلشدر :  
وان افتقادی واحد بعد واحد دليل على ان لايدوم خليل  
يعني : بربری آردنجه بر قاچ ذاتي غائب وضايع ايديشم ،  
دنياده دوستك دوام ايتديكنه دليلدر .



ومن سره ان لايري مايسوئه .  
فلايتخذ شيئاً يخاف له فقدا .

بر كسه كندوسنه مورث حزن اوله جق شيلري  
كورمك استرسه فقدانندن قورقديغي اتخاذايتسون .



مثل الرزق الذي تطلبه مثل الظل الذي يمش معك  
انت لا تدركه متبعاً فاذا وليت عنه تبعك  
يعني طلب ايلديكك رزق سنك ايله برابر يوريان  
كولكه كيدير كولكه سنك او كنده كتديكي حالده بر دورلو  
يتيشه مزسك اما بر كره يوز چوپردكي او سنك ارقكدن  
كلكه باشلار .

شو مفهوم اوراق پریشانك برنجی جزوی اولان  
صلاح الدين ابو بي ترجمه حالنده مندرج عبارة آيه ايله

بك كوزل افاده ايدلمشدر : ( دوات دنيا كولكه يه بکرز  
کیم ارقه سنه دوشرسه اوکندن قچار کیم یوزینی چویرر  
سه اردندن کلور . )

بو مألده برده مثل عربی واردر : سن رزقنی استمدبک  
وقت رزق سنی استر .



چشم مست شوخی و بی باکی از حد می برد  
کرچه می بیند بفرق خویش-تن شمشیر را  
آئیده کی بیت بونک مألّاً ترجمه سی دیمک ایسه ده ده  
پارلاق اولدیغی ذوق سلیم اربانه خفی دکلدن :  
چشم مستک و ای نه فتاندرکه پروا ایلن  
سل سیف ایتمش ایکن ابروی خونخوارک سنک



— ابن یمین —

ای دل مطلب زدیکران مرهم خویش !  
می باش بهر درد دلی محرم خویش !  
تنها بنشین خود همی خور غم خویش !  
درهم دمر آرزو کند همدم خویش !

نظماً ترجمه سی :

ای کوکل درمان دردی دیگرندن بکلمه  
محرم اول کندک ینه کندی درونی دردیکه

طالب همدم اولان جمع هموم ایلر مدام  
کوشه و حنده صبرایت کندی درد سربیکه



بیلک استرسه ک اکر عدد آیاتی  
جمله سی الی بیك والی یوز التمش الی  
بیکدر وعد بیانده آنک بیکی وعید  
هم بیکی امر عبادت بیکی نهی وتهدید  
بیکی امثال وعبر هم بیکی اخبار وقصص  
بشیوز آیاتی حلالیله حرامه مختص  
بولدی یوز آیاتی تسبیح و دعاده چو رسوخ  
التمش التیدی دخی آیت ناسخ منسوخ



کریم اودر که مجازات عفو ایده خصمه  
فلک مساعده انتقام ویرد کجه



بسملکه فرزند خلیلی بوری سیرابت  
کور مرحت عشقی که قرباننه قیز



نکه انداز ستم اوله کوکل کسر ایتمه  
ایتمه مرآتی شکسته سنی چوق صورته قور



## - افاده -

ترجمه سنی مجموعه مرده پارچه پارچه بولندیرمغه  
ابتدار ایلدکمز ( کتاب کشف الاسرار عن حکم الطیور  
والازهار ) نظیری مفقود بر یادگار قیمت دارد؛ ازهار  
وطایرات، اشجار و حیواناتک اطوار و مشوارلریله عرض  
انظار اولی الابصار ایلدکمری حقایق و اسراری تصویر  
وتذکار ایدن بتون آثاره رجحانی اربابی عنندنه آشکاردر.

بوکتاب مندرجاتندن شمدی یه قدر (محاضراته)  
درج ایلدیکمز اوچ اشارت رجحان مجعوثی اثبات  
ایلدیکی ومؤلفی اولان حضرت ابن غانم مقدسی  
مرحومک غرب ادباسندن بویولده اثار صاحبی  
بولنانلر کی مشاهیرک نه درجه لده مافوقنده  
بولندیغنی مرتبه تحقیقه ایصال ایتدیکی جهتله دهاز یاده  
تفصیلدن اتقا لزومی بدیدارد.

همان جناب حق واقف دقایق ، کاشف حقایق  
اولان مؤلفک روح شریفی شاد بیورسون .



## ﴿ کتاب کشف الاسرار عن حکم الطیور والازهار ﴾

— . مقدمه . —

بسم الله الرحمن الرحيم رب يسر واعن الحمد لله القريب في بعده  
البعيد في قرب به المتعالي في جده عز عن هزل القول وجده الذي  
اودع كل شيء حكما وجعل العقل بينهما حكما ليميز بين الشيء  
وضده فن فكر بصحيح قصده وتوفيق رشده علم ان كل مخلوق  
في قبضتي شقائه وسعده مرزوق من خزان نعمه ورفده مايفتح الله  
للناس من رحمة فلا يمسك لها وما يمسك فلا مرسل له من بعده  
(احده) واسأله التوفيق لخدمه سؤال عبد خائف وعبد راجيا لوعدده  
وان من شيء الا يسبح بحمده .

ایمدی عین تحقیق ایلہ نظر، نور توفیق وهدایتله  
مدبصر ایدرک کوردمکه هر مخلوق معترف وجود  
خالق، هرصامت حقیقتده ناطق در. عبارات و اشاراتدن  
استطلاع واستدراک ایلدمکه هرشی قریت فنا وارتحالی  
مشعر و مترجم اوله رق لسان حال ایلہ عرض مافی البال  
ایدیور. شو لسان حال بکا لسان قالدن افصح کورندی؛  
چونکه لسان خبر محتمل تکذیب و تصدیق، زبان عبرایسه  
انجق ناطق بالتحقیق در. اشته بن بوصورتله حیواناتک  
اشارات و رمزندن، جماداتک ایما و غمزنندن استفاده  
واستدراج و ازهارک لسان حال، طیورک دخی تحریء محل  
قرار و ارتحال ایلہ بکا ایتدکلری خطا بلردن استخراج

ایلدیکم سرأرك ترجانی اولق اوزره بوکتایمی تصنیف و ( کشف الاسرار عن حکم الطیور والازهار ) نامیله توصیف ایلدم . بوکتایم موعظه اهل اعتبار و تذکره سلیم الافکاردر .

فاعتبر وا یا اولی الابصار

آنده مندرج امثال و حکیماتی بحق مطالعه ایدن واقف حقایق کونا کون اولور؛ نظر عبرت وامعان ایله باقیان ایسه مأیوس و محزون قالور . هر حالده استناد واعتماده احق واستعانه واستمداده الیق اولان جناب حقک توفیقات صمدانیه سنه کووه نهرک سوزه شروع ایدیورم :  
بر کون ایادی قدمک میدان حدوثه احداث و اختراع و حکمت بالغه نیک عبث اولیه رق ایجاد و ابداع ایلدیکی شیلری کورمک اوزره متفکراً چیقمش ، بر روضه دلکشایه واصل اولمش ایدم .

اما نه حدیقه فرح فزا ! زمینی تزیین ایدن چیمنلر حقیقه نظر ربا؛ هواسی کرچکدن حیات بخشا؛ نخل و عیدانی پیکران سروقدان کبی خرامان؛ میلان اغصانی جداً تماشایه شایان ایدی . آنده کی ازهار کونا کون دانه دانه ژاله لاله مشحون ، اشک ریز فراق اولان ترکس قتان جانندن نمونه نمون ایدی .



ارزوی اعتلا ايله صارلديغي جداردن تأثير هبوب  
 نسيم ايله مجبور فراق اوله جق قدر دوچار اضطراب  
 وتلاش اولمش صارماشقلرينك حزين حزين خشرديسي،  
 يكديكريني تحسيرانه دراغوش ايتش ايكي عاشق شوریده نك  
 زبون پنجه رقابت اوله رق بلای فرقه دوشدكلى  
 صروده سامعه خراش اولان نالش وكر يانلى كى مستلزم  
 حزن درون ايدى .

نه خوش، نه طاتلى بر عالم سكوت وتنهائى! آيا نه  
 اولوردى بو پرده بر يار وفاشعار ايله برابر بولنسه،  
 انكله حسبال ايتسه ايدم؛ بن نظر تماشاه تصادف  
 ايدن اشجار وازهارى سيرايلر ايكن، بو اندیشه ايله دخى  
 مبهوت وحيران قالمش ايدم؛ منظورم اولان هر شى لسان  
 حال ايله بكا عرض مافى البال ايلدى؛ و ديديكه بزدن  
 احسن ندیم، بزدن احسن مجيب مى اراپورسك! بلکه  
 شمدى بوراده بولنان اشيا لسان حال ايله بيان حقيقت  
 ايلرلر و قربت ارتحاللى حقنده نفسلرينه عتاب وندا ايله  
 اشتغال ايدرلر اكر ذوق سليم صاحبي ايسهك اولنلى  
 ديكله !



## قلم صنع حقده سهواولز هب خطابین اولانلر احمقدر

مفتی الثقلین عنوان جلیلنه بحق احرا اولان ابن کمال مرحومک شوییت حقیقت ینانه سی حافظ شیرازی نیک - شرحی دردنجی و بشنجی نسخه لرمز ده - مندرج - بیت معلومی مؤکد و مؤید اولوب طبع سلیم و فکر مستقیم اربابی بونده هب اتفاق ایشلر سه ده محروم هدایت اولان بعض انظار قاصره صاحب لری وادی خلافه کتمش، فضای حیره دوشمش، اعلان غفلت و بلاهت ایشلر در؛ حتی ابن راوندی برنجی نسخه مزده - مندرج اولوب «اشیای موضعه وضع و عز و ذلی تفریق ایدنه متعجانه تسبیح ایدرم؛ نیجه عاقل کامل واردرکه طریق معیشتده مصادف اولدیغی صعوبات و مشکلات کنیدیسنی دوچار عجز و مسکنت ایشلدر؛ اما نیجه جاهل غافل واردرکه مرزوق و منعم کوررسین؛ اشته شو حال اوهای مستغرق حیرت ایتدی، عالم تحریری دخی زندیق ایلدی» مانده بولسان اوچ بیی انشاد ایله بیان حیرت، فاما اشاعه کمال غفلت ایشلدر.

ابن راوندینک بوسوزلرینه و کړک آنک کی اقوال سخیفه اربابنه جواب اوله رق ایراد ایدیله جک براهین مینه، دلائل متینه موجوددر. بونلردن بری مدینه علمه باب و بابی طالب یقینه مآب اولان جناب

مرتضوی رضی الله عنه و کرم الله وجهه جانبندن انشاد پیورلدینی کتب معتبره ده بیان اولنان ایکی بیتدر که (۱) برنجی نسخه ده و ابن راوندینک او ایاتی زیرنده مندرج ایدی مألیده شودر:

« نیجه ادیب واردر که فہیم القلب ، مستکمل العقل ایسہ ده فقیر وغیر مرزوق و نیجہ جہول واردر کہ کثرت مالہ مغروق بولنور بودہ عزیز و علیم اولان جناب حقک تقدیردر »

مذکور نسخه ده و عرض اولنان مألده کی ایکی بیتک التندہ بر جواب منظوم دہا وار ایدی آنک مألیده بودر :

« حکیم عادل واقوم اولان ربک عاقلی مال کثیردن محروم ایتمی اغریمیدر ؟! حضرت عادل عظیم و جناب رازق کریمک بومشیتی ظلم دکلدر انجق حکمت شناس کچینان او عاقلک عجز و مسکتنی اظهار و تقہیم ایچوندر »

بولنردن بشقہ بر جواب دہا وار کہ فضلی دمشقک سربلندی منیر زادہ صالح افندی جانبندن تنظیم و ارسال ایدلمش و بومقالہ ده بولسدیرملق اوزرہ مجموعہ مزہ درج ایدلمیہرک الیقونلش ایدی؛

اشتہ شمدی ذکر ایدیورز :

الرزق علم و مال فی الوری قسما  
حکمة ہا کھا ان رمت تدقیقا

اعطی اولی العقل عقل واولی جہل  
مال لنعلم عدل اللہ تحقیقا

(۱) اونسخہ ده بویتلرک فخر رازی حضرتلرینہ نسبتی یازلمش ایسہ ده جناب مرتضانک آثارندن اولدینی اکثر کتب معتبرہ ده کوریلور.

## وفی الوری من اذا ستغنی طنی وبنی ولاینال مدی الایام توفیقاً

یعنی؛ « رزق بین الانام لحکمة تقسیم ایدلش علم و مالند  
عبارتدر تدقیق ایتک ایستر ایسه که علم عاقله، مال ایسه  
جاهله اعطا اولمشدر بوده عدل الهی حقیقی وجهله بطولکمزن  
ایچوندرد. خلق میاننده بر طاقم آدمدر وارددرکه غنی اولنجه بنی  
وطغیان ایدرلر؛ اشته آنلر مدت انعم مظهر توفیق اوله منزل »

جواب اول بغایت متین و اساسلیدر زیرا بونده ( ذلك تقدیر  
الغریز العلیم ) نص ساطع و حکم قاطعندن استدلال ایدلش  
و مرزوق اولمیان چوق کامل، کثرت ماله ایرمش چوق جاهل  
بولنمسی مقتضای تقدیر الهی اولدیغی اکلا دلمشدر.

بحث قضا و قدری تحقیق ایتماش، کندینی خارجی بر قوتک تحت  
نفوذنده کی آلات منزلده سنده صائش اولانلر ( مقتضای تقدیر  
الهی ) سوزینی ایشیدر ایشتمز ابن راوندینک اصابت حیرت  
نابحاسنه ذاهب اولاملیدرلر و بیلیدرلرکه انسانک دنیوی، اخروی  
هر نائل اولدیغی شی کندی مکنتسبی بولندیغی نصوص جملیه ایله  
ثابت ایسده « ان الله خلقکم وما تعلمون » آیت کریمه سنک مقتضاسنه  
کوره انسان علی ایله برابر اثار تکوین الهیدر .

افانم ائمه کشف و شهوددن امام طائی محیی الدین عربی قدس  
سره العالی فصوص الحکمک ( حکمت قدریه فی کلمه عزیزیه )  
فصنده بیان ایتدیکی اوزره « قضا جناب حقل ازلده اشیا اوزرینه  
حکمیدر حقل اشیا به حکمی اشیاده و اشیا ایله اولان عملک حدی  
اوزره در اشیاده اولان علم الهی ایسه آنلرک استعدادات ذاتیه لرینه

کوره حضرت خالقه عرض ایتدکری معلومات نسبتده در . قدر ، اشیانک عینده ثابت اولان احکامی ( یعنی ویردییی معلوماته کوره علم الهی حصولیه اصدار واعطا اولنان حکملری وحالری ) زیاده ونقصان اولقسزین توقیت وتقدير ایدر . قضای الهینک اشیا اوزرینه اولان حکمی انجق او اشیانک عینده ثابت احواله کوره در اشته بوسبیدن جناب حق ایچون حجت بالغه واردر . یعنی شینک هر حالی کندی مقتضای استعدادی اولسنه مبنی هیچ بر حالندن شکایتیه حق وصلاحیتی اوله ماز ؛ عالمک ضرورتی ، جاهلک ثروتی کندی مقتضای استعداد و محصول سعی وغیرتی بولندیغندن غافلانه شکایت ایتسه بيله استماعه دکر .

سوزی براز دها ایضاح ایتک ایسترایسه ک حضرت امامک توضیحاتنده دوام ایده لم : مشارالیه افادات مرشدانه سنی دها سهل التفهم قلیق ایچون دیورکه ؛ « حاکمه عین مسئلهیه تابعدر زیرا مسئلهیه اولان حکمی ذات مسئلهک اقتضا ایلدیکی حکمدر بوجتهله محکوم علیه دخی حاکمک ویردییی او حکمه حاکم اوزرینه حاکمدر و بناء علیه حاکم ویردییی حکمه محکوم علیه اولور . بوندن صوکره حضرت امام بین الانام کوریلان عدم تساوی مرزوقیت بحشه انتقال ایدرک دیمشدرکه : « جناب حق فرقان کریمنده ( خلقلک بعضیسنی بعضیسنه رزقده تفضیل ایتدیکنی ) بیان پیورمشدر . رزق ایه یا علوم کبی روحانی ، یا اغدیه مثلاً وجسمانی اولور . جناب قادر خلق اوزرینه رزق انجق قدر معلوم ایه تنزیل ایدر ؛ قدر معلوم خلقلک حقدن طاب ایتدیکی استحقاقیدر زیرا جناب حق هر شیئه استعداد ذاتیسیله طلب ایلدیکی حکمی مستحق اولدینی حالی اعطا ایتشدر ؛ رزق مشیتک تعلق ایتدیکی قدر تنزیل ایدر ، مشیتی ازله عالم اولدینی و اوعلیه حکم

واراده ایلدیکیدر . علم الهی دخی دیدکز کبی معلوم کندی  
استعدادیله نفسنده اعطا ایلدیکی معلومات نسبتدهدر . ایمی توقیت  
وتقدیر ، اصلده معلوم ایچون اولوب قضا ، علم ، ارادت ، مشیت  
عین ثابتیه تابعدر « شو تفصیلات ، تقدیرک نه اولدیغنی ایضاحه  
شمذیک کفایت ایدر ایلروده محاضراته ذیل ایدیله جک بررساله  
مخصوصه بالاطراف توضیح حقیقت ایلجه جکدر .  
( مابعدی وار )



### مقتطفات مشوره

حضرت فخر کائنات علیه اسنی التحیات افندمن  
حضرتلرندن روایه جامع الفضائلده مسطور حدیث  
شریف مألیدر :

علم ایکیدر ؛ بری علم لسانیدر بوده نوع بشر ایچون  
بر حجت الهیهدر ؛ بر یسیده علم قلبیدر اشته بوده مفید  
ونافعدر .



جلال دوانی مرحومک ( لوامع الاشراق فی مکارم  
الاخلاق ) نام رساله سندن مقتطفدر :

جناب حق فرقان کریمنده ( وما خلقنا السموات  
الآیه یعنی « بزسموات وارضی وینلرنده اولانلری لعب  
وعبث اوله رق خلق ایتدک » و ) افحسبتم انما خلقناکم

عبثاً) (الآية یعنی «آياسزظن ایتدیکرمیدیکه بزسزی  
عبث اوله رق خلق ایتش اوله لم و طرفزه رجوع  
ایتمه جکسکز» بیورمشدر. بوا یکی نیرقدسینک پرتو  
اشعه سیله بینایان منظر تحقیق ایچون معلوم ومشهود  
اولشدرکه ممکن غیبدن منصه شهود ده جلوه کر  
وکلکونه (صبغة الله ومن احسن من الله صبغة) ايله  
آراسته اولان اکوان وحقائق علم امکاندن هربری  
«اعطى كل شئ خلقه ثم هدا» حکم جلیله - کندی  
ثمره سی منزله سنده اوله رق - برغایت ومصلحتی متضمندر.  
زیرا دلائل ساطعه و براهین قاطعه ايله مثبت اولدیغی  
اوزره فعال برحق وجواد مطلق اولان جناب رب عزتک  
فعلی غرضله معلل اوله مزسه ده حکم ومصلح و غایات  
و ثمراتدن خالی دکدر. خلاصه اکوان وعین اعیان  
ونقاوه جهان اولان انسانک غایتی دخی (انی جاعل  
فی الارض خلیفه) و (هو الذی جعلکم خلایف الارض)  
نصوص جلیله سی احکام لطیفه سیله رهین رتبه بدهت  
اولدیغی اوزره خلافت الهیه در. اکر «بزمانتی سموات  
وارض وجباله عرض ایتدک انلر اول امانتیه تحمیلدن  
خوف و ابا ایدوب دفعنی رجا ایتدیلر آنی انسان  
یوکلندی» الخ مضمون منیفی احتوا ایدن (انا عرضنا

الامانة) الآية نص لطيفه کی « امانت » تفاسیر مشهوره ده مسطور اولدیغی اوزره عقل ویا تکلیفه محمول اولورسه نحملاک انسانه اختصاصی لازم کلز؛ زیرا جنی وملائک عقلده انسان ایله مشارک اولدیغی کبی تکلیفه دنخی جنی انسان ایله مساهم ومشتکر . حال بوکه ذوق سلیم اربابنه خفی اولمادیغی اوزره امانتک انسانه اختصاصی فهم اولنیور بناءً علیه امانتک سرخلافت الهیهیه محمول اولسی مناسب اولورکه اکا یالکز انسان تحمل ایده بیلمشدر :

بار وجود خویش نتابد دلم رضعف  
لیکن زبار عشق کشیدن ضعیف نیست

اسمان بار امانت نتواند کشید  
قرعه کار بنام من دیوانه زدند



بعضلر عقل ، مقادیر اشیا به قولاً وفعلاً وقوفدر ، بعضلرده عواقبه نظر در دیمشدر ؛ متکلمین ایسه عقلی ، انسانده حصولی حالنده تکلیف صحیح اولان علومدر دیه تعریف ایتمشلدر .

بر طاقم فضلاده « عاقل ، نفسنی محارمدن صیانت



ایندرد بناءً علیه جناب حق بونکله وصف صحیح اولماز «  
بولنده اداره کلام ایتدکری کی برطایقه «عقل، جمیع  
شهواته رقیب وغالب اولاند» تعریفی درمیان ایتلدرد.




بعض فضلا نظرندحق، قلت اصابت وکلامی  
موضعنک غیریده تکلم واستعمالدر؛ برطایقه سالب  
سلامت، مورث ندامتدر دیهرک ذم وتقیح ایتلدرد.



مباحثات علیه جریان ایتیان مجلس میوه سز بستان،  
حسن ادبدن محروم اولان نورسیدکان ایسه کسز  
حیوان، حیا وحجابی اولیان قادین طوزسز طعام ونان،  
خصلت سخا وجوانمردیدن بری اولان غنی نهر بی آب،  
عملسز علم ایسه فانوس بی شعاع وتاب کیمیدر.



ارباب اصالت ونجات اولاندلر تحصیل علم وکمال  
ایتدکجه متواضع اولورلر؛ صویسز ولیم اولاندلرایسه  
برقاج شی اوکرنکله تکبر وتعظمده بولنورلر.



هر شیده سرعتله جواب موجب خطاومتج زوال  
صواب، مشرب بوم وغراب ایله ائتلافدن عدم اجتناب  
موصل دار الخراب اولور.



ازدیاد شهوت موجب نقصان مروت ، اسائن  
و بطائن دخی مستلزم کمال نکبتدر .



علمی ، سلامت اخرویه بی استجلاب ایچون تحصیل  
موجب رشد و فضیلت ؛ سعادت دنیویه بی استحصال  
ایچون طلب ایسه باعث خسران و ندامت اولور .



علامت عقل اوندر ؛ بشی ظاهری ، بشی باطنی .  
ظاهری اولانلر ؛ صمت ، تواضع ، حسن خلق ، صدق  
قول ، عمل صالح . باطنی اولانلر ؛ تفکر ، اعتبار ،  
خشوع ، خوف ، ذکر موتدر .



عمر ابن عثمان المکی رحمة الله دیمش :  
مروت ذلل و خطیئات اخوانه اماله نظر دقت  
واهمیت اتمامکدر .



عمر ابن الفارض رضی الله عنه :  
دشمنه اظهار تجلد و ممانت نه قدر مستحسن و مقبول  
ایسه نزد احبا و اخلاده ملائمتدن ماعدا حال و حرکته  
بولنلق اول درجه شایان ذم و قدحدر .



فاضل کامل جار الله الزمخشري نك ( اطواق الذهب  
في المواعظ والخطب ) نام رساله سندن او چنجي مقاله :  
عمر ، رباح واعصار كي چار چابق كچر كيدر !  
سن ايسه آنك عصر لرحه دوامني ارزو ايدورسك !  
نه واهي امل ، نه بوش هوس !

اي فريخته آلايش دنياي بوقلمون ، وي مجلوب آرايش  
جهان دون اولان آدم ! ايو بيلكه نه ار عمر ك قيش  
كونلري كي سور كسر ، ليل حياتك ياز كيجه لري كي  
قيصه ودوام سزدر ؛ چاليش ، فرصتي الدن قاجيرمه ،  
اعمال صالحه قازان ، بر نوع اولوم ديمك اولان تنبل  
اويخوسنه لزوم سندن زياده مألوف اولمه ! طاعت  
و عبادتي كنديكه عادت ايدن !

اي انسان ! مغرور اقبال عالم فنا اولمه ، طريق  
معرفته همما رزن كحيل سرعت اولان رهروان عرفان  
اثرينه اتباع واقتضا ايدن كاربان سراي معارف و كمالاته  
مواصلته كامران اول ! بيابان جهل و بطائنه خائب  
وحيران ، سفيلى و سرگردان قلله !.



❦❦❦ مقتطفات منظومه ❦❦❦

ابو الفتح البستي رحمة الله عليكم ( قصيدة الحكم  
والامثال ) نندن مابعد :

دع التکاسل فی الخیرات تطلبها \* فلیس یسعد بالخیرات کسلان  
لاظل للمرء یعری من نهی وتقی \* وان اظلمته اوراق واغصان  
والناس اعوان من والته دولته \* وهم علیه اذا عاده اعوان  
سحبان من غیر مال باقل حصر \* وباقل فی ثراء المال سحبان

یعنی: خیرات و حسناتی ارزو اید یورسه ک تنبل کی ترک  
ایله؛ زیرا تنبل قسمی خیرات و حسنات ایله مسعود  
اوله مز .

عقل و ذکا و فضائل تقادن عاری اولان آدم ایچون -  
هر نقدر کن دیسنه دالار یار اقلر کورکه ایتسه بیله - بر ظل  
سلامت بولنه مز .

خلق، اقبال و دولته کامران اولان آدمه معین و ظهیر  
اولورلر اما او آدم اقبال و دولتن دوشرسه اولوقت  
بالعکس علیه نه کنه میل و معاونت ایدرلر .

سحبان نام فصیح مشهور بیله پاره سزا و لسه قریحه سی  
منسد اوله رقی باقل کی ابکم و لال قالور، بالعکس باقل پاره سی  
چوق اولنجیه سحبان درجه سنده فصیح اولور .



ملا جامی رحمة الله علیه :

فلما شمرت للسیر سلی

بکت عینای من خوف التنائ

تعانقنا لتودیع فقلت

چه بودی گرنبودی آشنایی

محبوبه‌م (سلمی) سیر و سفر ایچون حاضراندیغی  
زمان کوزلم خوف و هیجان فراق ایله ایشار دموع ایتدی  
وداع ایچون یکدیگر مرز صارلدیغمزده (کاشکه آشنالغمز  
اولییدی) دیدی.



سلطان :

چشم سرمست ترا عین بلامی ینم  
لیک ابروی تو چیریزست که بالای بلاست  
مستانه باقشلی کوزلرک عین بلادری؛ لکن قاشلرک او یله  
بر شیدر که بلانکده بالاسنده در.



لادری :

صبح دم یارم بیالین آمد و خندید گفت  
آفتاب بر سر آمد تو غمی خیری هنوز  
صباحلین جانانم باش اوجه کلوب کوا-دیده دیدیکه  
آفتاب باشک اوجه کلدی سن حالا قالمیورسک !



سنبلزاده وهبی :

لب بستانچه لك امك ايجون كریه ایدوب  
طفل بی دایه طبعم شكر و شیر استر



فہیم :

مومیانك ایدہ من تصویر بہرہاد خیال  
خامہ مو یاسہ کر مرکان چشم موردن  
اول طیب ناز سوردی سینہ م اوزرہ سینہ سن  
یارہ دل بولدی صحت مرہم کافوردن  
دور اولان خاک وطندن آہ ایدر بی اشتباہ  
بك مبرہندر بودعوی نالہ فغفوردن  
شہد راحت کسب ایدر تدبیر منزل ایلیان  
الدی ارباب حکم بو عہرتی زنبوردن  
صاف دل لر حفظ اسرار ایلمز افشا ایدر  
ستر می مأمول اولور می کاسہ بللوردن



آثار منظومہ ابن کمال

( حرف الالف )

عالمك يوق چور دمينه بقا عاقل اولان بونك نه سينه بقا  
اثريله بقا بولور آدم اهل خيرك اثرلرينه بقا

الصدق في اقوالنا اقوى لنا  
والكذب في افعالنا افعى لنا (۱)

عشق اولينجه سرده خروش ايلز كوكل  
دریا تموج ايليه من اولسه هوا  
( مابعد می وار )



( کتاب کشف الاسرار عن حکم الطيور والازهار )

- برنجی اشارت -

○ نسیم ○

حديقه ذات بهجه اطلاقه سزا اودلكشا بچهده  
اك اول لذت بخش دل وجان اولان حال لطافت نشان  
نسيمك خفيف خفيف وزان، لطيف لطيف الحان ايله  
احوالني بيان ايتسي ایدی؛ کویا بویله سويليور ایدی:  
بن هر محبك رجاسنی حيينه، هر عليلك شکواسنی  
طبيينه ايصال وایتان ومحلنه تبليغه مأمور اولديغم اسرار  
(۱) جناب استاذك جله آناری صنایع متنوعه دن وارسته  
اولمادیغی کبی «اقوالمزده صدق بزم ایچون اقوی، افعالمزده کذب  
دخی بزم ایچون افعی؛ یعنی انکرك ییلانیدر» مفهوممنده اولان  
شویتمدهده صنایع بدیعهدن ایکی صنعت وارددر؛ بریسی صنعت  
تضاد، دیکری صنعت تجنیس ملفوقدر.

واخباری ایشدیکم، حفظ ایتدیکم کبی نقل و بیان  
ایلرم. مصاحب و رفیقلمی لطافت موانستله استصحاب،  
صفوت انفاسله نشوویه یاب ایلرم. رفیقم ابو اولور ایسه  
بنده ابو، کوتو اولور ایسه بنده کوتو اولورم.

لطیف هبومله مریض و علیل صحت، نومید و مأیوس  
نجات و راحت بولور؛ مشتاق متنفس و پرمسار، عشاق  
متوسوس و بی قرار اولور.

هر حالمده ملایم الاعطاف، سریع الانعطاف، سهل  
الاتسلاف. بن اولسهم ارض و سما بینک خالی قاله جغی  
مطلق؛ نبات و اشجارک، شکوفه و ازهارک صولوب  
قورویه جغی محقق در.

رفق و ملایمتی ارباب لطف و رأفت، کمال صفوتی  
اصحاب ذوق و طبیعت بولور، مختلف صورته و زانم ظن  
ایته که اثر طغیان و عصیاندر؛ بن هر فصلده انفع و اصلح  
اوله رق اسرم: ریغده شمالدن هبوب ایدر آغاجاره  
صو یوروته رک رنگارنگ چچکلره زینت و یرر، نباتاته یغور  
کتورر، لیل و نهار ییننی تعدیل ایلرم؛ هر چچیکدن،  
هر چندن، هر آغاجدن، هر اوتدن، باخصوص عارض  
کلکونه دوگلش طره ردن کتوردیکم دلاویز، شوق انکیز  
بوی مشکین ایله مشام عاشق شوریده یی تعطیر ایلرم.



یازین شرقدن وزان ایدر اشجاری درلو درلو  
میوه لاله تزیین بعضلرینی کماله ایصال وتلذید، مشتاقلرینی  
نهایت سروره رهین ایلرم؛ شدت حرارتله بی تاب  
ومضطر قالمش، ساعد سیمینی، سینه لطیفی آجش،  
بالین استغنایه طیانمش نازنده لری تفریح ایلرم. فصل  
خریفده جنوبدن اسرم هراغاچ میوه سنی کماله  
ایردیره جک قوتی حائز اولور.

قیشین غربدن هبوب ایدرم اغاچلریو ککرندن  
قورتیلور حال اصلیلرینی بولور.

اشته بن نظر کده کی وجود سزلغمه برابر نقدر  
منفعتلیم؟!...

اثمار بمله نمودار، ازهار هبوبمله لطافت دثار، اشجار  
وزانمله متنفع ومسلوب الغبار اولور؛ اسخارده قرب  
اوقات زیارت اخبارمله یلنور.



## محاضرات

مقتطفات

نومرو ۷ برنجی جلد ۱ جمادی الاخره

{ اسلامیتده }

امر سعی . نهی بطائت

۔ ان الله يحب العبد المؤمن المحترف ۔

«طلب معاشده صناعت، یا زراعت یا خود تجارت ایله متکلف اولان عبد مؤمنی جناب حق سور» . حضرت عمر رضی الله تعالی عنه (برر جلی کوردیکمه صورت ظاهره سنی بکنیرم؛ بر صنعت و معرفتی اولوب اولمديغنی صورارم؛ یوق جوابنی الوریسه کوزمدن دوشر» بیورمشدر .

سعی و غیرت حضرت عایشه رضی الله تعالی عنہادن مروی اولوب (سز رزق و حوایج کزی و مصالح ضروریه کزی طلب و رؤیته ارکندن شروع ایدیکز زیرا وقت صباح تسویه مصالحه مظنه ظفردر) مال صدق اشمالنده اولان حدیث شریف ایله مدح

وتفضیل؛ کسل و بطائت « کثرت نوم و تنپوری انسانی  
جناب حقن تبعید ایدر و ایراث فقر ایلر » کلام لطیفی  
ایله ذم و تقییح بیورلشدیر .

چالشمق الزمیتی حضرت عمر رضی الله تعالی عنہک  
« سزلردن بریکز طلب رزقده کسل ایله خانه سنده  
اوطوروب یاربی بنی مرزوق ایله دعاسیله مشغول اولسون  
یلورسکز که الله سمدان کوش والتون یاغدیرمز » وعظ  
حکیمانه سی ایله ثابتدر .

بطائتک کمال مرتبه مضرتی حضرت مرتضی رضی  
الله تعالی عنہک « تن پرورلک حقوقی اضاعه، عجز  
و خوف فقر و فاقه یی تولید و هلاکی انتاج ایدر؛ سعی  
و طلب ایدن املنه ایرر وعدم طلب فساد املی موجب  
اولور » کلام ناصحانه سیله متحققدر. کسب و تجارت (الکاسب  
حبیب الله) ایله ممدو حدر امت محمد حراثت و زراعت  
( اطلبوا الرزق فی خبایا الارض ) امر نبویسیله مأموردر.  
محصول سعی و غیرت اولان ثروتک ممدوح اولدیغنه  
جناب رسالت پناه صلی الله تعالی علیه وسلمک « ورثه کی  
اغنیا اوله رق ترک ایتکلکک ناسه محتاج و فقرا حالده ترک  
ایلمککنندن خیرلودر » مفهوم منیفنده اولان حدیث شریفی  
دلالت ایدر .

مقدرات سبحانیه نك تغییرینه قدرت بشریه نك  
غیر مساعد اولدیغی بدیهی و مطلق ، اما اهل سنت  
ایچون سعی و غیرت واسبابه تشبث و مراجعت لزومی  
دخی ثابت و محقق در .

علی المرء ان یسعی ویبذل جهده  
ویقضى اله الخلق ما كان قاضیا

یعنی «آله خلق و قادر مطلق حضرتلرینك تقدیر  
ایلدیکی یرینی بولور و قدر و قضانه ایسه ینه مطلق اولور  
انجق عبد مقدرك نصل اولدیغنی بیله میه جکی جهته  
سعی و غیرت و جهد و همت ایتلی در». زیرا غیرت موجب  
سعادت و سلامت، بطائت مستلزم احتیاج و ضرورت  
و نقیض یمن و برکت در . موحدینی چالیشمغه ترغیب  
ایچون امام شافعی رجة الله علیه « ناسك اعتراضاتنه  
قولاق آصمه ! همان حقنده نافع اولانی استحصاله چالیش  
و عظ و نصیحتنده بولنش ؛ ایوب سختیانی قدس الله سره  
ابنای زمانه « ای کنجلر ! کسب رزقه حرفت و صنعت  
حبلمه یا پیشك زیرا قومك زنکینلرینه محتاج قالمکزدن  
امین دکلم » یولنده نصیح و پند ایلش ؛ و حسن بصری  
رجة الله علیه ( کندوسنه کلوب « بن مصحف شریفی

آچار ونهـارك كليسـنده اوقورم « ديه كسب وكار ايله  
عدم اشتغالنى ايهام وافهام ايدن شخصه « سحر واقشام  
قرائت ايت » جوانى ويرمش يعنى چالشمق دخی لازم  
اولديغنى اخطار و بيان ايتش در .

اصبر على مضض الادلاج والسر  
وللروح على الحاجة والبر

لا تضجر ولا يعجزك مطلبها  
فالنجح يتلف بين العجز والخبر

« حاجات ومطالبك استحصالى ايجون كيمهـنك ،  
كوندوزك ، صباحك ، اقشامك مشاق ومزاجنه صبر  
وتحمل ايت ! چاليش ! »

« طلب حاجة سنى عاجز ومضطر براقسون زيرا نجاح  
وموفقيت عجز وضجرت يينده تلف اولور . »  
اشته بو حقائق اصلا نظردن دور ايتمهـرك جهد  
وغهـيده بولنق انسانلر ايجون لازم ولا بدر .



## مقتطفات مشوره

حضرت فخر کائنات علیه افضل الصلوات والتحيات  
افندمن حضرتلرندن مروی بعض احادیث شریفه  
مأللر یدر :

« دنیا علم علما ، عدل امراء ، سخاء اغنيا ، دعاء  
فقراء ايله قائمدر » .

« طول عمر ايله فرحلانان عند الموت ، کثرت مال ايله  
فرحلانان عند السؤال ، وسعت دار ايله فرحلانان عند  
القبر ، معصيته فرحلانان دخی عند النار ندامت  
ویشیمانی یه دوچار اولور » .



فقیردن مال ، جاهلندن حرمت ، دشمنندن حاجت ،  
حاسدندن نصیحت طلب وانتظاری محاذر .



شیخ ابراهیم القصارک سویلیدیکی نفخاتده ذکر  
اولمشدر :

انسانک قیمتی درجه همتنه کوره در ؛ همتی دنیا  
جهتته اولورسه هیچ دگری یوقدر ؛ اما جناب حقک

رضاسی ایچون اولورسه اول قدر قیتلیدرکه علو درجه -  
سنی استدراک ممکن اولهمز .



شیخ ابو عبد الله معزی رحه الله علیه دیمشدر :  
فقیر صادق هر شیئه مالک اولوب فقط هیچ بر شیئک  
مملوک و محکومی اولیاندر .  
اخوانک خدمتدن استنکاف و تعزز موجب  
ذلتدر ؛ اویله بر ذلتکه الی الابد زائل و منفک اولمز .



کثرت جعاع ، کیمه لری آز و کوندوزلری چوق  
او یومق ، حبس بول ، طوق قارننه طعام ، کیمه یاریسی  
او یخودن قالقوب صو ایچمک موجب حصول امراض  
اولدیغنه قدماتی اطبا اتفاق ایتشلددر .



فاضل کامل جار الله ز محشرینک ( اطواق الذهب  
فی المواعظ والخطب ) نام رساله سندن ایکنجی مقاله در :  
ای انسان ! جسمک - طوغله قدر دگری

اولیان - خام چاموردن ایکن بویله تکبر و تفخرده نصل  
بولنه بیلورسک ؟! کاه آبا واجدادکله ، کاه ثروت  
واقبالکله نصل بو بورلیورسک ؟! بیل که ابا واجداد  
ایله افتخار ، ثروت و اقبال ایله اغترار سکا کرکز .  
بر کره دوشون که آياسن نه دن مر کبسک ، عجبا نهایت  
نهیه منقلب اوله جقسک !

ایشته بونلری بیل ، بونلری دوشونده نخوتی ، کبرینی  
آیزیحق ، اولسون قیر، ترک ایله !



جلال دوانی علیه رحمة الباری (لوامع الاشراق فی  
مکارم الاخلاق ) نام رساله سنده شویله دیور :  
محیی رسوم قدمای حکما اولان حکیم الهی شیخ  
شهاب الدین تلویحاتده نقل و بیان ایدر که « ارسطویی  
بو طائفه نك اصطلاحنده غیبت ( غیبوت ) دینیلان  
خلیه لطیفه ده ( خلولطیفه ) کوردم ؛ غوامض حکمیه دن  
اولان تحقیق ادراک بحثنه دائر کندیسندن بر قاج نکته  
صوردم بونلرک جوانی ویرد کدن صکره افلاطونک مدحنه  
شروع ایله بو بابده اطراء عظیمده بولندی .  
« بعده متأخریندن انک مرتبه سنه کیسه ایر شمش میدر



دیه سؤال ایلدم « یوق یوق حتی اونک کالی جزؤنک یتش  
 بیکده برینه بیله کیمسه ایریشمامشدر » جوابنی ویردی  
 فلاسفۀ اسلامیهدن بعضیلرینی ذکر ایلدم هیچ التفات  
 کوسترمدی اما جنید بغدادی و ابو یزید بسطامی و سهل  
 بن عبد الله التستری قدس الله اسرارهم کبی ارباب کشف  
 و شهودی ذکر ایلدیکده « اشته آنلر حقیله فلاسفه در  
 لکن بو طریقده مخاطرات و مهالک کثیر و بشماردر زیرا  
 خطرات و ساوس و ورطات هواجس، تسویلات باطله  
 و تخیلات فاسده و عاطله سالکی بیابان طلبده حیران ایدر »  
 دیدی. بو طریقک افسد مفاسد ایدر که ( کسر اب بقیعة )  
 الایه (\*) ایت کریمه سی حکمنجه کوچک برنمایشه الدانیله رق  
 اول یوله کیدیلور دست طلب اوزاتیلور؛ صو بولنمدیغنه  
 اطلاع حاصل اولدیغنی کبی دوچار یأس و حسرت  
 اولنور .

---

(\*) بو آیه جلیله نك مبدا ئی « والذین كفروا اعمالهم کسر اب »  
 الایة اولوب مفاد عالیمی دخی ( کافر اولانلرک عملری یاز کونلرنده  
 او والرده کول کبی کورینسان سراه بکرر که صوصامش اولنلر  
 آنی کوروب صو ظن ایدرلر اما یقین کلدکده بر شی بوله مازلر ) در  
 ( سرآب ) ایام حارده عربستان چولارنده اوزاقدن صو کبی کورینور  
 چقور یرلردر و بویه کورینشی پرتو شمشک تأثیر یله در .

دورست سراب درین بادیه هوش دار  
تاغول بیابان نفریبد بسرآبت (\*)

خلیلی قطاع الفیافی الی الحمی  
کثیر وار باب الوصول قلائل (\*)

کذلک بو طریقک استاذی که مرشد کاملدن عبارتدر  
نادر در؛ وجودی تقدیرده ا کلامق متعذر ویا متعسر در.  
چونکه کمالات انسانیهی صاحب کمال اولانک غیرسی  
اکلایه من و قیمت جوهری جوهر جیدن بشقه سی طایفه من.

بسر قصه سمرغ و غصه هد هد  
کسی رسد که شناسای منطق الطیر است

(\*) عقلی طاورانکه بو چولده صو منبعی اوزا قدر صکره  
سنی غول بیانی (بیابان) سراب ایله الداتسون.  
(\*) ای دوستلرم! صحرای محل مقصودک قربنه قدر قطع ایدنلر  
چو قدر اما ارباب وصول آزدر.

اگر سالک صورت ظاهره به قایل و رایسه یاقوتی عقیقه،  
 محک طاشنی سیاه طاشه دکشور، مبتدی بیلمه رک تبلیس  
 و تدلیسه فریفته اولور، نقد عمرینی کال ظنیله ناقصک  
 خدمتنه صرف ایدر، حسران حال و ماله ایرر. «نعوذ بالله  
 من الغباوة والغواية». بو جهته علما انسانی اول امرده  
 طریق نظریه به سوق و تشویق ایدر لر. طریق تصفیه ده  
 دخی طریق نظریه به احتیاج وارد ر؛ زیرا سالک، علم  
 رسمیدن کلیاً خالی اولنجه ورطه افراط و تفریطدن امین  
 اوله مز مخالفت شریعت و حکمتدن بری قاله مز. بونک  
 ایچون حضرت هادی الثقلین صلی الله تعالی علیه  
 وسلم «ما اتخذ الله ولیاً جاهلاً» «قسم ظهیری رجلان  
 جاهل متنسک و عالم متهنک» بیورمشدر؛ یعنی «جناب حق  
 ولی جاهل اتخاذ ایتماشدر» و «ایکی آدم بلیمی قیرمشدر  
 بری جهل ایله عبادت ایدن جاهل، بری لایابالی بولنسان  
 عالم در».



اصحاب جناب رسالتدن صاحب التفسیر اولانلر :  
 خلفاء راشدین، عبد الله ابن مسعود، عبد الله  
 ابن عباس، زید بن ثابت، ابی ابن کعب الاکبر،

ابو موسی الاشعری، زبیر ابن عوام، انس ابن مالک،  
عبد الله ابن زبیر، عبد الله ابن عمر، جابر ابن عبد الله  
رضوان الله تعالى علیهم حضراتیدر.



مروریدر که کبرادن بر ذات حکمدان برینک نزدینه  
کیدر. حکیم بعض مشاغل مخصوصه حیلولتیه رعایت  
لازمه ده بولنه مز. شو حال او ذاتک مجبول اولدیغی کبر  
وعظمتیه، نخوت و انانیتیه طوقندیدنندن تعزیر و تهدید بولنده  
حکیمه شویله سویلر:

— بنم کیم اولدیغی بیلیورمیسک؟

حکیم مشار الیهده بویله جواب ویر:

— اوت بیلورم؛ اصل واساسک جزوی منیدن

عبارتدر عاقبت الامر اوله جفکده جرمک قدر جیفه در شو

حالده بویله متکبرانیه متعظمانیه تعزیر و تکدیره عجبا نصل

جرات بیوره بیلورسکز؟!



شیخ الرئيس ابن سینا دیمش:

صوت خوش و صدای شهی ایله متلنذ اولمیان، چهره

خوب ووجه بهی به تعشق ایتیان فاسد المزاج، محتاج  
العلاجدر .



مقتطفات منظومه

مولانا ابو القمح البستی مرحومک ( قصیده الحکم  
والامثال ) نندن مابعد :

ورافق الرفق فی کل الامور فل \* یندم رفیق ولم یندمه انسان  
ولا یغرنک خط جرہ حرق \* فالحرق هدم ورفق المر بنیان  
احسن اذا کان امکان ومقدرة \* فلن یدوم علی الاحسان امکان  
والروض یزدان بالانوار فاعمه \* والمر بالفضل والاحسان یزدان  
صن حروجهک لاتنتک غلاته \* فکل حر لحر الوجه صوان  
وان لقیتم عدواً فالقمه ایدا \* والوجه بالبشر والاشراق غصان

هر امر ده معامله رفق وملایمتی عادت ایدک ! زیرا  
رفق ایله معامله ایدنلر ندامته کرفتار ، ومذمت ناسه  
دخی دوچار اولزلر .

عنف وشدتلی امر لره مغرور اوله ! زیرا عنف  
وشتت مخرب وهادم ؛ رفق وملایمت ایسه بانی وعامر در .  
قدرت وامکان مساعد اولدقجه ناسه لطف واحسانه

شتابان اول ! زیرا امکان احسان هر وقت اله کیرمز ،  
دوام ایتمز .

بغیه چپکلرک کثرتیه زینت بولدیغی کبی ، انسان  
دخی فضل واحسان ایله زیب وزینت بولور .  
بشاشت وجهنی محافظه ایت ، هتک وازاله ایله !  
زیرا کریم اشیم اولانلر بهجت وبشاشت وجهی محافظه  
ایدلر .

بردشنی کوردیکک وقت دائماً بشاشت کوستر ! زیرا  
بومعامله دشمنه غم وغصه ایراث ایلر .



حضرت علی رضی الله عنه

إذا ما المرء لم يحفظ ثلاثاً

فبعه ولوبكف من رماذ

وفاء للصديق وبذل مال

وكتمان السرائر في الفؤاد

یعنی محب صدیقنه وفا ، مالی اهلنه بذل ، سراری

قلبنده کتم ، کبی خصائل ثلاثه یی حسن محافظه ایتیمان  
انسانی بر آوچ کوله بیله صات !

عمرو بن معدی کرب :

اذالم تستطع شیئاً فدعه

و جاوزه الى ما تستطيع

قدرتك یتدیکي شیئ براق ! قدرتك یتدیکنه

تشبث ايله !



حضرت علی رضی الله عنه :

کیفیه المرء لیس المرء یدرکها

فکیف کیفیه الجبار ذی القدم

هو الذی انشاء الاشیاء مبتدعاً

فکیف یدرکها مستحدث النسم

هیچ نصل اولور که هم جنسک حال و کیفیتی درک ایده-

میان انسان جبار قدیم اولان جناب حقک کیفیتی

ا کلایه یلسون ؟

هیچ نصل اولور که وجودی حادث اولان انسان

اشیای مبتدعاً یعنی عدمدن دفعهً انشا و ایجاد ایدن

موجد حقیقی ادراک ایده یلسون ؟



امام اعظم رحمة الله عليه :

الأتوبوا الى رب الانام \* وكونوا بالصلاح على الدوام  
اللاتطلبوا الا حلالاً \* الا لاتسئلوا سبل الحرام  
ولا تعشوا بما نالت يداكم \* ولا تأسوا على فوت المرام  
آله الخلق يدعوكم جميعاً \* من الدنيا الى دار السلام  
جناب رب الانامه توبه ايدرك صلاح دائمى اوزره  
بولئك ! حلالدن بشقه شى طلب ايتيك ! حرام يوللرینه  
كتميك ! اليكز ايردبكي شىئى اخلال و افساد ايتيك !  
مرامكزك حصول بولمديغندن مأیوس اولميك ! خالق  
مطلق هيكرزى دنيادن دار السلامه دعوت ايليور .



لكل داء دواء يستطب به      الالجماعة اعيت من يداويها  
هر علتى ، هر مرضى تداوى ايچون علاج واردر ؛  
انجق حماقت كنديسنى تداوى ايدهنى عاجز براقير .



اذا تم امر بدانقصه      ترقب زوالاً اذا قيل تم  
بر امر درجه كماله واصل اولنجه نقصانه يوز طورتره  
بناء عليه تمام اولدى دنيلان شينك زوالنه مترقب اول !







« دندر »

— . گفتار شیخ نجم الدین قدس سره المعین . —  
 زخاری بیندیش کو خنجر یست  
 زموری بیندیش کو صفدر یست

— . معروف کرخی قدس الله سره العالی . —  
 مکس را بچشم حقارت مبین  
 که اوهم درین بار که مهتریست

— . شیخ شبلی قدس سره العلی . —

مرنجان دل پشه خسته را  
 که از هر دلی سوی حضرت در یست  
 خاردن بیه خائف و اندیشه ناک اول ! زیرا او بر  
 خنجر، موردن بیه خوف و حذر ایله اوده بر صفدر در.  
 سینکه دخی نظر حقارت له باقه که شو بارگاهده اوده  
 بر مهتر در . بر خسته سیوری سینکک بیه کوکلنی قیرمه،  
 زیرا هر کوکل ایچون سوی حضرت له ناظر بر در مقرر در.



# محاضرات

مقتطفات

نومرو ۸ برنجی جلد ۱۵ جمادی الاخره

## اخطار مخصوص

طشمره ابونه لرمزه کوندریله جک کتابلر بوندن بویله قاپسز کوندریلوب  
سنه نهایتنده تجلیده الویریشلی ایروجه بر قاب تقدیم ایدیلر جکدر

## قلم صنع حقهده سهو اولمز هب خطابین اولانلر احمقدر

سرلوحه لی مقاله دن مابعد

کلهلم ایکنجی جوابه : بونده حضرت موسی علیه  
السلامک «لم ترزق الا حق وتحرم العاقل» مناجاته مقابل  
صادر اولان «لیعلم العاقل ان الرزق لیس بالا حتمیال»  
امر وخطابندن استشهاد واستدلال ایدیلرک احتیال ایلر  
استحصال رزق ممکن اولهمیه جنی ییلدرلمشدر وفضل  
فروش اوله رق نفسنه اعتماد ایدنلرک مخیطیلکی شوصورتله  
تفهیم ایدلمشدر .

اوچنجی جواب ایسه بر جهته برنجی بی مؤید  
وفقط کمال مرتبه عدالت آلهیه بر دلیل و افعال آلهیه نک  
متضمن حکم ومصالح بولندیغی بیانی معلندر .

ایمدی اجوبه معروضه شاکیله ، متحیرله ، غافلره ،  
جاهلله کافی و شافیدر ؛

( والهدایة من الله لانعبد ولا نستعین الایاه )

برده انسان آثار منظومه و منشوره ده عالمک محرومیتی ،  
جاهلک مرزوقیتی مقتضای قانون طبیعت جهان اولدیغنه  
دائر سوزلر کوردکجه و بو فکرک بطلانته بر اهین و دلائل  
مبینه ایله آگاه اولدقجه شاعرک :

الدانمه که شاعر سوزی البته یلاندر

قولنی مصیب کورمک مجبوریتنی حس ایدیور ؛ برکت  
ویرسون بو قولک بطلانیده ( کالشمس فی وسط النهار ) جلی  
و آشکار اولسنه منی او مجبوریتدن خلاصه امکان بولیور ؛  
اما اولوقت ده بعض تدقیقاته لزوم کوریور ؛ حتی بزده  
اوله تدقیقاته بولنغه میل حاصل ایلدک ، بعض مطالعات  
سردینی تصمیم ایتدک . بو تدقیقات و مطالعات اوزون  
سورمیه جک ، بر مثال ایله یته جک و حقیقتی او مثال ارانه  
ایده جکدر :

معلوم اولوق کر کدر که فاتحه مقاله من اولان یتسک  
منشدی ابن کمال مرحوم ارباب معرفتک اقبالسزلکنه  
دائر متعدد ابیات سویلشدراشته بریسی :

كاملڪ صف نعال اولسه مقامى غم دكل  
هر نه دكلو منصب على كه واراجله در  
حال عالم بويله درشاخ اوزره كوركيم ميوه نك  
خامى بالاده كماله ايرمى اسفله در

شمى فاضل مشاراليهك بو سوزى طوغرىمى ؟  
زماننده مناصب عاليه جهلايه انحصار ايتش اولسه ايدى  
كنديسى ملت معظمه عثمانيهك مسند جليل فتواسنه قدر  
ارتقا ايده بيلورمى ايدى ؟  
اشته برى دها :

جمع ايلامش مجلس عالم قوريلالدين  
عرفان ايله بريرده خدا مال ومعاشى

انصاف بيورلسون كه بو قولى ده حقل مى ؟ البته  
دنياده كيسه نك هر وقت درت باشى معمر اولماز اما هيچ  
اولديغى يوقيدر ؟ مجرد علم و عرفانى سايه سنده سلطان  
سلیم اول كى بر پادشاهك فوق العاده عاطفت و رعایتنه،  
سلطان سليمان كى بر شهنشاهك مدت العمر لطف  
و عنایتنه نائل اولمش، فضل و كمالنى ساده معاصرلىنه دكل

جملهٔ اخلافه اعتراف ایتدیرمش و غلغلۀ کمالات علمیه سنی  
 بلکه عالم ارواح اسلافه قدر ایصال ایتش اولان محقق  
 مرزوق بوییتلرده درمیان ایتدیکی افکارک اصابتی نصل  
 قبول ایده بیلور؟ او یله بر عارف محقق کندی نفسنده  
 ثابت اولان حقیقتک ضدینی اختیار و ادعاسنه امکان تصور  
 اولنه بیلور می؟ یا او یله درده ابن کمال بویله ایاتی نیچون  
 انشاد ایتدی؟، بویله حق سر مطلقه لرده نصل بولندی؟  
 اشته بونی دوشملی :

انسانک مدت عمرنده علی الدوام مرزوق و مستریج  
 اولمی البته ممکن دکلدر مایوس و مکرر و محروم بولندیغی  
 زمانلر واردر؛ مثلاً ابن کمال ترجمهٔ حالنی بیلانلره خفی  
 اولمیدیغی اوزره قاضی عسکر مؤید زاده نک معاونتنه نائل  
 اولنجیه قدر اصحاب اغراضک مداخله سندن مصون  
 اولمامش و او معونت سایه سیله شهنامه جیلک خدمتنه تعیین  
 بیور یلوبده اقتدار علمینی ارانه فرصتی اله ایدنجیه  
 قدر آغر آغر تکلیفله اوغرامقدن قورتیله مامش ایدی؛  
 بویله زمانلرنده او یوانده، دهها شدتلی ایات و اشعار سو یلمی  
 مطالعات و افکارده بولمسی استبعاد اولنه مز؛ مع هذا  
 علم و کمالی جهتیله سوزینک حق سر لغنی او یأس و حرمانی

زائل اولدوقده کندوده اعتراف ایتش اولمی امکائی انکار  
ایدیله مز بلکه مطلق ایتشدر دینه یلور .

اشته هر کسک فلکدن ، کردوندن ، بختدن ، طالعدن  
شکایتلری هب بوبله در زمان یأس وخرمانده غلبه قوای  
نفسانیه ایله بر آلائی شکایتلره قالقیشلمش ، یاخود نفسک  
تسکین هیجانی قصدیله تسلیت بخش خاطر فاتر اوله جق  
قاعده لر ایجادینه چالیشلمشدر که هیچ برینک جدی اولدیغی  
واسبابنه توسل ایدوبده نائل امل اولانه اسکی شکایتلرینی  
درمیان ایدن بولنورسه تأویلاره فلانلره قالقیشلدیغی تجارب  
عیدیله ایله ثابتدر .

دیمک ایسترز که عاقل هیچ بروقت اویله موافق حق  
اولیان فکرده فقط جداً بولمز هیچ بر کامل مقدرات  
الهیته نک عین صواب اولدیغنی ومتضمن حکم ومصالح  
بولندیغنی قطعاً تصدیق واعترافدن کیرو طورمز .

عاقلمسدر اول بوالهوسکه نفسنی ردائلدن متخلی  
وفضائل ایله متخلی قیلماز ، دائرة اقتدار وادراکنک خارجنه  
آتیلوبده بیابان حیرته دوشمکدن واوراده خائب وحیران  
سفیل و سرگردان قالمقدن چکنیوب حلیه اعتدال مزاج  
ایلّه تزین ذات وصفات وتعديل قوای جسمانیه ونفسانیه  
ایلّه تصفیة نفس ومنع هوسات ایلز .

عالم میدر اول ظاهر ینکه علمك حفظ اقوال  
متداوله دن عبارت اولدیغی فکر باطلنده بولنسون .  
کامل میدر او بد آیین که تهذیب اخلاق ایتیه رك بر  
طاقم الفاظ و اقوال تفوه و تکلمنه کندنده قدرت کورمکله  
کمال فروش اولور .

اعتماد نفس، غایت غرور، تجمیل غیرکی اخلاق  
ردیه ایله متصفك علم و فضلی می اولور ولو بر قاچ شی  
از برلش اولسون خیری کور یلور .

یا من تقاعد عن مکارم خلقه

لیس التفاخر بالعلوم الظاهره

من لم یهذب علمه اخلاقه

لم ینتفع بعلومه فی الاخره (\*)

مؤمن صادق ایچون او یله گفت کولره التفات  
ایتیه رك مکارم اخلاق ایله اتصاف، محاسن احوال ایله  
اثلاف، سعی و طلبده صرف قدرت، جناب حقه توسل  
ایدرك جد و اهتمام و جهد و اقدام، هر حالده اختیارمتانت،

(\*) ای مکارم اخلاق دن محروم اولان علوم ظاهره ایله افتخار  
ایدلر؛ اخلاقی علمله تهذیب ایتیانلر آخرتجه ده علندن فائده کورمز.

صابرانہ و متانیانہ حصول مقصدہ خدمت یاقشور؛ اولیہ  
کوشہ حیرتہ اختیار مسکنت، ارتکاب بطائت قطعاً  
یاقیشمز.

### ❧ مقتطفات منثورہ ❧

ابن عباس رضی اللہ عنہما نک حضرت پیغمبر صلی  
اللہ تعالیٰ علیہ وسلم افندمزدن روایت ایلدیکی اشهر  
کتب احادیث اولان «فردوس اعلیٰ» ده محرر حدیث  
شریفک مألیدر :

«مؤمن خالص بیاض لباس کییدر بر نبذه کیر  
بولنسه کوریلور منافق کیرلی لباسه بکزر اوزرنده  
نه قدر پیسلک و کیر بولنسه اصلاً بللی اولماز.»



ابوهریره رضی اللہ عنہک نقل و روایت ایتدیکی ینه  
«فردوس اعلیٰ» ده بیان اولنان حدیث شریفک مفهومیدر:  
«منافق نه قدر نماز قیلسه، نه قدر اورج  
طوتسه، کنیدیسنی مسلم ظن ایتسه بیله ینه بللی  
اولور؛ زیرا اوچ دلیلی واردر؛ انلرده شونلردر:



سوزنده یلان، وعدنده خلف، اماتنه خیانت .»



ابن عمر رضی الله عنهما نك روایت ایلدیکی کتب  
احادیثدن «صحاح» ده محرر حدیث شریف حضرت  
نبوی مآل جلیلیدر:

« منافق ایکی قوچ اره سنده قالمش متردد قیون  
کییدر کندیسینی کاه اکا کاه بوکا اعاره ایدر »



مسافره رعایت وخانه صاحبك مسافری اولقپوسنه  
قدر تشییعی سنن شریفه دن اولدیغنی ابن عباس وابو  
هریره ومسافری خدمتمنده بولندیرمق نقصان عقلدن  
نشأت ایتدیکنی نه ابن عباس رضی الله عنهم حضراتی  
روایت ایلدیکی « فردوس اعلا » ده مندرجدر .

قاضی یحیی بن اکثم رحمة الله علیه دیمشدر : برکجه  
خلفای عباسیه دن مأمونك مسافری ایدم بر آراق زیاده سیله  
صوصادم خلیفه « یا یحیی نه اولدك » ديه صورمسی اوزرینه  
صوصادیغمی سويلدم اویله ایسه او طور دیوب قالقدی

بر بارداق صو کتوردی ایچدم دونوب «سکا برشی  
 سویلیه ییمی بر فضیلت بیان اینده ییمی» دیدی نعم یا امیر  
 المؤمنین جوانی ویردم بونک اوزرینه پدری رشیددن  
 واوده پدرندن جدیده ابن عباس رضی الله عنهما دن  
 اولمق اوزره «مسافری خدمتده بولندیرمق» الخ مفهومنده  
 اولان حدیث شریفی نقل و بیان ایلدی .



«مؤمنک قوتی الله دکل قلبنده در» مألنده اولان  
 حدیث شریفی دخی ابو هریره رضی الله عنک روایت  
 ایلدیکی (فردوس اعلی) ده مسطوردر .



حضرت علی کرم الله وجهه «فرصت مرور سحاب  
 کبی سرعتله گذار ایدر» بیورمشدر .



جنید بغدادی رحمة الله علیه «علم ایکی قسمدر بری  
 علم عبودیت ، بری علم ربوبیتدر باقیسی هوس نفسدن  
 عبارتدر» دیمشدر .



شدائد و محن دنیا درتدر :

بورج ، ولوکه بر پاره اولسون ؛ سفر ، ولوکه بیک  
آدیم سورسون ؛ طلب ، ولوکه بر خردال دانه سی ایچون  
ایدلسون ؛ فرقت ، ولوکه بر کدیدن آیرلمقدن عیسارت  
قالسون .



اجسام ، طعام ایله بسلتمکه محتاج اولدیغی کبی قلوب  
دخی حکمت ایله تغدی یه محتاجدر .



پدرک ، مسافرك ، مظلومك دعاسی مستجاب اولدیغی  
مصایحه بیان ایدلمشدر .



تعلیم احق ایچون اشتغال ، اتلاف عمر دیمك اوادیغی  
متفق علیهدر .



اشد بلایا درتدر :

جاهل ارقداش ، یورومز مرکب ، آقز مرکب ،  
آدینلق ویرمز قندیل .



حکمت، (مجرد احوال موجوداته علیر) تعریفی ایله  
تفسیر ایلدیکیمی کی (انسانک جمیع موجوداته بولندقلری  
هیئت و حال اوزره نظر ایتسی و بو نظره حقایق احواله  
وقوف حاصل ایدرک نسنی تشریف ولایق و غیر لایق  
تمیز ایله برنجی بی اکتساب، ایکنجیدن اجتناب ایدرک  
نفسنی کامل و سعادت قصوایه نائل ایلسیدر) یولنده دخی  
توضیح و تصریح ایدلشد.

تعریف ثانی تعریف اوله ترجیح اولمقده در؛ زیرا  
تعریف اول حکمنجه عمل حکمدن خارج قالمش و فقط  
تعریف ثانی انی حکمت داخلنده کوسترمشدر؛ البته علم  
و عملی شامل تعریف راجع اولمق لازم کلور؛ مطلقدر که  
انسانک علم مجردله زروه کماله عروجی امکانسز اولوب  
علم و عمل دائماً یکدیگره منوط و مربوطدر حتی جناب  
رسول اکرم صلی الله تعالی علیه وسلم افندمن نفهسز  
علمدن استعاده بیوردقلری کی علم بی عمل و بال، عمل  
بی علم ضلال اولدیغنی بیان بیورمشلدر.

شیخ الرئيس و جلال دوانی کی افاضلک جمله سی  
حکمنده علم و عملی برابر بولمشلدر. حتی حکما و فضلاء  
سائره دخی حکمتی - نه یولده تعریف ایدرلر ایسه

ایتسونلر - علم و عملی شامل کوردکلرندن نظری و عملی  
قسملرینه تقسیم مجبوریتنده بولمشلردر .

ایمدی بیان اخیرمزدن دخی منفهم اولیور که هر نه  
تعریف ایله معرف اولور ایسه اولسون حکمت ایکیه  
منقسمدر : بری حکمت نظریه ، بری حکمت عملیه .

حکمت نظریه نك غایتی انسانك فعلی ایله وجوده کلیان  
موجوداته اعتقاد یقین حصولی اولوب مقصود انجق  
بر رأی و فکر حاصل ایتمکدن عبارتدر ؛ اما حکمت  
عملیه ده خیرلی اولان شیئی اکتساب ایچون حصول رأی  
یعنی عمل ایتک اوزره اوکرنوب بیلیمی مقصوددر .

بو ایکی قسم بشقه صورته ده بیان ایداشدر :  
حکمت ، یا اعتقاد ایچون تعلم اولنان علومدر بوکا نظریه  
یا عمل ایدلک اوزره اوکرنیلان علومدر بوکا عملیه دینور .



— ❖ — مقتطفات منظومه ❖ —

مؤذن حضرت نبی القریشی جناب بلال حبشی  
رضی الله عنہک تمجیددر :

تیقظوا تیقظوا یا نیام قد هزم الفجر جنود الظلام

یا نا ئمأ عن نومه فانتبه ليلك قد اسرع في الانهزام  
 یاذا الذی استغرق فی نومه انت تنام ربك لاينام  
 فهل تقول انی مذنب مشغل الليل بطيب المنام  
 ربك يدعوک الى بابه قم واسئل العفو بغير انتقام  
 صل على سيدنا المصطفى احمدنا الهادي عليه السلام  
 ای اویقوده بولنان آدملا اویانکز اویانکز ! زیرا فجر  
 جنود ظلام لیلی منہزم و پریشان ایلدی .

ای. اویویان شخص اویان ! کیجهك سمت انهزامه  
 شتابان اولدی . ای مستغرق نوم اولان انسان ! سن  
 اویویورسك فقط مولای متعال حضرتلری اویومز .  
 کیجهلری اویقوایله مشغول اولیورسكده عجبا هیچ  
 کنهکارم دیورمیسك ! جناب حق سنی باب مرچتنه دعوت  
 ایدیهور قالدق مظهر انتقام اولدن حضرت غفار ذنوبك  
 عفو وغفرانی طلب ایله !

سند وسیدمز هادی طریق مستقیم حضرت محمد  
 المصطفی صلی الله علیه وسلمه صلواة شریفه کتور !



امام شافعی رحمة الله علیه بیورمش :

تغرب عن الاوطان فی طلب العلی  
 وسافر ففی الاسفار خمس فوائد

تفرج هم واكتساب معيشة  
و علم و آداب و صحبة ماجد  
يعني مراتب معالي طلب خصوصنده وطنكندن  
اوزا قجه بولوك، غربته چيق! زيرا يوجليقلده وديار غربته  
غندن آزادي، اكتساب مدار معيشت، تحصيل آداب  
ومعرفت واصحاب مجد واصائله صحبت كبي بش فائده  
ميسردر.



شاعر مشهور ابن السكيتك آثازندن :


يصاب المرء من عثرة بلسانه  
وليس يصاب المرء من عثرة بالرجل  
فعثرته في القول تذهب رأسه  
وعثرته في الرجل تبرأ على مهل  
يعني انسانك خطاي لسانی موجب مصيبت اولور  
يوخسه اياغلك سورچسي كنديسني او كولمز درده دو-  
شورمز؛ زيرا لسانك ايتديكي خطا انسانك باشني كسدير  
اما اياغلك سورچسييله عارض اولان ضرر ومرض يواش  
يواش زائل ومبدل صحت اولور.



فضلا دن شامی منیر زاده شیخ صالح افندینک  
سلک نظمہ چکدیک اقباسدر :

لا تطع النفس صاحی بکل ما تهواه  
وان رمیت بسهم فانظر الی مرماه  
وان هممت بامر فانظر الی عقباه  
والله (فی کل حال) احق ان تخشاه

ای دوستم ! نفسنک ارزو ایتدیک هر شیده اطاعت  
ایتمه؛ براوق آتدینک وقت مرماسنه، برایشه اهتمام  
ایتدیک زمان انتها وعقباسنه نظر ایله! هر حالده جناب  
حقن قورق؛ زیرا فرقاق کریمده «والله احق ان تخشاه»  
بیورلشدر.



سلاطین آل سلچوقدن سنجر خانک اک سوکیلی کر-  
یمه سی اولان ماه ملک خاتونک وفاتنه عمق بخاری نامنده کی  
شاعر طرفندن امر خانی ایله سویلنان مرثیه دن:

هنکام آن که کلد مداز صحن بوستان،  
رفت آن کل شکفته ودر خاک شدنهان .



هنكام انكه شاخ شجر نم كشد زابر،  
بي آب مانده زكس ان تازه بوستان.

—

### نحيفى نك بر خوش غزلى

رنجش من مجو بچوز سوى تورضاي من  
تلخ سخن مكو بكو ماحصل رجاي من  
داغ جفا منه بنه مرهم رحم زخم دل  
طعمه غم مده بده ازلب توغداى من  
زخم زبان مزن بزن شيشه بدولى بسنك  
دل شكى مكن بكن اطف وكرم براى من  
كار ديكر مدان بدان قصه حال پيكسان  
قول عبث مكو بكو نسخه مدعاى من  
عيب كسى ميين بين شرط ادب نحيفيا  
سمت خطا مرو برو برره روشناى من



## — ﴿ محاضرات ﴾ —

مقتطفات

نومرو ۹، ۱۰، ۱۱، ۱۲ برنجی جلد غره شعبان

## — ﴿ فضائل قرآنیہ ﴾ —

﴿ خیر امت اودر کہ ہمت ایدوب ﴾

﴿ حفظ قرآنہ سعی ایدہ ہر آن ﴾

﴿ کہ رسولک کلامیدر بوحدیث ﴾

﴿ خیرکم من تعلم القرآن ﴾

فاضل شہیر اوقجی زادہ مرحومک شوق قطعہ برکزیده۔  
سنی تزین وتوشیح ایدن حدیث شریف مزاحفات  
بحر خفیفدن (فاعلاتن مفاعلن فعلان) وزنہ موافق  
ومطابق اولوب نامی «خیرکم من تعلم القرآن وعلمہ»  
اولدیغی وفاضل مشارالہک بیانی وجہلہ «کلزار صدق  
خبارک کل بی خاری صحیح بخاری» ده جامع القرآن  
حضرت عثمان رضی عنہ الرحمن جانبندن روایت  
ایدلیدی مذکور وعلی القاری علیہ رحۃ الباری نک فضائل

جليلهٔ كتاب قديمه دائر بر رسالهٔ مخصوصه ده جمع و ترقيم  
ايلديكي قرق حديث شريفك برنجيسي اوله رق مسطوردر  
و محتاج بيان اولديغي اوزره « تعلم و تعليم فرقان كريم ايدن  
سزك خيرلو كزدر » مضمون سعادت مشحونده در .

جناب قادر قيومك تمجيد و تفخيم و تعظيم و تكرم  
بيورديغي قرآن جليل الشانك كمال فضل و شرفي نصوص  
جليلهٔ عديده واحاديث صحيحهٔ محمدية ايله ثابت اولوب :

{ القرآن هو النور المبين والذكر الحكيم }

{ والصراط المستقيم }

خبر لطيفي جامع الصغيره مضبوط و كتاب كريم  
اسلافك اخبار و حكاياتي، مستقبلك احوال و وقوعاتني،  
خلقك بر بريله هر درلو معاملاتني متضمن اولديغنه دائر  
بولنان :

{ القرآن فيه خبر من قبلكم و نباؤ من بعدكم }

{ و حكم ما بينكم }

حديث لطيفي و كتاب اللهدن خالي و عاري اولان

خانه‌ك خیر و بر كشدن محروم و بری بواندیننی معین  
و مخبر اولان :

{ ان اصفر البیوت من خیر الییت الصفر من }

{ کتاب الله تعالی }

خبر شریفی کتب معتبره ده محرر و مبسوط در .  
کمال عدوبتی جهته سهولت حفظ و لطافت تلاوتی  
نصاً ، قلباً ، حلاً متحقق اولان قرآن کریمك قرائتندن  
متحصل محسنات و فوائد لایعد و لایحصی اولوب :

{ خیارکم من قراء القرآن و اقراء }

حدیث شریفی ابن مسعوددن نقلاً ابن مردویه  
طرفندن روایت ابدلدیکنی علی القاری مرحوم رساله  
مخصوصه سنده بیان ایش و

{ افضل العبادات تلاوة القرآن }

حدیث حقیقت ردیفنی دخی سلطان احمد بن محمد  
خان جنتمکان عصری مشاهیر فضلاسندن عثمان زاده

تائب مرحوم شوق طعنه نفيسه ايله شرح وتبيان ايتشدن :

ديدى ختم الرسل تلاوت ايجون

دينه ده افضل عبادتدر

دو جهانده تلاوت قرآن

باعث دولت وسعادتدر

تلاوت قرآن قلبى احيا ونفسى فحشا ومنكر كردن  
منع ونهى ايلديكى حضرت انس رضى الله عنه شرف  
وقوعبولان نصيحت پرمسعدت رسالت پناهى ايله مبرهن،  
قرائت فرقان انجلاى قلوبى موجب اولديغى احاديث  
شريفه فخر كائنات عليه افضل الصلوات والتحيات ايله  
متيندر .

ديلى مرحومك مسند فردوسده ابن عمرو دن نقلأ  
ذكر و بيان ايلديكى جامع الصغيرده مسطور اولان

{ اكر موا حمله القرآن فمن اكر مهم فقد اكر منى }

حديث شريفى ايله مثبت اولديغى اوزره حفاظ وحله فرقان  
ذيشانه اكرام واحترام و حبيبته نجيبه اهل اسلام اولدقدن بشقه

(فقد اکرمی) کلامک دلالیله نمایان اولدیغی وجهله ذات قدسیت صفات حضرت رسالت پناهی بی تفخیم و تعظیم و تبخیل و تکریم دیمکدر؛ نه مسعود در اول حفاظ عالی مقام که مفخر انبیاء کرام علیه الصلوات والسلام افندمن حضرتلرینک بودرجه مدح و ثناسیله بکام اولمشلر وینه او آفتاب عالم تاب نبوتک

### { اشراف امتی حمله القرآن }

اجمال جلیلی ایله اشراف امت محمددن اولق سعادتنی بولمشلردر .

امام اعظم و مجتهد اکرم رجة الله علیه دن مروی و منقول اولدیغنی اوقجی زاده مرحوم بیان ایلر که هر سنه ایکی ختم قرآن ایله فائز اولانلر صراط مستقیم سننه اقتدا و حق حضرت قرآنی ادا ایتمش اولورلر . ینه اوقجی زاده مرحوم محله یازار که « جدول محیط حقایق امام جعفر صادق رضی الله عنهدن شو کلام صدق انجام مروی و اول رشحه ساقی کوثر بومقال سلسبیل اثر ایله تشنکان هاجره بعد و هجرانی مرویدر » :

{ واللہ لقد تجلی اللہ لخلقہ فی کلامہ ولکنہم }  
{ لا یبصرون }

یعنی جناب خالق مطلق کلام حکمت انسجامندہ  
مخلوقات چون تجلی ایدر سہدہ انلر کورمز لر .

{ عاقلانرا حلاوتی در جان }  
{ غافلانرا تلاوتی بزبان }

ہر حالده « اصحاب قلوب صافیہ یہ پوشیدہ و خفی  
دکدر کہ قرآن عظیمک تعلم و تعلیمی افضل اعمال و اشرف  
مطالب و آمال اولوب نسیان باعث العصیانی سبب سخط  
جبار بلکه کبیرہ کثیرہ الاخطاردر حتی امام نووی شو  
حقیقتی کتاب روضہده تصریح و افادہ سنی بوحدیث  
صحیح الور و دایله کہ سنن ابن داوودده موجوددر تصحیح  
المشدر : »

{ عرضت علی ذنوب امتی فلم اردنبا اعظم }  
{ من سورة وآية اوتیها رجل ثم نسیها }

يعني « اتمك دتوبى بكا عرض اولندقدده اچلرنده  
 كندوسنه برسوره ويا آيت ايتا وحفظ ايتديرلدكن صكره  
 اونوتمش اولان آدمك كناهندن بيوك كناه كورمدم »

چنانكه زندكىء تن بصحبت جانست  
 بدانكه زندكىء جان بنور قرآنست

ايمدى مطلقدركه فضائل قرآن حكمت بيانى تماميله  
 اتيان خارج دائرة اقتدار انسان اولوب بوياده ايراد  
 ايلديكمز اقوال جليله واخبار عليه برر نمونه ديمكدر .

انشا الله كتاب اللهك :

جميع العلم في القرآن لكن  
 تقاصر عنه افهام الرجال

مضمون صدق مشحوننجه مغنوى ، ظاهرى  
 وباطنى بالجملة حقائق علوم، دقائق فنون ولواحق معارفى  
 احاطه وشمولنه دائر ايلروده مقالات مخصوصه يازلمسى  
 مقرر بولنديغندن وافاضل عصر دن اسكندراني محمد



افندی حضرت تیرینک آثار حکیمانه سندن اولوب کتاب  
کریمک احتوا ایلدیکی دقایق فیه دن باحث بولنان تألیف،  
لطیفی بالترجه بونسخه دن اعتباراً مجموعه مره درجه  
باشلادیغمرزدن ده تفصیلاتی آنلره تعلیق ایدرک بوراده  
اختیار اختصار ایلدک .



— توکل، تسلیم، رضا —

۱  
توکل

« ومن يتوكل على الله فهو حسبه »

« خالقنی ایستیان ناخلف اولمش دکل »

« خلقه کوکل باغلیان صکره پشیمان اولور »

هر مؤمن جد و غیرت و جهد و همته فصل مأمور ایسه  
توکل سلامت پیرا و تسلیم و رضایه او یله مأمور در. بو حال  
کورن بعض انظار قاصره اربابی بر طرفدن سعی و غیره

ترغیب، برطرفند ده رضا و تسلیه تشویق ایده‌لمسندن  
ناشی دوچار حیرت نابجا و گرفتار خطیئات غرابتنما  
اولشلردر؛ زیرا توکل و تسلیم و رضا نه دیمک اولدیغنی  
اکلاما مشلردر .

کتاب مشهورده مسطور اولدیغنی اوزره توکل قدرت  
بشر تعلق ایتیموب وسع انساندن خارج قالان اموره ۸  
ترك سعی ایتمکدر . استقامت افکار و سلامت طبیعت  
اربابنه خفی دکلدرکه انسان ایچون کندنی اقتدارینک  
خارجنده موفقیت آرزوسنه دوشمک مغایر عقل و حکمت  
و نشانه حق و بلاهتدر . ایشته توکل انسانی بوحق  
و بلاهتدن خلاص ایدر، نتیجه‌سی عدم موفقیتی و شو  
حالده‌ده بالطبع حرمان و مأیوسی و بلکه انواع بلا  
و مصیبتی استلزام ایده‌جک جرأتدن منع ایلر ،

دفع ایتیمه تیرستم گردش چرخ  
عالمده توکل کبی هرکز سپراولمز

یوقسه الدن کله‌جک و قدرت یته‌جک خصوصاً  
ترك سعی و غیرته قطعاً تشویق ایتمز؛ حتی جناب نبی کریم  
صلی الله تعالی علیه وسلم ذات قدسیت صفات رسالت -

پناهیلرینه خطاباً « دوهی ارسال و حضرت معین حقیقی به  
توسل ایلدم » دیان بر اعرابی به ( اعقلها و توکل علی الله )  
بیورمشدرکه بوندن صراحة معلوم اوله جغی اوزره جناب  
رب عزته توکل انسان ایچون دائرة اقتدار داخلنده  
اولان امورک اسباب معقوله و مقتضیه سنه توسل و تشبثدن  
صکره اولق اقتضا ایدر .

افانم شرح جانبندن « سر جناب خالق مکوناته  
حقیقه یعنی کنیدیسندن غیری فاعل یوقدر و خلق و رزق  
و عطا و هر بر موجود حق تعالی طرفسنددر حکمنی جزماً  
یله رک توکل ایدوب بعده وجه جمیل ایله طلبده اولسه کز  
اول رازق منع سزی کوندز یواسندن آچ کیدوب کیجه  
یواسنه طوق دونان قوشلر کی مرزوق ایدر » مألنده  
شرح ایدلش اولان و حضرت عمر رضی الله عنه جانبندن  
روایت ایدلدیکی معتبرات کتب احادیثده مصرح بولنان

﴿ ولوانکم توکلتم علی الله حتی توکله لرزقکم کما  
یرزق الطیر تعذو حماصاً و تروح بطاناً ﴾

حدیث شریف نبویسی دخی افادات سابقه مزى تأیید  
و تشیید ایدر .

## ﴿وتوکل علی الحی الذی لا یموت﴾

نص جلیلی ایلہ التزام واتباعی امر بیورلش اولان توکلک  
ممدوحیت و منفعتی حقنہ کی حدیث شریف مذکورده ترک  
کسبہ دلالت ایدر برشی اولمیوب بلکه طلب وسعیہ دلالت  
ایتدیککی وعبد ذهاب وایانده و امور و خصوصاتانده  
حضرت معین حقیقی یہ توکل ایلسه، هر درلوخیرید قدرت  
ربانیہ ده بولندیغنه قطعاً قانع بولنسه البتہ موفق اوله جغنه  
اشارت اولدیغی افانخ مدققین طرفندن بسط و بیان  
ایدلمشدر .

مشهوردرکه حضرت عمر رضی الله عنه اهل یمندن  
برفرقیہ تصادف ایتدکلرنده ( ما انتم ) یعنی سز کیمسکز  
سؤالی ایراد بیورمش و ( المتوکلون ) جوانبی النجہ  
« کذبتم انتم متکلون انما المتوکل رجل القی حبة فی الارض  
وتوکل علی الله عز وجل » یعنی یلان سویلدیکز سز  
متوکل دکل متکلسکز زیرا متوکل اول آدمدرکه تخمی  
ارضه زرع والقا ایلہ حقہ توکل ایدر بیورمشدر .

حضرت فاروق اعظم و خلیفہ ثانی رسول افخمک  
بوکلام منفعت انسجامی دخی توکلک ترک کسبہ قطعاً  
دلالت ایتدیککی اثبات ایدر .

ایمدی مطلقدرکه اسباب معقولهیه تثبث وتوسل  
هیچ بروقت مغایر توکل اولیوب جملهمن سعی وغیره  
وکسل وتوانیدن مجانبته مأمورز ومحققدرکه عدم توکل  
مستدعی ضیق حال ومستلزم انواع یأس وملال در .



کشف الاسرار النورانية القرآنية فيما يتعلق  
بالاجرام السماوية والارضیه والحيوانات  
والنباتات والخواهر المعدنيه

عنوانی التنده وادیب ولیب وطیب، فاضل یمدانی محمدافندی  
اسکندرانی جانبندن تألیف وتبویب ایدلش اولان اثر باهر  
النفع - که قرآن عظیم الشانک تضمن ایتدیکی حقایق علمیه  
ودقایق فنییهی مفسر وموضح در - اسلامیت ایچون نفع  
عظیمی درکار وجلهجه مطالعهسی من کل الوجوه استفادهی  
موجب اولهجنی آشکار بولندیغندن وذاتاً ( محاضراتی )  
نشرمن - ( قرنجه قدرنجه ) ولوکه جزوی اولسون - خدمت  
شریعت مطهره محمدیه مقصد اخلاصی مرصدینه مبتنی  
اولدیغندن - بولسخرمنك برنجی صحیفه لرینی تزیین ایدن

مقاله‌نک نهایتنده بیان ایلدیکمز اوزره - ترجمه و نشره  
مسارعت ایلدی .

### خلاصه دیباجه

بسم الله الرحمن الرحيم

شام شریفده اهلینک تداو یسمله مشغول بولندیغم  
صرهده برکون اطبای عیسویه دن بعضلریله برلشهرک  
مصاحبت ایدرکن احجار فحمیه حقنده سوز آچلدی ؛  
تورات وانجیلده بوکا اشارت اولوب اولمديغنه دأر مباحثه  
جریان ایدرک کتب مذکورهده صراحة و اشاره بوکا  
دأر هیچ برشی اولمديغنه حکم ایلدی ؛ بعده بکا توجیه  
خطاب ایله قرآن کریمده اشارت اولوب اولمديغی واکر  
یوق ایسه نه ایچون ( مافرطنا فی الکتاب من شیء )  
بیورلدیغی واکر وار ایسه هانکی موضعهده وقتغی سوردهده  
بولندیغی سؤال اولندی .

بونک اوزرینه علمانک برچوق کلانندن و فصحا  
وبلغانک بیکلرجه ائارندن و کتب تفسیر و طب مسائلندن  
کمال جهد وجد و تعب و کد ایله اقتطاف فواکه و التقاط

فرائد ایلہ رک استخراج ایدہ بیلدیکم مسائل واجوبہ بی یعنی  
 بوحجرک و حیوانات و نباتات واجرام سماویہ و ارضیہ  
 وجواهر معدنیہ نک کیفیاتنی اتیان ومقصدک ( والذی  
 اخرج المرعی فجعله غناءً احوی ) آیت جلیلہ سنده  
 اولدیفنی بیان ایلدم؛ انکشت بردهان حیرت اولدیلر.  
 ارتق بوندن صکره همان آیات قرآنیہ نک بونلره تعلق ایدن  
 جهتلرینی وجه مذکور اوزره تحریره تشریر ساق اهتمام  
 و اوچ باب اوزره برکتاب تألیفنه اقدام ایتدم. کتابی  
 ( احجار فحمیه ) حقنده بر مقدمه ایلہ حیوانات و نباتات  
 واجرام ارضیہ و سماویہ وجواهر معدنیہ بی حاوی اوچ بابہ  
 تقسیمی مناسب کوردم .



### —○— مقدمه —○—

( احجار فحمیه ) ایلہ بوکا متعلق اشیا حقنده در  
 ( الذی جعل لکم من الشجر الاخضر نارا فاذا انتم  
 منه توقدون ) (\*) معلوم اوله که آتش حوایج انسانیه دن

---

(\*) اول الله تعالى یشیل اغاجدن آتش چیقارر که سز آندن آتش  
 یافارسکز . بادیه عربده مرخ وعفار دیرلر ایی اغاج اولور که

اولوب بوده اغاجلره مودوع قوه صمغیه وشمعیه دن  
تحصل ایدر؛ آیت جلیله مذکوره ده ( جعل ) خلق  
معناسنه در احوالده مضمون حکمت مشحون آیت (سزک  
ایچون و منفعتکز ایچون یشیل اغاجدن آتش خلق  
ایلدی ) اولور . اوله یشیل اغاجدن آتشك جعلنده  
اصلا معارضه یوقدر زیرا کندوسنده اتشك ضدی  
اولان مائت بولمقله برابر یشیل اغاجدن آتش احداشه  
مقدر اولان جناب خالق سبحانه و تعالی آغاجده صمغ  
و شمع خلقنه قادردر . ( افرا یتیم النار الی تورون )  
یعنی سزک قدح و ذم ایلدیکنکز آتشی کوردیکز می ( أنتم  
النشأتم شجرتها ام نحن المنشئون ) یعنی او آتشك اغاجنی  
سز می خلق ایتدیکز یوقسه بز می مفاد جلیلی بونی اثبات  
ایدر .

( شجرة النار ) ك تفسیرنده ایکی وجه واردر برنجیسی  
آتش یا قلمغه صالح اولان اغاج اولوب بزم اودون  
دیدیکمزد زیرا بو اودون اولسه ایدی آتش یالق بزم  
ایچون سهولت بولمز و میسر اولمز ایدی؛ وجه ثانی ماده

انلری عربلر هنوز یشیل و آبدار ایکن دالارندن کسوب بربرینه  
سوردرلر آتش چیقار یعنی یشیل اغاجدن آتش چیقاران الله تعالی  
قورومش شینه طراوت و یرمکه قادردر . ( مواکب )



اشتهایه در که اغا جلرده موجود در و جناب حق قدر تیه  
 اغا جلرك كو كندن تولد ايدر ك تغذیه ایچون اغاچه منتشر  
 اولور و آندن صكره حضرت خالق مقدر آنی سوائل  
 دهنیه تحویل ایدر. اكر جناب حق اغا جلره یانق  
 خاصه سی ویر مامش اولسه ایدی هیچ برشی یانمز ایدی  
 اصل شعل اولان مذکور سوائل دهنیه بی احداثه مقدر  
 اولان جناب الله اغا جلده آتش احداثه مقدر در زیر  
 هر شیئه قادر در. ایدمی جناب رب عزت اشجار و نباتاتی  
 قدرت ربانیه سیله اخراج ایدر نه کیم فرقان جلیلنده  
 (والذی اخرج المرعى فجعله غثاء احوی) بیور مشدر که  
 الله تعالی یردن حیواناتک غذاسی اولان اوتلری چیقاروب  
 یشیلندیرد کدن صكره قوری و سپیه ایلدی دیمکدر. ابن  
 عباس رضی الله عنهما بیان ایلشدر که (مرعی) کلا  
 خضر یعنی یشیل اوتدر (غثاء) صولرك كو بوكی ايله  
 برابر کتوردیکی چورچوب ايسه ده بوراده قور یلق یعنی  
 بیوست در احوی دخی اسود دیمکدر.

اگرچه (غثاء) نك نه قدر مدته سیاهلندیغی  
 یلنور می دیو سؤال ایدیلور "سه جواب ویریلور که بونی  
 وطبقات ارضك ازمان تکنونی الله تعالی دن بشقه کیمسه  
 بیلز نه کیم جناب حق (الذی خلق فسوی والذی قدره

فهدی) بیورمشدر بوبایده بعض مسائل مفیده درمیان  
ایلمک لازم کلیور .

اولا جناب حق هر بر ممکناته قادر در و جمیع معلوماتی  
علمده دخی منفرد در مراد ابتدیکنی احکام و اتقان و کمال  
و عرفان ایله موصوف و عبث و اختلال و علت و اعتلا لدن  
بری اولدینغی حالده حب و اراده بیوردینغی وجهله خلق  
ایلدی .

ثانیاً بآیت جلیله ده کی ( قدر ) لفظ شریفنی جمهور  
مشدد ، کسانئ مخفف اوله رق قرائت ایتمشدر ؛ تشدید ایله  
قرائتنده مضمون عالیسی « جناب حق هر شیئی مقدار  
معلوم ایله تقدیر ایلدی » دیمک اولور . تخفیفاً قرائتنده  
ایسه قفال مر حومک بیانی وجهله ( ملک فهدی ) دیمکدر  
یعنی ( خلق فسوی و ملک ما خلق ای تصرف فیه کیف  
شاء و اراد ) تأویلنده در شو حالده آیت جلیله مذکوره نك  
مضمون صدق مشحونی « جناب حق جمیع اشیائی خلق  
و آنک انسب و الیق اولان حالاتنی تسویه ایتدی و مخلوقاتنی  
مشیت و اراده الهیه سی تعلق ایلدیکی اوزره تملك و تصرف  
ایدوب انلرک مصالح و منافی طریقنی هدایت ایلدی »  
دیمک اولور . جمهوردن بعضری بویکی کلمه نك هم معنی

ایلمک  
مطهره  
—  
عاز  
کار  
مسنده  
نور و  
۷

اولدیغنی بیان ایتشلدردرکه ( فقدرنا فعم القادرون ) نظم  
جلیلی بوافاده لرینه دلیدر .

ثانیاً جناب حق ( قدر ) قوی مخلوقاتک ذاتنده  
وصفانده علی حسبهم تناول لرینه اشارتدر و جناب مولی  
سماوات وارض و کواکب و عناصر و معادن و نباتات  
و حیوان و انسانی جثه و عظمین مقدار مخصوص ایله  
خلق و تقدیر ایلشدر و بونلردن هر برینه بقا ایچون  
مدت معلومه و صفات والوان و طعوم و روائح و اوضاع  
و حسن ، و قبح ، سعادت ، شقاوت ، هدایت و ضلالتدن  
مقدار معلوم مقدر قیلش ؛ نته کیم فرقان جلیلنده ( وان  
من شیئی الا عندنا خزائنه و مانزله الا بقدر معلوم ) یعنی  
هیچ برشی یوقدرکه آنک خزائنی بزم نزد مزده بولمسون  
و بز آئی انجق قدر معلوم ایله تنزیل ایدرز بیورمشدر .  
بوآیت جلیله نک شرحنه مجلدات غیر کافیدر زیرا بونده  
جیع اشیا حتی اعلای علیین دن اسفل سافلینه قدر  
جیع عوالم داخلدر .

ایمدی آیت سابقه نک تسیرینه رجوع ایدرک دیرزکه  
( فهدی ) قول شریفندن مستفاد اولورکه هر مزاج  
خاصه بر قوته مستعددر ؛ زیرا هر قوت انجق فعل معین  
ایچون صالح اولور . ( فسوی ) قول شریفنک مفهومی

اولان تسويه ايله ( فهدی ) دن مقدم اولان ( قدر ) قولنك تضمن ايتديكي تقدیره كلنجه بوتسويه وتقدير اجزای جسمائیه ده تصرفدن واول قوایی قبوله مستعد اولق ایچون اجزای مذکوریه وجه خاص اوزره ترکییدن عبارتدر و ( فهدی ) قولیده هر قوتی فعل معینه مصدر اولق حیثیتله بواجزا واعضا واجرام ده خلقدن عبارتدر و بوجمله مجموعندن تمام مصلحت حاصل اولور .  
تفصیلات معروضه دن صکره ( ژئولوژی ) علماسنك یعنی کتله ارضیدن بحث ایدن وطبقات ارضی مشاهده وآنك حقایقنی و بیانی قصدنده بولندیغز اشجار فحمیه دقایقنی معاینه ایتش اولان ارباب معلوماتك مقرراتی بیانه شروع ایدهلم .

( مابعدی وار )



### مقتطفات مشوره

عثمان زاده تائب مرحومك « صحت آباد » نامیهله تألیف ایلدیکی رساله مرغوبه ده مندرج ( حدیث اربعین ) دن اون اوچنجی حدیث شریف حضرت نبویدر :

« قال رسول الله صلى الله عليه وسلم ( رأس الداء الامتلاء ورأس الدواء الاحتماء ) صدق رسول الله .

هر مرضك باشي يعنى مبداء و منشأئى امتلاء، هر علاجك اصل و ركنى پرهيز و احتما در؛ زيرا كثر اكل باعث امراض متنوعه و مورث اسقام متلونه اولديغندن ماعدا بنيان فهم و كياستى خراب و خانه ذكا و فطانتى پراكنده و يباب ايدر انك ايچون حكما ديمش لدر كه ( كل قايلاً عيش طويل ) يعنى طعامك قلىلى ايله قناعت ايله كه عمر طويل ايله تعيش ايده سن. كتب شرع و طبده ده مذكور در كه معده هر دردك كانى در اعضايه امراض آندن حاصل اولور .

كرچه خدا گفت كلوا و اشربوا

در عقبش گفت ولا تسرفوا

عامل اولان كمسه بو فرمان ايله

حاصل ايدر صحت ايله آب رو



رسالة مذكوره مندرج ( حديث اربعين ) دن  
 اوتوز برنجیسی :  
 « قال النبي صلى الله عليه وسلم ( الرضاع يغير الطباع )  
 صدق رسول الله .

بومقامده رضاعدن مراد معصومك مدة رضاعده ۱۹  
 برخاتونك ممه سنی مص ایتسیدر. عادت آلهیه بونك اوزرینه  
 جاریه درکه هر خاتونك سودنده برکونه خاصیت وتأثیر  
 اولور اول خاصیت خیر و شر امر ردیکی معصومه اثر ایلر.  
 اعضا و جوارحه تأثیرنده بودلیل کفایت ایدرکه برکسه نك  
 ولدی مادرندن کبود چشم تولد ایلمسه آنی بر حبشی دایه  
 امر رسه مدت رضاعی تکمیل ایدنجه سیاه چشم اولور  
 صورت خلقیه بی تغییر ایتدیکی حالده کیفیات خلقیه بی  
 تغییر ایتسی جاه شبهه دکلدر. پس اصحاب اولاده لایق اولان  
 بودرکه دایه خصوصنده زیاده اهتمام ایدوب حسییه  
 ونسییه مرضیه الاخلاق وممدوحة الاوضاع مرضعه  
 اختیار ایدلر جاریه ده بو کیفیتك مشاهده سی متعسر در  
 توفیقه محتاج بر معنادر .

احتیاط ایله دایه امرنده

تا که اولادك اولیه بدخو

طبع مولودی شیراید رتقیر  
مفخر عالمک سوزیدر بو



ابوهریره رضی الله عنہن مروی اولہرق (فردوس  
اعلا) نام کتاب مستطابده مسطور بولنان حدیث  
شریف حضرت رسالت پناہی مفہوم جلیلدر :  
شفعاء بشدر : قرآن، رحم، امانت، پیغمبرکز وانک  
اہل یتى .



برآدم حسن بن علی رضی الله عنہماہی کلوب « قزیمی  
تزویج مرادمدر نصل آدمہ ویرہیم » سؤالی ایراد ایتسیلہ  
حضرت امام شو جوابی ویرمشدر « قزیمی جناب حقدن  
خوف ایدن ذاتہویر، اگر کریمہ کہ محبت ایدرایسہ قزیکہ  
سندہ حرمت ایلہ؛ ایتز ایسہ قزیکک حقندہ ظلم ایتماش  
اولور . »



ابو طیب مراعی رحتہ الله علیہک سویلدیکی امام

قشیری (رساله قشریه) ده ذکر بیان ایشدر:  
 «عقل ایچون دلالت، حکمت ایچون اشارت، معرفت ایچون شهادت وارد. پس عقل دلالت ایدر، حکمت اشارت ایلر، معرفت شهادت ایدر که عبادات صفاسنه وصول حصول بولمز الا صفای توحید ايله»



رساله مذکوره مندرجدر:  
 «رجا مستقبلده اولاجق محبوبه قلبی تعلیقدر  
 نه کیم خوف مستقبله متعلق اولور؛ قلبک عیش  
 واستقلالی رجا ايله حصول بولور؛ رجا ايله تمنی بیننده  
 فرق بودر که تمنی صاحبنه کسل ایراث ایدر پس جد  
 وجهد طریقته سالک اولمز. صاحب رجا بونک عکسیدر  
 بناء علیه رجا محمود تمنی معلولدر»



امام قشیری (اسماء الحسنی) شرحنک اسم «الله»  
 بحثنده بیورمشدر:

فضلادن بر ذات مجذوبیندن برینه (بر حاجتک  
 وارمی) دیمسیله مر قوم دخی (اوت) دیر بونک اوزرینه



فاضل ( نه کبی ) سؤالی ایراد ایتدکده ( بنی جهنمدن  
قورتار جنتسه ادخال ايله ) جوابنی آلهرق ( بونی بن یاپیم )  
بوللو مقابله ایلر . مجذوب ده ( اوله ایسه اسعاف  
وایفاسنه مقتدر اولهمیه جفک حاجتی بدن نیچون  
سؤال ایلدک ) دیه اسکات ایلر . اشته انسان هر  
شیئی جناب حقه توکل ايله طلب وارزوایلیدر . یوقسه  
ناسدن استیلاان حاجتک هیچ حکمی ، هیچ تأثیری  
اولمز .



امام همام مشار الیه ینه بو بحثده بیورمشدر :  
برآدم دائماً ( الله ) لفظ جلیلی ذکر و یاد ایلر ایدی  
برکون طاش اصابتیله باشی یارلدی ارضه دوکیلان  
قان ( الله الله ) اسم شریفنک صورت ترقیم و تحریرینی  
تشکیل ایلدی .

—

ابراهیم بن ادهم رحمة الله علیہک سویلدیکنی امام  
قشیری شرح مذکورک اسم ( قدوس ) بحثده ذکر ایلشدر :  
اخلاص جناب حقه صدق نیت در حتی حواریون عیسی  
علیه السلامه « اعمال و افعالك خالصی ندر » دیه سؤال

ایتدکلرنده نبیؐ مشار الیه جانبندن «خالص اعمال حق  
ایچون ایشلنیلان در یوقسه هر کس بکنسون دیه ایشلنیلان  
دکلدر» جواب صوابی اعطا بیورلمشدر.

—

فضیل رحمة الله علیه سویلدیکی کذلک بحث مذکورده  
مبسوطدر :

خلق ایچون بر ایشی ترک ایتک ریا اولدیغی کبی  
اعتیاد ایلکده شرکدر اخلاص سبب ثواب ریا ایسه  
موجب ذم وعقابدر .

شارح مشار الیه بو ایکی واصل باللهک اقوال جلیله-  
سنی یاد وتذکاردن صکردهده شو یله بیورمشدر :

طهارت قلبک ادا بندن درکه متاع دنیادن هیچ بر  
شیء ایله لکه لئمه زیر او متاع، قلبی هر وقت کرلدر،  
قلبنی حب دنیا ایله کرلتمیان عبد ایچون اهم اولان شیء  
سهولت پذیر اولور اقتضا ایتیمان علایقندن تجرد  
واستغنا حصول بولور .

\*\*\*

حسین کاشقی رحته الله علیه (اخلاق محسنی) نام  
تألیف لطیفنده دیمشدر :

اخلاص، ریا و علل و اعراضدن تطهیر اعمال و راستی  
نیت افعال در .

—

حکیم، جمیع شهواته غلبه ایتمینجه حکیم اوله میه -  
جفی عند الحکما ثابت اولمشد؛ حقیقت حسن اخلاق  
ایچون همان اک اول شهوته غلبه لزومی مطلقدر حکیم  
اولمق ایچونده حسن اخلاق صاحبی بولنمق وجوبی ایسه  
طبیعیدر .

—

اهل علم و حکمت ایله مجالسه، مباحثه، منافشه هر  
حاله نافعدر زیرا جهالتی مبدل علم و فضل، علمی تزید  
و بکمیل ایلر .



ایکی شی واردرکه غائب وضایع اولینجه قدری بیلنمز  
برنجیسی شباب ایکنجیسی عافیت .



سقراطه « نه ایچون دائماً شاد و خندان سک هیچ  
مغموم و کریان کورغمز سک » سؤالی ایراد اولندقد « بن

هیچ بر شیشه تعلیق خاطر اتمم که فقدان مغموم، هیچ  
بر متاع دنیایی طالب اولام که عدم حصولدن ناشی  
دوچار محن و هموم اوله یم جوانی» ویرمشد.



اخلاقیون حلمی شو صورتله تعریف ایتشدر :  
حلم، شدت غضب و قمتنده سکون و قرار و ترک  
تهییج فساد و اشراردن عبارتدر .  
جناب حقهک حلیم متعفی سودیکی حدیث شریف  
حضرت نبوی ایله تبشیر یورلمشدر .  
حکما و علما دخی حلم حقنده شویله دیمشدر :  
حلم، انسانی بلایا و آفادن حفظ و صیانت ایدر ؛  
جمال انسان حلم ایله نمایان، کمال علم حلم ایله اولدیغی  
آزاده بیاندر .



حسین کاشفی مرحومک ( اخلاق محسنی ) نام اثر  
بهتری ذیلنده مسطوردر که الی شیدن ثبات و بقا توقع  
و انتظاری جائز دکلدرد :

برنجیسی سایه ابر که بر لحظه ده زائل، ایکنجیسی  
محبت اهل غرض که ادنی بهانه ایله شعله برق ناچیز کی

مضمحل اولور؛ اوچنجیسی عشوه زنانه جزوی سبب  
ایله سکونت، دردنجیسی سرمایه جمال که نه قدر کمال  
بولسه البته نهایت بولور؛ بشنجیسی ستایش دروغ که  
آنک فروغی اولمز، التجیسی مال دنیا که عروس بیوفادر  
قابله کز؛ هر حالده مرد خرد منده لایقدر که نه کثرت  
مال ایله شاد وفرحناک نه ضیق حال ایله غمکین واندو-  
هناک اوله .



فاضل مشار الیهک ینه بو اثرنده مذکوردر :  
انسانلر اقوال و افعالنده درت قسمه منقسمدرلر ؛  
برنجیسی ساده سویلر اجرا ایتمز ، بوشیمه منافقان و صفت  
بخیلاندر؛ ایکنجیسی یاپار اما سویلر، بو عادت جوانمردان  
و مقتضای مروت واحساندر ؛ اوچنجیسی هم سویلر  
هم یاپار، بوسیرت اوسط ناسدر ؛ دردنجیسی نه سویلر  
نه یاپار، بو خصلت دون همتان و خسیساندر.



ینه مذکور کتابده مندرجدر :  
انکشت که زینت دست و آلت قبض و بسطدر نه وقت

آکا بر آفت طاری اوله بقای جثه باقیه ایچون قطع ایدرلر؛  
دندان که زیب و زیور دهان و آرایش صورت انساندر  
نه وقت بر عارضه جانکاه آکا راه بولسه امحای زجت  
ووجی ایچون قلع ایدرلر .



خالد بن عبدالله القشیری رحمة الله علیه ( واسط )  
شهرنده ایراد ایلدیکی بر نطقده شویله دیمشدر :  
ای ناس مکارمله افتخار ، اکتساب غنائم فضائله  
مسارعت و صرف اقتدار ایدیکز ! جود و کرمله استحصال  
حد و شکر یعنی استجلاب ممنونیت و تأخیر امور و مصالح  
ایله دوچار ذم و قدح اولمقدن توفی و محاببت ایلیکز !  
بر شیئی احسان ایتزدن اول سوبایلیکز ، ایجاد و تصنیع  
ایده جککز اشیای دخی اتمام و اکمالدن مقدم خبر و یرمیکز !  
تلطیف و انعام ایتدیککز آدم تشکرده قصور ایلرسه  
آنک حقنده ترتیب مجازات جناب حقه عائددر صاقین سز  
تشکر ایتدی دیه لطف و عنایتدن امتناع کوسترمیکز ؛  
زیرا جناب حقک سزه ایده جکی احسن مجازات و عنایات  
البتسه او آدمدن کوره جککز تشکراتدن انفع و خیر لودر  
هم بیلککز که حقک سزه اعطا و احسان ایلدیکی ثروت

ونعم حوايج ناسی تهوین ایچوندر اهلنه بذل وایشار لازمدر  
نعمت آلهیه قارشی ملال کوسترمیک که صکره آفت  
ومصیبه تحول ایدر . احسان وعنایتی صورت انسانده  
تصویر ایتسه هر کورن فرینته ومجلوب اولور، محتاجین  
سرور وحبور بولور؛ بخلی اوصورت قویسهلر عبوست  
وکراهندن ناشی هرکس نفرت وتقبیح ومذمت ایلر  
کمدیکز بیله خوف وفرار ایدرسکز .

ای ناس خلقک زیاده جوانمرد وسخنیسی نیاز ورجاسز  
احسان ایلاندر انتقامه قدرتی اولدیغی حالده مسامحه  
قیلانیده اصفح وسمیحدر؛ کمدیسنه جفا ایلانده احسان  
وعنایت ایدن ده اوصل واحسنیدر .

ایشته سوزلم بوندن عبارتدر کئدم وسزک ایچون  
جناب معین حقیقیدن استغفار واستظهار ایلرم .



( اخلاق محسنی ) نك ذیلنده مسطوردر :

اوج شئك وجودی دیگر اوج شئك وقوعیله زائل  
اولور .

برنجیسی؛ آب چشمه اول زمان شیرین ولذیذ اولورکه

بحره واصل اولمیه، بر کره دریاه اتصال وانصباب ایدرسه  
ارتق آدن لذت وعذوبت امیدی محال اولور.

ایکنجیسی: حال متعلقات اول وقت اصلاح پزیر  
اولور که شریر وبداندیش میانلرینه القای تخم تئیر  
وتشویش ایتیه، اما بر کره ارباب شقاق بونلرک اره سنده  
نفاقه یول بولورسه ارتق امید وفاق منقطع وتنفر دائم  
اولور.

اوچنجیسی: مصاحبت ومصادقت اولوقت صافی  
اولور که مردم سخن چین وفته انکیرک کلامی استماعدن  
امتناع ایدیه، اما استماع ایدیلورسه دعوی محبتہ اعتماد  
وادعای صداقتہ اعتقاد جائز اوله من.



ادب، نفسنی اقوال ناپسندیده و افعال غیر مشکوره دن  
صیانتدر. حقیقت ادب جمیع احوالده رسول اکرم  
صلی الله تعالی علیه وسلم حضرتلرینه متابعتدر؛ زیرا  
(ادبی ربی فاحسن تأدیبی) حدیث شریفیلده ثابت  
اولدیغی اوزره اک ادیب، اک لیبب جناب رسول ذیشاندر.

ادب آموز ازین ادیب که او

ادب از حضرت خدا آموز





## مقتطفات منظومه

شاعر الوزراء • وزير الشعراء مولانا ابو القحح البستي  
مرحومك ( قصيدة الحكم والامثال ) نذن ما بعد :

وذوالقناعة راض من معيشته  
وصاحب الحرص ان اثرى فغضبان

ياايها العالم المرضي سيرته  
ابشر فانت بغير الماء ريان

ويااذا الجهل لوا صبحت في لجم  
فانت ماينها لاشك ظمآن

لا تغتر بشباب رائق خضل  
فكم تقدم قبل الشيب شبان

كل الذنوب فان الله يغفرها  
ان شيع المرء اخلاص وايمان

اهل قناعت صورت معيشته دن دائماً راضي وممنون

بولنور، حریص و طمعکارک ایسه مالی ارتدقجه حرص  
و شدتی زیاده لشور .

ای سیرتی مقبول و مرضی اولان عالم ! سکا مرده که  
صوسز یرده بولنسهک بيله عطش و تشنگی چکمرسک .  
ای جاهل بی اذعان ! صولره بوغلسهک بيله  
شبهه سز بو حالکده ینه مشاق حرارتدن رها بوله مزسک .  
لطافت و عنفوان شبابه که مغرور اوله ؛ زیرا نیجه  
کنجلر اختیارله مقسزین رهین هلاک اولمشلردر .  
انسان اخلاص و ایمانه تابع اولورسه هر ذنبی جناب  
حق مغفرت ابلیر .



(روضة الناظر ونزهة الخاطر) نام مجموعه منظومه نك  
باب اولنك « انجح جد وسعی ايله استحصال ایديله بیلان  
آداب و فضائل اکتسابی مشوق اولان » برنجی فصلندن:

بنی اجتهد فی اقتناء العلوم  
تفر باجتناء ثمار المنی

الم تر فی رقعة یدقاً  
اذا جد فی سیره فرزنا

فأبأونا الغر قد اسسوا  
من المجد شم المباني لنا

فان لم نشدها لمجهودنا  
سينهار والله تلك البنا

اولادم ! اكتساب واقتناء علوه جهد واهتمام ايله كه  
اثمار مقصديكي جمع واقتطاف ايله فوز بوله سك .  
كورمز ميسك كه شطرنج او يوننده ( بيدق ) دينيلان  
آلت بيله جهد ايله يوررسه فرز اولور .  
آباء عظامز بزم ايجون مباني عاليه مجد وشرفي  
تأسيس وانشا ايتشلردر .

اكر بزاول مبانيك اعمار وتشيدينه ومحافظة عمرانته  
غيرت ايتمز ايسهك والله خراب اولورل .



ان السعيد فتى تأدب ناشياً  
حتى اذا بلغ الكهولة عظماً

حاز الفضيلة في صباه مرعياً  
لسلوك مذهبها فشب مقوماً

وسری فساد بفضلہ وکمالہ  
وعلمومہ فی العالمین مکرمہ

ادب ایلہ تربیہ ایدلش اولان کنج ہر حالہ مسعود  
ویودیکندہ ہر طرفدن تعظیم واکرام کورمکله مغبوط  
اولور .

او مثللو مسعود ومحترم ذوات ہنکام شہاب  
وصباوتدہ طریق سلامت رفیق فضیلتہ سالك اولدقلری  
جہتلہ حائز فضل و عرفان اولمش و ہنکام شیب و شیخو -  
خندہ قویم اولمقلہ شرف بولمش ، فضل و کمال ایلہ درجہ  
علای احترامہ ارتقا و علم و عرفان سایہ سندنہ ایکی جہاندہ  
منزلہ رفیعہ تکریم و تسیدہ اعتلا ایتشلردر .



اخ العلم حی خالد بعد موتہ  
واوصالہ تحت التراب رمیم

وذوالجهل میت وهو ماش علی الثری  
یعد من الاحیاء وهو عذیم

علم صاحبک وفاتندن صکره اعضاسی طپراق التنده  
چورر اما کنندیسی حقیقتده حی مخلددر (یعنی نام وشهرت  
باقی ودائمدر) صاحب جهل یریوزنده کزر یورر اما  
حقیقتده اولمش کبیدر جانلی عد اولنور ایسهده اموات  
مثللو معدوم الجسددر .



حضرت علی رضی الله عنه

لعمرك ما المرء كالرب حافظ  
ولامثل عقل المرء للمرء واعظ

لسانك لا يلقىك في الغي لفظه  
فانك مأخوذ بما انت لافظ

عمریکه قسم ایدرمکه انسان ایچون جناب حق کبی  
 برحافظ ، کندی عقلی کبی برواعظ یوقدر .  
 لسانکک سویلادیکی شی سنی یأس ونومیدی به  
 دوشورمسون ؛ زیرا سن تلفظ ایتدیگک شیله موأخذه  
 اولنورسک .



ان القليل من الكلام باهله  
 حسن وان كثيره ممقوت

ماذل ذوصمت وما من مكثر  
 الايدل ومايعاب صموت

ان كان ينطق ناطق من فضاة  
 فالصمت در زانه الياقوت

نظماً ترجمه سی :

کلامک قلتي اهليله خوشدر  
 اکر کثرته اولسه اوله ممقوت

خوشی اولان نه سورچر نه چکرعار  
 ذلل اولدی ولی مکشاره مشوت

اولورسه ناطقك نطقى كوشدن  
سكوتى آنك اولور در وياقوت



الناس من جهة التمثال اكفاء  
ابوهم آدم والام حواء

فان يكن لهم فى اصلهم شرف  
يفاخرون به فالطين و الماء

ماالفخر الا لاهل العلم انهم  
الى الهدى لمن استهدى ادلاء

وقية المرء ماقد كان يحسنه  
والجاهلون لاهل العلم اعداء

افراد بشر من جهت المماثلة يكديكرينه مساويدرلر  
زيرا هپسنكده باباسى حضرت آدم، اناسى حضرت  
حوادر .

انسانلر ایچون فی الاصل مدار افتخار اوله جق شرف  
اولسه ایدی انکله مقتخر ومباهی اولملرنده بؤس یوقدی  
حالبوکه بویله بر شرف زده اصلاری طوپراقله صودن  
عبارت !

فخر وابتها انجق اهل علمه لایق وسزادر زیر انا  
طالب هدایت اولانلری طریق حقیقه سوق ومنزل  
سلامته ایصال ایچون دلیل ورهبردرلر .  
قیمت ومزیت انسان حسن احوال وافعالیه در  
وجاهلر اهل علمك غدوی درلر .



شاعر مشهور ابن المعتز { ك آثارندن :

تکلم وسدد ما استطعت فانما  
کلامك حی والسکوت جاد

فان لم تجد قولاً سديداً تقوله  
فصمتك عن غير السداد سداد

سویله ، مقتدر اولدیغك قدر طوغری سوز سویله ؛  
زیرا کلامك حی، سکوتك جاددر .



اگر سويليه جك طوغرى سوز بوله مز سهك طوغرى  
اوليان شيمده سكوتك عين صوابدر .



— ❧ آثار منظومه ابن کمال ❧ —

{ حرف الباء }

بی بقادر بو منزل ای احباب  
فاتقوا الله یا اولی الالباب



قلعه کردونه دوشسه آفتاب  
لشکر اختر اولور بی فروتاب



حرف التاء



یار سرکش سینه پر آتش کو کل سودا پرست  
بخت ناهموار و طالع سر نگون خاطر شکست

شهر غم آباد بهجت خانه ویران و خراب  
رتبه اهل عالای پایه اقبال پست

باده حیرت مهیا کیسه آلام پر  
بزم هجران کرم و هم هشیار عالم جمله مست

کیسه امید خالی دست استغنا تهی  
منزل فرصت بعید و پای استغنا شکست

ظلمت محنت هویدا صبح همت نابدید  
نیک و بد بر مقتضای قسمت روز است



### احکام ایام

روز شنبه بصید منسوبست  
اندرین روز صید مرغوبست

روز یکشنبه است روز بنا  
این عمل در حدیث مکتوبست

روز دوشنبه است روز سفر  
سفر این روز اگر گئی خوبست

درسه شنبه بکنی حجامت و فصد  
روز تعطیل و شغل منکو بست

شریت اندر چهارشنبه خور  
که چهارشنبه محل مشروبست

پنجشنبه بجوی حاجت خویش  
باش طالع بان که مطلق بست

روز ازینیه است روز نکاح  
جمع و تزویج راعجب خوبست

یادگیر از (کمال) این ابیات  
تا باهل کمال منسوبست



کلبم همدانینک ابیات منتخبه سندنذر :  
صبح پیر را شفق اندود کردی از حنا  
قامت خم را که می آرد برون از انحنای

صبح پیری بی حنا ایله شفق اندود ایلورسک؛ اما  
 قامت خنی انخاندن بکم قورتاره بیلور؟  
 یعنی مانند نور صباح بیاض اولان صقالی حنا ایله  
 شفق کون ایدیورسک؛ آکری اولان بویکی بکم  
 طوغرلته جق؟

ازوقارشیب داری کوش سنکینی و بس  
 ازدرای کاروان عمر نشیدی صدا

صاغراغکی وقارشیب وعظمت شیخوخت ایله ستر  
 واخفا ایدیورسک بک اعلا؛ اما کاروان عمر چینغراغنک  
 صداسنی ده ایشتیورسک .

هیچ ازپیری نشد تغیر درحالت چوشمع  
 بی رک کردن نه ازابتدا تا انتها

حالنده پیرلکله هیچ تغیر حاصل اولدی ابتدادن  
 انتهایه قدر بوینی موم کی طوغری طوته بیلدک .



بهائی

یاقدك ای آتش زن ارام یانمش کوکلی  
نوهوس قیلدك بودنیادن اوصانمش کوکلی



لا ادری

بردیده ده کیم عینك ادراك اوله ایلر  
آینه امروزده فردای تماشا



بهائی

کوزل تصویرایدرسك خال وخط دلبری اما  
فسون وعشویه کلدکده ای بهزاد نیلرسك



انطاكيه مفتیسی اولوب کمال فضل و عرفانی بیلانی  
نزدنده خفی اولیان عاکف افندی مرحومکدر :

درون دلدۀ نه ذوق و حال قالمشدر  
دهنده دلبره دائر مقال قالمشدر

کوکل علاقہ نی برعادت ایلش یوقسه  
نه بنده عشق ، نه سنده جمال قالمشدر



لطائف النعمه

فی

اقسام الحکمه

بسم الله الرحمن الرحيم

الحمد لله ملهم الصواب و منور الالباب والواهب  
للعقل والمتكفل بالعدل والصلوة والسلام على رسوله  
الامين وعلى آله واصحابه اجمعين (وبعد) محاضراتی مطالعه

ایدنلره معلوم در که استاذ الحکما ابو علی ابن سینا  
 علیه رحمة المولى جانبدن ( حکمت ) ایچون تذکار ایدلمش  
 موجز و مکمل و مفید و مجمل بر تعریف لطیفی مجموعه مرک  
 اوچنجی جزؤنده درمیان ابتدیکمز صروده جناب استاذک  
 تعریف و اقسام حکمتی حاوی بر رساله مرغوبه سنک  
 در دست ترجمه بولندیغنی بیان و بونک مجموعهیه درجی  
 مقرر اولدیغنی افاده و اتیان ایلش ایدک رساله مذکوره نک  
 ترجمه سی بتوفیق رب الموفق بو کره رسیده ختام اولمسی  
 و تبعات عاجزانه من نتایجندن اوله رق بعض توضیحات  
 و مطالعات علاوه سیله بر درجه دها توسع ایلسی اوزرینه  
 ( لطائف النعمه فی اقسام الحکمه ) نامیله توسیم و بو  
 نسخهدن اعتباراً درج و ترقیم ایله تزین صحیفه مباشرت  
 ایلدک ومن الله التوفیق و بیده اذمة التحقیق .

### ﴿ مدخل ﴾

کمال مرتبه علوشانی ( ومن یؤتی الحکمة فقد  
 اوتی خیراً کثیراً ) نص جلیلی ایله ثابت و مبرهن و شکر  
 وجیهه ذمت عبودیت اولان بر نعمت صمدانیه بولندیغنی  
 ( ولقد آتینا لقمان الحکمة ان اشکر الله ) نظم لطیفیله

مستدل ومتین اولان حکمتك اصلاً راست گفتاری  
 و درست کرداری به موضوع لغت اولدیغی مدققین حکما  
 جانبندن بسط و بیان ایدلمش و حتی برنجی آیت کریمه ده  
 بو معناجه انسب اولدیغنی اساتذہ حکمادن فاضل بیدانی  
 جلال دوانی مرحوم مؤلفات مشهوره سننده درمیان  
 ایشدر .

ایمدی فرقان جلیله بو صورته مدح و ثنا بیورلمش  
 اولان حکمت حقنده افاضل سالفهك بسط و تمهید  
 ایدلکری تعریفات متعدد اولوب فقط اکثری لفظاً و یا  
 تفصیل و اختصار جهتلیله یکدیگره مخالف و مباین  
 صورته ایشهلده تضمن ایدلکری معنی جهتیه موافق  
 و مطابق بولندقلرینه مبنی هر برینک آیری آیری درمیانی  
 یولنه کیدلیوب انتخاب شهری مناسب کورلمشدر :

محاضراتك اجزای سابقه سننده مذکور اولدیغی اوزره  
 حضرت ابن سینا ( حکمت ، علی طاقه البشریه تصور  
 امور و تصدیق حقایق نظریه و عملیه ایله نفس انسانیه بی  
 استکمالدر ) تعریف مجملنی بسط ایش اولدیغی کبی  
 جلال دوانی دخی ( حکمت ، مجرد احوال موجوداته  
 علمدر ) تعریفی نفس الامر موافق کوره میهرک ( حکمت ،



انسانك جميع موجوداته بولندقلرى هيئت و حال اوزره  
نظر ايتى و بونظرله حقايق احواله و قوف حاصل  
ايدرك نفسى تشرىف و لايق و غير لايق تميز ايله برنجى ي  
اكتساب ايكنجىدن اجتناب ايدرك كمال و سعادت  
قصوايه نائل اولمىدر) يولنده تصرىحاتده بولمىدر .

فاضل مشار ايله شو تصرىحنى خلاصة دخی حکمت نفسك  
كندوسى ايچون ممكن اولان كماله عروجنى موجب علومى  
افاده ايتديكنى يازمىدر حقا كه شو افاداتى پك مطابق  
حقيقت اولوب اكر افاضل طرفندن تصويب و قبول  
ايدلمش و ابن سينا اشبو رساله مره اساس اتخاذا ايلديكمز  
اثر جلينده ( حكمت برصناعت نظريه در كه انسان  
انكله طاقت بشريه سى يتديكى مرتبه ده سعادت قصواى  
اخرويه استعداد حاصل ايدر و معقولات و موجوداته  
عالم اوله رق نفسى تشرىف ايله كماله ايرر) ديمىدر كه  
مشار اليهك بو تمهيدى جناب جلالك توضيحاتنه مأخذ  
اوله رق ايكي استاذك بو بابده متفق بولندقلرينه صراحة  
دلالت ايلر .

ارباب فراست و كياسته خفى اولمديغى و توضيحات  
معروضه ايله مرتبه تحققه واردىغى اوزره انسانك غايت

ایجادى اولان کماله نائل اولمسی علم و عملی شامل اولان حکمت یاردمیله، نفوس انسانیه نك کالات علمیه و فضائل علیه سنك و صورتی و معنوی مصالح و منافعتك حصولی ینه حکمت یاردمیله در .

مشکوة انوار نبوتدن اقتباس پر تو حکمت ایلش اولان قدمای حکماء اسلامیه نك اس متیننی وضع و تقریر ایتش اولدقلری حکمت وانلرك اثر اعتدال جویانه و حقیقت بینانه سنه اقتدا و اقتفا ایدن افضل متأخرینك قیود شریعت و قانون نوامیس ملتیه مطابق و موافق اوله رق تشریح و توسیع ایلدکلی حکمت کرچه چوق دفعه لر انواع تعریضاته اوغرامش و بر چوق تغیراته دوشه رك نیجه اشکال مضریه قونلش ایسه ده بو درلو عوارض قبیخه دن تجرید ایدیلنجه اکملیت اصلیه سنی کندی کند ینه ارئه و تبیین خاصه امتیازیه سمندن قطعاً خالی قالماشدر .

مبدأ اقدس و منشأ مقدسدن ظهور و نشأتی ادله قاطعه ايله محقق و لطف جلیل ربانی و چشمه آب زندگانی اولدیغی مسلم و مصدق اولان حکمتك حال معروض تشویشه قونلمسی ایسه بعض طالبینك یولیه تحصیل و تعلیم

عدم موفقیت لرندن ایلرو گلشدر چونکه اسانده حکمانک مؤلفات نافعہ سنده مبسوط و مسطور اولدیغی اوزره طالب فضیلت اول امرده تهذیب اخلاقه اندن صکره علم منطق و صکره علوم ریاضیه و طبیه تعلنه مأموردر حتی ابن سینا علوم ریاضیه بی منطقه تقدیم ایلش و جلال دوانی شیخ الرئیسک بو تقدیمی تصویب ایله دیمشدر که : « بو طریق اقربدر چونکه ممارست ریاضیه ایله بعید یقین اولور و ملکه استقامت و متانت تحصیل ایدر تکلیف و تحقیق و تعسف و تدقیق میاننی تمیز و تفریق شعاری حصول بولور ریاضیه التفات اتمه رک منطقله اشتغال اکثری صفات مجوئه نک عکسیله اتصافی مستلزمدر؛ بوندن ناشی در که افلاطون اوینک قپوسنه ( من لم یعرف الحویطر لا یدخل دارنا ) یعنی ( هر کیم هندسه بیلمزسه اویمه کیرسون ) یازدیرمشدر. اما تهذیب اخلاقک علوم سائرہ به تقدیمی هر حالده مقرر و متفق علیهدر و بقراط ( البدن الذی لیس بالنقی کما غنوته فقد زده شرا ) یعنی ( بر بدن که اخلاط فاسده دن پاک دکلدر اکانه قدر غذا ویرر ایسه موجب تراید شر و تضاعف ماده مرض اولش اولور ) دیمشدر بوده نفس اخلاق ذمیه دن پاک اولینجه تعلم علوم حکمت انک ازدیاد فسادینی موجب

اوله جفنه رمز و اشارتدر زیر بو واسطه ايله طالبدنه کبر  
 ونخوت و احراری افساد و کبار علما ايله مکابره ایچون  
 اسباب قدرت تحصیل ایدر . حقیقت طالبک درجه تخلف  
 وضلال و فسوق و انحلالده بولنمی ( فأتوا البيوت من  
 ابوابها ) مقتضاسنجه عمل ایتیهرك ابتدا تهذیب اخلاق  
 ایتدیکسندن ایلرو کلور . حکمت قید تقلیددن رهایی  
 و درجه تحقیقه وصولی موجبدر دیه ایشیدلمش ایسهده  
 بونک معناسی اکلاشلامشدر قیود شریعتک انحلالنی  
 وقانون نوامیس ملتدن اطلاقی مستلزمدر تصور باطلنده  
 بولنمشدر . بو مثلورلر دوعای هوی و رغبات طبیعت  
 حسبیلله تحقیقه ایره میوب زیور مردان راه طلب اولان  
 رسوم شرع شریفی ترك ايله آب و علفدن محروم بهایم  
 کبی خلیع العذار قالمشدر و آباء روحانیه اولان و کندیلرینه  
 تشکر ذمت همت طالبانه کاليله واجب بولنان اسلاف  
 واعیانله اسأت ادب و همتک عرض اقران خصوصسند  
 سباع انیاب کبی زباندرازلق ایتمشلردر .

اعتقاد عجائزه دوشهرك حقیقت کاره ایره -  
 مامشدر ، ( الذی استهوته الشیاطین فی الارض ) کبی ( مذبین  
 بین ذلك ) اولمشلردر . اشته بوندن ناشیدرکه کتاب وسنتک

مواضع متعدده سنده ممدوح و مشکور بولسان حکمت نیک  
 ناملغی بدناملغه تحویل ایدن بو قاصرانک سو احوالی تأ-  
 ثیر یله دوچار طعن اولمشدور . عصمنا الله و سائر المسلمين  
 عن الطغیان والذل في العقد والقول والعمل ولا حول  
 ولا قوة الا بالله و ما النصر الا من عند الله .

### ❦ اقسام الحکمه ❦

ایمدی شوقدر تفصیلات ایله دخی مجملأ معلومین  
 اولان حکمت مدلولاتنه نظراً ایکی یه تقسیم ایدلمش اولوب  
 بری ( حکمت نظریه ) بریده ( حکمت عملیه ) در .

حکمت نظریه نك غایتی انسانك فعلیه وجوده کلیان  
 موجوداتك حالته اعتقاد و یقین حصولیدر و بوندن مقصود  
 انجق بر رأی و فکر حاصل ایتکدر؛ علم توحید و علم  
 آلهی کبی .

حکمت عملیه ده ایسه مطلق موجوداتك حالته اعتقاد  
 و یقین حصولی مقصود اولیبوب خیرلو اولان شیئی انسانك

بالذات اکتسابی امرنده حصول رأی مقصود در و بونک  
حصولی عمل ایچوندر.

شوتعریفادن ا کلاشیلدجی اوزره حکمت نظریه نك  
غایتی معرفت حق حکمت عملیه نك غایتی معرفت خیردر .

—————

### ﴿ حکمت نظریه ﴾

اوچدر؛ برنجیسی علم اسفل در که بوکا «علم طبیعی»  
ایکنجیسی علم اوسطدر بوکا «علم ریاضی» اوچنجیسی  
علم اعلادر بوکاده «علم الهی» دینور؛ زیرا حکمت نظریه نك  
بحث ایتدیکی امور اوچ قسمدن غیر خالی در برنجیسی  
یا کرک وجود و کرک حدودی اجرام افلاک کبی ماده  
جسمانیه و حرکتیه و حرکت، سکون، تغیر، استحاله،  
کون، فساد، نشو، بلی و بواحوالک صدور ایتدیکی  
قوا و کیفیات و بونلرک ممائلی شیلر اولوب مواد  
جسمانیه و حرکتیه خاص اولان حاللره تعلق ایدر  
اشته بو برنجی قسمدر؛ یا بالکز وجودی ماده و حرکت  
متعلق اولوب حدودی تعلق ایتز تربیع، تدویر، کربت،  
مخروطیت، عدد و خواص کبی اشته بوده ایکنجی قسمدر

( فی الحقیقه کرتیک نه اولدیغنه ایاچ میدر التونمیدر دمیرمیدر تدقیق وتفهمه محتاج اولمقسزین ذهناً اطلاع ممکندر لکن انسانک نه اولدیغنی اکلانق ایچون کیلک وات صورتنده بولندیغنی تعریف وتفهمه لزوم واردر حال بوکه تغییر « کریت » کی کندوسنده غطوست شانی بولنان شیئی بیلک احتیاجنه محل قالمقسزین معلوم اولور مع هذا تربیع ، تدویر ، تغییر ، احدیداب وهیسی انجق حرکته واقع اولان اجرامدن برنده بولنور ) ؛ ویاخود امور مذکوره نه وجودی نه حدودی ماده وحرکته محتاج دکلدر هویت ، وحدت ، کثرت ، علت ، معلولیت ، کلیت ، جزوئیت ، تمامیت ، نقصان وبولنره مماثل صفات کی اشته بودخی اوچنجی قسمدر .

یعنی حکمت نظریه‌نک بحث ایتدیکی امورك برطاقی ذهنده خارجه ماده‌در سموات ، حیوانات ، نباتات وبولنرک متعلقاتی کی . او مثللو مادی اموردن باحث اولان قسم حکمت ( علم طبیعی ) ( طبیعیات ) یا ( فلسفه سفلی ) ویاخود ( علم ادنی ) تسمیه ایدلمشدر . ذکر اولنان امورك برطاقیده یالکز ذهنده ماده‌دن تجردی صحیح اولانلر یعنی

تصور وجودی ذهنده ماده‌دن مستغنی اولوب خارجه  
 مادهیه محتاج بولسانلردر حساب و هندسه کی؛ بونلره  
 امثالندن باحث قسم حکمه‌ده (علم ریاضی) یا (ریاضیات)  
 یا خود (علم اوسط) دینلشد. مذکور امورک برطایقه  
 ذهنده خارجه ماده‌دن مجرددر یعنی تصور وجودی  
 ذهنده و خارجه ماده‌دن مستغنی در قدم و حدوث، عقول  
 و ارواح کی بونلره امثالندن بحث ایدن قسم حکمه  
 دخی (علم الهی) یا (الهیات) (علم اعلی) (فلسفه اولی)  
 و کلیات موجوداته شمولی و عمومی اعتباریله (علم کلی)  
 و یا موضوعنک ماده‌دن تجردی جهتیله (علم مابعد  
 الطبیعه) نامی ویرلشد.

### ﴿اقسام حکمت عملیه﴾

افعال مذمومه و محمودنک بالاراده مصدری بولنسی  
 جهته ترک مذمومات و رزائل، اکتساب محاسن و فضائل  
 ایچون احوال نفس ناطقه‌یه علم و وقوف اقتضا ایدر.  
 اشته بو حکمت عملیه ایله حاصل اولوب؛ انسان کندیسنه  
 متوجه اولان کماله بو علم سایه‌سنده ایرر.



حضرت علی کرم الله وجهه ورضی الله عنہن  
منقول و مرویدر کہ جناب حق ملکہ شہوت و غضب سر  
عقل و حیوانہ عقل سر شہوت و غضب و یرمش فقط  
انسانہ ہینسی بخش ایلشدر؛ اگر انسان شہوت و غضبی  
منقاد عقل ایدر ایسہ کمال عقلیہ ایرر ملکدن عالی  
مرتبہ واصل اولور چونکہ ملک ایچون کالده مزاج  
یوقدر بلکہ ملک کمالی اختیار ییلہ دکدر حال بوکہ  
انسان مزاجک وجودیلہ برابر سعی و اجتهادی ثمرہ سی  
اولہرق او مرتبہ واصل وفائز و سعادت عظمیٰ کاسب  
وحائز اولشدر اما عقلنی مغلوب شہوت و غضب قیلارسه  
اووقت بہایمدن بغایت آلیق بر مرتبہ دوشر زیرا  
بہایم ییلہ مفقود العقل اولدیغی حالده شہوت و غضبدن  
وازع و فارغ اولور ہم کندسی فقدان عقل جہتیلہ  
نقصانده معنوردر اما انسان دکدر .

اشته انسانی شہوت و غضبه مغلوب ایتیمہجک  
معلومات و ممارسہی حکمت عملیہ تعین ایدر؛ انسانی  
دنیوی، اخروی مسعود و محترم قیلہجق طریق معیشت  
و اصول مدنی حکمت عملیہ تلقین ایلر .

حکمت عملیه نك باحث اولدیغی امور و معاملات دخی  
 یا شخص واحد مخصوص اولور یا مخصوص اولمز یعنی  
 تدبیر انسانی یا هر نفسه منفرداً یا خود افراد نوعه مشارکه  
 راجع اولور . افعال و اکتسابات و اختیارات بشریه  
 بالکز کندی نفسنك صلاح معاش و معادینه متعلق  
 بولنور ایسه اکا علم اخلاق دیرلر . علم اخلاقه ( علم  
 شریعت ) ( علم تهذیب ) ( فرهنگ ) ناملری دخی  
 ویرلشدر وحتی نفس انسانیه مرتبهٔ بییمت و سباعیتده  
 و بلکه اندن ده ادا ایکن علم اخلاق توسطیله  
 ملکدن اعلا مرتبهیه ایردیکی یعنی اخس موجودات  
 ایکن اشرف مخلوقات اولق سعادتتی علم اخلاق سایه سنده  
 بولدیغی جهته او علمه بعض اکابر ( اکسیر اعظم )  
 دیمشلردر . قدامان ارسطاطاليسك اخلاق حقنده کی  
 کتابی بو علمی محتوی اولدیغی ابن سینا بیان ایلشدر .  
 انجق شریعت محمدیه علم اخلاقی کچرچکدن تکمیل  
 و تصفیه ایلش اولق جهتیه نور اسلامتیه منور اولان  
 افانم اسلامیه نك اخلاق حیده حقنده کی مؤلفاتی  
 اثار قدامیه بالطبع مرجع و فائق و مقتضای حال و حقیقته  
 تمامیه موافق و مطابق اولشدر؛ چونکه علم اخلاق وحتی  
 حکمت عملیه حسن و قبحی تعیین ایدن علم دیمك اولوب

بولنری ايسه انجق شريعت تعيين ايدر حتى قدمای حکمانک  
علم اخلاقه اک واقف اولانلری دخی آفتاب نبوتدن  
اقتباس فروتاب ايتمش اولنلردر؛ اتم واکمل شرايع دخی  
شريعت مطهره اchiedه بولنديغی اجلدن اومنهج فلاح  
ونجاته ناهج و بو طریق فیض وسعادته سالک اولمش  
اولان اعظم اسلامیهنک تعیین و تقدیر ایلدیکی قواعد  
اخلاقیه نئس انسانیهنک حصول سعادتني کافل اولمشدر.

افراد نوعه مشارکه راجع اولان افعال واکتسابات  
ومعاملات دخی ایکی درلو اولوب بر طاقی بر منزله مشاء  
رکه راجعدر یعنی اهل منزل واحدک سبب انتظام احوالی  
اولور. بوکا (تدبیر منزل) (علم کتخدانی) دینور. ابن سینا  
بو علمی دخی قدمای حکمادن (بروسن) نام ذاتک تدبیر  
منزل حقنده کی کتابی مشتمل اولدیننی بیان ایلمشدر.

مدنیت انسانیهنک حافظ وحامی و مکمل و متممی اولان  
شريعت اسلامیه بو علمی اکمال ایلشدرد. باشلیجه قواعدی  
اداره بیتیه، انتخاب زوجه، تربیه اولاد و اصلاح معیشت  
عیال دیمک اولان علم مذکورک احکام شریعتیه نه قدر  
موافق اولور ايسه اول قدر مفید و نافع اوله جغی درکاردر.

افعال مذکورہ نك بر طاقيده بر بلده و ولايته و يا بر اقليم  
و مملكتہ بالمشاركه متعلق و راجع اولور. بوكا ( علم سياست  
مدن ) و يا خود اختصاراً ( علم مدنيت ) ( علم سياست ) نامی  
و يرلمشدر .

شيخ الحكما اشبو علمی افلاطون و ارسطاطاليسك  
كتابلری تضمن ايتديكنی پسان ايله ديمشدر كه « نبوت  
و شریعتہ تعلق ایدن جهتلر دخی حکمای مومی الیهمك  
نوامیس حقنہ کی مؤلفاتندہ مندرجدر . حکما ناموس ايله  
اوله خلقك ظن ايتديكي حيله و خدعه مراد ایتز بلکه  
انلر عنسدنہ ناموس قانون و وحی ايله ثابت وقائم اولان  
مثال حکمیدر . عرب دخی وحی ايله نازل اولان ملکہ  
ناموس دیرلر اشته حکمت عملیه نك بو جزؤيله نبوتك وجوبی  
و نوع انسانك وجود و بقاسندہ و شریعتہ باعثیت و مجبو-  
ریتندہ کی احتیاج ییلنور و کذا مجازات و عقوبات کی  
شیلرک و شرایعده کی اشتراك کلینك و قوم قوم و زمان زمان  
اولق حسبيله هر برینه مخصوص اولان شریعتلرک  
حکمتی و نبوت آلهیه ايله بو بابده کی دعاوی باطله یینندہ کی  
فرق معلوم اولور . »

تفصیلات معروضه ايله مستبان اولدی که حکمت عملیه

دخی حکمت نظریه مثلوا اوچه منقسمدر : (علم اخلاق)  
(تدبیر منزل) (سیاست مدن) .

انشا الله کرک بو اقسام و کرک حکمت نظریه نك اقسامی  
حقنده ایجاب ایدن تفصیلات صره سیله عرض ایدیله -  
جکندن بوراده اختیار اختصار مناسب اولور . انجق  
شوراسنی عرض ایدلم که حکمت عملیه نك موضوعی افعال  
و اعمال اولسی جهته عمله مختص بولنمسی لازم کلز زیبرا  
محتاج ایضاح دکلدر که بیلنیمان شیهه عمل ممکن اولمز .  
مابعدی وار



﴿ ابن غانم مقدسی مرحومك ﴾

« کتاب کشف الاسرار عن حکم الطیور »

وازهار نام اثرندن »

— ❖ ایکنجی اشارت ❖ —

— کل —

—  
بوندن صکره اشجارك حرکات اغصان و افنان،

از هارك الوان لطافت نشان ايله يكديكره بيان حال  
 و شان ايتلرينه نكران، هله او كوزل كلک - بزم ياره  
 هنوز كلهرك نشر نور صفا ايدن دلفكارك حجاب  
 ايله آل آل اولمش رخسارنده كي طراوتي آنديرر - بر  
 حالت دلنشين، بر طرز بهتري ايله اخبار حسن ورود ايد-  
 يشنه حيران اولدم؛ نشر رايحه نفيسه ايله نه كوزل بيان  
 حال ايديور، بوي دلاويزيله حلول فصل ربيع بديعي  
 حسرت كش صفای گلزار اولانلره نه خوش بيلديرييور،  
 كويا كه شويله سويلايور ایدی :

بن يازله قيش ارسنده كلير بر مهمان خوش اطوارم.  
 اما زمان ارام بهجت مدارم پك تيز گذار، حسن و لطافتم  
 غايته بي دوام و بي قرار در .

بن قلب وفا مشغونمی عاشق صادق، و امق موافقه،  
 رنك لطافت نمونمی دل آشوب لایقه بخش ایدرم؛ قو-  
 قلايانك مشامنی تعطير، شوق و زوقنی تكثير، حبور و سرو-  
 رینی تزید و توفير ایلرم؛ هم زیارت اولنورم؛ هم زارم؛  
 ارزودار دوام اولانلرك غفلتنه متحیرم .

آه ! زرده يتسه هم ديكنلر عارض اولور، جسم نازنینی

اینجی سدرلر؛ خار ظلم شعار اره سنده محبوس و مطروح،  
 ییکلرجه سهام زهرناک ایله مجروح؛ ایشته قائم بیله اوزرمده  
 عیان و ظاهر در؛ باق که شو حال پر ملالم دهر دونک علی  
 الدوام اثار کدورت کوسترمنه، شراب خوشکوارذوق  
 و شوقی سم مصائب و نوائب ایله تلخنک ایتسنه برهان  
 باهر در .

چیچک لک طراوتلیسی، اک لطیفی، مهمانلرک اک  
 خوشی، اک ظریفی اولدیغم حالده یته مصائب و مزاحدن  
 بردرلو رهایاب اوله میورم؛ دنیانک ا کدار و آلامنه صبر  
 و تحمل ایدنلر کرچه مطلقا نائل مقصود اولورلر؛ اما  
 زواللی بن بویله صبر و تحملده قدرتسزم؛ نه بلای حرارت  
 تاب آور مقاومت اوله یلیورم؛ نه اذای برودته طاقت کتیر  
 یورم؛ پک از زمان طیانورم؛ مطلقا چوق کچمدن صو-  
 لیورم؛ محو و پریشان اولیورم؛ تحمل ایتکه چالشدیغم  
 مدتجهده تعرضدن قورتیله میورم .

یا بر محبوبه نازنده ادا کلیور؛ بنی یرمدن جدا اید-  
 یور؛ رخسار آلنک حسن و آننه و یردیکی زینت کویا

یتشمیورم ش کی زلف دلبازینی بمله تزینه چالیشیور؛  
 او سیاه، او پارلاق، او ایک کی نازک کوزل طره لاره -  
 سنده بولند قجه فی الحقیقه غبطه بخشای عالم اوله جق بر  
 بختیارلغه نائل اوله - ورم؛ اما بیلم حرارت عشق تأثیر یله -  
 میدر نه در بو صفالی یرده ده ینه صولیورم؛ بر قاچ ساعت  
 اول لطافتیه حیران اولمش، بنی شایان التفات واحسان  
 کورمش او دلفکارک نهایت کوزندن دوشیورم .

آه قدر ناشناس پری ! دها دمچک جاندن کوکلدن  
 سوه سوه قوقلادیغک، مدار زیب وزینت بیلدیگک بن  
 بیچاره حقنده کی حسن نظرک، حسن توجهک نه دن بویله  
 چار چاباق مبدل نفرت اولدی ؟ عجیب بوکا سبب زوال  
 لطافتم میدر ؟ او یله ایسه ایواه ! ایواه که شمعی مفتون  
 حسن و آنی کورندیگک او محبوبه ینه سنک آلام عشقک ایله  
 صولارسه او بیچاره بی بر طرفه براغه جق، بلای فراق  
 وهجرانه او غراته جق، بشقه محبوبه ینه عرض محبت ایده -  
 جکسک ! نه وفاسزلق ! نه عبرت بخش ارباب عقول حال !  
 ضرری یوق . بن ینه سزه ایولک ایدرم، رایحه طیبه می



در بیغ ایتیم؛ اهل معرفت بولنانلریکزی منافعمدن حصه-  
دار، اهل محبت اولانلریکزی بوی خوشمله پردوق و مسار  
ایلرم؛ چونکه بیلیرم، هپ چکدکلریمه سبب کمندی رنک  
رویم، خوش بویمدر.



## محاضرات

مقتطفات

نومرو ۱۳، ۱۴، ۱۵، ۱۶ برنجی جلد غره رمضان

## صیام

{ یا ایها الذین آمنوا کتب علیکم الصیام کما کتب  
على الذین من قبلکم لعلکم تتقون }

« ای ایمان واسلام ایله شادان و بکام اولانلر ! ای  
دین مبین اجدیه اتباع وتوسل ایله شرف تام بولانلر !  
سزدن اولکیلره فرض ایدلمش اولان صیام مغفرت انجام  
سزک ایچونده فرض یورلمشدر تا که متقی اوله سکز » یعنی  
صیام، قوای شهوانیه ونفسانیه کزه ایراث ضعف وسکون  
ایتسون وسزی او قوای مفسدت اتناک زیر پنجه قهر  
وتغلبنده زبون وبو صورتله اسیر ذلل کونا کون اولمقدن  
خلاص ومصون ایلسون ایچون فریضه عبودیتکز  
اولمشدر؛ ادای فریضه ده قطعاً تسامح وتماهل ایتیک که  
مهلهکه فساد وضالیدن قورتله سکز .

خطبای کرامک منابر وجوامعده هر جمعه اخطار  
و بیان بوردقلری  
« اتقوا الله واطيعون »

امر حقیقت مشحونیه مکلفیتز وارسته رب ووطنون  
اولان اتقا، اوامر صمدانیه انقیاد واطاعت ونواهی  
سبحانیه دن قطعاً مجانبه در وایکی جهانده مستلزم نجات  
وسلامت، هر حالده محض فلاح وسعادتدر .  
اتقا، بر مسلك امنیت پیرادر که اکا سلوک ایدن ارباب  
اهتدا بر مقتضای

« فان تصبروا وتتقوا لا بضر کم کیدههم شیئاً »

هر درلو کید وضرر اعدادن خلاص ورها بولور .  
اتقا، بر کسوه زر اندود وزیادر که آنی اکتسا ایدن  
دانا بر منطق حدیث مفخر انبیا

« الایمان عریان ولباسه التقوی »

تزیین ایمان میامن بخشا اتمکله محسود اعداومغبوط  
احبا واخلا اولور .

اتقا، اویره بر سعادت عظمی در که اکا مظهریتله  
کامین اولان هدایت قرینک علو قدر ومنزلی رکن  
رصین دین مبین بولنان کتاب بهینده

« ان الله يحب المتقين »

نص رکنیله تصریح و تعیین و نزد رب العالمینده  
قبوله رهین عبادت عابدين تقوی آیین اولدیغی  
« انما تقبل الله من المتقين »

نظم متینیه توضیح و تبیین یورلشدر .  
ایمدی بویله آیات جلیله واحادیث علیه ایله ممدوح  
ومشکور بولنان اتقانک سهولت حصولی ایچون اوزرمزه  
فرض ایديلان صیام، صوم رمضان شرف رسان  
اولدیغی :

« شهر رمضان الذي انزل فيه القرآن »

نص کریمیه نمایان در یعنی اشبو آیت جلیله دن مقدم  
اولان ( ایاماً معدودات « الآیه » مضمون حقیقت مشحون-  
نندن منفهم ایام معدوده شهر رمضان در اول رمضان که  
ناسی حقه هدایت و حلال و حرامده و دین و شرایع و احکام-  
مده حتی باطلدن فرق و تمیزه دلالت ایدن حضرت قرآن  
لوح محفوظدن سماء دنیایه او شهر سعادت عنوانده  
شرف بخش نزول اولمشدر بو شهر مبارک سزدن هر کیمیک  
معلومی اولور ایسه صائم اولسون حال مرضده و یاسفرده  
بولنلر صائم اولمقلری کونلرک یرینه کون طوتسونلر

جناب حق سزہ سہولت ارادہ بیورہرق عسرت وصعوبت  
مراد بیورمدیغندن حال مرض وسفرده اداسنه مقتدر  
اولہمدیغکز فریضہ صومی حصول صحت ویا تقرر اقا -  
متکڑہ ایفا کرہ مساعده بیورمشدر سزی صوم ایلہ طریق  
سعادت رفیق حقہ ہدایت بیوردیغی ایچون حضرت  
قادر قیومی تکبیر و تفخیم وشو نعمت جلیلہ دن طولای  
اول منعم حقیقیہ عرض شکر عظیم ایدیکز ( مفہوم  
عالیسندہ کی نص مار البیان اوزرمزہ فرض اولان صوم  
صیام رمضان اولدیغنه دلیل واضح وعیاندر .

برده اشبو نص جلیل ایلہ مرتبہ ثبوت وقطعیته  
توصیل بیورلمشدر کہ حال مرض وسفردن غیریدہ افطار  
یعنی ترک صیام خیر آثار غیر جائز وخلاف امر حرکتک  
متبع عقوبات شدیدہ اولہجغی امر بارزدر .  
یازق آنلرہ کہ شوارادہ نافعہ ربانیہ اطاعت وانقیاد  
ایتمزلر .

«تصوموا تصحوا»

خبر شریفندن غفلتله موجب اعتدال قوای بدنہ  
اولان صومی مستلزم ضعف عدایتمک کبی وهم سقیم  
وفکر ضلالتہ دوشرلر .

واہ صد ہزاران واہ اول بی اذعانلرہ کہ طریق

مسعدت رفيق هدايته سلوكريني تسهيل ايجون فرض  
بيورلش اولان صوم رمضانى طاقت فرسا بر باركران  
صانع حق و بلاهتنه اسير اولمشلر،

«كلوا واشربوا هنيئاً بما اسلفتم فى الايام الخالية»

نص جليلى ايله تبشير بيوري لان سعادت عظمادان محروم  
قالمشلردر من كل الوجوه منافع ومحسناتى ظاهر و باهر  
اولان صومى موجب ضعف عد ايدن بدبختلر بر كره  
دوشونسلر كه مضر صحت محل عافيت صوم بر منفعتيدر  
يوقسه ذوق وصفا نامنه دوشدكلرى او كرىوه  
فساد ورزالت، نشوه ناك صانهرق مالوفى اولدقلرى اوزهر  
هلاهل خباثت ميدر؟ تلخى خجارى لذت وصفاسنى هر زمان  
امحا ايدن ووجوده مضراتى لايعدد ولايحصى اولان او  
زهر ناك مايعاته كمال خواهش كوستر و بده بر قاچ ساعت  
سورن، لذت وصفاسى قلوب منوره اربابنك مسلمى اولان  
صوم نافعدن خوف و محاببت ايدن زواللير از يحق ملا-  
حظه ايتسلر كه شو جهاننه نه ايجون كلمشلر، خليع العذار  
كشت و كذار ايتك ايجونمى وجود بولمشلر؟!

نَحْنُ بِرَنَفْسِ تَمْنَّاسِي اِيْلَه  
يَمَّكْ وَاِيَحْمَكْ اُولَه دَلْخَوَاهَكْ

مَعْبِدَكْ مَطْبَخْ اُولَه شام و سحر

مَسْتَرَاخْ اُولَه زِيَارَتْ كَاهَكْ

بُونَكْ اِيَحُونَمِي اُولُورْسَكْ مَخْلُوقْ

بُو مِيْدَر اَمَرِي سَكَا اللّٰهَكْ ؟

ايمدی عاقل اودر که جنت اختیاریه ده بولنمز، ادای  
فریضه عبودیتده قدرتی یتدیکی قدر جد و غیرت ایدر؛  
اوهام باطله و خیالات عاطله ایله قعر عمیق مذلت و مفسدته  
دوشمز، اوامر الهیه اطاعت و انقیاد ایلر .

« لِّلصَّائِمِ فَرْحَتَانِ فَرْحَةٌ عِنْدَ الْإِفْطَارِ وَ فَرْحَةٌ عِنْدَ

لِقَاءِ رَبِّهِ »

حدیث لطیف رسالت پناهی مضمون حقیقت مشحو-  
ندن یعنی ( صائم ایچون ایکی فرح واردر بری افطار-  
زماننده بریده لقاء رب آن شرف عیاننده متحصّل در )  
مفهوم حکمت نمونندن مستدل و مستبشر اولان سعادت  
عال العاله نائلیت ایله مباهی و مفتخر اولور .

کامل اودر که غفلت جهولانه دوشمز مبنای اسلام  
اولان صیامه اقدام، اصلاح نفسه اهتمام ایدر؛ ارباب  
فسق وفجور کحال اسف اشمالنندن عبرت آلهرق سلامته  
ایرر .

### « زکوة الحسد الصیام »

کلام حکمت انسجامندن اقتباس پرتو هدایت وزکوة  
وجودینی صوم ایله بالایفا اکال قوت وصحت وتزید عمر  
وعافیت ایلر .

فی الحقیقه بلا انکار ترک صوم ایدنک توبه سی مقبول در  
اما قضا ایله اولور یعنی صلوٰة و زکوة ده اولدیغی کبی  
ترک ایدلمش اولان صومی قضا وادا ایله توبه رهین  
قبول اوله ییلور انجق توبه یه کووه نوبده ارتکاب معاصی  
ایدنلرک عقل ایله اتصافنه کوکل هیچ رضا ویرمک ایستیمور  
توبه یه کووه نان معصیت کارلرک غفلتنه حکم ضروری  
اولیور .

توبه ایله اولور دیو ساقط

ارتکاب کناه ایدر غافل

نفع تریاقه اعتماد ایدوب

ماره می صوقدیر اوزین عاقل



همده قضاء صوم نه مشكل اولديغي بيلغيدير؛ اول  
امر ده دوشونغليدركه رمضان كبي شرفلى بر زمانده،  
معابد ومساجدك الك نورلى بر وقتى اولان او شهر مغفرت  
نشاندە صائم اوله ميان صبرسز، بتون اخوان دينك صوم  
ايله تشرف ايلديكي آوانده آنلردن اعتزال وافتراق ايله  
بر لقمه اتمك بر لقمه صوويا بر قاچ درلو مكروهات خاطرى  
ايچون امر آلهي يه اطاعتدن امتناع ايده جك قدر مظلم  
القلب اولمش كوته بين نصل اولورده قضاء صوم ايده -  
بيلور؟! باخصوص هانكي آدم يارين بر حيات بولنه -  
جغنه اميندر كه بو كون ايفاسى مترتب عهدۀ عبوديتي  
اولان وظيفه يي يارين ادا امنيه سنده بولمق حقنى حائز  
اولسون؟! بناء عليه بويله افكار واهيه ايله ترك صوم  
بيوك قباحتدر، عين جنت در .

براز انصاف ايله تأمل ايدلسه كه الك عادى بر لرده الك كيرلى محللرده  
پاكلكى سونلرك يارم دقيقه طوره ميه جغنى مزبله لرده كال خوف  
وهراس و صوك درجه احتراز ايله بر لقمه اكك يمكه ويا  
بر نفس سيغاره چككمكه ويا بر يوتم صو ايچمكه چاليشوبده  
اضطراب ايچنده يشانه جغنه هر كسك منفورى اولنه جغنه  
حتى كندى وجدانى نظرنده بيله محبوب قالنه جغنه بر قاچ

ساعت صبر و تحمل ایدلسه ده فریضة نافعہ صومی ایفا اولنسه  
 دها کوزل دها خوش اولرمی؟ رمضان شریفده صائم اولانک  
 ذنوب سابقه سی رهین عفو و صفح آلهی اوله جغی اخبار بی  
 کریم ایله مبشر و مجزوم ایکن بونلر دوشلیوبده هوسات  
 نفسانیه نک تسویلاته قایلک، ادای فریضة شرف و موفقیتندن  
 محروم قالمق مغایر عقل و هوش اولرمی؟

اشته ای اخوان دین! بورالری کوزلجه مطالعہ  
 ایله صائم اولکز فقط شرائط صومی پله رک، رعایت  
 ایدرک صائم اولکز.

حکمت مفروضیتی - تسهیل اتقا ایچون - کسر  
 شهوت اولدیغی تفصیلات سابقه ایله معلوم اولان صومک  
 بیاض ایسلکه تشبیه اولنان نور صباح ایله فرق و تمیز  
 ایدیه یلدیکی زماندن کیجه یه قدر دوامی نص ایله ثابت  
 اولوب کیجه لری زمان ابتداء صومه قدر حلالیه اجتماع  
 وجعاع غیر ممنوع اولدیغی معلومدر.

صائم اولانلرک حرامدن، رزائلدن، فسادی مؤدی  
 و منتج هر درلو احوال و اطواردن مجانبتی تحت الزمیتده

بولند۔ یعنی ہر کس عندندہ معلوم و محققدر . حال بویله  
اولنجہ رمضانلرده کورمکده اولدیغمز احوالک دوامنه کوکل  
نصل راضی اوله بیلسون !

کسر شهوتله معاصی و مناهیدن مجانبت ایچون صائم  
اولورکن کیچه لر انواع مفاسدی ارتکاب، کوندز بیـک  
درلو مناهی یه اجتناسار یاقیشورمی ؟

عفت واستقامت، ناموس و حیثیت، حقوق غیره کمال  
ریایت هر وقت، هر زمان واجبه ذمت اسلامیه مز ایکن  
صلاح و عبادته حصر ایتمک لکمز لابد اولان ایام مبارکده  
لهو و لعب و تماشای نسوان کی تزید و تحریک شهوت ایدر  
مستجن حاللره و حرکترلره موفقیت ایچون اختیار انواع  
تعب موافق قاعده اسلام، مطابق شرائط صیام اولورمی ؟  
شهر عبادتی موسم معصیت عد ایدرجه سنه علی  
الدوام فسق و فجوره اقدام لایقمیدر ؟

حق تسبیح ایله اشتغالی لازم کلان دیلرک مخدراته  
حرف اندازلغه استخدای روامیدر ؟

فرقان و موعظه کی تصفیة قلوبی مستلزم مستحسناتی  
استماع ایتمی اقتضا ایدن قولاً قلمزک هو او هو سمنه خادم  
اولان مستجناتی اشته کله مشغول بولندیرلمسی سزامیدر ؟

فی الحقیقه زینت، لازمهٔ نسوان اولدیغی معلومدر  
 اما حلالندن غیرینک عدم رؤیتی لابدر کمال رعایت  
 مقتضای اسلامیت اولان قاعدهٔ استتاره هیچ اهمیت  
 ویرمامک، کرائم نسوان ایچون مدارزب وزینت اولان  
 حجاب نقیصهٔ حسن وآن ایمش کبی نظر التفاته النمیوبده  
 قطعاً جائز اولمیان لایبالیکله ائتلاف ایلک نصل اولیورده  
 عقیف بر وجدانی لکه دار ایتیور؟ شیطان پسندانه قیافتلر،  
 طورلر، نمایشلر، آشناقلر، معاملهلر نصل اولیورده نقیض  
 عفت، مغایر عصمت عدایدلیور؟ هر حالده بویله  
 مقدوح ومنفور احوال محذراته هیچ بر وقت مناسب  
 دکلدلر .

بیللی یزکه معاصی ومناهیدن توقی هر زمان الزم او -  
 لوب شهر غفران اولان رمضانده ایسه بسبتون قطعی  
 الوجوبدر؛ چونکه رمضانده عبادت وطاعت فوق العاده  
 موجب اجر ومثوبات اولدیغی کبی فساد ومعصیت دخی  
 ضایه الغایه مستلزم مجازات وعقوباتدر .

شهر الصیام مشا کل الحمام  
 فیه طهور جوامع الاثام

فاطهر به واحذر عثارك انما

شر المصارع مصرع الحمام

يعنى «شهر صيام مشا كل ومشا به حمامدر آنده جميع  
آثامدن طهارت حصول بولور سنده انكله تطهره  
چاليش واياغنك سورچسندن فوق العاده حذر ايت؛  
زيرا دوشمه لك اك فناسى حمامده دوشمكدر».

اشته شاعر شو اياتنده رمضان شريفى موجب  
طهارت بدن اولان حمامه تشبيه ايله آنده جميع آثامدن  
طهارت حصولنى بيان ايتمش وحمامده آياق سورچمسندن  
احتراز لزومنى بسط ايدرك او ايام مباركده اك اوافق  
كناهدن بيله الزميت توقيبى اتيان ايلمشدر.

«اللهم زين قلوبنا بزينة العفة والعصمة \* ونور عيوننا  
بنور الهداية والحكمة \* بجاه من هو العالمين رحمة».

(انتهى)

توکل، تسلیم، رضا

۲

﴿تسلیم﴾

ترك تعريض ايدرك حقه اطاعت ايله  
اولهيم دیرسهك اكر ايكي جهانده مسعود

حذرايت چيقمه صقین دائره تسلیمدن

بويله امر ایلدی زیراکه جناب معبود

حقیقت ترك اعتراض ايله اوامر التیهیه انقیاد واطا-

عت واجبه ذمت عبودیت اولوب کربوه تعريض ومخا-

لفته صامق قدر مضر ومهلك بر علت اولهمن .

او رجه مضر که گرفتار اولان دنیاده شدتلی یأس

وحرمان ايله امرار زمان ایدر؛ عالم بقاده قعر عمیق

ذات وجزایه دوشر .

تسلیم، نه مستحسن سچیه درکه متخلفی دارینده

نائل فیض وسعادت ایدر .

تسلیم، نه مرغوب خصیصه در که صاحبی اضطراب

واندیشه دن حفظ وصیانت ایلر .

علمای اخلاق تسلیمی هر امر ربانیه انقیاد واطاعت

و صورت ظاهره ده ایجاب حاله مطابق کورنمیان  
 اموره اعتراضدن مجانبتدر دیمشله و بو انقیاد و مجانبتسک  
 موقوف علیهی ایمان اولدیغنی اثبات ایلشله در.  
 سندن ادنایی کوروب شکرایله دمساز اولمق  
 سندن اعلا لره رشک ایلنک مرهمیدر  
 نابیا سالک سر منزل مقصود اولانه  
 راه تسلیم و رضا یوللرک اک اسلیدر



۳

—○— رضا —○—

« لکیلاتاً سوا علی ما فاتکم ولا تفرحوا بما آتیکم »

\*

شاد و غمکین مشو بسود زیان  
 زانکه سود زیان نخواهد ماند

مطلقدرکه نعم دنیانک فوت و ضیاعندن یأس  
 و اغبرار، تحصیل و تزایدندن کبر و اغترار قطعاً موافق

عقل و حکمت اولمز؛ بوقاعده‌یه اتباع ایتیمانلر هیچ بر  
دقیقه راحت بوله مز .

هر که راضی شد از قضای خدا

بهره می یابد از رضای خدا

محققدر که قضای آله‌یه رضا ایله هر حالی بلا تغیر  
حسن تلقی ایدنلر رضای صمدانی‌یه نائل اولورلر و بورضا  
ایله ایکی جهانده راحت و شرف بولورلر .

رضا، طرف خدادن متواصل اولان قضایه خشنود-  
لقدن عبارت اولدیغی و بو خلق مستحسن ایله اتصاف  
برچوق فوائد و محسناتی مستلزم بولندیغی کتب اخلا-  
قیه‌ده بسط و بیان و امثال و دلائل عیدیه ایله تفهیم  
مقصد و مرام ایدلشد .

سعی ایت همیشه کسب رضای خدایه کیم  
راضی اولوب خدا سنی راحت مکین ایدر

تقدیره ربط قلب ایدن آزاده خاطری  
عزت نه شادکام و نه ذلت حزین ایدر



## تمه

ایمدی اخلاق اسلامییه دائر اولان مؤلفات مرغو-  
به دن مقتطف شو مسروداتمز توکل و تسلیم و رضایی  
ممکن مرتبه تفهیم وایضاح ایلمکده در .

هر ایشده اسباب ووسائله بعد التثبت حصول  
نتیجه یه متوکلانه منتظر اولانلرک او زمان انتظارک ویره-  
بیله جکی هر درلو وسوسه و اندیشه دن آزاده بولنه جقلری،  
دائرة تسلیم ورضاده پابرجای ثبات بولنلرک نیک و بد  
احوالدن قطعاً متأثر اولیه رق یأس وحرمان کبی اک  
باشلو سبب بطائت و بطالتدن مصون اوله جقلری نظر  
اعتماددن دور ایدلمیجه هر زمان توکل و تسلیم ورضا حبل  
میننه صارلمق اقتضا ایدر .

شریعت مطهره محمدیه نك ارکان واحکام وقواعدی  
هب بویله فوق العاده متین، فوق العاده رصین، فوق  
العاده نافع، فوق العاده شایان توسل وتمسکدر .

حقیقت بویله اولنجه انسان که ایکی جهاندی معزز  
ومحترم اولمغی دیلر محض خیر وصلاح اولان اوامر  
الهییه مطیع ومنقاد اولمیدر .

انسان که هر زمانده مرغوب ومکرم اولمغی ایستر بر  
مقتضای

## « بعثت لاتمم مكارم الاخلاق »

متم ومكمل اخلاق مستحسنه اولان آفتاب عالمتاب  
نبوت پیغمبر ذیشان علیه الصلاة والسلام افتدمن  
حضرتلرینک انوار فیوضات نثار احادیثندن اقتباس  
پرتو کلماته ساعی بولمیدر .



## م زراعت

فقریکی رفع ایچون زراعت قیل  
حالکی ماسوایه ایلمه عرض

افضل انبیا بیور مشدر

اطلبوا الرزق فی خبایا الارض

او قجی زاده مر حومک شو قطعه بر کزیده سنه زینت  
بخش اولان حدیث شریف موافق بحر خفیف اولوب  
( ابو یعلی ) نک ( مسند ) ده و ( طبرانی ) نک ( مسند کبیر ) ده  
و ( بیهقی ) نک ( شعب ایمان ) ده ذکر و بیان ایلدکلرینه  
کوره حضرت عائشه رضی اه تعالی عنها جانبندن روایت  
ایلدیکی ( جامع الصغیر ) ده مسطوردر .

جاراه الزمخشری علیه رحمة البارینک ( خذ والغتکم

من رجل اعجمی) کلامیله علوقدرینی بالذات اعلان  
 و بیان ایتدیکی فائق اللغه نام کتاب مستطابنده (اطلبوا)  
 یرنده (ابتغوا) ذکر ایدلیدیکی کی سائر بعض کتبه دخی  
 (التسوا) کورلش اولوب بونلرک معنی فرق کلیری بو-  
 لندیخی جهته هرنه صورتله قبول ایدلسه بئس یوقسه ده  
 (اطلبوا) اولسی اکثر محدثین کرام حضراتک اخبار  
 وروایتنه توافقدن ناشی مر جحدر .

شارح جامع الصغیر مناوی مر حومه سائر بعض  
 افخم جانبندن دخی بیان بیورلدیخی اوزره حدیث شریف  
 مذکورده کی خبایا (خبیئه) نک جمیدر شفیع ورنده  
 (خبیه) و شفیع ورنده (خبی) کیرلو و مستور شینه  
 دینور شو حالده حدیث مذکور ارضده مستور و پنهان  
 اولان خزائن خفیهدن وارضک حائر اولدیخی قوه منبته دن  
 بالاستفاده اکتساب رزقه سعی و غیرتی  
 آمر در بو صورت (فائق للغه) ده دخی توضیح و حدیث  
 شریفک زراعتله استخراج معاده ترغیب ایچون اولدیخی  
 تصریح ایدلشدر .

اشته جناب مفخر ابنیا علیه افضل التحایا بو حدیث  
 شریف ایله مسلمینی هم زراعت و حراثته همده استخراج  
 معدنیاته سعی و غیرته تشویق بیورمقده در .

شویقین زمانلرده (سوربون) ده ایراد نطق ایله  
 اسلامیت امانه صنعت و معرفت ایلشدر دیه جک قدر  
 بلاهت کوسترن (موسیو ره نان) دیده بصیرته کلمش  
 او غشاوه جهل و عنادی قالدیروبدی بو درلو حقایق  
 کورمش و بو کون ملل واقوامک کسب ثروت و سامانه  
 الک برنجی خادم اولدیغی تحقق ایدن معدنچیلکه بیک  
 اوچیوز سنه اول مسلمانلری حث و تشویق بیوران پیغمبر  
 دیشانک نشرینه مأمور اولدقلری شریعت مطهره ده کی  
 بو اکملیت فوق العاده به بر آزجق آگاه اولمش اولسه  
 ایدی او یله تعرض و تجاوزده ممکن دکل بولنه مزیدی.  
 اسلامیتک مکملیت فوق العاده سنی مرقوم موسیو (ره نان) ه  
 ونور بصیرتی رمد اغراض ایله خیره نمش اولان هم  
 افکارلرینه اکلایمق ایچون بر مقاله مخصوصه احضار  
 ایلدیکده اولدیغی کبی مجموعه مزه درج ایتدکه بولندیغمن  
 (اسرار النورانیة القرآنیة) ترجمه سی دخی شو مقصده  
 حقیقه خدمت ایلدیکده اولدیغمن بوراده صد ددن آیرلمیه رق  
 یتنه بحث زراعتیه رجوع ایدلم.

معلوم اولسون که محمدیلری زرع و حرث تشویق  
 ایچون ده بر چوق اوامر جلیله کتب مخصوصه سنده  
 مبسوط و مندرجدر؛ ازجمله (ابی داود) رحمة الله علیهم

(علی بن حسین) رضی الله عنهما دن نقلاً (مراسیل) ده  
ذکر ایلدیکی

« احرثوا فان الحرث مبارك »

حدیث شریفی هم او تشویق همده حراثت مبارک  
یعنی کثیر الخیر و عظیم النفع اولقله ممدوح بولندی  
تبشیرینی تضمن واحتموا ایلکده در .

اشته زراعت او مشغولیت پریمن وبرکتدر که  
حضرت نبی ذیشان علیه الصلاة والسلام افسندمزنک  
مدایح جلیله سنه مظهریتله شرفیاب اولمش؛ اشته حراثت  
او واسطه نفیسه معیشتدر که اشرف وسائل و وسائل  
اداره اولدیغی هر وجهله تحقق ایتشددر .

تتبع خبايا الارض وادع مليکها

لعلک يوماً ان تجاب وترزقا

خبایای ارضی تتبع ایله یعنی خفا و مخترنات ارضدن  
استفاده جه جد واهتمام و او ارضک خالق و مالکی اولان  
حضرت قادر مطلقه دعایه دوام ایت که بر کون اولوب  
مجاب و مرزوق اوله سک .

« فلاح المعیشة فی الفلاحه »

قول حکیمانه سی ناطق اولدیغی اوزره امر معیشتده  
الک زیاده موجب فلاح ونجات اولان حراشدر .

« الفلاحة بالفلاح مصحوبة

والبركة على اهلها مصحوبة »

کلام حقیقت انسجامیله مستدل اولدیغی اوزره  
فلاحت وزراعت مقارن فلاح وسلامت واهلنه موصل  
منفعت وبرکتدر؛ هر یوزدن مستلزم فوز وغنیمتدر؛  
محصول زرع بستان ایله تدارك اقوات عیال وتزیدوت کثیر  
امواله غیرت هر وجهله منتج مسعدت وراحتدر .  
اوقجی زاده مرحوم ( احسن الحدیث ) نام اثر  
بهترینده ( مرصاد العباد ) دن نقلاً ایراد ایلشدر که  
« فلاحت ودهقت ، جناب عزت ایله معامله وسودا کری  
وبهترین مکاسب واشغال اولدیغی ریب واشکالدن بری  
اولوب فی الحقیقه صفت رزاقیده نیابت حضرت حی  
باقیدر لکن زرع وحرثه مواظب اولان کاسب غیر کاذبه  
لازم ولاذبدر که مال بی مأل ایله مغتر ومزاج وحالی  
آفات ملک سریع الارتحال ایله مغیر اولیوب اسباب یسار  
ومکنت ید تصرف وقدرتنده مودوع بولندیغی تیقن  
ایده وهنکام زراعتده تقدیم نیاز وضراعت وزمان حراشده

سر رشتهٔ حزمی حفظ و حراست ایدوب بونیتله دانه افشان  
وبو امنیت ایله درخت فشان اوله که چراگاه زندکانیده  
هر زیروح محتاج زاد وقوت و عطالت و اهمال هر حاله  
مذموم و ممقوتدر .

فاضل مشار الیه ینه محل مذکورده دیمشدر که «اگر  
بعض سنینده محصول زمین کمتر و اشجار مثمره مقاصد  
و آمال خشک سال قحط و ابدال ایله بی برک و بر اولورسه  
زبان سرتیز و دل وسوسه آمیز ایله افاعیل حکیم کردکاره  
اعتراض و انکاردن پرهیز و آیت  
« فی السماء رزقکم و ما توعدون »

ده مخزون اولان حکم کونا کونی درک و تمیز ایدوب  
قلت نان بی امتناندن متضجر و تنکدل و ضیق معیشتله  
پریشان و منفعل اولنیه؛ و سنبابل و حبوبک نشو و نمایی  
باران بهار و اعتدال کردش لیل و نهاردن دخی بیلمیوب  
سرجهٔ دل صفی شرک خفیدن پاک و بو مثللو حکم مجهول  
لهجه متابعت اعتقاد عجایز جائز اولدیغی ادراک ایدیه .  
حقیقت زراعتک پک زیاده مقبول و معدوح اولسی  
حیل و مفاسدن مصون اوله رق کسب ماله و سیه  
بولنمندن و تمام توکل و عصمتله تدارک اسباب معیشتی  
تسهیل ایلمسندن ناشی اولدیغنه مبنی زراع ایچون بو

خصائص امتیازیہ حرائق ازالہ دن اجتناب ایتمک، و قتیله  
و یوایله اکیینی اکهرک و فدائی دبکهرک موسم حصاد  
و ثماره متوکلانه انتظار و ترقب ایلم اقتضا ایدر .

« دهقان صاحب ایقان که دهقنه بو نیته شروع  
و خلوص طویته حفظ کروم زروع ایدوب اوامر آلهیه  
رعایت ایده مسافران عالم ناسوته کنديسندن قوت و قوت  
حاصل و یاخود و حوش و طیورک حواصلنه واصل اولان  
هر برک و بار و لقاطه ثمار آنک صحائف آمانه نوشته  
و مزرعه حسناتنده کشته اولوب هر دانه کبها سلوک  
راه خداده بر قدم راسخ و قطع مراتب احرویه ایدن یاران  
میاننده سبب شرف بازخ او اور؛ نته کم بو حدیث اکا  
اشارات و الماع و بو بیده اولان پاداش و نوالی مکرمت  
زمانه اسماع ایدر .

« من یزرع زرعاً او یغرس غرساً فما اکل من الطیور  
والدواب یکتب فی دیوان حسناته »

بلکه اخلاص عمل ایله تکمیل انسانیت و عباد الله  
ایصال نفعه تصحیح نیت ایدر ایسه کدیمی نی ایله بر آورده  
سفره زمین اولان محصول محصول و ربع مقصود ایله  
هر کیله تغذی و اول قوت ایله مراسم طاعتی ایفا ایده  
با سرها اکا محسوب و



« من غیران ینقض من اجورهم شیئاً »

دیوان حسنات و طاعاته مکتوب اولور

فضل حق که بها نمی جوید

مغفرت را بهانه می جوید

ارکان معموره یقین اولان بزرگان ملت و دین  
دیمشردر که برلقمه نان شایسته سرخوان اولنجه حراث  
واکار و حداد و تجمار و آنک ندرا و امثالی محترفه و عمالدن  
اوچیوز التمش کمسنه ترتیب و تربیه و تربیتدن علی طریق  
المداوله مزاوله ایدر لر. چونکه اولقمه کم بها مستورات  
قبا ب اصطفا دن بر مرد خدایه غذا اوله جناب کریم  
منان جمله عمله و کارکنانی اول و بی جلی المواهبه هبه  
ایدوب یوم عسیرده نار سعیردن آزاد ودل ویرانی او اهل  
رحمت و رضوانک همتیه آباد ایدر».

« دار کرم مدارینه ابنای سبیل ایچون تسبیل و مهمان

خانه سنه دخولی آشنا و بیکنه یه تسهیل ایدوب

« النخل بالطعام من اخلاق الطعام »

قول حکمت شعارینی استحضار ایله اکرام صنوف

ضیوفده جد بیحد ایدن لر کمال شادی یه ایرر.

ایمدی « زراعت کبی برکرامتی اولور که

« فی کل سنبله مائه حبه »

فحوای جنیلی اوزره شیء قلیلی تکثیر،  
« واللہ یضاعف لمن یشاء »

مقتضای عالیسی اوزره تضعیف وتوفیر ایدوب  
عطایای جدیرهٔ جدیدہ ایجاد واجادہ ومنکران معادہ  
احیای موات اقوات وازواد ایلہ دلائل حشر واجساد  
تکریر واعادہ ایدر .

کیمیا خواهی زراعت کن کہ خوش گفت آن کہ گفت  
زرع ثلثانش زرست وثلث باقی همزرست



{ اسرار النورانیة القرانیة } ترجمہ سندن

مابعد

— بیان احجار الفحیمہ —

بونده مباحث عدیدہ واردر

— مبحث اول —

معلوم اولسونکہ اراضی غازیہ تجاویفیلہ میل  
وانحداری قلیل اولان درہ و یاریقلرنده وصویک ایر-  
کیلوب طوپلانیدیغی یرلرنده رسوبات نباتات تکنون وآنک

تخلاندن قابل احتراق بر جسم تحصیل ایدر . رسوبات  
(تورتی) مذکوره انجق احوال مخصوصه اوزره متکون  
اولدیغی کبی میاه جاریه ده و عمیق اولان برکه (صولی  
چقور) لرده و بعضاً میاهی بوشلان محلارده دکل میاه  
جاریه نك علی الدوام باقی قالدیغی یرلرده وقعری آزا اولان  
چقورلرده تکون ایلر .

وجه مذکور اوزره متکون رسوباته (ره ئاووژی) عباسی  
(تورب) تسمیه ایتشیلردر . بونك تکونی خصوصیه  
علی الدوام صوده قالمش نباتات خلویه نك تراکنندن  
نشأت ایدر و نباتات مذکوره رسوب 'یچون اصل اولان  
(عجینه) کندیسندن تکون ایدن نبات مائه نك انواعی  
کبی سرعتله متکثر اولور . بو عجینه بر ماده در که جمیع  
نباتات مذکوره نك تخلانه مساعد و ساعیدر و میاه انهارك  
جذب و جلب ایتدیکی متعدد نباتات ارضیه بو عجینه یه  
مضاف اولور .

اکثری دخی صو بریکدیکی مختلف یرلرده مندفن  
اشجار کبیره و باخصوص اجزای سفلیه اشجار واردر که  
بونلر کندیلرندن رسوب تکون ایدن (رمل و طفیل)  
اوزره متراکم اولورلر . اشجار مذکوره بعضاً عموداً موضوع  
ایسه لرده اکثری - توربك تکون ایلدیکی محل مستویده

ثابت اولان - جذر واصلاری قر بنده کی مکانلرنده تکسر ایدرلر . و بعضاً بو اغاجلر متعدد و توربک تشکیلدن اول ثابت اولدقلری مکانده یکدیگری نه - کویا غابات تامه ده نشأت ایتمشجه سنه - مقابل بولنورلر . اشته بو اغاجلر عصر مزده اشجار رائجیه ایله بلوط و بعضاً ده لسان عصفور انواعنه نسبت ایدیلورلر . اشجار رائجیه صلابتی حفظ ایتدیگی جهتله حال طبیعی سنده همانده باقی ایسه ده قوریوب غباره تحولنده سیاهلنور . توربک محل تولدی اولان فجواتده او کوز کیمکری و کیک بوینوزلری کبی مملی حیوانات بقایاسی بولنور . بو فجوات ارا - ضینک انواع مختلفه سنده و بعضاً ده متبلور یرلرنده بولنوب جمیع اح - والده رمل و طفل و یا بزاطدن رسوبات ایله مبتدئه اولماسی نادر در .

بربری اوزرینه متراکم نباتات بقایاسنک - جزؤ سفلاسی اکثریتله اسوداد و اندماج حالنده بولنان و ثخن مختلف اولان - کتله واحده حالنه تحولی مواد توریه - دندر کندوسنی غطی و ستر ایدن رسوبات متوالیه دن متکون و متشکل و یکدیگرندن مختلف الثخن رسوبات ایله منفصل طبقات شکلنده بولنان شی دخی مواد توریه دندر .

بورسوبات جیری اولسون طفلی اولسون رملدن ومادن  
 حجری دن متکون اولوب میاه عذبه نك قواقعی ایله میاه  
 انهارك جذب ایتدیکی قواقعی محتوی بولنور .  
 اکثری توربك سطحی میاهله و بعضی کرده کذلک  
 رطوبته مناسبتی بولسان مختلف نباتاتك ثابت اولدیغی  
 ارضله مغطی ومستور اولور .

توربك قلیل الغور اولان میاه تحتندہ متکون اولدیغی  
 اقدجه بیان ایتش ایدك شو حالده توربه اصل اولان  
 رسوبات جداً ثخین اولوب تکنونی دخی احوال مخصوصه  
 اوزره اولدیغی ظاهر در و بوندن طولای معلوم اولور که  
 رسوباتك بولندیغی اما کینه هبوطی اثنای تکنونده متتابع  
 بر صورتده حصول و وقوع بولشد .

تورب حالده بولسان طبقات ارض نباتیه بوکا دائر  
 اولدیغی کبی مواد توریه نك محال مستویه سنده کوریلان  
 اشکال اشجارك غابات منظمده یکدیگره ملاقی ومقابل  
 بولندیغی صورت وحالده کورنمی دخی اکا دلالت ایدر .  
 اشته بولر ارضك بر مدت ییوست وجغافی و بر مدتده  
 میاه ایله انغمار واستتاری ایله عارض اولان احوالدر .

ایمدی مواد توریه سطح ارضده کثیره الانتشار  
 اولوب ارضك تجاویف مختلفه سنی اشغال ایدن وجیع

ارتفاعاتده مختلف الاتساع اولان احوالنه طلاغیلور . مواد مذکوره دن (آلپا) طاغلری کبی جبالک تپه لرنده وفرانسه نك مرکرنده کی جبال مرتفعه سطوحنده بولنور و دوز و آلحق پرلرده دخی چوقدر حتی پروسیا وهولانده ده اولدیغی کبی اتساع و بر خیلی یری اشغال ایلر و توربك پك چوغی نباتات نهریهدن تگون ایتدیکی کبی بعضیسیده بحاره متصل مستقعاتده تگون ایدر و مستقعات مذکوره ده متگون رسوبات تورپه - بحر محیطك قوملی سواحله ده اولدیغی کبی - یوصون و نباتات بحرینه نك انواعندن حاصل اولور و بعضی کرده ده جبل اوزرنده نباتاتك اوراقتدن ورطوبتلی اودییه نك محال مستویه سنده تراکم ایدن مختلف بقایادن رسوب حصول بولور انحق بو رسوب عارضدن تولد و تگون ایدن تورب غیر جید اولوب احتراق ایچون استعمال ایدیله مز .

### ✧ بحث ثانی ✧

حجر فحمی بیاننده در

شبهه یوقدر که باطن ارضده بولمان رسوبات فحمیه بربری اوزرینه تراکم ایدن نباتاتدن تگون ایدر تورب کبی بوکا دلیل ایسه منظار معظمله ( بیوک دوربین ) باطن ارضده و تورپده کشف ایدیلان بقایادر . تورپه مصاحب

اولان مواد طينيه ده بولنان اغاج كوده لری واوراق عديده  
 دخی اكا دلالت ايدر . ( ژئولوژیون ) بومسئله ده اتفاق  
 ايتشلر سده كيفيت تراكمه متفق دكلر در : بعضلر رسوبات  
 فحيمه ميايه انهارك و بعض اما كننده قديمأ موجود اولان بحار  
 طالع لرينك طاشيديغی كبر الحجم نباتاتك اندفانندن حاصل  
 اولديغی درميان ايتشلر و بعضلر ده بورس و باتك اغلبی  
 اراضی مكشوفه و مستويه ده كلن صولی چقورلر ده او -  
 اديغی و مياهاك دخی كندوسنه قریب اولان نباتات  
 بقاياسنی مذکور چوقورلر طاشيديغی بيان ايتشلر در .  
 قول اول مردود در ؛ زیرا مياهاك طاشيديغی كبریه الحجم  
 نباتاتك - بعض بلادده بولنان طبقات فحيمه كبی قالین  
 طبقاتی حاصل ايدیه بيلمك ايجون - غایت قالین اولمسی  
 اقتضا ايدر يعنی قالینلغی بر آرشون و بر ثلث ویا اوچ ویا  
 قرق ارشون بولنان طبقات فحيمه یی وجوده كتوره جك  
 اغاجك قرق یا يتش بش ویا یوز يكرمی ارشون قالینلغنده  
 بولنمسی لازم كلور بونی ايسه عقل تجویز ایتز زیرا بو ثمن  
 و حجمده اغاجلرك سطح انهارده و بك چوق بحارده  
 یوزمسی مستبعد در .

قول ثانیه كلنجه بونده صعوبت یوقدر فحم حجرینك  
 تكون ايتدیكى مواد عضویه نك تراكمی ايجون زماندن

بشقه هیچ رشی ایسته من بوزمانك دخی غایت اوزون  
اولدینی آشکاردر . عصر منزه قدر باقی اولان غابات  
قدیمده سنوی متکون قار بونك یعنی معدن کمورینك مقداری  
حقننده بحث ایدن ارباب معلومات دیملردر که هر یوز  
سنهده بر انحق یوزده بر بحق قالینلنده طبقه واحده  
فحیمه تکون ایدر لیکن حیواناتك تکوندن اول اولان  
ازمنه قدیمده کی جو بخار ایله مشحون بولندیغندن  
آندن نشأت ایدن نباتات جداً قوی اولوردی وباطن  
ارضدن خیلی حاض قاربون صعود ایدر ایدی بناء علیه  
نباتات مذکوره قاربونی باطن ارضده سرعتله حصوله  
کتورردی هر حالده تکونی زمان طویل ایستیـان یالـکـز  
فحم حجری رسوباتی دکلدر بلکه جمیع رسوبات دخی زمان  
طویل ایستر حتی غایت ثخن عظیم کسب ایدن وجیری  
اولان رسوبات حجریه قوقعیهك تکونی ایچون دخی  
قرون عدیده احتیاج واردر .

نباتات بقیه سیله وجود بولان نوربی رسوبات فحیمه  
ایله تشبیه وتطبیق ایدنلر فحم حجریه وتوریده منظر  
معظم ایله کشف اولنان ازهار خلویه عدیده بی رؤیت  
ومشاهده ایتملردر وتحقیق ایتملردر که تورب ارضه جزوراً  
متعذری اولان اشجار ایله واو اشجارك شست فحمیده



محفوظ بولنان اور اقی ایله، ویکدی کردن منفصل ومختلف  
الاتساع حوزه رده کی اشجارك وجودیله حاصل اولور .  
ایمدی بو احوالک جله سی اراضی مکشوفه حقلرنده  
متکون مستنقعاتلی اماکنده حصولنه دلالت ایدر و بونیکله-  
ده اشجاری میاه انهارك و یا میاه بخارك طاشیردیغی حقننه کی  
قول مردود بولند بخی نمایان اولور .  
(مابعدی وار)

○✧ مقتطفات منشوره ✧○

حضرت علی کرم الله وجهه شو مآلده بیورمشلردر :  
 اصداقا اوچ واعدادخی اوچ نوعدرا احبا انسانک  
 کندی دوستی، دوستنک دوستی، دشمننک دشمنیدر اعدا  
 انسانک کنیدنک دشمنی، دوستنک دشمنی، دشمننک دوستیدر.

۞=۞

امام ابو القاسم قشیری ( مقصد الاسنی فی شرح  
اسماء الحسنی ) نام اثر مقبولنک اسم (وہاب) مجتہدہ بیان  
ایلیشدر:

حکمدان بری دیمشدر که دنیاده الچوق غمی انسان  
حسد شعار و کمال راحت و سعادت اوزره یشایان قناعت کار

واذا يا وجفایایه بغایت صبر و تحمل ایده یلان حریص  
و معیشتده دوچار سفالت اولان تارك دنیا بولنلردر الك  
زیاده گرفتدار ندامت اولانلر ایسه ورطه افراطه دوشن  
عالمردر .

اثر مذکورك (السلام) بخشنده دخی شویله افاده  
قلمشدر :

(سلام) سلامه دندر جناب حقك اسمی معناسنجه  
ربی آفادن تنزیه وصفات مخلوقاتدن تقدیسدر مولایه  
قلب سلیم ایله رجوع ایتمك

(یوم لاینفع مال ولا بنون الامن اتی الله بقلب سلیم)

مضمون **ك**ریم ومؤدای فنیمنجه دخی مدلل او-  
لیدیخی اوزره بغایت مقبول، انسانك سعادت داریننه مدار  
حصول اوله جنی آزاده کواه اولوب آداب اسلام وسلا-  
متدن اولیدیخی وقلب سلیم ایسه غل وغشیدن وحقدر  
وحسددن بری اولمقدن عبارت بولندیخی کتب مرغوبه ده  
مبسوطدر حقد وحسددن برائك منافع فوق العاده سنه  
دال اولمق اوزره امام مشارالیه اصمعی دن نقلاً دیمشدر که

یوز یکرمی یاشمنده بر اعرابی دن بو قدر یشامسی سبی  
سؤال اولندقدہ (حسدن برأتمدر) جوانی ویرمشدر.

رساله قشیریہ نك (استقامت) باینده مندرجدر :  
ابو علی دقاق علیه رحۃ الخلاق « استقامتک اوچ  
درجه سی واردر اولی تقویم صکره اقامت صکره استقا-  
مت در تقویم نأدیب نفوس، اقامت تہذیب قلوب، استقا-  
مت ایسہ تقریب اسراردر » دیمشدر.

ابو علی جرجانی علیه رحۃ الباری « صاحب استقا-  
مت اول طالب کرامت اولما کرچه نفسک کرامت طلبینده  
متحرکه در اما ربک سندن استقامت طلب ایلر » دیمشدر.  
واسطی علیه رحۃ العالی « استقامت اول خصلت درکه  
وجودیلہ محاسن کمال بولور، قصدیلہ محاسن قبیح اولور،  
شیخ شبلی علیه رحۃ الولی « استقامت اول خصلت  
درکه شمیدین مشاہدہ قیامت ایدہ سک » بیورمشدر.

امام قشیری رحۃ اللہ علیہ دہ بیان ایلمشدرکه « استقامت  
فی الاقران ترک غیبت، استقامت فی الافعال نفی بدعت،  
استقامت فی الاعمال غیرت ونفی حجت ایله اولور. »

## ❦ الواحد \* الاحد ❦

حقیقه امام قشیری شویله دیمشدر :  
 بو ایکسی اسماء الهیه دندر و اسماء الهیه دن اولدقلرینه  
 «وآلهکم آله واحد» «قل هو الله احد»

نص جلیلاری دلالت ایدر .

حقیقه واحد قسمی اولیان و کندیسندن بر شیمک  
 استثناسی غیر ممکن اولاندر بو مفهوم اهل تحقیق عندنه  
 معنای حقیقیدر و (دار واحده) و (درهم واحد) ترکیب-  
 نده کی واحد لفظی معنای مجازییه محمولدر زیرا بونلردن  
 بهضیسنک استثناسی صحیح اولور .

ابن فورک دیمشدرکه (واحد) صفات الهیه دندر و اوچ  
 معناسی واردر : بریسی لذاته قسمی یوقدر ریرا غیر  
 متبعص و غیر متجزیدر ایکنجیسی شیهی یوق دیمکدر  
 حتی عرب (فلان واحد فی عصره) دیرلر یعنی بو ترکیب  
 ایله فلانک عصرنده نظیری اولدیغنی بیان ایدرلر او-  
 چنجیسی افعاننده شریکی یوقدر معناسنده در فصلکه  
 فلان بو ایشلرده متوحددر دینور یعنی هیچ بر کیمسه او  
 ایشده او آدمه معین و شریک اولدیغنی کوستریلور .  
 متقدمین بو اوچ معنی جناب حقه مستحق اولوب فقط

توحید برنجیده یعنی نفی قسمت معناسنده حقیقت، دیگر  
 ایکسینده مجاز صورتنده اولدیغنی بسط و تمهید ایلشلردر.  
 (احد) ك دخی لغتده اصلی (وحد) در نصلکه (رجل  
 وحد) دینور حاك فتح و سکونی جائزدر (رجل فرد  
 و فرید) دینلیدیکی کی. (وحد) ك واوی همزه یه تبدیل  
 ایدلشدر نصلکه (امرأة اسماء) دینور (اسماء) نك اصلی  
 (وسما) در زیر حسن معناسنه اولان (وسامه) دن اولوب  
 واوی الفه قلب ایدلشدر. خلقك برطاقی واحد ایله  
 احدی فرق ایتمز و بعضلری ایدر و دیرلرکه واحد افتتاح  
 اعداددر بر ایکی اوج الی اخره دینور (واحد) عدددن  
 کندیسيله ذکر اولنان شئتک نفیی ایچونده بر اسم اولور  
 و بعضلر جمعد ایله ذکر اولنور دیمشلردر او حالده (ماجانی  
 احد) دینور بوده و احد ایله مافوقنك کلمنی نفیدر و (جانی  
 واحد) دینور (جانی احد) دینلر.

توحید ایسه سبحانه و تعالی حضرتلری بر در دهرک  
 حکم ایتمکدر بو حکم قول و عمل و اشارت اصابع ایله  
 اولورایمندی توحید اوچدر: بنفسه جناب حقک توحیدیدر  
 بوده اللهم علم و اخباری کندوسنك بر اولدیغیدر  
 ایکنجیسی عبدك حق توحیدیدر بوده ذکر اولنه جعی  
 اوزره وحدانیت آلهیه تصدیقدر اوچنجیسی حقک عبدی

توحید ایتسیدر یعنی عبده توحید اعطا ایتسی وتوفیق  
ویرمی دیمکدر .

توحید حقنده افخم اسلامیه آثارندن مقتطف بر  
رساله ترتیبنه چالیشلقده اولدیغندن ایلروده بونک دخی  
محاضراته درجیله ترین صحائف قلنه جقدر .



« اخلاق محسنی » ذیلنده مسطوردر :

علامت حق بشدر : غیرک مضرندن کنیدیسنه  
منفعت تصور ایلک، بی ریاضت عبادتله ثواب آخرت  
رجا ایتک، خصومت و خشونتله معاشقه نسوانه مباشر  
اولق، راحت و حضور ایله دقایق علومه وقوف و شعور  
قصندنه بولنق، نقض و بغض و عقوق ایله ناسدن صداقت  
توقع و انتظار ایلک .



کذلک ذیل مذکورده مبسوطدر :

شو الی خصلتله آراسته اولانلرک صداقتنده شائبه،  
مخائننده شبهه یوقدر یعنی دوستک معاینه اطلاع ایلدیکی  
حالده افشا و اظهاری جائز کورمیان، احباسنده کوردیکی

هنر و محاسنی مع زیادهٔ افشا و اعلام ایدن، ابتدییکی احسان مقابلنده امتنان و کوردیکی احسانه قارشو تجویز نسیان ایلمیان، احباسندن مشاهده ایلدییکی خطا و ذلتی ذیل عفو ایله ستر و معترف جرم و قصور اولان احبانتک آزارینی شرف قبوله ارزان کورمکه همت ایدن ذواتک صدق و خلوصی تام و نقایصدن بری اوله جغندن انتخاب احبا خصوصصنده شو خصائص جیله نظر دقته النطق و كذلك غیرک **الحب** و فاش عاری اولق ایچون بو خصائل ایله متصف بولنق لازم در شبهه سزدرکه بونلرله اتصاف ایتمیانلر ظاهرده دوست ایسه ده باطنده دشمندن فرقلی اوله مزلر.



ینه (اخلاق محسنی) ذیلنده محرردرکه :

مرافقت و مصاحبت شو اوچ طائفه ایله اولور ایسه هر یوزدن استلزام منفعت ایدر برنجیسی ارباب علم و عمل که انلرله مصاحبت سعادت دنیا و آخرتک حصولنه مدار سهولت در ایکنجیسی اصحاب مکارم اخلاق که انلرله الفت و اتفاق موافق عقل و حکمتدر چونکه بونلر دوستک خطاسنی دامن اغماض ایله ستر ایدوب نصیح و پند و صلاح و فلاحنه سعی و همت ایدرلر اوچنجیسی

بی غرض اولانلر، شائبه طمعدن بری بولانلر واساس  
 محبتی قواعد صدق و اخلاصه بنا ایدنلر در که محبتلری  
 ارباب اغراضک مفسدیتله زائل و سائقه طمع و حرص  
 ایله محو و مضمحل اولیه رق هر زمان ماحی مشقت،  
 داعی مکرمت در.



احوال آتیه ایله متصف اولانلرله الفت هر وجهله  
 شایان مجانبت در: بر طاقی ارباب فسق و فجور در که انلرک  
 سعی و همتی مشتهیات نفسه منحصر و مقصور در کندو-  
 لینه میل و محبت نه سبب راحت دنیا، نه ده موجب رحمت  
 بقادر؛ بر طاقی اهل کذب و ارباب خیانت در که انلرله  
 مصاحبت عذاب الیم و معاشرت بلای عظیم در سائرله  
 سندن کلام فتنه انگیز نقل و روایت، بشقه لردن سکا  
 اخبار و حشت آمیز ایصال و حکایت ایدرلر دروغ بی فروغی  
 صورت راستیده کوسه تروپ حق صریحی باطل صریح  
 طرزنده تفهیم ایلرلر؛ هله بر طاقی ایسه اصحاب حق  
 و بلاهت در که نه جر منفعت ده اقوالنه اعتقاد، نه دفع  
 مضرتده افعالنه اعتماد مناسب در اکثر عین خیر تصور  
 ایتدکلری محض شر واقع و مفید اعتقاد ایتدکلری ضار،



موجب خسار اوله رق مضر ملاحظه ایتدکری نافع  
اولور .



— ✧ — مقتطفات منظومه — ✧ —

( روضة الناظر ونزهة الخاطر نام اثر لطیفک )

فصل اولندن

تأدب صغيراً فالتأدب في الصغر

يزيدك اقسام الكرامة في الكبر

تعلم وريعيان الشباب بمائه

ففي الغصن شيء ليس يوجد في الشجر

وما حفظ الانسان في حده الصبي

يدوم دوام النقش في صفحة الحجر

—

زمان صباوتده تحصیل ادب ايله؛ زيرا کوچکلکده

تأدب بیودیکک وقت انواع لطف و مکارمی زیاده ایلر .

علمی اکتسابه شباب ايله که نهال شباب آب ناب

علوم ايله فیضیاب اولور؛ زيرا اشجارده اولمیان خواص

اغصانده بولنور .

هنكام صباوتده حفظ وتعلم ايديلان شي طاش  
اوزرنده كي نقشك دوامى كبي پزيراي ثبات اولور.

من باع ايام الصبي بتأدب  
ربحت تجارته على الا زمان

ايام صباوتنى تأدبه حصرو صرف ايدنلرك تجارتي  
على الدوام مربوح ومز داد اولور.

ومن اشترى لهو الخدائة فاته  
نبيل الكهول وآب بالخسران

هنكام حداثتى لعب وعبثله محو وافنا ايدنلر ايسه  
زمان شيخوخته فضل وراحتدن محروم اولورلر وخائب  
وخاسر اوله رق محو اولوب كيدرلر.

— اثر مذكورك فصل ثانیسندن —

اذا العود لم يثروان كان شعبة  
من المثرات اعتدة الناس فى الخطب

ولا تتكل الا على ما فعلته  
ولا تحسبن المجد يورث كالنسب

میوه و یرمیان اغاج اشجار مثمره جنسندن بولنسه  
بیله خلق آنی ینه اودون یرینه استعمال ایدرلر .  
سن یالکز کندی افعالکه باق، اکا کوون یوقسه مجد  
وشرف نسب کبی موروث اولور ظن ایتمه .

ليس اليتيم الذي قدمات والده  
ان اليتيم يتيم العقل و الادب

پدری وفات ایتش اولان یتیم دکلدیر؛ یتیم انجق عقل  
وادبدن محروم قلمش بیچاره لدر .

لئن فخرت بآباء ذوی شرف  
لقد صدقت ولكن بئس ما ولدوا

صاحب شرف و شان اولان آبا واجدادکله افتخار  
ایدرسهک طوغری سو یلمش اولورسک لکن شو قدرکه  
آلر فنا برولد وجوده کتور مشلدر .

شاعر مشهور (باخرزی) نك آثارندن

خذ العفو و أمر بعرف كما

أمرت و اعرض عن الجاهلین

و لن فی الکلام لكل الا نام

فمستحسن من ذوی الجاه لین

—

عفوئ الدہ ایت، سن نصل اولئکله معاملئیه مأمور

اسهک خلقهده او خصئلته ائتلاف توصیه ایلہ !

جاهلاردن چکین، اجتناب ایلہ !

هر کس حقنده کلام ملایم قوللان؛ زیرا صاحب

عز و منزلت ایچون اک زیاده مستحسن اولان حال

ملائیتمدر .



ابن کمال مر حومک آثار منظومه سندن

( حرف الدال )

مطبخی دهر ایچنده آچ اولسهک

کیسهک نعمته ائمه حمده

رزق ایچون فی الحقیقه غمیه کیم  
ضمن الله رزق کل احد

سفید و سرخ ایله اولمز خراب قصر حسن آباد  
قچن اصلاح ایده عطار آنی کیم دهر ایده افساد

صولادی سوراقلری سقای ابر  
سپوردی ره شاهی فراش آباد  
فرحدن دوکوب یاش سمانک کوزی  
جهانک یوزی کولدی واولدی شاد

### (حرف الراء)

هیچ بیلدکی بو اموات قبرده نیلر  
هرکیاهی دیل اولوب سا که نصیحت ایلر  
استخوان سرینی کاسه ایدوب یوللرده  
هرکچندن ال آچوب یعنی دعا جر ایلر

عالمك احوالنه يوقدر ثبات  
آدمی که آغلدر که کلدر  
کستاندن جهانك هر کسه  
که دیکندر صونیلان که کلدر

کوکل ییقمق خراب ایتك کیدر بیت معموری  
ولی یایمق هزاران کعبه بنیاد ایتدن یکدر  
قول ایتك لطف واحسان ایله دنیاده برآزادی  
افندی ! نیجه یوز بیک قولى ازاد ایتدن یکدر

که صفا بولدی کوکل آینه سی که کدر  
عالمك حالى بودر بویله کلور بویله کیدر

هر قچن قارنجه نك بالی بتر  
اولور اول بیچاره نك حالى بتر

— ❧ — انوری ❧ —

نوش اب لعل توقیت شکر شکست  
چین سر زلف تورونق عنبر شکست

نوبت خوبی بزن هین که سپاه خطت  
 کشور دیگر گرفت لشکر دیگر شکست  
 اهل تودر خنده شد رشته پروین کسست  
 جزع تو سرمست کشت ساغر عبر شکست  
 جرعه جام لبث پرده عیس درید  
 نقطه نون خطت خامه آزر شکست  
 رهرو امید را عشوه تویی برید  
 خانه اندیشه را غمزه تودر شکست



— پیدل —

در شدند اهل عالم خواه شهری خواه روستایی  
 قضا نا بختیه کل کرده کویی خاك آدمرا



هر که در ادب طلب نکند  
 بر بساط شرف طرب نکند  
 ادب آموز کورت می باید  
 که زمانه ترا ادب نکند

(لطائف النعمه في اقسام الحكمه) دن :

حكمتك قسميني بيان ايلديكمزدن شمدي بوراده  
بوقسملكده اقسامني بسط وتمهيد شروعايده جكر .

✧ حکمت طبیعیہ ✧

علم طبیعی دخی ( حکمت طبیعیہ ) اصلیه و فرعیہ  
اعتبار یله ایکی یه و بولرده قسام متعدده یه منقسمدر .

( حکمت طبیعیة اصلیه )

سکرز قسم اولوب برنجیسی ایله ماده، صورت،  
حرکت، طبیعت، اسباب، نهایت، غیر نهایت، حرکاتک  
محرکاته تعلقی، واحد متحرک اولان وقوتی غیر متناهی  
بولنان وجسم اولمدیخی کی بر جسمده بولنمیان محرک اوله  
انتهایی مثللو جمیع طبیعیاته شامل امور بیلنور امور مذ-  
کوره دن ایسه (سمع الکیان) نام کتاب بحث ایدر .

عبد القادر بغدادی علیه الرحة جانبندن بیان ایلده-  
یکنه کوره (کیان) کلهسی فرس قدیم لساننده عناصر  
وطبایع معناسنده در و کتاب مذکور ارسطونک تألیفاندن  
اولوب مبادی علم طبیعی بی مشتملدر . (ادب الکاتب) ده  
ایسه (کیان) کلهسی لسان سریانیده طبیعت معناسنه  
اولدیخی وعند الحکماء طبیعت اجسامک مواضعنه صرف



وتحریرك ایدن معنایی مفید بولندیغی و (سمع) ایسه شین معجمه ایله (صیت) دیمك اولوب مؤخرأ بالتعریب (سمع) اوله رق استعمال قلمش و بوده (سمع الکیان) نامنده اولان مذکور کتابك مبادی علم طبیعی بی مشتمل اوله رق متعلق علم مزبوردن ابتدا مسموعی اولسی جهته بویله تسمیه ایدلمش اولدیغی مذکوردر .

اقسام مجوئه نك ایکنجیسی ایله سماوات و مافیه، عناصر اربعه وانك طبایع و حرکات و مواضعندن عبارت بولنان واركان عالم دنیلان اجسامك احوالی و بونلرك صنعتنده کی حکمت معلوم اولور بوقسمی (کتاب السماء والعالم) متضمندر . اوچنجیسی کون و فساد، تولید و توالد، نشو و بلو و استحالادن بحث ایدر و مباحث مذکوره ایله نظائرینی (کتاب کون و فساد) شاملدر . دردنجیسی سماویاتك تأثیریه تخیل و تکالیف کی انواع حرکاتك عناصر اربعه عارض اولسیله قبل الامتزاج عناصر مذکوره عارض اولان احوالدن و كذلك علامات و شهب، بلوطر، یغمور، کوك کورلتیسی، شمشك، هاله، قوس قزح، یلدره لار، روزگارلر، زلزلهلر، دکرلر و طاغردن بحث ایدر بونلری (کتاب آثار علویه) نك اوچ مقاله سی مبیندر .

حکمت طبیعیہ اصلیه احکامک بشجیسی ایلہ معاندندہ  
اولان اشیانک احوالنه وقوف حاصل اولور ( کتاب آثار علویه ) نک مقاله رابعه سی شاملدر .  
التجیسی کائنات نامیه دن بحث ایدرکه آنی ( کتاب نباتات )  
مضمندر .

یدنجیسی ایلہ کائنات حیوانیه کسب وقوف ایدیلور  
بونندہ ( کتاب طبایع الحیوان ) باختر .  
سکرنجیدی نفی ، حیوانانده و خصوصیه انسانلرده  
بولنان قوه دراکه و محرکینی بیان و نفس انسانینک وفات  
بدنله وفات ایتدیکنی و جوهر روحانی آلهی اولدیغنی  
تدین و اعلام ایدر اشبو سکرنجی قسمی نفس و حس  
و محسوس کتابلری مشتملدر .

### ( حکمت طبیعیہ فرعیہ )

اقسامی دخی یدین عبارت اولوب برنجیسی طبر . علم  
طبدن غرض بدن انسانینک مبادیسنی و صحت و مرضجه  
اولان احوالنی و دفع مرض و محافظه صحت اسباب  
و وسائلنی تعلیمدر .

ایکنجیسی احکام نجوم اولوب بوده ( علم تخمین )  
در و غرض ایسه اشکال کواکبک بعضیسنی بعضیسنه  
مقایسه و بونلرک قیاسیه بروجه درج ایدرک جله سنه

ادوار عالم، امالك، بلدان، مواليد، تحاويل، تسابير،  
اختيارات ومسائل كې احوالى اوزرينه رضه قياساً  
استدلدر .

اوپنجىسى علم فراست اولوب بوندن غرض ده  
احوال ظاهره دن اخلاق اوزرينه استدلالدر .

دردنجىسى علم تعميردر غيريك تمثاليه نفسك  
مشاهده وقوه مخيله نك تخيل ايلديكى شئ اوزرينه  
تخيلات حكميه در .

بشنجىسى علم طلسمات دركه عالم ارضيده قوه فعل  
فعل غريب ايله اتلاف ايتك ايچون قواى سماويه ي  
بعض اجرام ارضيه نك قواسيله مزج ايلكدرد .

التنجىسى علم نيرنجات دركه كندوسندن فعل غريب  
حدوث وظهور ايتك ايچون جواهر عالم ارضيدن بولنان  
قواي مزج ايتكدرد .

يدنجىسى علم كييادر بوندن غرض جواهر  
معديه نك خواصنى سلب وبونى بشقه برشيئك خواصيله  
ويا ديكر برشيئك بعض خواصنى بونك بعض خواصيله  
مزج ايلكدرد .

شينك حكمت طبيعيه ياخود علم طبيعى حقنده كى  
شو تقسيمى علوم وفنونك سكر عصر اول بولنديغى

درجهیه کوره در . اول زماندنبی و باخصوص ازمنه  
 اخیرده ترقیات علمیه حیرت رس افکار بر مرتبه وارمش  
 و بناء علیه تقسیم معروض طبیعیه حکمسنز قالمشدر؛  
 حتی حکمت طبیعیه نامی غریونک (فیزیک) تعبیر ایتد-  
 کلری فنی تسمیهده استعمال ایدلمکده بولنمشدر . یونان  
 لساندن مأخوذ اولوب اولسانده کی اصلی طبیعت دیمک  
 اولان (فیزیک) کلمه سنه مقابل لسانزده قبول ایدیلان  
 حکمت طبیعیه نامی آلتنده کی فن منتظم شامل اولدیغی  
 مباحثه نظراً قدامانک حکمت طبیعیه تعبیر ایدلکلری  
 علمدن غیری دکلمهده آنک عینی دخی اولیبوب انجق  
 بر جزویدر . زیرا اربانه خفی اولدیغی اوزره شمیدیکی  
 حکمت طبیعیه علوم طبیعیهدن منشعب اولهرق صلبی،  
 هوائی، مایعی کبی اجسام موزونه، ضیا و حرارت کبی  
 اجسام غیرموزونهک تجزی، الاستیقیت، عطالت، حرکت،  
 انتشار، انعکاس مثللو خواصیه ترکیب کیمویلرینه خلل  
 کلامک اوزره یکدیگرینه اولان تأثیراتندن نشأت ایدن  
 آثار و حوادث متنوعهدن و بو آثار و حوادثک متبوع  
 بولندقلری قوانین و قواعد طبیعیهدن بحث ایتمکده  
 اولدیغندن تقسیم استاده کوره مقدمکی حکمت طبیعیه  
 اصلیهنک درت برنجی قسمنه مقابل کورنمکدهدر .

فی الحقیقه بودرت قسمك احتوا ایتدیكى مباحث  
میاننده علومك شمدیكى حالنه نظراً فلسفهیه تعلق ایدن  
بحث وار ایسهده اکثریت او بر طرفده قالمقده در و بناء  
علیه حکمت طبعیه جدیدیه اقسام مذکوریه مقابل  
کوسترمکله بیوک خطا ایتدیکمزی ظن وامیدده حقسز  
دکلز صانیرز.

قدماك حکمت طبعیه اصلیه اقسامندن عد ایتدکری  
تقسیم استاذدن نمایان اولان معادن، نباتات، حیوانات  
علمرینك ایسه بوکون آیری آیری ومنتظم و مکمل برر  
علم اوله رق سعادت مدینهك ارکان متینه سندن بولندقلری  
وارسته قید ایضاح و اصراح اولدیغی کبی نفسی  
وحیواناتده و باخصوص نوع بشرده بولنان قوه مدرکه یی  
بیان و نفس انسانیهك غیر فانی بر جوهر روحانی بولندیغی  
تعیین و اعلام ایدن علمك - که تقسیم استاذده کوره حکمت  
طبعیه اصلیه اقسامك سکزنجیسیدر - (پسیقولوژی)  
یعنی علم احوال روح اولدیغی نزد معارفنده غیرخفیدر.  
استاذ حکما علیه رجه المولی جانبندن حکمت طبعیه  
فرعیه اقسامی میاننده ادخال ایدیلان علم جلیل طبك  
نه قدر ترقی ایتش و برچوق علوم و فنون عالیه و آلیهك  
ارتباط و انضمامیه نه درجه لده توسع ایلش اولدیغی

آزاده کلفه بیان اولوب طلسمات ونیرنجات کی زمانزده اصول وفوائدی غیر مسبوق وزمانزك یوز بیکلرجه بدایع فنیه سی قارشوسنده خیالات واهام نوعندن قاله جغی محقق اولان شیلردن بحثه بوراده هیچ لزوم یوقدر و حقیقتنه واقف اوله مدیغز و بلکه اولغه بيله محتاج بولندیغز بو درلو علملری موضوع بحث ایتکدن ایه تفصیلاتنی آرزو ایدنلره اوقونمقدن مبرا کتب مخصوصه سنی، مجملأ بیلک ایدتیانلره دخی ابن خلدونک کتاب اولنک فصل سادسنی توصیه ايله اکتفا ایتک البته اولی در. کله لم حکمت طبیعیه فرعیه اقسامندن اولان احکام نجوم، فراست، تعبیر رؤیا، کیمیا علملرینه:

علم احکام نجومک مر دودیت وغیر مر دودیتی مدققین علمای اسلامیه بیننده موضوع بحث و مناظره اولمشدر. انجق اول امرده شوراسی معلوم اولمیدر که استاذک علم احکام نجوم حقنده سبقت ایدن تعریفندن دخی نمایان اولدیغی وجهله فن هیئت بو علمک متفرعا- تندن اولمدیغندن مر دودیت وغیر مر دودیت بحثنک اکا شمولی اوله مز.

هیئتک حکمت ریاضیه اقسامندن برفن جلیل پر منفعت اولدیغی وسیارات و کواکبک اعداد واحوال

واشكال وطبايع وسير وحركاتندن يعنى اجرام سماويه ايله  
بولرك قوانين وحركاتى احوالندن بحث ايلديكى جهتهله  
علم احكام نجوم ايجون استلزام مردوديت ايليان مشابهت  
كهانت شائيه سندن برائثله ممتاز بولنه جنجى اشكاردر .

حكمت رياضيه اقسامى بسط واعلام قلنه جنجى صره ده  
فن جليل مذ كوردن دخی بحث طبعی اولديغندن بوراده  
آندن فراغتله علم احكام نجومه نقل كلام ايدلم .

علم احكام نجومك نظر شر يعتهده مردوديتى مخبر  
غيوب ومعرف اسرار عدايدلسندن وعلم اسرار وخفيايده  
حضرت عالم الغيب والشهاده متفرد ومتوحد اولمسي  
جهتهله كهانت يعنى معرفت اسرار واخبار غيب وانلره  
اعتقاد موجب كفر اولسندن ناشيدر كتب عقايد مطالعه  
ايدنلره خفي اولديغى اوزره سيلكوتى كې بعض محققين  
كهانتله علم احكام نجوم بيننده كى مشابهتى رد ايدرك كاهن  
احكام واحوالدن سېدسز، علامتسز اخبار ايله اطلاع  
غيب ومعرفت اسرار ادعا ايدندر منجم ايسه كاهن كې  
اوليوب علم نجوم سبيله ودورات فلکيه علامتيله مقتضيات  
ومسبباتى اخبار ايدر بلا سبب وبلا علامت خبر ويرمز  
ديمشدر فاما سعدالدين كې بعض افانم دخی حوادث  
آتيهيه علمى ادعا ايلديكى تقديرده منجمده كاهن كيدير

رأینده بولمشلردر احکام نجومک مر دودیتی کهانت وسخره  
 مشابہت ومماثلتندن ایچون اولسنه نظر ایدیلور ومنجمینک  
 اخباراتی احوال نجومدن استدلالاً وتجارب واقعیه  
 استناداً اختیار ایدیلان ظنیاتدن عبارت اولهرق مطلق  
 الوقوع بولنمامسی قبول وتقدير قنور ایسه مر دودیتک  
 زوالی (اه اعلم) ممکن اولهجنی ؛ یوق اجرام واحوال  
 علویه نك اجسام وحوادث سفلیهیه تأثیراتی ادعا و بو  
 تأثیراتدن استفاده وانتفاع والتزام ایدیلور ایسه مستلزم  
 مذمومیتی اولان مشابہت ومماثلت معروضه بلکه تمامیه  
 حاصل اولمش اولهجنفندن بالضروره مر دود اولسی لازم  
 کلهجکی متبادر خاطر ایسهده افخم ییننده موضوع بحث  
 اولمش وحقننده مختلف رأیلر ویرلمش بر ماده مهمیه دائر  
 بسط ملاحظه خدمن خارجنده اولدیغندن علم مجتو  
 عنه ایچون بو قدر تفصیل ایله اکتفای مناسب کور یورز.  
 فراست ایسه افخم علمانک بیاننه کوره خلق  
 ظاهر دن خلق باطنی یعنی احوال ظاهره دن احوال  
 باطنیهی استدلالدر وایکی قسم در برنجیسی تجربه ایله  
 حاصل اولور حکمانک فروع حکمت طبیعیه دن عد  
 ایلدیکی اشته بو تجربه ایله حاصل اولان فراستدر .  
 متقدمین ومثأخرین حکمادن پك چوق ذوات



وخصوصیله ابن سینا و ابو طالب دمشقی کبی مدققین  
 بو فراست حقنده رسائل متعدده تألیف ایشلر و الفاظ  
 و اقوال و اطوار و الاحوال دن و وجوه و اعضا و اشکال دن باطنیاته  
 استدلالک طریقنی تجربه یه استناداً بسط و تمهید ایتشلردر.  
 تجربه ایله حاصل اولان فراستدن بحث اولندیغی  
 صروده ایراد ایدیلان مثاللر ارمه سنده شایان استبعاد او-  
 لانلری موجود و فی الحقیقه خاصه فراست عقلک قوته،  
 انتقالک سرعتنه و تجربه و معلوماتک کثرته کوره درجه  
 درجه اوله جغی جهتله برینک نظر استبعادینی جالب  
 اولان استدلال دیکری عندنده ممکن عد اولنه یلمورایسه ده  
 امثله فراستدن چوقلرینک قولایقله شایان اعتماد اوله-  
 میه جغی مطلقدر.

شو سوزلرمز فراستی جحد و انکارمزه مدار حکم  
 اولما ملیدر چونکه

﴿ان فی ذلک لآیات للمتوسمین﴾

نص جلیلی دلالت ایدرکه انسان ایچون احوال و وقو-  
 عاتدن عواقب و نتایجی، اقوال و افعال دن منویات ضمیر  
 و خفایای مطالبی توسم و نفرس و کشف و استدراک غیر مستحیل و

﴿تعرفهم بسیماهم﴾

نظم عالیسیله مثبتدرکه اشکال و جوه ایله احوال و اخلاقه

تحصیل علم و وقوف ارباب دقت و تجربه سهیلدر .  
همده فراستك بیانی صروده ایراد اولنه بیلور اول درجه  
حکمی وقوتلی مثالار واردر که دلائلترنده کی مطابقت  
ظاهر در .

فراستك ایکنجی قسمی فراست شرعیه در قلبی فیو-  
ضات صمدانیه ایله منور اولان عارفین نائل اولور ؛ او  
کار بانسرای سعادتہ اعمال حسنیه مداوم وسیئات ومعا-  
بدن توفیه مقدم اوله رق مرآت ضمیری غبار تعلقات  
فانیه دن طاهر واولانجه همتی متقیسانه ایفای وظائف  
عبودیتہ مصروف و منحصر اهل یقین واصل اولور .

(تعبیر رؤیا) حقیقه بر علم صحت نما اولدیغی رهن  
رتبه بداهتدر زیر رؤیای صالحه نك اجزای نبوتدن  
بولندیغی خیر شریف ایله مثبتدر . واقف حقایق رسول  
امین ونبی صادق صلی الله علیه وسلم افندمن حضر-  
تترینك کندی رؤیالرنی تعبیر بیوردقلربله مرتبه ثبوتہ  
توصیل ایدلمشدر که رؤیای صالحه واردر وانی تعبیر صحیح  
اولور .

تعبیرك خیالات و اوهام نوعندن اولمیدیغی جناب  
پیغمبر دیشانه یار صدیق ابو بکر الصدیق ونصاب فراستدن  
بغایت بهره یاب اولدیغی دلالت حدیث شریف ایله

بی ارباب اولان عمر بن الخطاب رضی اللہ عنہما کی رکن  
رکن ائمہ مسلمین حضراتنک تعبیر رؤ یا بیورملریله محقق  
وصریح اولور»

انجق تعبیر پر صحت ایچون رؤ یای صالحہ بی اضغاث  
واحلام وخیالات و اوہامدن فرق وتمیزہ موفقیت  
شرطدر بوکا اک زیادہ موفق اولان مکاشفہ در . بزم  
ایچون رؤ یامزنک صالح و غیر صالح اولدیفنی تمیز و تحقیق  
سہیل دکلدر پک مشکلدر و بناء علیہ تعبیرندہ اصابتز  
بلکہ دہ مستحیلدر . بو جہتلہ فریفتہ ہوس تعبیر اولما  
مقلعز و بو صورتلہ بر چوق اندیشہ لہ ، وسوسہ لہ ، درلو  
درلوا میدلہ ، انتظار لہ اوغرا ما مقاعمن مناسبدر . رضا جویانہ ،  
متوکلانہ حرکتی ترجیح ایتیوبدہ ہر کوردیکمن رؤ یادن  
تقال ایتک ، ہر راست کلدی کمزدن تعبیر طلب ایلک و یا  
ہر المزہ کچن تعبیر کتابلرینہ اعتماد ایلہ بوش بوش و ہملرہ  
خوفلرہ املارہ دوشمک روا اولمہ کر کدر .

(مابعدی وار)



— مدینت اسلامیہ —

عنوانی التندہ کی شو مقالہ و یا دھا طوغریسی

رساله‌ی یازمقدن مقصدمز اومدیتک قواعد وقوانینی  
بسط و بیان و حقیقه تمدن بو قوانین جلیله وقواعد  
جلیله تمامیه اتباعه توقف ایلدیکنی ارئه وتبیاندر .

اولجه بر قاج سوز ❧

چوقلرک لسانمه یکی نقل ایدلمش یعنی غربک مفید  
ومضر متنوع هدیه لرندن معدود اوله رق مملکت مزه یقین  
زمانلرده کلش ظن ایتدکلری « مدنیت » ویا « تمدن »  
کله لری بزده ومقصدامز اولان قوم نجیب عربده من القدیم  
موجود ایدی واوناملرک احتوا ایلدیکی حقایق ومنافعدن  
اقوام معروضه مستفید ووایه دار ایدی؛ انجق بر اراق  
اونودلدی، صحایف کتبه قالدی؛ مؤخرأ غربله اولان  
مناسبت ائارندن اوله رق میدان چیقدی اما حال اصلیسند  
دکل ایدی بلکه ظاهرده پارلاقخی کوزی آلان و فقط  
حقیقته محروم زیب وزینت اولان بر لباس عجیب  
غربی بی ملبس ایدی؛ دینه بیلورکه اسکی وقار وجدیت  
وخیر ومنفعت خلعت فاخره سنی هنوز اکتسا ایده مامشدر .  
بومدنیت کله سنک - انتشار ایتش بعض مقالاتده کورلمش  
اوله جخی اوزره - « آسایشده کمال » معناسنی افاده  
ایتدیکی بعض معاصرین جانبندن ایراد اولنه رق شو  
مفهومک اصابتی اثبات ایدلمک ایستلمش ومدنیت مجتمعا  
یشامق اولمادیغی ظننده بولنمشدر .

مدنیت انسانك مجتمعاً يشامسنى افاده ايلديكى حاله  
 آسايشده كال معناسنى مفيد اوله جفنده حصـول تردد  
 ضرورى كورينور؛ فقط انسانلرك « مجتمعاً يشامسى »  
 تعبيرله « آسايشده كال » تعبيرى آره سنده فرق بوله ميان بزم كبيلر  
 اچون اوضرورتك زوالى ضرورى اولور؛ زيرا تركيب مذـ  
 كورده « يشامق » تعبيرى « اولمك » لنتك نقيضنى مفيد اوليوب  
 « راحتله عمر سورمك » مفادنده بولمى در خاطر ايديلنجه  
 و بويله « راحتله عمر سورمك » حالى « آسايشده كال » دن  
 غيرى اوله ميه جنى بالضروره تصديق اولنجه حكماى  
 قديمه مرك « تمدن انسانلرك مجتمعاً يشامسيدر » يولنده كى  
 سوزار ينى رده لزوم قالمز . باخصوص مشار اليهمك  
 ونى نصل ونزهده سويلدكلرى وعقبنده نه مطالعات  
 بسط وتمهيد ايلدكلرى نظر دفته آلنجه اويله بر ردك  
 عبث اولديغنى تسليمدين غيرى چاره بولمز؛ باقكزكه فاضل  
 حقايق بين بيمدانى جلال الدين دوانى بر اثر مرغوبنده  
 نه ديمشدر :

« تمدن ياخود مدنيت مدينه دن مشتق اولوب مدينهده  
 اجتماع ديمكدر انجق مدينه بو مقامده ابنيه وجدران  
 معناسنه دكلدر بناء عليه مدينهده اجتماع ديمكلكمز »

وجه لایق اوزره انتظام اموری مؤدی بر اجتماع عامدر.  
 حکمانك ( انسان مدنی بالاطبعدر ) دیمیری دخی بو معنی  
 اوزره در . »

اشته حقیقت بوندن عبارتدر . اعضا و قوای بدن  
 انسانی دوام و بقاده یکدیگره محتاج اولدیغی کبی افراد  
 واجزای انسانی دخی بر برینه محتاج و مفتقر اولوب  
 هر شخصك کمال و تمامی دیگر اشخاصك معاونتیه حاصل  
 اوله یله جکی اجلدن انسانك ابنای نوعیه بر وجه تعاون  
 الفت و محالطه سی وجوب قطعی تحتنه کیرمشد . شو  
 وجوبك خلافی اختیار، قاعده عدالتدن انحراف و صفات  
 جور و تعدی ایله انسام و اتصافدر حتی فاضل مشار ایله  
 بو حقایق و دقایقندن بحث ایله دیکی صروده دیمشدر که  
 « هم نوعندن عزالت و وحشتی اختیار ایله آنلره معاونتدن  
 کلیاً اجتناب ومع هذا کندی اسباب معیشتی تهیئه  
 بارکرانی دیگره تحمیل ایتکه بعضیلر زهد نامی و یرمشر  
 و بونی فضائلدن عد ایتمشر سرده شو حالک بالعکس جور  
 محض اولدیغی آشکاردر؛ چونکه دنیا یوزنده بولنه بیلک  
 ایچون هیچ بر انسانك احتیاج و افتقارندن وارسته قاله  
 میه جغی غذا و لباس کبی انواع حوایجی دیگرلرینک  
 محصول سعی و غیرتندن اخذ و تدارك ایدوبده مقابلنده

هیچ نفعی کورلماک موافق عدل و حقانیت اوله میه جغی  
 بدیداردر کرچه بو مثل لوردن عدم اسباب سایه سنده  
 افعال رذیله نك صادر اوله مامسی کندیلرینک اهل فضیلت  
 اولدقلری ظنی و یرمش ایسه ده بو ظن خطا در؛ زیرا  
 عفت ترک شهوتله دکل بلکه آنی بر وجه عدالت استعمال  
 ایله اولور» .

حضرت جلال الدینک بو مقامده کی تمهیداتی ده  
 مفصل ایسه ده شمدیلک بخشنه عدم تعلقی جهتیله بوراده  
 تذکاری مناسب اوله میه جغدن صدد بحثه رجوع اقتضا  
 ایتمکده در .

بالاده اشارت اولندیغی اوزره قدامی حکمانک  
 و بتخصیص محققین علمای اسلامیه نك مدنیت حقنده کی  
 تعریف معروضلری بو رساله ده موضوع بحث اوله جق  
 مدنیتک معنای اصطلاحیسی اوله رق قبول ایدلمشدر .

انسانک مجتمعا یشامسی استلزام ایدن خلقت و طبیعتی  
 بولندیغی نقطه نك دائماً یوقاروسنه عروج و اعتلا سنی موجب  
 اولسی حسبیله اولانجه سعی و همتی شو مقصدک حصوله  
 طبیعتیله انصراف ایدرک نوع بشر ایچون هر آن رقی  
 کورلک مقتضی اولمشدر .

شو ایکی قوه طبیعیه نك تأثیریه هر هیئت مجتمعه

بشریه مقصود اصلی اولان راحت کامله نك اسباب  
ووسائلنی استكمال واستحضار واستدامه واستقرارحائده  
بولنوب مدینك نقطه كماله وصول ایچون طرق مختلفه یه  
سلوك ایتشدر. انجق انسانك جمع قوای متضاده اولسی  
الجاتندن دركه اكثر هیئت بشریه نك كریوه خطایه  
کیتسی اقتضا ایلشدر؛ یالکز او قوائك محافظه اعتدالنه  
موفق اولانلر کندیلرینی کاربان سرای سعاده ایصال  
ایده جك طریق سلامتی بولمشلردر. موفقیت مذکوره  
عجز ذاتی بی ادراك واعتراف وهدایت خلاق کریمدن  
استفاده غیرتله اتصاف ایتك سایه سنده حصول بولش  
واوهادی حقیقینك احسان ایلدیکی فانوس شریعتله  
منور شهره دوام ایدیلوب قوای فاسده وصالخه  
متابعته افراط وتفریطدن مجانبت دخی چیقمز یوله  
صامق فلاکتندن موجب خلاص وسلامت اولشدر.  
شو حال هیئت اجتماعیه لك ایکی درلو اولسنی اقتضا  
ایتدیروب خیراته تنظیم امور واجرای معاملات ایدن  
افراددن متشکل جمعیتلر هیئت فاضله عنوان جمیلنه  
مظهر اولشلر وشرور ایله اجتماع ایدن افرادك وجوده  
کتوردکری هیئتلدخی هیئت غیر فاضله نامنی المشلردر.  
هیئت فاضله نك اساسی کسب سعادت ودفع شرور



قواعدینه مؤسس ومبتنی اولوب اعضا وافرادینک اعتقاد-  
 دات حقه و اعمال صالحه یه اشتراک لری دائمی اولور؛ بونلرک  
 حرکات و افعال لری - اختلاف اشخاص و تباین احوال  
 طریقک وجودیله برابر - متوافق و انجق برغایته متأدی  
 بولنور. شبهه سزدر که بونک موجب صحیح و سبب قطععیسی  
 اتم واکل شرایع اولان شریعت مطهره محمدیه در و او  
 شریعت جنلیله بو خاصه فوق العاده بی تمامیه حائز اولمقده  
 متفرد و متوحد در؛ بناء علیه هیئت فاضله ایچون اساساً  
 انواع و اقسام فرض و تقدیرینه لزوم قالمز. اما هیئت غیر  
 فاضله نک وجودینه باعث اولان شرر و متنوع، قواعد  
 فاسده و ضعیفه مختلف اولدیغی جهت-یله بونک تنوعی  
 ضروریدر و بوسبیدن هیئت غیر فاضله نک اقسامی واردر  
 که بری هیئت جاهله بری هیئت فاسده بریده هیئت  
 ضاله در اقسام مذکوره حقنده ایجاب ایده جک تفصیلات  
 ایسه محلنده کله جکدر.

(مابعدی وار)



## — ❧ محاضرات ❧ —

مقتطفات

نومرو ۱۷، ۱۸، ۱۹، ۲۰ برنجی جلد ذی القعده

## — ❧ خیر ❧ —

عاقل اولدر که خیره طالب اوله  
دوشمییه تا که شر ایله ذله

امر سلطان انبیا در بو  
اطلبوا الخیر دهر کم کله

ما به الافتخار فضلاى اسلام اوقبى زاده فضيلتبنام  
عليه رجة العلامك شو قطعه سنه زيب آور اولان حديث  
شريفك تامى « اطلبوا الخير دهركم كله وتعرضوا النفحات  
رجة الله فان لله نفحات من رجة يصيب بها من عباده  
وسلوا الله تعالى ان يسهل عوراتكم ويؤمن روعاتكم »  
اولوب حضرت انس رضى الله عنه جانلرندن نقل وروایت  
ايدلديکنى ابونعيم کتاب حليسه ده و حضرت اباهريره

جانبندن روایت ایدل دیک‌کنیده امام بی‌هقی شعب ایمانده  
ذکر و بیان ایدل دیک‌کی جامع الصغیره مسطور در .

حضرت رسول اکرم صلی الله علیه وسلم اش‌بو  
حدیث شریفله امر و بیان بیورمقده درکه «مادام الحیات  
طلب خیره همت واقدام وروایح نفحات رحمت رحمان ایلله  
تعطیر مشام دل و جلّه غیرت واهتمام اولنسون؛ زیرا  
جناب رب عزت نفحات لطیفه رحمتله قوللرندن ایستدیک‌کی  
شرفیاب ووايه دار ایلر» .

معلومدر که مشیت الهیه علمه کوره در(\*) علم اشیانک  
استعداد ذاتیلرینه کوره حضرت خالقه عرض ایتدک‌لری  
معلومات نسبت‌نده در بو جهتله رواج نفحات رحمت  
وعاطقتدن حصه‌مند اولق ایچون الزمیت طلبکاری واضح  
وآشکاردر .

جناب نبی افخم صلی الله تعالی علیه وسلم اش‌بو  
حدیث لطیفله اراده و فرمان بیورمقده درکه «عوراتم‌ری  
ستر ایلله بزى آفات و مخوفاتدن حفظ وصیانت ایلسی اول  
ستار العیوب وقاضی الحاجاتدن سؤال واستدعا قلنسون» .  
عجزومدرکه کمال خلوص وصفوتله استدعای خیر

(\*) محاضراتک مک‌رنجی جزونه تصادف ایدن ۷۳، ۷۴ صحیفه.

لرینه نظر بیوريله .

وصلاح وضراعت و تسلیمتله استرحام نفع و فلاح مدار  
شایانی الطاف کردکار در .

اوقجی زاده مرحوم دیمشدر که « اشبو حدیثک  
اولی ( اطلبوا ) و آخرنده صیغه ( سلوا ) اولق اهل  
بصیرته ایما و اشارت ایدر که هر طالب کنج مطالبه متحتم  
وواجبدر که سپیده دم شباب پرشتابدن انجام نشیب  
مشیه وارنجه بالغدو و الاصال علی الاتصال دعاو تضرع  
و مصارف نفس بی انصافدن آمن اولق ایچون سلاح  
مؤمن ایله تترس و تدرع ایده

لوم ترد نیل ما ارجو و اطلبه

من فضل جودك ما علمتني الطلب

اگرچه صفحات نفحات حی قدیر رقم کش دبیر تدبیر  
دکدر اما

تجلی خدا ناکاه آید

ولیکن بردل آگاه آید

مغزای عبرت فزاسی اوزره دوام تنبه و آگاهی ایله  
منتظر فیض نامتناهی الهی اولق لازمه صدق و نیت و کتاب  
استبصار و تیقظی تحفظ مقتضای ادب عبودیتدر» هر نقدر

عموم موجودات من کل الوجوه نظام عالمه اوفق اوله رق  
هر چه هست از بلا وعافیتی  
خیر محضست و شرعاریتی

مدلولنجه خیر مطلق و شر کوردیکمز شیئک نیجه  
حکم خفیه بی متضمن اولدیغی محققدر فاما اکتسابات  
خصوصنده بوراسی بالطبع موضوع بحث اوله میوب مکتسبات  
وافعال بشریه نک خیر و شر دن غیر خالی اولدیغی مسلم  
ومصدقدر مع هذا جمله موجوداتی خیر مطلقدر دیمک  
هر موجودک من جهة العمومية کل عالمک نظامنه خادم  
وساعی اولدیغنی بیان دیمک اولوب یوقسه شرک اساساً  
سلب وجودینه دلالت ایتمز بلکه شر و ضرک دخی ننع  
وخیر کی خادم نظام کل عالم اولسی مقتضی وجودی  
اولشدردر بو بحثی جلال دوانی مرحومک آثار قلیه سندن  
اولوب محاضراتک دردنجی، بشنجی نسخهلرنده مندرج  
بولنان شرح لطیف و بوکایازلمش والتنجی، سکرنجی نسخه-  
ره درج ایدلمش اولان ذیل مخصوص حل وفصل ایده-  
بیله جکندن بوراده تفصیلدن توقی ایله اولجه عرض  
ایتدیکمز اوزره خیرک خیر، شرک شر اولسی کل امورک  
نظام کل عالمه اوفق بولنسی مقتضاسی اولدیغنی ایراد

واتیان و حدیث شریف حضرت رسالتپناهی دخی  
دلات ایلدیکی اوزره طلب و کسب خیراته سعی و همت،  
خیر و شردن مجانبت مقتضای عقل و فطانت، لازمه  
زکا و انسانیت بولندیغنی بیان مناسب اولور .

مدایح نفع و خیر و مندمات ضر و شره دائر آئارده کو-  
ریلور که امام امامان مقتدای سنیان، شرف فقهای  
کامکار، عز علمای ابرار ابو حنیفه نعمان بن ثابت الخرار  
رضی عنه الجباره عاقل کیمدر سوالی ایراد و تذکار ایدلش  
و حضرت امام فضیلتشعار دخی (عاقل هوشدار خیر  
و شری فرق و تمیزه مقتدر ذوی الابصاردر) جواب  
صوابی و یرمشدور .

حقیقت کشف و ادراک دقایق خیر و شر خیلی هنر،  
تمامیله رؤیت و تمیز خفایای نفع و ضرر مشکله اولوب بو  
موفقیت چوق اهل هنره غیر میسر، یسرت و قوعی طو-  
غریبی مدار مفخرت بر شرف معتبردر

اگر اشیا چنین بودی که پیدااست  
سؤال مصطفی کی آمدی راست

که باحق فخر عالم گفت الهی

بمن یمای اشیارا کماهی

البته حقایق اشیا هر نظر ایچون سهل المنظر اولمش  
اولسه ایدی وقوف سرأر موجودات ایچون دور ودراز  
اختیار کلفت و بحث ومشورته محل قلمز، البته خفای اشیا  
تماشای ظاهر یاتله عیان واطهر اولمش اولسه ایدی اول  
واقف هر دقایق نبی صادق علیه الصلوة والسلام حضر-  
تنک اویله مناجاتی وقوعبولمز ایدی .

نه بختیاردر انلر که تمیز نیک وبد خصیصه سنه نائلیتله  
مظهر لطف جلیل کردکار اولمشلر، نه کامکاردر شونلر که  
یاوری طبع پاک وفکر چالاک ایله تفریق حق وباطله  
اقتدار بولمشلردر انجق «ارباب زکا ونباهته بالبداهه  
ظاهر وبی حجت وبرهان باهردر که خبر خیری مجرد نقل  
وحکایت ومنذمات ضر وشری ساده افاده وروایت کفایت  
ایلز بلکه منهج خیره عازم وعزیمت طریق مظلم شردن  
نکولده مقدم وجام اولمق لازب ولازمدر که؛ عداد اهل  
سداده معدود ومیان اخبار نیک نهاده مودود اوله نته کم  
معارف الهیهده ذوقنون حضرت ذوالنون بوسر مکنونی  
کشف وافاده وبوکلام بدیع الاشاره بی اظهار و اشاره ایلشدر.

کن بالخیر موصوفاً ولا تکن للخیر وصافاً  
فان الکافر قد ینطق بالحکمة

یعنی (وصاف نفع و خیر اولمه خیر ایله موصوف  
و ممدوح اول زیرا کافر دخی بعضاً حکمتله ناطق اولور) مأ-  
لنده کی کلام حکمت السجّامی اراد ایدرک خیر ایله اتصا-  
فک وجوبنی اخطار ایتشد.

نعم وخیرک مداح ووصافی اوله رق خلقی انکله اتصا-  
فه تشویق ایدن و فقط کندوسی موصوفیت خیر ایله  
شرفیاب اولمغه غیر ساعی بولنان غریب الاحوالر ایچون  
ورود ایتش امثال عربیه نک بریده شودر :

مثل الذی یعلم الناس الخیر ولا یعمل به  
کمثل اعمی بیده سراج یستضیء به غیره  
وهو لا یراه

یعنی (ناسه تعلیم خیر ایتدیکی حالده کندی خیر ایله  
عامل اولیان آدم شول کوره بکزرکه النده فانوس بولنور  
هر کس آندن مستضیء و مستنیر اولور حالبوکه او فانوس  
ضیاداری کندیسی کورمز، نورندن استفاده ایتمز) .  
او یله ایسه انسان هم کندیسی طریق فیض رفیق



خیره سلوکه اقدام وهمده خلقی او شهراه سعادت وسلا-  
 مته عزیمتیه ترغیب ایچون اهتمام ایلملیدر باخصوص  
 اخوانی خیره تحریص وتشویق لازمه محبت وواجبه الفت  
 ومخاندت اولدیغندن بولزوم ووجوبی هیچ بروقت او-  
 نوتماملیدر .

حکما دیمشلدردرکه اخوانک خیرلوسی رفیقنی شرور  
 ومضرتدن منع وتحذیر ومنافع وخیراته س-وق وهدایت  
 ایدر .

اوقجی زاده مرحوم احسن الحدیث نام اثرنده یاز-  
 مشدرکه «رکون خلیفه پاک مشرب شرفیافته» (اول من  
 یسلم علیه الرب) داور عدالت پرور یعنی حضرت عمر  
 رضی الله عنہک نادئ جزیل الایادیلرنده سر جریده اخبار  
 اولان کعب الاخبار حاضر ودریچہ درجه انتظارده کلزار  
 رخصت گفتاره ناظر ایدی ناکاه شعرای نادره الهیئهدن  
 (خطیئیه) که ساحه جودت قریحه صریحه سی عریض و بین  
 الشعرا نقاد شعر وقریض در زروه روايته اسناد و بوییت  
 پر عبرتی انشاد ایلدی .

من یفعل الخیر لایعدم جوازیه  
 لایذهب العرف بین الله والناس

کعب الاخبار که هر حدیث شده نیجه سر قدیم مندرج  
واکثر کلامنده نفع و حکم مند مجدر دیدی که یا امیر المؤمنین  
بوشعر متین تورات شرف آیاتده مصرح و موجود و اخبار  
یهودده منهل و رودی مورود در .  
خلیفهٔ مسلمین :

شریعت را کمال افزود اول

ز چل مردان یکی او بود اول

صاحب مناقب پیر حضرت عمر رضی الله عنه کیفیت  
وقوعدن استنطاق ایلدکده کعبهٔ اخبار اولان کعب  
الاخبار اظهار مضمیر و سرمکتوم و مکنونی مظهر ایدوب  
بیان ایلدی که توراتده بالصراحه لابلالتوریه بواسلوب  
اوزره مکتوبدر یعنی :

من یصنع الخیر لایضیع عندی

ولایذهب العرف بینی و بین عبدی

کلامی مسطوردر .

کرك یت مذکور و كرك اكا اساس اولان شوعبارۀ  
تورات خیرك عند الله درجۀ قدر و اعتبارینی ارأه ایدر .  
هر حال و کارده خیرات و حسنات ابله ائتلاف قدر

شرف اوله مرز. جناب نظام بخش کائنات فرقان کریم و بھیندہ:

واحسنوا ان الله يحب المحسنين

نص متینلہ خیر و احسانہ سعی و غیرتی ارادہ و تلقین

و ارباب خیرات و حسناتی سودیکنی تبشیر و تبیین :

ان الله لا يضيع اجر المحسنين

حکم جلیلیلہ دہ محسن و کرم کارلک آمال حسنہ

و اجراآت مستحسنہ لری اجر و مکافاتی ضایع و تلف

اولیہ جغنی بیان و تعیین بیور مشدر .

آیت نفع غایت

فاستبقوا الخیرات

جلہ مؤمنین و مؤمنات ایچون طریق فیض مبرات

و حسناتہ و خلوص و طاعاتہ سلوک و دوامی امرایۃ تکدہ در .

حتی حضرت حسن بصری رحۃ اللہ علیہ برو عظ و نصیحت

ارہ سندنہ اشکر یز تأسف و تلہف اولہ رق « ای ناس

جناب فرمان فرمای کائنات ( فاستبقوا الخیرات )

نص جلیلیلہ صلاح و فلاحی، خیر و بری، طاعت و عبادتی

امر ایلور بزایسہ ( فاستبقوا الشهوات ) امرنی

المشجہ سنہ مائل فساد، مجلوب هوا و هوسات اولوب

طور یورز « یولندہ اداره کلام ایدرک امت محمدی خیرات

و حسناتہ تشویق و ترغیب ایلشدرد. خیرات و مبراتہ سعی

و همت هر حال ده دنیوی، اخروی مستلزم سعادت و سلامت اولوب

{ یوم تجد کل نفس ما عملت من خیر

مخضراً وما عملت من سوء } الایة

یعنی ( یوم قیامتده هر بر نفس دنیا ده خیردن، شردن  
ایشلیدیکی شیئی حاضر بولور ) حکم جلیلیله مبر هندر که  
جزای خیر مطلق و

ومن یعمل مثقال ذرة خیراً یره

ومن یعمل مثقال ذرة شراً یره

یعنی ( خیر و شردن ذره مقداری ایشلیان مقابلنی کورر )  
حکم جلیلی ایله مستدلدر که، لو که جزوی اولسون خیر ایشلیان  
جزای خیری، شر ایشلیان جزای شری کور مسی محققدر.  
حقیقه نه مسعوددر اول مرد نیکوکار که قسمتخانه

{ وربك یخلق ما یشاء و ینختار }

دن افاضه مبرت وجود ایچون مخلوق و موجود اولوب  
دست سخایار ایله سلسله خیرات و مضاری تحریک و نشر  
مناشیر انعام ایله علی الدوام تحصیل نام نیک ایدر

ولا خیر فی طول الحیاة اذ امرء

مضی ثم لم یدکر بخیر عواقبه

البته اولمش کیتش وعواقبی خیرایله یاد ایدلما مکنده بولنش  
اولان آدمک طول حیاتندن هیچ خیر وفلئه اوله من  
الخير ابقی وان طال الزمان به  
والشر اخبث ما اوعیت من زاد

شبهه سز نه قدر زمان کچسه خیرک حکمی باقیدر شرایسه  
طوپلانیلان زاد و ذخایرک اخبث و مر داریدر . ایمدی  
خیرایله اتصافک ممدوحیتنه، شره ابتلا نك مذمومیتنه  
دائر دهها پک چوق نصوص واحادیث واقوال و کفتار  
نقل و تذکار اولنه یلور سده تفصیلدن اتقاء بو قدرله  
اکتفا و فقط سوق کلام ایجابیله خیر و شر حقننده بر  
افاده دهها بولنمق اقتضا ایلدی .

منقاد احکام قضا و قدر اولانلره روشن و اظهر او-  
لدیغی اوزره خیر و شر هپسی حقندن اولوب انجق مقتضای  
ادب عبودیت خیری جناب رب عزندن، شری کندی  
نفسندن وارد و متحصل بیلیدر حتی حسن بصری  
رحمة الله علیه زماننده افکار قدریه و جبریه اساسنک  
انتشاره باشلامسینه مبنی (قدر) بحثنده بعض استیضاحه لزوم  
کوره رک قره عین زهرا ولدا کبر مرتضی حنفید جلیل  
حضرت مصطفی ابو محمد حسن بن علی رضی الله عنهما یه

تقديم عريضه ايلش وبونده «سز اعلام هدايت، امام امت اولديغكزدن وحقه مؤمن اولان كشتي نوحده نجات بولديغي كبي سزه متسابعت ايدنلرك فلاح و نجات بوله. جقلى آشكار اولديغندن بزم قدرده اولان حيرتمز وقدر. يلره اولان اختلاف وعدم استطاعتز خصوصنده رأى رزينلر يني استفساره جرأت ايلدك تا كه بو بابده اولان رأى وقرار كزي اوكرنوب حقيقتيه آگاه اولهلم» طرزنده استكنانه ماده ايتشيدى نور ديدة نبي مختار بو عريضه يه يازديغي جوابنامه ده «هر كيم كه خير و شر خدادن اولديغنه ايمان كتورميه كافر در وهر كيمكه معاصي يي خدايه حواله قيله فاجر در بنده عاجز جناب حق دن استطاعتى مقدارى كندى كسبنده مختار در ودين اسلام جبر ايله قدر بيننده در» مألنده اداره كلام وافاده مرام حكمت انسجام ايتشدر كه شوندن صراحة نمايان اولديغي اوزره خير شر حق دن ايسه ده جناب خالق مكوناته حواله معاصي فسق و فجور درجه سنده در.

قرآن حقيقت بيانده :

ما اصابك من حسنة فمن الله وما اصابك

من سيئة فمن نفسك

بیورلمش اولمسیله مثبتدرکه انسانه حسناتدن اصابت ایدن شیئی  
جناب رب عزتدن بیلک، سیئاتدن اصابت ایدن شیئی  
دخی کندی نفسندن عد ایلک متضای آداب دیانتدر  
حتی حضرت ابراهیم صلوات الله علی نبینا وعلیه  
} بنی اطعام ایدن الله اسقا دخی ایدر  
و بن مریض اولورسه هم شفایاب ایلر }

دیمشدر مشار الیهک شو سوزیله ظاهر و باهر اولمقده درکه  
خیری حقندن، شری نفسندن بیلیدر یعنی نبی مشار  
الیه اطعام لطف و عنایتی جناب منعم حقیقیدن، اسقا  
عاطفتی ینه اول حضرت رب العالمیندن بیلدیکی حالده  
مریض اولمقلغی کندی نفسنه اسناد وحواله ایتش فاما  
شفا بولمق شرف موفقیتی ینه جناب شافی مطلقدن  
بکلدیکنی بیان ایلشدر . اشته بو ایجاب ادب عبودیتدر .  
صاحب الفصوص امام طائی محی الدین عربی قدس  
سره العالی دخی فصوص الحکمک برنجیسی اولان کله  
آدمیهده منقوش حکمت الیهیه فصی نهایتلرنده دیمشدرکه :  
« امر ذم و جددن عبارت اولدیغندن کندنده ذم  
و نقص اولان شیئی نفسکره اسناد ایدک صاقین حضرت  
حقه اسناد ایتیک جدی ایجاب ایدن شیئی ایسه جناب ارحم

الراحينه اسناد ايدك صاقين نفسكزه اسناد ايتيك اشته  
 بو حالده ادبا وعالميندن اولورسكز . ايمدى ادب  
 عبوديتله مؤدب ومقتضيات شريعت مطهره يي حسن  
 ايفا ايله مشرف اوله رق ايكي جهانده مسعود وبختيار  
 اولمق ديليان؛ خواهشكران نجات وفلاح، آرزومندان  
 سعد وصلاح اولانلر خيرات وحسانه هران وزمان سعي  
 وغيرت، شرور وسئيادتدن على الدوام مجانبته جد وهمت  
 ايتليلر وبوصورتله مقصد اقصى ومطلب اسنى اولان  
 سعادت وسلامته ايرمليلردر .

همده نتيجه مقاله مرزده مصرح ادب عبوديتي هيچ بر  
 وقت اونو تميوب او يوزدن دخی مسعود وكامكار  
 اولمليلردر .



{ اسرار نورانيه قرآنيه } ترجمه سندن

ما بعد

مبحث ثالث

فحكم مدت تكوینی بیانده در

ارض اوزرنده جبال بولمیه رق مسطح اولديغی



و مستغرق میاه بولندیخی وقتلر بعض نباتات موجود او-  
 لوب فقط اول زمانه مخصوص اولان نباتاتک اشکالی  
 زمانزه منسوب نباتاتک اشکالنه مخالف ایدی . نباتات  
 مذکوره (فصیلہ اشنیه) (فصیلہ کبریت نباتی) انواعندن  
 ایدی که بولنرک ترکیبی بسیط و چچیکی خفی اولوب لیکن  
 ابتدای خلقتده حجماً بیک و عدداً چوق ایدیلر . ایشته  
 بو نباتندن ارض فحمیه تگون ایتشدیر . قابل احتراق  
 بولنان بو جوهر حیواناتک تگونندن اول اولان زمان  
 قدیمده کی نباتاتدن متحصلدیر . جبالک تگون و توحثی  
 ایسه ایشبو نباتاتک برخیلی کوملمسنی یعنی ارضک پک ایچرو-  
 سنده بولنمسنی استلزام و بوده طبیعت و هیئت تنوع ایدرک  
 زمانزه قدر قالمسنی انتاج ایلشدیر . نباتات مذکوره ناک  
 بعض عناصری مفقود و زائل اولمسی دخی مواد نباتیه ده  
 حاصل تحلیل بطبیعی حصوله کتورن مواد قاریه و قطرا-  
 نیه ایله مشرب فحمه تحولنی ایجاب ایتشدیر .  
 ایمدی معلوم اولدی که مطبخخلرده ، تنورلرده ، آلات  
 بخاریه ده ، سائر بوکا مماثل اولان شیلرده مستعمل بولنان  
 و کندیسندن غاز استحصال واستحضار اولنان فحم حجری  
 انجق — باعث تگون غابات اولان و زمان قدیمده  
 مستنقعاتده نابت بولنان — نباتات ماده سیدر .

مدت فحمیه ایسه کره ارضیه بی بتمامها ستر ایدن نباتاتک مدتی مثللو عظیم ومدیدر؛ زیرا جو زیاده حرارتلی وچوق رطوبتلی ایدی . کندیسنه نباتات مدت فحمیه نك منسوب اولدیغی اجناس شمیدلرده انجق بلاد حاره ده بولنور . نشوونماسی عظیم اولان اشبو نباتات حفریه جولک رطوبتله متشعب بولندیغنه وعروضده درجه حرارتک بر اولدیغنه دلالت ایلر .

ایمدی کندیسندن فحم حجری تکیون ایدن نباتاتک نموی ارضک هر نقطه سنده بر ایدی . فنا بولان انواع نباتیه نك درجه نموی بر اولدیغی و بولنلرک دائرة استواء ودائرة قطبیه ده بولندقلری مشهود اولسنه کوره تکیون ارضک اوچنجی زمانی اولان ازمنه مذکوره ده درجه حرارتک هرجهته مساوی ایدوکی وتمامله کرده انجق بر قطر بولندیغی بالمشاهده معلوم اولمشدر .

زمن مذکوره نباتاتنده بولنان وصف عجیب نباتات مذکوره نك خارق العاده اولان نموی در . کندیسندن زمانزده انجق بلاد بارده ده چوق یاشایان نباتات حشیشیه تکیون ایدن انواع سرخس اولوققلر اشجار تنوبدن دها یوکسک اولوردی وحقی زمانزده بر زراع ارتفاعی بولنان کبریت نباتی انواعنک زمن

قدیمده اوتوز ایکی-دن قرق زراعه قدر بوی و بر یچق  
 زراع قطری وار ایدی . بو اشجار مرتفعه — مدت  
 فحمیه ده کنديسندن غابات متسمه تگون ایدن — اشجار  
 درکه بر قطبدن دیگرینه قدر ارضی کاملاً ستر ایتشلردی .  
 مدت فحمیه نك بیانی ایچون ایکی یه تقسیمی مناسب  
 اولور :

برنجیسی کنديسنده رسوبات مهمه بحریه تولد ایدن  
 حجر جیری فحمی مدتیر ؛ ایکنجیسی مدت فحمیه در .  
 فحم جیرینك تگونو بو ایکی مدته ، خصوصیه مدت  
 ثابته ده حصول بولمدر .

حجر جیری فحمی مدته کلنجه جزاری غطی و ستر  
 ایدن نباتات سرخس و یا ذیل فرس و یاخود کبریت نباتی  
 و یاخود ذات فلقتین اولان و نباتات فصیله مخروطیه  
 مشابه بولنان نباتات انواعندن ایدی . اوراق حلقیه لی  
 اولان نباتات ایله ختوملی بولنانلرک انواعی نابت اوله رق  
 نسلی منقطع اولان فصائله نسبت اولنور که یونلر هب  
 ذات فلقتیندر . قصب فارسی انواعندن عظیمة الارتفاع  
 بولنان نباتات مدت مذکوره ده غایتله کثیر و هر برینك  
 طولی اون اوچدن اون بش ارشونه قدر ایدی .

ایمدی مدت فحمیه ارضی غطی و ستر ایدن نباتات

عجيبه نك كثريله ونموده متشابه اولان نباتاتك وجوديله  
متصفدر . نباتات زمن فحمى بالملكليه زمانك نباتاتنه  
مخالفدر .

زمن فحمينك احوال حيويه وارضيّه سندندر كه اشبو  
نباتات اصليله نك تميرينه مدار اولان صفات معلوم اوليور  
امطار مستره، حرارت شديد و ضباب مستر ايله مستور  
ضوء خفيفدن نبات مخصوص تولد ايدر كه عصر مزده  
بونك شيهنك حصولي ممكن دكلدر . بونكله برابر او  
زمانك تصوري مراد ايديلور ايسه بحر هادي يا خود  
شاطي اطه لزندن (شبلويه) جزيره سي مثلاً جزايري  
تأمل لازم كلور . مذكور جزيره شبلويه ده سنده اوج  
بوز كون يا غمور يا غار كونش دخی ضباب مستر ايله مستور  
بولنور يعني دومانله مستور اولور . ايشته بو اطه نك نبا-  
تاتي مدت فحميه ده يعني فحمك زمان حصولنده كره  
ارضی ستر ایدن نباتاتنه خیلی مشابه بولنديغندن جزيره  
مذكوره نباتاتي تصور وملاحظه مجتو زمن فحميه  
نباتاتنك حال وشكلنه على وجه التقريب حصول وقوف  
ومعلوماتي موجب اولور .

سرخس شجرينك انواعنه كلنجه ذكر اولنان جزيره  
شبلويه ده سرخسك انواعندن برطاق غابات تكون ايدر كه

انلرك ظلنده ذات مستنقعات اولان ارضك برزراع فوقته  
مرتفع سرخس حشيشيه انواعى نشو ونما بولور  
و بوسرخس حشيشيه نك التنده دخى نباتات صغيره خفيه  
انواعندن پك چوغى نابت اولور . نباتات مذكوره شكل  
وهيئتي مارالذكر مدت فحميه نباتاتنك شكل وهيئته  
مشابه ومماثلدر .

نباتات مذكوره نك بيانمز وجهله جنسى پك آز اولوب  
انجق فصائل قليله نك انواع كثيره سى وار ايدى . مقدا  
اوروپاده بولنان اراضى فحميه ده متحصل سرخس حفرية  
ايكى يوز اللى نوع ايدى ؛ حالبوكه بونك اوروپاده شمى  
انواعى انجق اللى قدردر . ذات فلقتين ، ذات بذور  
الريان نباتاتنك انواعى مقدا يوز يكرميدن زياده ايكن  
اراضى فحميه ده شمى ياشايه بيلانلرك مقدارى يكرى  
بش نوعدن عبارت اولديغى ارباب معلوماته خنى دكلدر .

مابعدى وار



## ❧ مقتطفات منشوره ❧

قال رسول الله صلى الله عليه وسلم (علامات المؤمن اربعة لسانه بذكر الله تعالى ناطق وقلبه بامر الله صادق ونفسه بخدمة الله سابق وخلق له للشرعية موافق) يعنى عندليب كلزار رسالت عليه الصلوة والسلام افندمن حضرتلری بیورمشلردرکه علامات مؤمن درتدر :

لسانی ذکر صمدانی ایله ناطق، قلبی امر ربانی به صادق، نفسی خدمت سبحانیده سابق، خلقی شریعتیه موافق اولور .

سید اهل تجرید سربلند ارباب تفرید وتوحید سرور مهاجرین وانصار خلیفه اول حبیب پروردگار رفیق صدیق رسول شفیع ابوبکر عبد الله بن عثمان الصدیق رضی الله عنه بیورمشدرکه علامات مؤمن درتدر :

لسانی لطیف، قلبی نظیف، نفسی عقیف، دینی شریف اولور .

سرخیل غضنفران اهل ایمان افخم ارباب لطف واحسان رهبر مجاهدین دین خلیفه ثانی حضرت محمد

الامین امام اصحاب صفوت غریق دریای معدلت ابو حفص  
عمر بن الخطاب رضی عنه التواب بیور مشدر که علامات  
مؤمن در تدر :

نومی قلیل، نفسی علیل، حزنی طویل، مونسی جلیل  
اولور .

کنج حینا عابد ترین اهل صفا جامع قرآن حقیقت  
بیان خلیفه ثالث پیغمبر ذیشان راضی امر خدا داماد  
حضرت مجتبا ابو عمر عثمان بن عفان رضی عنه الرحمن  
بیور مشدر که علامات مؤمن در تدر :

اکلی حلال، مالی نوال، خوفی سؤال، قوی کمال  
اولور .

عم زاده مختار مصطفی غریق بحر بلا حریق نارولا  
شیر خدا خلیفه رابع خاتم انبیا مقتدای اتقیا پیشوای  
اصفیا ابو الحسن امام علی المرتضی بن ابی طالب کرم الله  
وجہه و رضی الله عنہما دخی بیور مشدر که علامات مؤمن  
در تدر :

مالی دینی، قلبی حصنی، عدوی نفسی، حب الله سیفی  
اولور .



کتب اخلاقیه ده اختیار استاذن بحث اولنورکن  
 دینلشدر که انتخاب و اختیار اولنه جق استاذک اعلم واورع  
 واسن اولمسی لازمدر حتی حضرت ابو حنیفه رضی الله  
 عنه حماد بن سلیمان رضی الله عنہی تأمل وتفکر دن صکره  
 کندیسنه استاذ اتحاد ایلش واستاذمی شیخ وقور حلیم  
 صبور ومتفکر بولدم دیمش ومشار الیهدن کمال استفاده سنی  
 دخی بن حماد بن سلیمان نزنده ثابت اوله رق نابت اولدم  
 کلامیله بیان ایتشدرد.



شریکک مجد، ورع وتقوی واستقامت طبیعت صا-  
 حبی اولمسنه متفهم وکسل وعطالتدن وکثرت کلام  
 ومفسدتن متوقی ومجانب بولمسنه وقتان اولمامسنه اعتنا  
 ودقت لابدر زیرا

عن المرء لا تسأل وابصر قرینه

فان القرین بالمقارن یقتدی

فان کان ذا شر فجانبه سره

وان کان ذا خیر فقاربه تهتدی



یعنی بر آدمک احوالندن سؤال ایتمه رفیق و قریننه باق  
زیرا قارن مقارننه اقتدا ایدر اگر مقارن شریر ایسه آندن  
بالسرعه امتناع و مجانبت اینله اگر اهل خیر ایسه قرین  
و قریب اول که سنی سلامته و خیره هدایت ایدر.



حضرت علی رضی الله عنه جانبندن روایت ایدلدیکی  
کتب احادیثه مندرج حدیث شریف مألیدر :  
التي شيء مستحسن لکن التي صنف ناسده بولنور  
ایسه احسن اولور برنجیسی عدالت که مستحسندر اما  
امراده اولور ایسه احسندر ایکنجیسی سخاوت که  
مستحسندر اما اغنیاده اولورسه احسندر اوچنجیسی زهد  
که مستحسندر اما علماده اولورسه احسندر دردنجیسی  
شکر که مستحسندر اما فقراده اولورسه احسندر بشنجیسی  
توبه که مستحسندر اما کنجیلرده اولورسه احسندر  
التجیسی حیا که مستحسندر اما قایلرده اولورسه احسندر.



سلطان شهدا شهید کر بلا ابوالحسن امام حسین  
بن علی رضی الله عنهما بیورمشدر :

اشفق اخوانكز دينكزدر . حقاكه نجات دينه متا .  
بعتمه هلاك مخالفتمه در . مرد خرد مند اولدر كه او  
معين اشفقك رحم و شفقتنى ادراك و اذعان ايله فرمانه  
رام اولمغه همت و متابعتدن رو كردان اولمامغه غيرت ايده .



حسن بصرى رحمة اه عايهك بعضاً بوجهمه  
دعا و مناجات ايلديكى بعض آثارده كورلمشدر :

آلهى ! نعمت ويردك شكر ايدهمدم مبتلا قيلدك صبر  
ايدهمدم حالبوكه نه عدم شكرم سبيله نعمتى اكسك  
ايدىورسك نه ده عدم صبرم مقابلمده ادامه بلا ايليور .  
سك آلهى ! سندن كرم و عنايتدن لطف و عاطفتدن  
غيرى نه كلور .



مشار اليهك

كفتار بى حكمت عين آفت ، سكوت بى فكرت شهوت

و غفلت، نظر بی عبرت اهو و ذلتدر؛ عزلت ایلیمان  
سلامت، شهوتنه غالب اولان ازادکی و راحت بولور  
حسدن ال چکن صاحب مروت اولور.



### ینه مشارالیهک

ظاهری باطنه باطنی ظاهره موافق اولیمان منافقدر.



مشارالیه فلان کسه جان چکیشیور دنیلدکده جوا-  
با دیمشدرکه (یتش سنه در جان چکیشیور خلاصلق  
ایستیور اماقنده خلاص اولور).



### بوده مشارالیهک

سبکبارلر نجهاة بولور کران بارلر هلاک اولور.  
حق تعالی شونلری مغفرت ایدر که دنیایی کندیلرینه  
امانت بیلهلر؛ امانتی صاحبنه تسلیم ایدوب سبکبار کیده لر.  
اگر سندن صکره دنیانک عاقبتنی بیلک ایستر ایسهک بر  
کسه یه موت ایرشدکده نظر ایله دنیاسی نه حاله وار-  
مشدر سنده کندیکی اکا قیاس ایت.



## ذوالنون مصری رحمة اه علیه :

هر عضوك توبه سی واردر توبه دل ترك شهوته  
 نیت؛ توبه چشم محارمی رؤیتدن، توبه گوش استماع  
 غیبتدن، توبه پای مناهیه عزیمتدن، توبه دهان  
 اكل حرام ایله الفتدن، توبه فرج فواحشه قریتدن  
 مجانبتدر .

صادق لسانی حق وصوابدن غیرى نطق ایتمیاند  
 صادق شمشیر خدادر اول شمشیره قارشی کیم طوره  
 بیلورکه ایکی شق اولیه .



## سری سقطی قدس الله سره :

مرد خدا اولدرکه هم بازاردہ بیع وشرایده هم  
 ذکر حقله مشغول اوله بر لحظه حقندن غافل اولیه .  
 اقوای خلق اولدرکه غضبک سکا غالب اولیه سن  
 غضبیکه غالب اوله سک .

کندی نفسنی تأدیبدن عاجز اولان غیرک نفسنی  
 تأدیبدن البته عاجزدر .

مشار الیه بر کون صبر و تحملہ دائر بعض افاداته  
 بولنیوردی ایاغنی عقرب صوقدی دفعه شتاب ایتمدی

«نچون همان دفع ایتیمورسکز» دنیلده کده «کفتـارمن  
صبره دأردر شرم و حیا ایدرم» جوانی و یردی .

صلحاء رجالدن بری صبر و محبت و تمکیندن هانکیسی  
افضل اولدیفنی امام شافعی دن سـؤال ایلده کده امام  
مشار الیه شو یولده جواب و یرمشدر :

«تمکین درجه انبیادر محبتدن صکره اولور زیرا  
امتحان اولنسه صبر ایدر و صبر ایدر ایسه تمکین بولور  
کورمز میسک که حق تعالی انبیادن ابراهیم و موسی و ایوب  
صلوات الله علی نبینا وعلیهمه بعد الامتحان تمکین  
و یردی و سلیمان علیه السلامه امتحاندن صکره ملک  
و یردی بناء علیه تمکین افضلدر کما قال الله تعالی  
«و كذلك مکنا یوسف» و ایوبه بعد المحنة العظيمة  
تمکین و یروب کتاب کریمده «و آتیناه اهله مثلهم معهم»  
دیو کال لطف و احسانن بیان بیوردی .

اساتذة حکمدان جلال دوانی علیه رجة الباری  
عدالته دأر یازدیغی بر رسالده بیان ایلشدر :  
ارسطاطاليس عدالتی اوچ قسمه تقسیم ایلشدر :  
یرنجیسی عبد ایلـه خلق ییننده اولوب محض جود

و کرماندن موجوداته خلعت و جود الباس واکسا و نعم  
نامتناهی احسان و اعطا بیوران جناب خالق مطلقه  
اولان عبودیت مواجیبدر؛ بو قسمک حکمنجه رسوم عبادته  
رعایتده هیچ بر دقیقه مسامحه و اهمال جائز اوله مز.  
ایکنجیسی بنی نوع میاننده جاریدر تعظیم سلاطین،  
تکریم علما و ائمه دین، اداء امانات و منصفانه معاملاتدر.  
اوچنجیسی دخی قضاء دیون، تنفیذ وصایا کبی حقوق  
اسلافی ادا در.

مطلع احکام شریعت مقدسه محمدیه علیه افضل  
الصلوة و التحیه اولانلره خفی دکلدر که اول حضرت رسالت  
پناه « اوتیت جوامع الکلم » حکمنجه جمیع اقسام عدالتی  
مواضع متعدده ده اک شریف و اک لطیف عبارات  
ایله بیان ایتشلدردر مثلاً « التعظیم لامر الله و الشفقه  
على خلق الله » بیورمشلدردر که تمام اقسام عدالتی مشتملدر  
زیرا رعایت عدالت یا حق الله متعلق امورده در اشته  
فقره اولی بوکا دلالت، یا حق ناسه متعلق امورده در فقره  
ثانیده بوکا اشارت در. فطن لبیب ایچون معلوم وهویدا.  
در که شو کلم وجیزده بو قدر عنذوبت فعوی ورشاقت  
مؤدی درجی (ادبی ربی فاحسن تأدیبی) مکتبنک مؤدبندن  
غیری به میسر اوله مز؛ بناء علیه حکمای متأخرین احکام

شریعت سید الانامک دقایقہ واقف و مطلع اولدقلری  
اجلدن بویابده افعال و کتب حکمایی تبعدن دست کش  
فراغت اولشردر.

چوان رخسار و بالا باعیان دید  
زکل بر کند و ببرید از صنوبر



سقراطه حسن خلق ایله سؤ خلقدن سؤال اولاندقده  
شویله جواب ویرمشدر:

حسن خلق قبایحی ستر ایدر سؤ خلق ایسه محاسنی  
ستر ایدر طبیعیدر که خلق مستحسن ایله متخلقک نظر نفرقی  
جالب قبایحی کورنمز.

سؤ خلق ایله متصفک ایسه معایب و قبایحدن غیری  
حالی نظره تصادفی اتمز.



حلم حال رضا و سکونته دکل انجق حال حدت  
و غضبده وقوع بولور ایسه مقبول و مرغوب اولور حتی  
حضرت رسول اکرم صلی الله علیه وسلم (خیر الاخلاق

الحلم عند الغضب) بیورملری شو حکمتی تبیین ایلر اشته  
زیرده کی بیت دخی بو مآلده در

لیست الاحلام فی حال الرضی

انما الاحلام فی حال الغضب

حقیقهٔ حلمك فضیلتی غضب زماننده وجودینه  
توقف ایدر زیرا معرفت غضب وقتنده حلیم اولمقدرد  
یوقسه حال سکونت ورضاده هر کس حلیم اوله بیلور .



❖❖ مقتطفات منظومه ❖❖

حضرت امام علی رضی الله عنه وكرم الله وجهه :  
من لم یکن عنصره طیباً لم یخرج الطیب من فیه  
اصلی پاک اولمیانک لسانندن ایو شی چیقمر؛  
اصل الفتی یخفی ولکنه من فعله یعرف مافیہ  
طبع انسان کرچه خفیدر لکن خفایاسی فعلیله معلوم  
ومعروف اولور .

بیت اول (الکلام صفة المتکلم) مآلنه مقارندرد؛ بیت  
ثانی دخی (کل اناء یترشح بمافیہ) مفهومی متضمندر .



شو دخی قطعۀ مذکورہ نك ترجمہ سی عد ایدیلہ یلیر:  
 عنصری پاك اولیوب طیتی بد اولانك  
 آغزی آچلسه اكر سویلیه لفظ بدی  
 اصلی خفی هر كسك حكمت حقد ر ولی  
 هر نه ایسه مایه سی فعلی عیان ایلدی  
 ابن کمال مرحومك شوییتی ده قطعۀ مذکورہ مآلنه  
 ملا یمدر .

ایلسه ك طوطی یه تعلیم ادای کلمات  
 سوزی انسان اولور اما اوزی انسان اولمز

—  
 امام مشارالیه حضرتلر ینکدر:

اصبر قليلا فبعد العسر تيسير  
 وكل امر له وقت وتدير

نظماً ترجمہ سی:

براز صبر ایت که بو عسرك صوکی البت بولور تيسير  
 اولور هر کار اچون عالمده بر وقت ايله بر تدبير

وللمهمين في حالاتنا نظر  
وفوق تدبيرنا لله تقدير

ترجمه سی :

اولو بدر اول خدا احوالزه شاهد و ناظر  
بزم تدبیر منز فوقنده در تقدیر بی تغییر



{ روضة الناظر ونزهة الخاطر } نام اثرک مصاحبت  
ومؤاخات ومصادقت ومصافات حقنده اولان  
{ فصل رابعندن }

واصحب اخا کرم تحظى بصحبته  
فالطبع مكتسب من كل مصحوب

دائما اصحاب کرم له مصاحبت ايله که صحبتندن متحظى  
ومستفيد اوله سک زیرا انسان هر حالى صحبت ایلدیکنندن  
اقتباس واکتساب ایدر .

والريح آخذة مما تمر به

نتنًا من الثمن أو طيبًا من الطيب

نصل که روزکارده کدران ایتدیکی یرلک کریمندن  
رایحه کریمه، طیب و لطیفندن رایحه طیبه اخدایلر.

وقارن اذا قارنت حراً فانما

یزین ویزری بالفقی قرنائہ

مقارنت ایده جک ایسه ک کریم الشیم اولانلره مقارن  
اول ! زیرا انسان قرینی اولدیغی آدملر سببیلر اعتبار  
وزینت بولور و یاخود مظهر نفرت و ذلت اولور .

اذا ما اخلل لا یکفیک خطباً

فوحشته والفته سواء

اگر دوست بیلدیگک آدم لزومی حالنده سکا معاونت  
ایلیه من ایسه انکله الفت و صحبت ایدیلوب ایدلماک  
مساویدر .

ومن یبغض صدیقک وهو یدعی

هواک فان صحبته جفاء

دوستنه بغض ایدن وسکا دوستلق ابراز ایلیمان  
آدمله مصاحبت سنک حقکده جفادر .

اذا المرء لم یختَر صدیقاً لنفسه

فکروه ما یلقی یكون جزاءه

اگر انسان کندوسی ایچون بر صدیق وفا شعار  
انتخاب واختیار ایتمز ایسه سیئات ومکروهاتدن تصادف  
ایدهجکی شیر هب بوحرکتک جزاسیدر .

یهوی الشاء مبرز ومقصر

حب الشاء طبعه الانسان

مفصل اولسون مختصر اولسون مدح وثنادن حظ  
ایدیلور زیرا حب مدح و ثنا مقتضای طبع انساندر .

{ ابن کمال مرحومک آثار منظومه سندن }

( حرف الراء )

دن

ای دل منبسط قتی کوله

خنده ضممنده کریه منضمدر

منقلبدر جهان بوقلمون

انبساطی غمیلہ مدغمدر

—

دنیا که کاربان حوادث قوناغیدر

میل ایتلی دکدر ارازل بتاغیدر

دنیا به نسبت ایلله هله سن اینان بوکا

قبرم حضور کوشه سی وحشت بوجاغیدر

—

قنوغک کندی رزقیدر یدوکی

آچیق طوت قپوکی برکون قپارلر

یدوکلک سکا قالور، صاقلادیغک

ندکلو بغریکه باصسک قپارلر

—


شریعت کیم سرای کبر یادر  
 حقیقت ملکیدر محکم بنادر  
 آنک برطاشنی هر کیم قویارسه  
 یرینه باشنی قویمق روادر

قلم صنع حقده سهو اولز  
 هب خطابین اولنلر احقدر  
 شول قدر وارکه مقتضای قدر  
 کاه مبرم کھی معلقدر

فچن الویره دولت بر کشیه  
 عدوسی داخی اکا عزت ایلر  
 خدا کوسترمسون یوز دوندیرسه  
 احببسی دخی هب نفرت ایلر

بنی ذم ایتمدن حسوده چه سود  
 کندینک زشت خویی ظاهر اولور  
 ذم اولندقجه نشر اولور هنرم  
 ازسهلر مسکی بویی ظاهر اولور

بحر معناده دل اولوب غواص  
 صدف اولمشدرر زبان سوزدر  
 کرم ایدر سردی نرم ایدر سختی  
 سحر و افسون دیدگری سوزدر



عرفی :

جهان بکشم و در دا که هیچ شهر و دیار  
 نیافتم که فروشتند بخت در بازار  
 کفن یاور و تابوت جامه نیلی کن  
 که روزگار طیب است و عافیت بیمار  
 زمجنیق فلک سنک فتنه میبارد  
 من ابلهانه کریم در آبکینه حصار

—

کذا :

رو بقفا کن بین عمر تلف کرده را  
 نابو روشن شود رو به عدم داشتن  
 مایه نازنده کی از کهر خویش گیر  
 تابکی این عزو ناز از اب و عم داشتن

—

سلمان فارا ینک قصیده موسندن منتخبدر:

ماچوموی توهمه حلقه بکوشت شده ایم  
 حلقه موی پریشان تو سر حلقه ماست  
 موبمو حال پریشانی من می گوید  
 موبموی سر زلفت که برین حال کواست  
 کاه در حل دقایق نظرت موی شکافت  
 کاه در کشف حقایق قلمت چهره کشاست  
 ❀❀

بی دل :

یارب این خالست یاجوش اطافتهای حسن  
 می نماید دانه سیب زرخدان شما

—  
 بونجه اول یقده ای سیل جنون کوردکی هیچ  
 ناپزیرای عمارت قلب ویرانم کبی

—  
 گذرگاه جهان طولو خطر در  
 آنکچون اولورز کریان ونالان  
 اگر جای مرور اولسیدی هموار  
 ندن آب روان ایدردی افغان



دل اولورینه دل سرینه واقف  
زبان ولب بورازه محرم اولمز

—

تکنمای کوشه زندان غم  
لاجرم ویرر بکا قدر و شرف  
قیمتی اولمزدی اینجونک اگر  
پرورش قیلماسه زندان صدف  
❦❦❦

ریاضی :

صاف دل سرکشته حال اولسه نوله ارباب عشق  
کندیسنه دوندورر جذب ایتدیکن کرداب عشق  
❦❦❦

روحی بغدادی :

یانسون شرر آتش غمله وجودمن  
اعدا کوزینی کورایده شاید که دودمن

—

ساغری :

آنک ایچون مزارم اوستنده  
بن واشجاری بویله وضع ایتدم

تا کورن صورمدن یله حالم  
که جهان ایچره نیلدم نیتدم

بر بوی سر و چشم بادامی  
شفتالیننه دویمدن کیتدم



### { لطائف النعمه فی اقسام الحکمه }

نام رساله دن

کیمیا ترقیات متوالیه سیله بو کون برحاله کلشدر که  
علوم و صنایع موجوده اره سنده آنک تحصیلنه احتیاج  
کوسترمیان همان هیچ بر فن یوقدر دینلسه خطا ایدلماش  
اولور .

محافظه حیات و صحتک سبب عالیه سی، امراض کونا  
کون بدنک دافع و ماحیه سی اولان علم جلیل طب از هر  
جهت کیمیا به مربوط بولنیور .

سعادت مدینه و ثروت مادیه و معنویه مزنی حاصل  
ایدن هر درلو صنایعک کالی کیمیا به توقف ایدیور .

صورته هیچ ایشه یرامز ظن اولنان نیجه موادک  
کیمیا سایه سنده کشف خصائص و منافع متنوعه سینه

موفقیت حاصل اولیور ؛ دوماندن زفت واسپرتو  
 استحصالی امکان دائرہ سنہ النہرق یاقیلان اودونک  
 دومانن بیلہ ضایع ایدیلیور ؛ باشمره، ارقه مره، ایامره  
 کیدیگمز هر شیئک وجود ویا انتظامی کیمیا سایه سنده،  
 اسباب ذوق وصفامزک استحضار واستکمالی ینہ کیمیا  
 سایه سنده اولدیغی محتاج ایضاح اولیان حقایقندن  
 کور ینور .

یدیگمز شکر کیمیا یاردمیلہ ویاقدیغمز موم کیمیا یاردمیلہ  
 خلاصہ اولجہ دیدیگمز کی همان هر شی کیمیا یاردمیلہ  
 یاپیلیور . اشته بوقدر نافع اولان علمک موجودی  
 اعصار معارف اسلامیہ زینت بخش اولان افخم علمادر ؛  
 جابر کوفیلر، ابوبکر رازیلر، ابن سینالر، ابو القاسملر کی  
 آفتاب کمالات علمیہ سی بوکون بیلہ رهنمای توفیق اولان  
 افاضل حکمدار .

وارسون ارباب اغراض ایستدیکنی سویله سون  
 تاریخ علوم بو حقیقتی تبیین ایدیور برقاچ حسد شعارک  
 تأویلات وتزویراتی شایان الثفات اولمز .  
 علم جلیل کیمیانک محسنات وایجادى حقنہ تفصیلات  
 کافیه ایستیانلر کیمیای طبی نام اثر بہترہ مراجعت ایلسونلر .  
 استاذ اطبای روم عزیز بک مرحوم اونالیف لطیفنک

مقدمه سنده ایضاحات لازمه ویر یور بوراجه تکراری  
اقتضا ایتمز .

استاذ حکمانک حکمت طبعیه اقسامی حفته کی  
سوزر یله خلاصه محصول تبعاعتمز اولان مطالعات بوراده  
نهایت بولدی اولیه ایسه حکمتک ایکنجی قسمی اولان  
حکمت ریاضیه بی نظر مطالعه الهه :

### حکمت ریاضیه

درت قسم اوایوب بری علم عدد ، بری علم هندسه ،  
بری علم هیئت ، بریده علم موسیقیدر .

### علم عدد

انواع عددک احوالی وهر نوعک خاصیتنی واعدادک  
بر برینه اولان نسبتلرینی و بر برندن تولدینی و سائرینی  
یلدیرر .

## علم هندسه

اوضاع خطوط واشكال سطوح ومجسماتك  
ومتفرعات وامثالنك حالندن بحث ايدر بونك اصولنى  
كتاب اوقليدس جامعدر .

## علم هيئت

اجرام عالمك اشكالنده كى احوالدىن و بعضسنك  
بعضى عننده كى اوضاعندن، يئلرنده كى ايساددىن،  
افلاك وكواكب ايجون اولان حركلاتدىن وسأرهدىن  
باحثدر بونى كتاب مجسطى جامعدر .

## علم موسيقى

نغمك واختلاف واتفاقنده كى بعض علمك احوالنى  
والحانك تأليفنى وبالبرهان آلت اتخاذى طريقنى وامثال  
ونظائرئى بيلديرر .

## فروع حكمت رياضيه

وصف و بيان اولئان حكمت رياضيه اقسامندن  
هر برينك فروعى اولوب رقلارله جمع وتفریق وجبر  
ومقابلہ علم عددك فروعندن وعلم مساحه، علم جر اثقال

علم اوزان، علم موازین، علم آلات جزئیّه، علم مناظر،  
علم مرایا، علم نقل المیاء هندسه فروغندن و علم زیجات،  
علم تقاویم هبئت فروغندن وارغنون کبی آلات عجیبه  
وغریبه استعمالی دخی موسیقی فروغندندر .

§

حکمت طبعیه ده استاذک افاداتندن صکره بعض  
مطالعات و معلومات بسط و علاوه ایدلدیکی کبی حکمت  
ریاضیه ده دخی مناسب معلومات و مطالعات سرد واتیانی  
عبث کورلما مکنده در :

قدمانک علم عدد تعبیر ایدلدیکی فنک مباحثندن بر قسمی  
زمانمرده حساب دینیلان علم شامل ایسه ده دیگر قسمی  
شامل اوله مرز ؛ زیر اقدمانک فروع علم عددن عدد  
ایتدکری جبر بوکون بر علم مخصوص اولوب حسابک  
فروغندن دکل فنون ریاضیه اقسامندندر .

برده ارباب معلوماته خفی دکلدرکه زمانمرده علم  
حساب دینیلان فن نزد غریونده (آرتماتیق) نامیله  
معروف اولوب بوايه لغات یونانیه دن اوله رق (عدد)  
دیمک اولان (آرتموس) ایله (علم) دیمک اولان (ماه)  
کله رندن مر کبدر ؛ بناء علیه الک طوغری ترجمه سی  
علم عدد دیمک اولور و قدمانک فن مجسّمه علم عدد

دیمتری اصلاً اسکی یونانلوردن مأخوذ اولمئندن وانلرجه  
(آرتمتیک) نامیله معروف بولمئندن ایلرو کلدیکی قویاً  
ظن اولنور . شو حاله نظراً ریاضیونمز علم رقم ویا حساب  
دیدکلی فنه قدماک قبول ایتش اولدیغی (علم عدد)  
ترکیبی اسم ونام وضع وتعیین ایتش اولسهلر ایدی کوزل  
یامش اولورلردی صانیرز .

قدما علم جراثقال، علم مرایا، علم اوزان، علم نقل  
المیاه کبی علومی هندسهیه فروع اتخاذ ایتشلر سده  
زمانزده بو علومک هندسه فروعئندن دکل حکمت  
طبیعیه مباحثندن اولدیغی وارسته ریب وکلندر .

مناسبت کلام ایجابیله کتاب اقلیدس حقنده دخی  
بعض معلومات ویرلم : ابن خلدونک بیانته کوره کتاب  
مذکور (کتاب الاصول والارکان) نامیله بنام اولوب  
فن هندسهده کی کتابلرک الک مفصل ومبسوطی بولندیغی  
کبی لسان عربیه ترجمه ایدیلان کتبک دخی برنجیسمیدر  
مترجم ابن خلدون دیرکه اشبو کتاب درت دفعه ترجمه  
ایدلش اولوب ایکی دفعه سی هارون ومأمون عصرلرنده  
حجاج بن یوسف بن مطر الکوفینک و اوچنجیسی متوکل  
علی الله عصری حکما واطباسمندن حنین بن اسحاقک

دردنجیسی دخی خلیفه عباس معتضد عصری حکما سندن  
ثابت الحرانی الصابی نام ذاتک اثر یدر .

کتاب اقلیدس اون بش مقالہ ہی شامل اولوب  
دردی سطوح ، بری مقادیر متناسبه حقنہ ، بری  
سطوحک بربرینہ نسبتلری بیانہ ، اوچی عدده  
دار ، بری منطقات ایله جزرله و بشی دخی مجسماتہ  
متدار بولندیغی و بوکتاب دفعاتله تلخیص و اختصار  
ایدیلہرک ابن سینا طرفندن بالتلخیص شفافک ریاضیات  
مباحثندن برجزؤ عدایدلیکی و ابن صلت جانبندن دخی  
بالاختصار ( کتاب اقتصار ) نامندہ بر اثر وجودہ کتورلمش  
اولدیغی ابن خلدونک جملہ افاداتنددر .

مترجم ابن خلدون آنف الیمان مجموعه مرغوبه  
علوم هندسیه نك مؤلفی اولان اقلیدس حقنہ معلومات  
اولہرق دیرکہ « اقلیدس یونان ملتندن وصور بلده سی  
اھالیسندن اولوب ولادتی میلاد حضرت عیسا دن  
اوچیوز سنہ اولدر شامده ساکن صاحب جو مطریا  
دیمکله معروف و قدما ی حکما دن وزمانندہ مشہور  
برفیلسوف اولوب اندن اول یونانیونک بویله کافہ اصول  
هندسہ ہی جامع برکتابلری یوق ایدی . اندن صکرہ  
کلانلر دخی آنک کتابی کاه شرح و توضیح و کاه تلخیص



و تنقیح و ادیلرنده طولاشدیلر شمعدی اوروپاده طرق  
 براهین هندسیه مجدد و تفرعاتی متوسع و متعدد اولمش  
 و جبرک هندسیه تطبیقیله قدماتک کشف ایده مدیکی  
 نیجه شیر بولمش ایسه ده هندسه اصلیه ینه اصول  
 اقلیدس اوزره اولغله حالا مکاتب ریاضیه مرقومک وضع  
 ایندیکی اساس اوزره در سبحان العلیم القدیر . »

علم هیئته کلنجه حکمت طبیعیه اقسامندن عدایدلمش  
 اولان علم نجومندن بحث اولندیغی صروده بیان ایدلدیکی  
 اوزره بونکله استخراجات خادمی بولنان علم نجوم بیننده  
 فرق کلی اولدیغی درکاردر .

علم هیئت وجود بولدیغی زماندنبری موضوع بحث  
 و منظره اولمش درت مذهب ظهور ایلش ایسه ده ایکسی  
 رواج بوله میوب فقط ایکسی مرعی و مروج اولمشدر  
 یونلرکری سکرنجی عصره قدر مقبول بولنان بطلمیوس  
 مذهبدیر که آده مرکز عالم کره ارض اتخاذ ایدلمشدر  
 ابن سینا دخی مسلککنجه بواساسه تابع اولدیغی فن  
 مذکور کتایب مجسطینک احتوا ایلدیکنی بیان ایله  
 اکلاتمقده در چونکه کتایب مذکور مشار الیه بطلمیوسه  
 منسوبدر .

بو بطلمیوس - اسکندر یونانیدن صکره وجود بولان  
 حکومتلردن اولوب اسکندریه ده فرمان فرما اولان  
 و بطلمیوس نامنی آلان - ملوک یونانیه دن دکلدر؛ مصرده  
 تولد ایلش وزماننه قدر متشتت و غیر منتظم اولان علم  
 هیئتہ دائر آثاری جمع و تدقیق و اصول جدیدہ ایجاد ایدرک  
 میلاددن یوز اوتوز سنہ اول ذکر اولنسان مجسطی بی  
 تألیف و تبویب ایتش اولان بطلمیوس قلو زیدر. اون اوچ  
 مقالہ بی شامل بولنسان بو کتابی حکمای اسلامیه دن ابن  
 سینا، ابن رشد، ابن سمح، ابن صلت کی افخم تلخیص  
 ایلش لردر .

مترجم ابن خلدون طرفندن بیان ایدلیدیکی اوزره  
 « بعض محققین دیمشدرکه هیچ بر فنده جمیع مسائل فنی  
 جمع ایتش بر کتاب یوقدر الا بوصورته اوچ کتاب  
 تألیف اولنشدر اولکیسی علم منطقده کتاب ارسطو،  
 ایکنجیسی علم هیئتده کتاب مجسطی، اوچنجیسی علم  
 نحو ده کتاب سیبویه در . »

ذکر اولنسان ایکی مذهب مشهورک برده  
 ( قوپرینیق ) مذهبیدر . آلان مرعی اولان  
 قوپرینیق اصولی سایه سمنده درکه فن هیئت حقیقه محیر  
 عقول دینه جک قدر ترقی ایلش و دائماً ترقیدن غیر خالی

بولنش اولديغى معلومدر . قوپر ينيقك اصولنجه مرکز  
عالم شمسدر .

عدم رواجنى عرض ايلديكمز ديكر ايكي مذهبدن  
برى اسكى مصر ليلرك ، بریده اعصار اخيره رجالنندن  
( تيخو براهه ) نامنده بر دانيمارقه ايلکندر . اسكى مصر -  
ليلرك اصولنجه شمس مرکز سيارات اولوب سياره ليله  
برابر اطراف ارضده دائر در . بومذهبك نفوذ و رواجى  
رهابين مصر ك دوام نفوذ و مكنترليله دائم اولمش ، آنك  
زواليله زوال بولمش و بطليموسك ايجاد اصول مبسوطه  
ايلسندن طولايى بىستون حكمدن قالمشدر . تيخو براهه  
ايسه شمسى عطارد وزهره مرکز عدد ايدرك قر ،  
مريخ ، مشتري و سائر سيارات ايله برابر اطراف ارضده  
دائر عدد ايدوب مصر ليلر اصوليله بطليموس اصولنك  
اورته سنى بولمغه موفق اولديغنى ظن ايتشدر انجق مدققين  
راصدينك تدقيق و بيان ايلدكلرينه كوره خطادن خطايه  
دوشهرك مر دود اولمشدر شورا سنيده عرض ايده لمكه  
تاريخ علومه واقف اولانلره خفي اولديغى اوزره شمسك  
مرکز عالم بولنديغى كشفنده قوپر ينيق برنجيلاك شرفنى  
تماماً حائز اوله مامق ضرورى كور ينيور ؛ چونكه قدامى

حکمدان فیثاغورث ارضک محوری اوزرنده دونر واطراف  
شمسده سیر و دور ایدر اولدیغنی دهامکتبده ایکن کشف  
و تحقیق ایتش و کرچه مذهب ورأی مصیب ایسهده  
زمانده قبول ایدلما مشدر . بوبلده مسلمانلرک دخی همتی  
مصدق اولوب کرة ارضک حرکت محوریه سی اهل  
اسلامجه معلوم اولدیغنی امام ابهرینک (متوسطه) سندن  
ابن اقلک (مبسوطه) سندن و ناصرالدین طوسینک  
(تذکره) سندن، علی قوشجینک (فتحیه) سندن نقلاً  
نتایج الفنون نام اثرده مندرج بعض افادات تصریح  
ایلمکده در؛ حتی سعادتلو احمد مدحت افتدی  
حضرتلری طغارجنک سکرنجی نسخه سنده (عثمانلی  
کتب عتیقه سنی قارشدیردقجه فرنکره کولمامک المزدن  
کلیور) عنوانی التنده بر مقاله یازهرق بونده ارضک  
حرکتی کشف شان و شرفی نه بودعوانک طرفدار مجد  
و ثابتی اولان (غالبه) یه، نهده انک مقتداسی بولسان  
قورینیکه انحصار ایده میه جکنی ارأه و بیان ایلمشدر .

موسیقینک حال قدیمیه شمدیکی حالی یئننده فرق  
کلی موجود اولوب ترقیاتی قابل انکار دکلسهده آلات  
موسیقیه جدیده آلات موسیقیه عتیقه نک نفوذ و مرعیتی

ذره‌جه تنقیص واخلال ایدہ مامش اولسنہ نظراً اختراع آلات موسیقیہ خصوصندہ مقدمینہ تفوق ایدیلہ مدیکی فکرندہ بولنلق خطا عد اولئر صانیرز . موسیقینک قدما نزدندہ کی اہمیتی ایسہ بوکونکی اہمیتلرندن فوق العادہ زیادہ اولوب حتی تأثیرات روحانیہ سنی ادعادہ بلسکہ لزومندن زیادہ ایلو کیدلش اولدیغی محققدر وحتی محاضراتک یدنجی جزؤندہ کی مقتطفات منشورہ میانندہ مندرج اولدیغی اوزرہ شیخ الزیئس ابن سینا (صوت خوش وصدای شہی ایلہ متلذذ اولمیان فاسد المزاج محتاج العلاجدر) دیمکلہ موسیقینک اہمیتی ودرجہ تأثیرات مخصوصہ سنی ایضاح ایلش وپک چوقلر بوبولده کی افادات وآرای مدققانہ لیلہ موسیقینک اہمیت وتأثیراتی ابانہ واصرار ایتشلردر .

حکمت ریاضیہ ایچوندہ بوقدرلہ اکتفا ایدرک بتوفیق اللہ تعالیٰ حکمت الہیہ دن بحثہ ابتدا ایدہلم .

( مابعدی وار )



## مدنیت اسلامیہ

دن

تمدن وجه لایق اوزره انتظام اموری مؤدی اجتماع  
 دیمک اولنجه هیئت فاضلهیه هیئت متمدنه عنوانی ویرمک  
 ممکن اولور چونکه بیان ایدلمش اولدیغی اوزره هیئت  
 فاضلهنک اساسی کسب سعادت، اجرای خیرات، دفع  
 شرور قواعدینه مؤسس ومبتنی اوله رق افراد واعضاسنک  
 احوال وحرکات ومعاملاتی نظام جمعیتک دوامنی  
 ومصالح اعضای جمعیتک حسن جریاننی موجب صورته  
 بولنه جغی و ذاتاً وجه لایق اوزره انتظام اموری مؤدی  
 اولق دخی بوصورتله حیز حصوله وصول بوله بیله جکی  
 آشکاردر بناء علیه هیئت فاضلهیه هیئت متمدنه وهیئت  
 غیر فاضلهیه هیئت غیر متمدنه ناملری ویرمک نفس الامر  
 بلکه دهها زیاده توافق ایده جکی وارسته قید تذکاردر .  
 هیئت بشریه لک فضل وتمدن وصفلریله توصیفلری  
 ایسه آنلری تشکیل ایدن ارکان واعضایه کوره در  
 معلومدر که برهیئتی تشکیل ایدن عالهلر وعائلهلری تشکیل  
 ایدن ارکان واعضا دخی افراد واشخاصدر شو حالد

بر هیئتک وصف تمدنه لیاقتی آنی تشکیل ایدن عائله لک  
 فضل و تمدنه و عائله لک بو وصف لره موصوفیتی دخی  
 کندولرینی وجوده کتورن افراد و اشخاصک فضیلتند  
 ومدنی اولملرینه توقف ایدر دیمک که بر هیئتک فاضله  
 و یا متمدنه اولسی ایچون اک اول نظر تریسه و اصلاح  
 اوکنه آله حق عضو ورکنی آنی تشکیل ایدن عائله لک  
 اعضا وارکانی اولان افراد و اشخاصدر شخصک فضیلتند  
 ومدنی اولسی ده مکارم اخلاق ایله تخلقنه وابسته در  
 بر شئله تخلق و اتصاف اکا علم و وقوفه توقف ایده جکندن  
 مکارم اخلاق ایله تخلقن اول اکا علم و وقوف ایجاب  
 ایدر بر کره بو حصول بولور و اول مکارمله اتصاف سعادتته  
 نائل اولنور ایسه مقصود حاصل اولش یعنی هیئت  
 فاضله و متمدنهی وجوده کتوره بیلجک عائله لک تشکیل  
 سهولت بولش اولور .

معلوم اولی الالباب اولدیغی اوزره ذکر اولنان مکارم

اخلاق

{ ادنی ربی فاحسن تأدی }

حکم جلیلنجه تربیه الهیه ایله ممتاز و سرافراز نبی

ذیشان علیہ الصلوٰۃ والسلام افندمن حضرتلرینک  
تنظیم واصلاح واتمام واکمال بیورمش اولدقلری  
مستحسنات اخلاق اولدیغی مطلقدر نصل مطلق  
اولسونکه غنا وفقر وعظمت وذلتی استحقار ایتک یعنی  
نه برینه نائلیتله کردنکش نخوت ونه دیگرینه دوشمکه  
سر بزمن یأس ومسکنت اولماق او اخلاق اسلامیه  
قواعدنن؛ علو همت، آلام واهواله صبر ومقاومت،  
حلم، سکون، تواضع، شہامت، حسنات وخیراته سعی  
وغیرت، احوال مخوفیه قارشو التزام متانت ونجبت،  
ممنوعات ومحترماندن کندونی محافظه ایله تہمتدن احتراز  
ومجانبت اخلاق اسلامیه ارکانندرن .

شریعت مطهره مجدیہنک متم فضائل اخلاق  
اولدیغی نصل مسلم ومصدق اولسونکه ارتکاب قبیاحدن  
حیا وحجاب، هوا وهوسه متابعدن اجتناب، شہوتک  
هیچانی حالنده اختیار سکونت، غیره ظلم واهانت ایتہرک  
اکتساب اموال وتدارک اسباب معیشت، اقتصاد وتصرفه  
رعایت، استحصال مطالب ومقاصدده متأنیانه غیرت،  
رفق وملایمت، کسب فضائله محبت هب او اخلاق اسلامیه  
ایجاباتندن؛ مصالح ومعاشک مدار حصولی اولان اموری  
حسن تصور واجرا، کرم وسخا، صداقت وتبذیر معاش



ایچون تعاونده اتفاق آرا، یار و غمکسارلغه دوام و اعتنا،  
محافظه مودت اقران و محبت امثال و سائلنی استکمال،  
مکافات، معاملاتده عدل و حقانیت دقت، اموال و مملک  
تدن متعلقات و اقاربنی وایه دار ایتک، اصلاح ذات البین  
کبی حسن احوال هپ اخلاق اسلامیه مقتضیاتدن در.

اشته انسان مدنی بو فضائل جلیله الیه تزیین ذات  
وصفات ایتش اولاندر بو مکارمله مکرم اولان دخی  
حبل متین شریعت محمدیه حقیله تمسک و توسل شرفنی  
بولاندر.

ایمدی بو مثللو افرادک وجوده کتوردیکی عائله لرده  
قواعد صلاح و انتظامات و لوازم امتزاج و سعادات  
محافظه و ادامه ایدلک اصولی دخی ییلنهرک بونده قصور  
ایدلر ایسه فضل و تمدن اوصافنه بحق سزا عائله لر  
بو عائله لرک اجتماعیه لده بو اوصافه حقیله الیق هیئت  
و جمعیتلر ترکب و تشکل ایتش اولور شایان دقتدرکه  
برهیئتک وصف تمدن و فضیلتیه هر وقت لایق اولسی  
ارکانی اولان عائله لر ییننده کی روابط و معاملاتک انتظام  
و انشیادینه متوقف اولدیغنی کبی بوده عائله لرحه صلاح  
و نظامک تأیدینه و خلادن محفوظیتنه و شوایسه افراد

واشخاصك متصف و متخلق اولديغى فضائل و مكارمى  
انخلال و تناقصدن على الدوام حفظ و صيانتنه و سيأت  
و مفاسدن هر زمان مجانبته منوطدر .

اول سيأت و مفاسد كه مزاج و ملاهى ايله ائتلاف،  
حال و كفتارده قيافت و رقتارده اناثه مشابعت رذيله سييله  
اتصاف، حيرت، جهالت، عجب نفس، كبر و نخوت،  
افتخار، غدر و خيانت، جفا و اذيت، ذلت و سفاهت،  
اعالى و اعظمه عدم حرمت و رعايت، تپرورى و بطائت،  
فقدان صبر، خوف، حرص، حسد، طمع، كذب،  
غرض و نفسانيت، تلون و تغير مزاج، عهده عدم وفا،  
هم نوعنه معاونتده اهمال و تراخى، الفت ارازل، امتناع  
فضائل كې تعداد و تفصيلي صحيفه ل طولديره جق بيك  
درلو سوء احوال دن عبارت اولوب جله سى اتم و اكمل  
شرايع و اقدس مقدسات اديان اولان دين ميين احديتك  
منع ورد ايلديكى، هر مسلماني اتصافدن زجر ايله محفوظ  
قلديغى فنا لقلدر .

انسان كه مقتضاي خلقتى اولان حال مدنيت و فضيلتده  
بولمغى آرزو ايدر . بو مكارم ايله مكرم و مشرف اولملى  
انسان كه بو صورتله مكرم و مشرف اولمغى آرزو ايدر .

احکام شریعت اسلامیہ پر حقیقہ، تمامیلہ انقیاد و اطاعتہ  
چالیشملی در .

اللهم اجعلنا من المنقادين والمطيعين

شو بر قاج سوزله نمایان اولیور که جمعیت فاضله قواعد  
وارکانتی، قوانین و نظاماتی احکام شریعت اسلامیہ  
توفیق و تطبیق ایدرک ایضاح و بیان ایچون اولاً مکارم  
اخلاقدن بحث ایله هر خلق مستحسنی تعریف و اتیان  
و بو بابده کی اوامر دینیہ یی تذکار و تبیان و سیئات اخلاقی تعداد  
و تصریح ایله بونلرک ممنوعیت و مردودیتی حقننده کی  
نواهی دینیہ یی ارأه و بیان مقتضیدر و انتظام امور  
عائله دن بعده بحث ایدوب قواعد و قوانین جمعیتی نهایتده  
درمیان لازمدر بناء علیه بومباحثی احتوا ایدن بر اثرک  
اوج فصلدن عبارت اولسی طبیعیدر .

مجموعه مزده بولندیرلقد اولان ( لطائف النعمه  
فی اقسام الحکمه ) نام اثری مطالعه ایدنلره معلوم و نزد  
معارفندانده معروف و مجزوم اولدیغی اوزره مذکور اوج  
فصلده بسط اولنه یله جک مباحث حکمت عملیه علم جلیلنک  
حاوی اولدیغی معلومات و حقایقدر .

اول حکمت عملیه علم جلیلی که انسانک غایت ایجادى  
اولان اشرفیت و نافذیتک حصول و تحقیق اکا توقف ایدر  
وانسان بواشرفیت و نافذیت سعادت عظماسنک طریق  
تحصیلی رسوم و اصولی اول حکمت عملیه ایله اوکرنه بیلور .  
اول حکمت عملیه علم جمیلی که حکما اکا طب روحانی  
دیمشلردر ؛ چونکه حفظ صحت بدن علمنک منزله سنده  
کورمشلردر .

حفظ صحت بدن علمنک قوانینی انسانه تعرض  
امراضی مانع اولدیغی وانسانده کی صحت وعافیتک  
محافظی بولندیغی کبی حکمت عملیه علمیده نفس کامله نك  
انخلال اعتدال خلقتیسنی موجب اوله جق سیأت  
وردیاتی منع ایدر ، نفسک کالنه خادم بولنان او اعتدال  
خلقی بی افراط و تفریط کبی اضدادینه قلب و تحولدن  
محافظه ایلر .

حکمت عملیه علمنه حکما طب روحانی دیمشلردر  
چونکه انی امراض ابدانی دافع علاج منزله سنده  
بولمشلردر .

امراض ابدانیه تحت تغلب وجفاسنه الیدیغی  
وجودلری یاهمان محو وافتنا ویا مدت مدیده اسیر آلام

واوجاع کونا کون ایدرک زار وزبون ایلدکن صکره  
ینه اوقعر فنایه ایصال والقا ایدر مکرکه دفعنه علاج  
عاجل وموافقله همت اولنه ویاورئ توفیق ربانی ایله  
اعاده عافیه موفقیت حصول بوله . ایشته مایکات  
ردیه یعنی سیأت اخلاق دخی تمامیه امراض ابدان  
کییدر بلکه اوامراضک الک شدید ومضر اولانلرینه  
مشابه ومائلدر زیرا هانکی آدمه سرایت ایتسه هانکی  
آدمی تحت حکمنه الهه دنیاده ، آخرته ذلیل وحقیر ایلر .  
عالم نظرنده مستهجن وپر تقصیر ایدر امراضک اسیرینی  
آندیغی زندانده اقامت موقدر اما سوء خلقک زبوننی  
دوشوردیکی حسیض ذلت وسفالت ، قعر عمیق عیب  
ورزالتده مایوس ومحروم قالمق دائمی وابیدر .

اول حکمت عملیه که علومک انفع واهمی ، اشرف  
ومجتمی اولدیغی محققدر زیرا بر علمک شرفی  
ویاموضوعنک نباهتی یاغایت ومنفعتنک جلالتی ،  
یا برهان وحجتنک وثاقتی ایله اولور بو علم ایسه ذکر  
اولنان اوج شرفی تمامیه حائز وشو حائزیتله علومک  
الک نافعی ، الک مهمی ، الک اشرفی ، الک محتمی اولق مرتبه سنده  
بولتمقله ممتاز وفائزدر . حکمت عملیه نک نباهت موضوعی

مسلم ارباب معرفتدر چونکه موضوع مذکور افعال جلیله  
و محموده و قبیحه و مذمومه کنند پسندن صادر اولان نفس  
ناطقه انسانیه در نفس ناطقه انسانیه اینه اشرف  
و محترمدر .

حکمت عملیه نك جلالت غایت و منفعتی مصدق  
عارفین حکمتدر چونکه غایتی جنین جوهر شریفی  
اکمال و زیادت نفعی دخی نفس انسانیه بی بهیمیت و سباعیت  
و بلکه دها ادنی مرتبه دهه ایکن اعلی منزله به ایصال  
ایدر .

حکمت عملیه نك وثاقت برهان و حجتی مجرب و اقفین  
حقیقتدر چونکه جله حجج و براهینی دلائل قاطعه  
شرعیه، تجارب و افعاله حکمیه ایله مشید و مؤیددر .

ایشته بز (مدنیت اسلامیه) عنوانی التمهده او اشرف  
علوم اولان (حکمت عملیه) مباحثی بسط و بیان  
ایده جکز معروضاتمز نور شریعت مطهره ایله تنویر عیون  
ظاهره و باطنه ایلش اولان محققین حکمای اسلامیه،  
مدققین فضلائی شرعیه آثار مرغوبه سندن اقتباس  
و اقتطاف اولنه جق و بناء علیه مسروداتمز او نور اعظم  
شریعت محمدیه دن تنور شریفه متحیر و فائز بولنه جقدر .  
حکمت عملیه مباحثی احتوا ایده جك اولان شور رساله

برمقدمه ايله ابوابه منقسم اوج فصل و برده تته دن  
تركب ايدجك و محتوى اوله جنى مباحث هپ انسانه  
تعلق ايلديكندن مقدمه ده انساندن بحث ايديله جك  
و برنجى فصل ايسه (مكارم اخلاق) دن باحث  
اوله جقدر فصل اولك تضرى ايدجكي مباحث  
حكمت عليه ده علم اخلاق عنوانى التنده اولوب علم  
تهذيب، علم شريعت ككى دها بشقه نامرله دخی  
مسمى در .

علم اخلاقه علم شريعت ديلمى بك طوغريد  
نصل طوغرى اولسونكه علم اخلاقده كى هر قانون،  
هر قاعده، هر تنبيه، هر توصيه البته احكام متينه  
شرعيه ايله مثبت و مشيد و مستدل و مؤيددر ايشته  
بو فصل بر آدمى دنيا ده، آخرته محترم قيله جق محاسن  
و مكارم اخلاقى تفصيلاً بيان و تصریح و مسرودات  
و مبسوطاتك ارادات سبحانيه و اوامر محمديه مربوط  
و مستند بولنديغنى و انرله نصل تأيد و تشيد قنديغنى  
ايمان و توضيح ايدجك و كذلك دنيوى، اخروى  
خسران حال و مالى موجب اولان قبايح و سيأت و معايب  
وردياتى و بوياده نصوص جليله و احاديث عليه مستند  
تحذيرات و مذماتى افاده و ارايه ايليه جك و شوصورتله

برنجی بی اکتساب ، ایکنجیسندن اجتناب اسباب  
ووسائلی یلدره جکدر . بناء علیه فصل مجوٹ عنه  
بعض تبصره و خاطرہ لی دخی محتوی اولہ جق ایکی  
بابی مشتمل اولق لازم کلمدر . تفصیل سابق ایله نمایان  
اولدی که ذکر اولنان ایکی بابک برنجیسی ( کریم الخلق )  
برانسان کاملک احوال حسنه و حرکات محتمه سی فصل  
اوله ییله جکنی تعلیم و مزیات مسلمہ سنی تفہیم ، ایکنجیسیده  
( لئیم الخلق ) برسفیلاک حال فلاکت اشمالی تصویر ایله  
سیأتدن مجانبت وسائل واسبابی استکمال و تئیم ایده جکدر  
ایکنجی فصل ( عائله ) دن بحث ایده جکدر ؛ عائله نک  
اسباب و صورت تشکیلیله زمان ازدواج و انتخاب زوج  
و زوجه کبی خصوصاته متعلق مباحثی برنجی باب  
و عائله نک تشککندن یعنی ازدواجک وقوعندن صکره  
اولان حسن الفت و امتزاج ، تطلیق ، تربیه اولاد ،  
تدارک اسباب معیشت کبی خصوصاتی دخی ایکنجی  
باب محتوی اوله جق و بوباب ثانی ایکی قسم اوزرینه  
بالترتیب برنجیسنده عائله نک احوال داخلیه سی نظر  
مطالعہ دن کچوربله جکی کبی ایکنجیسنده دخی احوال  
خارجیه سی موضوع بحث ایدیلوب قازانق ، صرف



ایتمک ایشلرینه عائد مطالعات و مقتضیات بالطبع قسم  
 ثانیده بولندیر یله جقدر او پنجی فصله کانجه بونده  
 هیئت مدینه نك اصول منتظمه وقواعد ساله و نافعہ سی  
 بسط اولنوب بونلرک شریعت اسلامیہ جانبندن تشدید  
 و تأیید ایدلدیکی ایضاح و هیئت غیر متمدنه نك اصول  
 مشوشه وقواعد فاسده و مضره سی بیان اولنه رق بونلرک  
 شریعتده نه درجه لرده مردود و منفور بولندیغی اصراح  
 ایدیله جکدر شو حالده فصل ثالث دخی ایکی بابہ  
 انقسام ایتمک و برنجیسی هیئت مدینه یه ، ایکنجیسی  
 هیئت غیر متمدنه ایلہ اقسامنه دأر بولنق لازم کلمشدر .  
 خاتمه ده ایسه احوال امه عطف نظر دقت و آلایش  
 مدینتله عرض انواع مفخرت ایدن اقوامک مرئیت فساد  
 و ضلالتنی تسهیل ایتمک و سائلنک استکمالنه غیرت  
 اولنه جقدر .

( هو المعین والمستعان )

## محاضرات

مقتطفات

نومرو ۲۱، ۲۲، ۲۳، ۲۴ برنجی جلد صفر الحیر

### مقامه شکران

معرفت اوپله بر نور جلیل ربانیدرکه پرتو بخش  
اولدیغی اقالیم و بلدانی ازاده ظلام ظلم و نادانی ایدر .

معرفت اوپله بر اصف جیل سبحانیدرکه شامل  
اولدیغی اقطار و بیابانی رشک آور ریاض جنان اوله جق  
درجده نائل عمران و آبادانی ایلر .

معرفت ماوپله بر غذاء مکنت بخشای ارواحدرکه  
احسان بیورلدیغی جان ناتوانی فیض مقدرینه مستعد  
وسزا قیلهرق عارج معارج سعد ونجاح ایدر .

معرفت اوپله بر قوت قوت افزای اشباحدرکه رزق  
مصون الفسقی اولدیغی هر وجود زبون و بی امائی فوز  
مقررینه لایق و احراقیلهرق واصل اعلای مدارج فیض  
و صلاح ایدر .

حق و باطل، صحیح و عاطل یننی فارق و فاصل  
معرفت؛ انواع فضائل و فواضلی جامع و حامل ینه  
معرفتدر .

انسانی دنیوی اقبال و راحتک درجهٔ عال العالنه  
موصول معرفت؛ بنی بشرک - اخروی اجلال و سعادتک  
کالنه نیل الیه - تشریفنی کافل ینه معرفتدر .

ایشته محسناتندن اک کوچک بر جزوئی شو صورتله  
ارائه و بیانندن عاجز قالدیغمن معرفتک منافع و محسناتنی،  
فوائد بیغایاتنی حقیقه، تمامیه، تفرعایله مدرک و عالم اولان  
شهنشاه معارف پناه و خلیفهٔ حقایق آگاه، حامی دین  
مبین، حافظ مسلمین، ولی نعمتمن داد کسترامم، ظل لله  
فی العالم، السلطان ابن السلطان السلطان المغازی

ملک الوری عنی المعارف والندی

تاج العلی عبد الحمید الغازی

ابدالله تعالی دولته واید مدی الدهور شوکتیه  
بالعز والنصر، آمین.

افندمن حضر تلیرنیک عید اکبر عثمانیان اولان یوم جلوس  
میمت مأنوس خلافت پناهیلرندن برو ابدال بیور مقده  
اولدقلری هممات لائحی و عنایات بی انتهانک قسم  
اعظمی هر نقطهٔ ممالک محروسهٔ المسالکیرنیک نورمعا-  
رفله مزین اولسنه تعلق ایتش، هر جهته مکتبیلر، مدرسه-

ر، دارالعلوم لکھنؤ کتابخانہ کی تاسیس و تشکیلی امر ندر جملہ میں  
احیا ایدر موفقیتلر حصول بولشدر .

پادشاہمز افندمن حضرتلرینک لطف و عنایتی سایہ-  
سندہ درکہ اولاد وطن دھا کوچوچک یاشرندہ بلبل کبی  
قرائت قرآن، از زمان ایچندہ تدارک دستمایہ علم و عرفان  
ایدرک انالرینی، ببالارینی، وطنداشالرینی، اشکریز فخر  
وامتنان ایلور و شو حال سعادت اشتمالی کورن هر  
صاحب صدق واستقامت کمال تضرعلا سجدہ گاہ وحدتہ  
رومال اولہرق وجیبہ عبودیتی ادایہ صرف مقدرت  
ایدیور .

پادشاہمز افندمن حضرتلرینک کرم وعاطفتی سایہ-  
سندہ درکہ ملکہ هر طرفنہ اشعہ معارف پرتو افشان  
اولدقجہ، تبعہ وزیر دستان صداقت نشان زلال احسان  
ایلہ حیات تازہ بولدقجہ انتظام و عمران فراوان اولہرق  
بویلہ بر عادل، فاضل، کامل، حامی بی معادلہ نائل اولان  
بختیار عثمانیلر کلزار نشین امن وآمان اولورلر .

پادشاہمز افندمن حضرتلرینک سایہ هنر و معرفتندہ  
درکہ بر طرفدن مکتبلر اولاد وطنی تربیہ ایتدیکی کبی  
بر طرفدن دہ کتب و رسائل افکار عمومیہ میں اصلاح

ومزيات فضائل وعرفاني، منافع سعي واهتمامي ايضاح  
واصراح ايديور .

ايسته پادشاهمن افندمن حضرتلرينك سايه احسان  
ومعدلتنده دركه بزم كبي صدق وغيرتله اتصافي جانه منت  
ومدار مفخرت بيلان پروردكان عنايت و(محاضراتي) نشره  
صرف مقدرت ايله فضائل اسلاميه بي افاضل اسلاميه نك  
اعلان اثارمر غوبه سيله ارئه و بيانه دامن درميان اوليور،  
بو كتابك جلد اولني اكمل ايدرك جلد ثاني سني نشره شتاب  
ايله شرف بوليور .

(محاضراتك) نشرنده نصل دوام اولنسون كه سلطان  
عالي شانك خير و حسناتي، الطاف و عناياتني تزديد و توسيعه  
كيجه كوندوز سعي و اهتمام بيور مقده اولان مظهر سر  
(اشراف امتي حلة القرآن) ناظر دار السعادة الشريفه  
دولتو عنايتلو بهرام اغا حضرتلرينك نظر اكسير اثر  
رغبت و مطالعه لرينه نيل ايله كسب مزيت ايديور .

بك چوق ذوات عظام و مشتركين كرامك تشويقات  
و ترغيباتنه و باخصوص معارف نظارت جليله سي هيئتتك  
تسهيلاتنه نائل اوليور .

شو الطاف و همتادن طولاي حقيله عرض شكراندن  
عجزمن اشكار و بعناية المستعان نشرده دوام ايدرك

ایفای فریضهٔ عبودیتہ اقدام ایلہ بکام اولمقلغمز لزومی  
بدیدارد .

ایشته بوارزو وخواهش الجاسیلدرکه محاضراتی  
دها توسیع ایلہ قریباً جلد ثانیسنی نشرہ باشلایه جغز یعنی  
التمش درت صحیفه لک بر نسخہ یی هر آی نشر ایدرک بر  
سنه ده جلد اولک ایکی مثلی بر جلد ثانی وجوده کتور-  
مکه چالاشه جغز .

شو موفقیتیز ایچون اولا جناب حقدن استعانه ایدر  
ثانیاً مشوقین عظام و مشترکین کراممک دوام همت معارف  
شناسیلرینه عرض انتظار ایلرز .



﴿ اسرار نورانیۂ قرآنیۂ ﴾ ترجمه سندن مابعد

« دردنجی مبحث »

فحم حجرینک ارضده مدت مدیده بولمان نباتاتک  
تحلل جزؤ یسی نتیجه سی اولدیفنی بیان ایلدک . علمای  
فن بورأیده متحد ومتفق درلر . فحم حجری معادننده

نباتات مذکوره بقایایسی کثیراً مشهود اولوب بونلرک جنوع واوراقیله اراضی فحمیه تمیز و تفریق ایدیلور و بوفحمک طبقاتنده اشجار کیره جنوعی دخی مراراً بولنور .

ذکر اولسان یوک اغاجلر جنوعنک فحم حجری میاننده کورنسی ایکی وجهه محمول اولق لازم کلوب بونلرک بری اشبو اغاجلرک اوزاقدن کلهرک اندفان ایلمش اولملریدر یعنی نباتات مذکوره بحار وانهارک سطحنده یوزر اولدقلری حالده کلمشالر، صکره اماکن مختلفهده توقف ایدرک آدن صکره دخی اراضی یه قارشمشالردر؛ وجه ثانی ایسه اشجارک نابت اولدیغی محله تحلل ایدرک حال فحمیتی بولملری اولوب یوقسه وساطت انهار و بحار ایله بشقه محلدن کلمش بولملری دکلدن .

مقدما دخی سویلمش اولدیغمز اوزره وجه اول بعید الاحتمالدر چونکه بولدیغمز قالینلقده کتله فحمی وجوده کتوره جک قدر عظیم الثخن اغاجلرک سطوح بحار وانهارده یوزرک کله بیلیمی مستبعددر اما شق ثانی عقله قریبدر زیرا بونک ایچون زمان میددن بشقه شیه احتیاج یوقدر یعنی کندیسنندن فحم حجری تکنون ایدن مواد عضویهک اولوجهله تراکی ایچون یالکز

زمانه لزوم واردر. برده اراضی فحمیه طبقاتنک  
توازیسی واجزای دقیقه سنک انطباعاتدن حفظی  
دلالت ایدرکه طبقات مذکوره هده تام وسکون کامل  
ایله تگون ایشدر واشته بوصورتلده استنتاج  
اولنورکه فحم حجری اماکننده یعنی نابت اولدیغی محله  
تحلل ایتش نباتاتدن متحصدر.

ایمدی معلوم اولسونکه فحم حجری مدتنده قشره  
ارضیه دن انجق برغلاف رقیق مرن تگون ایدوب  
غلاف مذکور کتله سائله اسفله اوزرینه مرکز بولنور  
وبوقشر جذب قری وشمسیه منقاد اولان کتله سائله  
باطنه ده متحصل ومتعاقب الوقوع ارتفاع وهبوط  
حرکتلرندن مضطرب ومتأردر.

شوندن ظاهر اولدیکه قشره ارضیه نک هبوطنده  
صولر غاباتی وزمن فحمی نباتاتنک کتله عظیمه سنی  
ستروانمار ایتش وبوندن صکره دیگر غابات نابت اوله رق  
وکتلات تگون ایدرک ومؤخراً ینه قشرک هبوطیه  
صولر غابات وکتلاتی تحتنه آیشدر وبونک تکرر  
وتعاقبیه برخیلی کتله نباتات تگون ایتش وبوندن ده  
فحم حجری تحصیل ایشدر تحصیل مذکورک قرون  
کثیره وعیدیده وقوعی ایسه محتاج ایضاح دکدر.



از منته قديمه نباتاتك قار يعنى زفت و سائر ايله  
مشحون كتهله فحميه صورتي تحولى سؤال ايديلور  
ايسه جواب و يريلور كه ميايه ايله منغمر نباتاتك كتهله سي  
زمانزده مستنقعاتده متكون «توربه» مشابه اوله رق مدت  
مديده صوتلنده بولمق له تعفن جزوى حاصل ايتمش  
وسكره تخمزايشدر و نباتات مذكوره ده حاصل  
اولان تحلل فحم حجريده بولنان غازات سائله معدنيه نك  
وانواع شيت قاريده كي زيوت قطرايه منشأ نك تكونيله  
حصول بولمشدر . «تورب» طبقاتك اراضى آلتنه  
اندافندن سكره بوغازاتك انتشارى مستمر اولوب فحم  
حجري دخى مدار تميزى اولان ككشافت عظيمه ي  
واراضينك ثقلت و تضيقيله تعظم و تزايد ايدن حالت  
انضمامى كسب ايتشدر و جوف ارضدن تصاعد ايدن  
حرارتك دخى تكونات مسروده ده تأثير عظيمى اولمشدر  
بناءً عليه فحم حجري طبقاتنده كي اختلافاتك بوايكي  
سببدن يعنى مارالعرض تضيق ككشافته حرارت مركزيه  
تأثيرينك وقوعه كتوردىكي تسخيندن ايلرو كلديكنه  
ذاهب اولوق مناسبدر . ايمدى طبقات سفلا نك  
جفاف و اندماجى طبقات عليادن زياده در زيرا طبقات

سفلايه تأثیر ایدن حرارت کثیر الارتفاع اولدیغی کبی  
اوزرنده کی تضیق دهها قویدر .

اشته فحم حجرینک صورت تکونی بویله در و بوده  
فناً اجرا ایدلمش اولان تجارب عدیده ايله واضح و عیان  
اولشد .

« تته »

فاضل یمدانی محمد افندی اسکندرانی جانبندن احجار  
فحمیه حقهده سرد ایدیلان اشبو معلومات و مطالعات  
برجه دهها سهل التفهم قلمق امیدیه درکه بوتیه بی  
یازیورز .

علم ارض و معادنه وقوفی اولانلره خفی اولدیغی  
اوزره صخور فحمیه یعنی قابل احتراق اولان قیالر،  
طاشلر اساساً درت جنسدن عبارت اولوب بونلرده  
« فحم لامع » « فحم ترابی » « خشب متفحم » « تورب » در  
انجق « کبریت » « توف کبریتی » « شست قاری »  
« قفر الیهود » « نفت » « غرافیت » « صاری کهربا » کبی

بعض معادن دخی قابل احتراق قیالر نوعدن عد  
ایدلشدر بوراجه بونلری موضوع بحث ایتکه لزوم  
اولیوب ممکن مرتبه اطرافلیجه بیلکلیکمز اقتضا ایدن  
شی بالاده مذکور درت قسمدر .

### ۵. فحم لامع ❖

بیلدیکمز ولسان ناسده واور کموری دینلان معدن  
جنسندن اولوب رنکی سیاه وپارلاقدر معدنی وطنوق  
رنکده بولنسی نادر در علو ودومانی اولیوب یانسی  
عسرتیلدر ویانمقده مواد سائرته معاونتنه چوق محتاج  
اولور طوزی کور کبی قوقار اکثری اشاغیده بیان  
اولنه جق «فحم ترابی» معدن اوجاقلرنده وبوفحمک  
اراسنده چیقار براز مولد الجموضه ومولد المائی حاویدر  
بعضاً مولد سورج ایله ده مخلوط بولنور طوپراغی پک  
آزدر .

اشبو معدن حرارتی شدتلندیرمک ایچون تیمورجی  
اوجاقلرنده مواد سائرته ایله برابر قوللانیلور .

## « فحم ترابی »

اشته اصل و اپور کوری بودر رنکی قیو سیاه  
 اولوب اکثریت اوزره پارلاقدر فحم لامع دن دها  
 یמושاقدر یانمسی دخی پک قولایلقلیدر و علولی اولوب  
 دومان سیاهدرینار ایکن منتفح اوله رق اریدیکی جهته  
 پارچه لری متلاصقدر .

فحم ترایده کی مولد الجموضه و مولد الماء فحم لامع ده  
 بولنندن زیاده در طور اخی دخی آذرطو پراخی آز بولنان  
 نوعلری علوله یانمقده ایکن سوندیر یلور ایسه « قوق »  
 حاصل اولور .

فحم مذکور تقطیر اولنورسه مواد قاریه صو و سائر  
 غازات و چوق وقت نشادر روحی چیقیدیغی و مواد قا-  
 ریه نك تکرار تقطیری حالنده نفتالین ذیلان ماده نك  
 حصول بولیدیغی تجر به ایدلمشدر .

صخور فحمیه نك ارضده اک چوق بولنانی فحم  
 ترابی اولوب سببی ده صورت تحصیل حقنده استاذک  
 و یردیکی معلوماتدن استنباط اولانه جنی کبی آتیده و یره-  
 جکمر تفصیلات ایله ده تعین ایده جکدر .

بوکورک انواعی اولوب بونلره ارباب فن « فحم

ترائی دھنی خشین « فحم ترائی دھنی مارشالی »  
 « فحم ترائی دھنی لہبی » « فحم ترائی لہبی یابس »  
 نامرلہ تفریق ایتشلدر .

( قاتل قووال ) نامندہ برنوع فحم ترابی دھا اولوب  
 پارلاق علولہ یانار وقابل انقطاع بولندیغی جھتلہ کندو-  
 سندن قابر و تزیناتہ متعلق سائر بعض شیرل یاپیلور .  
 فحم ترابیدن قطران استحصال اولنہ بیلدیکی کبی  
 سوقاقلرمزی تنویر ایدن هـوا غازی دخی چیقاریلور  
 هوا غازی استحصالنہ اک زیادہ یارایان « فحم ترابی دھنی »  
 لہبی « اولدیغی تحقیق قلمشدر .

### « خشب متفحم »

اسمر وقارامتراق وقارہ وبعضاً قزاسی اولوب اکثری  
 طنو قدر واکثر نوعلری فحم ترابی یابس وفحم لامع ایلہ  
 قارشمشدر . بوندہ کی مولد الحموضہ نک مقداری اوتہ کیلردن  
 زیادہ اولوب انجق فحمی آذر وکندوسندن استحصال  
 ایدیلان قطرانہ نفتالین مادہسی بولنمز وشو حالی فحم  
 ترابیدن مدار تمیزی اولمشدر .

خشب متفحمک یانمسی سہولتی وعلولی اولوب  
 دومان سیاہدر تلہی منقطع اولدقده کمور قوری کبی

قور ویرر و تقط-یرنده حاصل اولان صومواد قاریه  
و حامض خـلایی حاویدر بو فحمک برنوعی واردرکه  
زایت نامیهله معروف اولوب جـلالته جق قدر کشیف  
و خیلوجه صلابتلی اولدیغندن تزینات ایچـون استعمال  
اولنور فحم مذکورک برنوعیده ترابی اسمر قارامتیراق  
اوله رق تصویرده مستعمل و «تراب ظل قولونیا» نامیه  
مسمی در .

خشب متفحمک سائر نوعلری وهله ترابی اولانلری  
زراعتده استعمال ایدلمش وقوه انباتیهی تزیده خدمتی  
کورلمشدر .

### ﴿تورب﴾

بموشاق ورنکی اسمر و بعضاً قارامتیراق ویا قزیل او-  
لان بو معدنک ترکیبی نباتاتک ترکیبنه قریب اولوب مولد  
الحموضه سی هم نوعلرندن زیاده در علولی علوسز پک  
قولایلقله یانار دومانای ایه قوری اوت ویا توتون دوما-  
نه بکزر فقط رایحه سی فنادر بناء علیه اودون و فحم  
ترابی بولندیغی یرلرده قوللانیلور ایه ده انلرک بولندیغی  
محلارده مرغوب اولماقده در .

(تورب)ك تقطيرنده حامض خلا وماده ز يتيه تحصل  
ايدروكولى زراعتده مستعملدر .

§

صخور فحميه نك احوالنه دائر شو ويريلا ن معلومات  
بوراجه كافى اولوب شمدي بونلرك صورت تكون وتشكلى  
حقننده كى ايضاحات فنيه يى بر كوزدن كچورمك ايجاب  
ايدوبور ذاتاً بزجه مقصد بونلرك ندن ونصل تحصل  
وتشكل ايتديكنى بيلمك اولوب انلرك احوالندن بحث  
حالى بيلمديكمز موادك صورت تكوننى درميان مناسب  
اوله ميه جغى جهته ضرورى اولمشيدى .

صخور مجوٹ عنھادن فحم لامع اكثريت اوزره فحم  
ترابى آره سنده بولنه كلديكندن بونك نصل تحصل وتشكل  
ايتديكندن آيروجه بحث مقتضى اولديغى كى خشب  
متفحم دخى على الاكثر تورب دن متحول بولنسنه كوره  
اصل مطالعه وملاحظه من تورب ايله فحم ترابى به تعلق  
ايتك طبيعيدر مع هذا توربدن بحث ايدوبور ايكن خشب  
متفحمك صورت تحوله اشارت ضرورىدر .

« تكون تورب »

جناب مؤلفك بيان ايلش اولديغى كى تورب ديديكمز

صخر فحمی نباتاتدن تحصیل ایدر صویو صونلری  
 وقالقاسیا، سرخسیه کبی نباتات مائه صویک تأثیرله تحلل  
 ایدرک تورب حالنه انقلاب ایدرلر یعنی یپراقلدالر  
 اغاجلر میوهلر میاه راکده ورطوبت دائمه ایچننده قالوب  
 حل اوله رق مواد نباتیه دن عبارت قالین قالین طبقه لر  
 تشکیل ایدوب اشبو طبقه لر اوزون برمدتدنصکره تورب  
 اولورلر توربک تشکل و تحصلنه بو پراکنده اوراق وانمار  
 و نباتات خادم اولدیغی کبی تشکل و تحصل مذکورک صو-  
 رت اخری ایله ده وقوعی فنا ثابت اولمشدر .

کتب فن ده مصرح اولدیغی اوزره امریقای شما-  
 لیده ورژیناده صولو وبالچقلی بر محل واردرکه وسعتی بر  
 قاچ میل اولوب آدینه دیسمال اسوام دیرلر .

زلزله لر و امثالک ارضه و یردیکی تبدلات و تغیرات اثارندن  
 اوله رق بر قوجه اورمان بو وسعتلی بالچقک صوی آلتنده  
 قالمشدر اورمانک اغاجلری صو ایله مستور اولوب  
 ساحلده کیلرک تپه لری کورنمکده در و بونلرک میاننده  
 صنوبریه اغاجلری بولنوب تحلل ایتمکده و اورطه ده کی  
 اغاجلر دور یلرک افقی برحاله ایه لده ساحلده کیلر  
 عوداً طور مقده و اشجار مذکوره نک اطراف و اکنافنده کی  
 نباتات مائه بر طرفدن نشو و نما بولوب بر طرفدن



فناياب اوله رق تاثير مياہ ايلہ بالتحمل تور بہ تحول ايتکده  
وتورب طبقه لری حصوله کتور مکده اولديغی و بو حال  
ايلہ محل مذکورک بر وقت برتور به یعنی تورب محلی اولہ  
جغی کشف ایلشدیر .

ارباب کشف ورژیناده دهها بویله تور به لر بولندیغی  
وانلرک تشکلی ده بویله اوله جغی تحقیق ایلشدیر .

ورژیناده کی مذکور تشکلاتک امثالی المانیاده کی الپا  
طاغلرندہ دخی مشهوردر روسیه و سبیریاده کی قوجه  
اوواردہ دخی یوصون و نباتاتک تورب رسوباتی حصولنه  
خدمت ایتکده اولدقلری متحققدر .

رسوبات تور به بوصورتله نباتاتدن تحصیل وتشکل  
ایتدیکی کبی بورسوباتک برکائی اندفاعات و یا زلزله لر کبی  
انواع اسبابدن ایلرو کلان تبدلات و تغیرات ارضیه  
اٹارندن اوله رق دکز آئنده قالمسی ممکنات و واقعاتدن  
اولوب اوزرینه رمل و عصار امثالک ترسبیلہ طبقه لر  
وجود بولدیغی و طبقات مذکورہ تحتندہ قلان توربک  
میاہ بحرک تأثیرندن و طبقات مجوٹ عنہانک تضییقندن  
ناشی خشب متفحمه و بلکه فحم ترابی به انقلاب و تحول  
ایده یلہ جکی فن نظرندہ مسلم بولمنسنه و خشب متفحم  
طبقاتندہ صنوبریه اغاجلرینک کتوکلری حتی بعضا

عمودی اوله رق کورلمسی واوراق ویا اراقلی اغاجلر اثماری  
مشهود اولمسی معدن مذکورک تور بدن منقلب و متحول  
بولندیغنی بیلدیردیکنه مبنی خشب متفحکم هیچ اولمز  
ایسه تورب کبی نباتندن تحصیل تحقق ایتک طبیعیدر .

### « تشکل فحم ترابی »

کره ارض اک اول نار بیضا حالنده بولنوب صکره  
سطح خارجیمی قابوق باغلامغه باشلامش وقابوق درجه  
کفایه یی بولدقده کرده اک اول حکم سورن برکانیت  
اولمشدر بو زمان برکانیتده متشکل اراضی ایله زمانمزده  
دخی تأثیر برکانیت ایله تشکل ایدن اراضی به اراضی ناریه  
نامی ویرلدیکی کبی قشر ارضک تبردی تزیاید ایلدکدن  
صکره تأثیر میاه ایله اراضی رسوبیه تشکل ایشدر که  
ژئولوژی علماسی بوکا اراضی مائه تسمیه ایدرلر . علمای  
فنگ بو بابده مختلف تقسیماتی وار ایسه ده بز بولنلردن  
یالکز برینک مسلکنی التزام ایده لم: بومسلک ایجابنجه ارا-  
ضی ابتدائی، ثانی، ثالث، جدید ترتیبیه درده منقسم اولوب  
هر برینک طبقات و اجزایی کتب مخصوصه سنده تعریف  
وایضاح ایدلشددر .

اراضی مائنهك دور ابتدایی بش طبقه یه منقسم  
اولوب ارض فحمی بشجیسی در ارض فحمی طبقاتك  
سمکی فوق العاده اولوب بعضاً اوچ درت بیک مترو قدر  
بولنور بونلرك اوزرنده غرده و غذارلی شیستلر اشکل  
ایتمشدر وانلرك مافوقنده فحم ترابی یعنی واپور کوری  
وارد .

فحمی حامل اولان ارضك طبقه لری ایکی بیك  
مترو دن زیاده بولندیخی حالده فحم ترابی طبقه لری  
اوتوز مترو نخنده در و بو فحم یعنی معدن کوری دور  
فحمیده سطح ارضه زینت بخش اولان غایت جسیم  
نباتاتك یواش یواش انخلالندن تحصیل ایتمشدر .

حضرت مؤلفك دخی بیان ایلدیکی اوزره ژئولوژی  
علماسی فحم تراینك منشائی حقنده مختلف رأیده بولنوب  
بر طاقی رسوبات فحمیه صولر واسطه سیله محال بعیده دن  
کلان نباتاتك ترا کمندن متحدث اولدیغنه ذاهب اولمشلردر  
بونلرك بورایی بتون بتون اساسسز دکل ایسه ده تجارب  
عیده ایله ثابت اولمشدر که رسوبات فحمیهك یالکز  
بو صورتله تحدثنه حکم صحیح اوله مز . زیرا فحم  
تراینك فراشنده یکدیگرینه مرتبط بر طاقم کوکلر



تحول ایدرک و سیاهلنهرق بشقه بر جسمک حال و طبیعتنه  
ابتدادن برو بیان اولنان اسباب یاردمیله انقلاب ایدن  
نباتات اولدیغی فن نظرنده متحققدر .

بویله اولنجه اسرار نورانیه‌نک دها مبادیسنده ایراد  
اولنان و «جناب حق یشیل اوتلری انبات و اخراج و صکره  
قوری و سیاه ایلدی» مضمون حکمت مشحونده اولان  
(والذی الایة) نصل جلیلی احجار فحمیه حقنده اشارت  
کافیہی متضمن اولدیغی مرتبه وضوح و صراحتدهدر .

### سبحان الخالق العلی العظیم

اشته اسرار نورانیه‌نک مقدمه‌سی یتدی بوندن صکره  
فصل اولی درج ایدیه‌جکدر .



### ❦ مقتطفات منشوره ❦

روی عن ابی هريرة رضی اه عنه انه قال : قال رسول اه صلی اه تعالی علیه وسلم « ان الدين النصيحة » قالوا الاصحاب « لمن يا رسول اه » قال « لله ولكتابه ولرسوله ولائمة المسلمين وعامتهم » .

ابو هريرة رضی اه تعالی عنهن منقول ومرویدر « جناب رسول اکرم صلی اه علیه وسلم دین نصیحتدر بیورمشلر واصحاب کرام رضوان اه تعالی علیهم اجمعین حضراتی کیمک ایچونددر یارسول اه دیملریله اول عندلیب کلزار رسالت « جناب حقله کتابی، رسولی وائمة مسلمین ووجهة مؤمنین ایچونددر » کلام حقیقت انسجامیله جواب ویرمشلدر .

شرح احادیثک افانجی بو حدیث شریفک شرایط شریعت احادیثی جامع اولدیغنی بسط و بیان وحق ایچون نصیحت، کتابنه رسوانه نصیحت فصل اولدیغنی وائمة

مسلمین وعامہ مؤمنینہ نصیحتك نه اوله بيله جكنی تصریح  
واتیان ایلش لدر در که مشار الیهك بو بیده کی تشریح اتنی  
نظر مطالعه دن کچورمك مناسبدر :

حقه نصیحت جناب رب عزتك وجوب وجود  
و وحدانیتنی تصدیق، نقصان صفتلردن بری صفات  
کمالیه ایله متصف بولندیغنی اقرار و اعتراف، هر حال  
وزمانده باطنی، ظاهری حضرت حقّه ضراعت مندانه توجه،  
اوامر ربانیه پی ایفایه غیرت، نواهی صمدانیه دن مجانبت،  
اهل حق و اطاعته محبت، رب عزته باغی و عاصی اولانلره  
خصومت، کریوه بغی و ضلالتّه صاپمشاری شهره سلامت  
و اطاعته هدایت، واجب الوجوده هر بار تعظیم و تکریمه  
اعتنا کی مقتضیات عبودیت اولان خصوصیات ایله  
اولور .

کتاب الله مختص نصیحت تجوید و مخارج حروفه رعایت  
و اقدام و معانی آیات و مزایای بینات فرقانی کلامغه  
غیرت و اهتمام، تحریفات و تأویلات ارباب ضلالتی رد و ابطال،  
وجوه قرائت و تفسیر و صورت صحیحّه ده تأویلات کی قرآن  
کریمه متعلق واقف اولسان حقایقی خلقك کوش فهم

وادرکنه ایصال یولنده خدمات دینه ووظائف شرعیه یی  
ایفا ایله اولور .

رسول الله نصیحت آنک جانب الوهیتدن تبلیغه  
مأمور اولدیغی جله احکام و او امره و اخبارات و سائریه  
اعتقاد ایدرک حضرت نبی اکرم و رسول افخم صلی الله  
علیه وسلم افندمرک سنت شریفه سیله ارئه و اشارت  
بیوردقلری طریق فیض رفیق حتی تعلم و تعلیم و طلب  
و ادا ، اخلاق و اوصاف محمدیه ایله تخلق و اتصاف  
و اداب احمدیه ایله تأدب ، نشر دینه غیرت ، ناسی طریقت  
و شریعت مطهریه دعوته همت ایله اولور .

أئمة مسلمینه نصیحت ایسه عرض حقیقت ، محو  
مفسدت ، اعلام احوال ، افهام وارئه احوال ، مستقبلاتدن  
ایضاح کبی ایجابات صدق و اخلاصی ادایه اعتنا ایله در .

عامه مؤمنینه نصیح و پنده کلنجه بوده خلق مکارم  
اخلاق ایله اتصاف ایدرک تصفیة قلوبه ، سیات  
و مفاسددن اجتناب ایلیه رک رد عیوبه تشویق و ترغیب  
ایچون موضوع و مسلم اولان قوانین و قواعدی تعلیم  
و بونلره توفیق حرکت هر حالده مستلزم فلاح و سلامت



اولدیننی تفهیم وشو صورتله اخیاری تکثیر وتفضیل،  
اشراری تنقیص وتذلیل در .

اشته فاتحه مقال اولان حدیث شریفک نکت  
ومزایاسی شمعی معلوم وشریعت مطهره محمدیه نکت  
دنیوی و اخروی، صوری و معنوی و ظاهری و باطنی کمال  
خیر و منفعتی بو علم ایله مجزوم اولدی .

نه عاقلدر انلرکه بویله اشرف واکمل بردین مبینک  
محض خیر و سعادت اولان احکام و قوانیننه تماماً انقیاد ایله  
ایکی جهانده ممتاز و سرفراز اولورلر . نه غافلدر انلرکه  
عمای ظاهری و باطنییه گرفتار اوله رق آفتاب فیض  
وسلامت اولان شعله عالمگیر شریعتدن اقتباس ضیاء  
معرفت و حقیقت ایده میهرک زندان ضلالت وفلاکت  
ولیل غیاهب فسق و مفسدنده خائب وخاسر، پریشان  
وسرکردان قالورلر .

اللهم نجنا مما نخاف



ابو بکر و عمر رضی الله عنهما حضراتی بعد الصلوة  
قرائت قرآن شریف ایدرلر و جناب صدیق اوصول  
اوصول حضرت فاروق ایسه آواز بلند ایله تلاوت  
ایدرلر ایدی. رحمة للعالمین اولان سرخیل رسل عظام  
علیه الصلوة والسلام افندمن حضرت ابو بکر الصدیقن  
قرآن کریمی نه ایچون اوصول اوصول تلاوت ایلدیکی  
سؤال بیوردقه اول رفیق صدیق رسول شفیق :

### یستمع من اناجی

کلامیله عرض جواب ایتشلردر یعنی « یا حبیب  
الله علیک سلام الله یقینم واردرکه قاضی الحاجات  
بندن غائب دکلدر سمیع و بصیر و لطیف و خبیردر  
کک خفی، کک جلی نصل تلاوت ایتش اولسهم استماع  
ایدر » مدلولنده کی کلامیله اراثة مافی الضمیر ایتشدر .

حضرت نبی ذیشان کتاب قدیمی آواز بلند ایله  
تلاوتی سببی فاروق غضنفر تواندن استفسار بیوردقه  
اول فاتح قدس شریف :

## « اوقظ الوسنان واطرد الشيطان »

کلام لطیفی ایله امره اجابت یعنی آواز بلند ایله تلاوت فرقان حقیقت بیان ایتسی نأتم ووسنانی ایقاپ، فاسد شیطانی طرد و تبعید ایچون اولدیغنی عرض وافاده ایدرک دائماً خدمت دین و حفظ مسلمینه توغلنه اشارت ایلشدر .

— —

حضرت عمر رضی الله عنه :

الغرة راحة من خلطاء السوء

یعنی « عزلت همنشینان بد راحتی استلزام ایدر » بیورمشلردر؛ حقیقهٔ سیأت احوال ایله متصف بولنا نلرله الفت ورفاقت قدر مضر بر حال یوقدر دیمک مبالغه دکلدر؛ چونکه دنیوی و اخروی خسار و مضرتی کوریلور. عزلت اهل طریق عنده ایکی درلودر : بری

خلقدن اعراض، بریده انقطاعدر . خلقدن  
 اعراض بر محل خالیده ظاهراً صحبت هم نوعدن تبری  
 ایدوب کندیسیمه مانوس اولق و عیوب اعمالنه نظرله  
 مخالطه ناسدن رها و خلاص طلب ایلوب خلقی کندی  
 مضرندن مصون قیلقدر . اما انقطاع برملکه  
 قلبیه در خلق ایله الفت اولنور انجق کوکل ظواهره تعلقدن  
 بری اوله رق دائماً حقه متوجه بولنور. شبهه یوقدر که  
 خلقدن اعراض ایله انقطاع بیننده فرق کلی اولوب  
 ایکنجی برنجی بهر جحد؛ زیرا انسانک مادام که برلقمه یه،  
 بر خرقه یه اولسون احتیاجی دوام حیاتله دائمدر دنیادن  
 تمامیه فراغت البته ممکن اوله من ذاتاً مطلوبیده فراغت  
 کامله اولدیغی و مقصد اصلی محزن اسرار روحانیه اولان  
 قلبی علایق ردیه و تمایلات فاسده دن حفظ و صیانتله  
 تطهیر و تصفیه اولدیغی جهتله اوله بر فراغته لزوم قالمز  
 حتی بوندن ناشیدر که علما و فضلالی اسلامیه زهدی  
 قناعتله تفسیر و بعضلری مالدن فراغ مدلولنده بولندیغی  
 بیان ایله ایضاح حقیقته همت ایتشلردر حتی علامه  
 زحمشری علیه رحه الباری (افضل الناس مؤمن مزهد)  
 حدیث شریفنده کی مزهد کلمه سنی جلد ثانیده بر مقاله  
 مخصوصه ده بیان ایدیله جکی اوزره قلیل المال ایله

تفسیر و بعض فحولین دخی قناعت ملزوم قلت اولدیغندن  
علامه نك بو تفسیرینی دها واضح قیلهرق دنیایه هیچ  
بر وجهله عدم تعلق ممکن اوله من الاهرشیدن ضرورت  
مقدارینه قناعت ایله اولور دیمشدر . حجة الاسلام  
امام غزالی رجة الله علیه (ولیس الزهد فقد المال وانما  
الزهد فراغ القلب کان سلیمان علیه السلام فی ملکه من  
الزهاد) دیمشدر؛ یعنی زهد فقد مال ایله فقیر الحال اولق  
دکل بلکه فراغ قلبدر : زیرا سلیمان علیه السلام  
سلطنتده ایکن زهاددن اولدی دیهرک ارأته حقیقت  
ایلمشدر .

زهد حقنده بر مقاله مخصوصه یازلق مقرر اولدیغندن  
تفصیلاته ان شاء الله اوراده کیریشیلور .



حضرت علی کرم الله وجهه پیورمشلر که ضرب  
وايلام ویا اخافه وتحذیر ایلمدکجه کندیسنه اولسان  
وعظ ونصیحتدن متنفع اولسان غافلیندن اولیکز ؛  
زیرا انلر شرف عقلدن محروم حیوان کبیدر . عاقل

ادبله یعنی حسن صورت وایما واشارتله ایدیلان نصح  
و بندی قبولده تردد اینز اما حیوان صوبه یمینجه تربیه  
اولمز .

حضرت علی کرم الله وجهه بیور مشدر که « اخوانی  
نکبت، غیبت و وفاتی حالنده حفظ وصیانتہ سعی موفورده  
بولنمیانلر صداقت اخوتله پیراسته عد اولنه مزلر » .

مشارالیه حضرتلری « ترک کلفت شرط الفتنه »  
بیور مشلردر . حقیقت بین الاخلا الفتنه کلفت فقد محبتی  
اشارت ایدر تکلفله صحبت ایدنلرک اکثر آوانی قواعد  
تکلفه توفیق افعال و مشوار و تطبیق اقوال و کفشار  
زحمتی چکمکله کچر کیدر شو قدر که هر حاضر مجلس  
الفت، هر لافزن انجمن صحبتی یاد و فکر، محب صدق  
شعار عد ایدوبده بلا تکلف طاورانماق و شو صورتله  
یار حقننده کی ماره سر رشته طعن و مذمت ویرمکدن

کری طور مقمضای عقل و فطانت اولدیغی رهین  
رتبهٔ بدهتدر .

—

ابو محمد امام احمد حنبل رضی عنه رب الاجل دن  
اخلاص نه اولدیغی سؤال اولندقدہ امام مشارالیه دخی  
شویله جواب ویرمشدر :

( الاخلاص هو الخلاص من آفات الاعمال )

یعنی اخلاص افات اعمالدن خلاص ایلهدر .

—

سری سقطی رحمة الله علیه جنابندن بیان ایدلدیکی  
بعض آثارده مسطوردرکه مشارالیه بر بیرام کونی معروف  
کرخی قدس سره العالی بی خرما طویلارکن کورب  
نیچون طویلادیغی سؤال ایتدکده معروف کرخی حضر-  
تلی شویله جواب ویرمشدر « اطفال اسلام جویر او-  
ینایوب اکلنمکده اولدقلری صرهدہ برچوجخی اوینامیه رق  
اغلار کوردم وکندیسی یتیم اولوب دیگر اطفال کی البسه  
جدیده کیه مدیکی وجویری اولدیغندن او یونلرینه اولسون

اشترک ایدہ مدیکی ایچون اغلادیغنی بالتحقیق اوکرندم  
بونک اوزرینه همان بوجانبه کلوب خرما طوپلامغه  
باشلادم خرمارلی صاتوب چوجغه جو یز آله جغم .

جناب سری معروفک بو سوزینی ایشیدنجه همان  
چوجقلرک او یون یرینه عزیمتله مذکور یتیمی کیدروب  
قوشاتمغه وبر چوق جو یز صاحبی قیلغه مسارعت ایتش  
ودرحال قلبنده بر نور فرح وانبساط حاصل اولشدر .

—

داود طائی حضرتلری مقتدای سنیان ابو حنیفه  
رضی عنه الرحمن دن تحصیل علوم ایلدکن و صدر  
فقها اولدکن صکره حضور فضائلشور امامه کلهرک  
نه کاره شروع ایتسی، نه ایله اشتغال ایتسی لزومی  
استاذدن استفسار واستیذان ایلدکده جناب امام  
همامدن :

{ عليك بالعمل فان العلم بلا عمل كالجسد بلا روح }

امر جواییسی صادر اولش یعنی سنک ایچون عمل



اقتضا ایدر؛ زیرا عملسز علم روحسز جسد کیدر جوا-  
بیله مقابله بیورلمشدر.

«الحق علم عمله مقرون اوله دن صفوت بولمز، علم مجردله قناعت ایدن عالم اولمز؛ زیرا طبع عالم ایچون علم مجردله قناعت محال، عمل ایله تصفیة علم امنیه عال العالدر؛ عین هدایت مجاهدهسز آچیلمز، عملسز علمله تلذذ ایدلمز» البته عین هدایت مجاهده ایله لامع و البته علم و معرفت عمل و عبادتله نافع اولور. علم عملی مورث اولاندر غیریبسی نظر قبولدن هر وقت دور طوتلغنه شایاندر

خوانش برای دانش دانش برای دید  
چون دیده نیست خوانش برای چیست

—

امام فخر الدین رازی معاصری بولنان واصل بالله  
شیخ نجم الدینه (بم عرفت ربك) سؤالی ایراد ایلمش  
بغنی ربکی نه ایله عارفك بولنده استفسار رأی ایتمش

وحضرت شیخ ایسه ( بوارداتِ ترد علی القلوب فتعجز  
النفوس عن تکذیبها ) جوانبی و برمش یعنی ربمی قلوبه  
اولان و نفوس کن دیسنی تکذیدن عاجز قالان واردات  
معنویه ایله بیلورم کلامیله مقابله بیورمشدر .

—

شیخ شهاب الدین سیواسی رحمة الله علیه (الرحان)  
ایله (الرحیم) ییتنده کی فرقی ایضاح ایچون عیون التفاهله  
سیرده دیمشدرکه « رحان معنأ عام، لفظأ خاصدر غیره  
اطلاق اولنمز؛ رحیم معنأ خاص، لفظأ عامدرانکله غیره  
تسمیه وتوصیف صحیح اولور » .

—

افانچدن بری احباسندن برینه یازمشدر :

« خلقه سوزله دکل فعل و عملکله وعظ و نصیحت  
ایله که انلرده طریق خلوص و عبودیتده سنک اثرینه  
اتباع ایدرک متعظ و منتصح اولسونلر عبد خلوص  
شعار، محب وفاکار اولقله شرف بولسونلر . »

«سَنَك احوال وحرکاتکے نزدیک باریدہ اولان غلم  
ووقوف قدر حقہن حیا ایت کہ رضای ربہ مخالفتہ جرأتہ  
حضور علام الغیوبہ محبوب قائمہ سک .»

«جناب قادر قیومک سکا نافذ اولان قدرت  
وقوتی قدر اول ذوالجلالہن خوف وهراس ایلہ کہ  
مقتضای عبودیتک اولان خشوع وضراعت وکمال انقیاد  
واطاعتہ پابرجای ثبات وامتانت اولہ نک سہولتنی  
بولہ سک .»

(قلبدہ محبہ اللہ ایچون بر معیار مستقیم وارد صدق  
وکنز، خیر وشر او معیار راست عیار ایلہ طانیلور  
قلبدہ محبہ اللہ اولورسہ شہوات نفسانیہ و تسویلات  
شیطانیہ نک عرض و ترویج ابتدیی مکر و مفسدت غلبہ  
او مر شرعیہ ایلہ مردود اولور کوکل فرمان خدایہ  
میل و انقیادہ سہولت بولور .)

(فقرک زینتی صبر، غنائک زینتی شکر در؛ اسلامدن

اعلا شرف، تقوادن اعلا کرامت، توبه واستغفاردن  
اعلا شفیع، عافیت بدندن احسن ثوب ولباس یوقدر  
حرص وطمع مفتاح تعب و مشقت و مطیہ الم وشدندر .

(سقم ابدانیہ دوا ایلہ زائل و بی نشان اولدیغی کبی  
نفوس انسانیه ده صداقت اخوان ایلہ تشفی ایدر .)

(کلام عاقل قوت، جواب جاهل سکوتدر ؛ سقام  
حرصه دوا موجود، داء جهل طیب مفقوددر .)

ارسطاطاليس ديمشدر که عاقل عاقله موافق و رفيق  
صادق اولور اما جاهل نه جاهله نه ده عاقله موافق  
اوله من نصلکه مستقيم مستقيمه منطبق اولور اما معوج  
نه معوجه نه ده مستقيمه تطبیق اولنه من .

استاذ مشايخ كرام ابو على دقاق عليه رحة الخلاق  
 اظهار حق كلام ايدوب بيورمشدر :  
 «اكر چه فقر وغنائك ترجيح وتفضيلنده چوق قال  
 وقيل اولنمشدر اما بنم قائمه اشرف واكمل وجمله دن  
 اجل اولان كفايت كفافى وتحصيل قناعت وعفافدر .»

### — ❦ مقتطفات منظومه ❦ —

« روضة الناظر ونزهة المخاطر » نام اثر لطيفك  
 ( فرصت انعام واحسانى انتهاز ) حقننده اولان فصل  
 خامسندن :

ليس فى كل ساعة واوان  
 تتهياً صنايع الاحسان

فاذا امكنت فبادر اليها  
 خيفة من تعذر الامكان

یعنی هر آن وساعت اسباب لطف واحسان مستحضر  
 وآماده اولز بونك ایچون فرصت وامكان وقوعنده  
 (ایلروده امكانك متعذر اولسندن احترازاً) همان احسان  
 وانعامه مبادرت ایله .

اذا هبت رياحك فاغتمها  
 فعمي كل خافقة سکون

ولا تغفل عن الاحسان فيها  
 فلا تدري السكون متى يكون

رياح ثروت وسامان سندن طرفه هبوب ايتديكي  
 زمانلرده آنی غنيمت ييل زيرا هر روزكارك عقي سکونندر  
 آنك ایچون او زمانلرده احساندن غفلت ايتمه كه سکونتك  
 نه وقت حصولوله جفني بيلرسين .

یعنی ثروت وسامانك بولنديغي زمانلرده دها ایلرويه  
 تعلیق ایله احسانی تأخیر ایتاملیدر ؛ چونكه هر اقبال  
 و ثروتك برزوالی اولوب بو زوال نه وقت كله جکی

بیلتریکندن وقتیهله انتهاز فرصتله احسان و انعامدن  
کیرو طور ماملیدر .

خذوا بنصيب من نعيم ولذة  
فكل وان طال المدى يتصرم

ولا تتركوا يوم السرور الى غد

لعل غداً يأتي بما ليس يعلم

یعنی نعيم و لذتدن حصه مند و مستفید اولیکز؛ زیرا  
هر برشی نقدر اوزون سورسه سورسون محو و منقطع  
اولور . ایمدی یوم سروری ایرتهیه براقیکز زیرا یارنکی  
کونک نه کتوره جکی بیلتمز .

ولا ترج فعل الصالحات الى غد

لعل غداً يأتي ونحن فقير

یعنی اعمال خیریه یی یارینه براقه؛ زیرا بلکه یارینکی  
کون بز مفقود بولتورز .



## ابن کمال مرحومک آثار منظومه سندن

( حرف الراء ) دن مابعد

یوق یره نعمتی خلقه صاقین بذل ایتمه  
 دنیهدنه نان و نمک حقنی کوزلر یوقدر  
 مسکنتله اوزیکی خاکه برابر ایتسهک  
 اونودرلر او کونی نعمتی آکر یوقدر

معرفت کرچه که بکرادهلره لازمدر  
 او قویوب یازمن ایشه ینه بک اوغلی بکدر  
 اهل علم اوغلی اولوب خانقه دنیاده  
 جاهل اولمقدن ایشه طوغمه دن اولمک یکدر

ذنوبی کموج الجبال بل هو اکثر  
 اصغر مثل جبال بل هو اکبر  
 و لیکن عند الکرام اذا عفی  
 مثل عفو الذباب بل هوا صغر



صبحه دکین مروحه جنبان ایدم  
 واردی صفا خوابنه اول شیوه کار  
 مرغ دله بنده سلیمان ایدم  
 قبضه دستمه ایدی روزکار

کل یوزکده خط بلورسه کوزلم کریان اولور  
 هاله کورنسه کنار ماهده باران اولور

ایاغیکه دوشدیکک عاشققلرک عیب ایله  
 پای شمعه دوکیلور هب یانیجق پروانه لر

کوزلم باشی امید وصل ووهم هجرله  
 بکرز اول بارانه کیم برآن دیگر برآن یاغر

کوزیوم جهانندن آج کوز یکی غفلت ایله  
 سن کوزیوموب آچنجه بو عالم کلور کچر

## — حرف السین —

بیلدوگک بیلدیگک شخصه مقارن اوله  
هم نشینی کشینک شویله بیل ای اقبل ناس

معرفت معدنی اولرنسه سخا کانی کرک  
بونلر اولرنسه هله باری کرک قدر شناس

## لُحَابِ عَرَفِی

اقبال کرم می کدر ارباب هم را  
همت نخورد نیشتر لاونعم را

فقرم بسیاست کشد از مسند همت  
در چشم وجود ارندهد جلی عدم را

اسحق افندی قدیم

ایستم زاد غمك دلدۀ فراوان اولسون  
که جهانندن سفر ایتك بکا آسان اولسون

ینه مشارالیهك :

غرضك جان ایسه کل آل طورمه  
بورجهز وارمی انتظاره دخی

جوری

عرض ایتمه بوی سر زلف امیدي  
ای باد هوس شمدی پریشانلغمز وار

طالب

انتظارك بشقه بر ذوق نهانی اولدیغن  
شاهد وصلت در اغوش اولمینه بیلدم

لا

ینه هم جنسی چکر بر برینک غیرتی  
زحم مقراضه اورور سوزن آنک چون مرهم

آکھی

قورسان اول حاعلی دنیاده آلا رغه اوله کور  
بو خیرسز اطهده طورمه دلا یسه سرن  
اورصا وارسهک قیامز سین بوجه کتسهک کرداب  
نیجه ایتسهک دوشر البت قرهیه کشتی تن

نثاری

دل غم ابتلایه رحم ایدوب لطف ایتمه سین غمزهک  
که بیمار مهفید اولمز علاج ایتمک علاج اوزره

نفعی :

بلا بودر که آشدی بلارکله کوکل  
عَمکده کسه دله باعث مسرت اولور

---

خسروی :

غرضم ملک بقا ایدی عدم راهندن  
اونغرایوب شهر وجوده اویالاندم قالدیم

---

صبری

الدیلر عقم پری رولر پریشان ایتدیلر  
بریره کلز مکر جمعیت خوبان اوله

---

## لاادری

عاقل ایسه‌ک کندی تدبیرکه نقصان ایله  
چونکه نقصان ایلدک تقدیره بهتان ایله

—

فکر ایتمه‌ده در هیبتنی بیت خدانک  
بیهوده دکل دتره‌دیکی قبله نماتک

—

بلبل نیازه باشلادی سن ناز قیل دیو  
کلشنده کل بوداغنی تحریک ایدر صبا

—

## لطائف النعمه فی اقسام الحکمه ۱ دن

مابعد

حکمت الہیہ

بالادہ بیان اولندیغی اوزره علم آلہی واسماء سائرہ  
ایله دخی موصوف ومسمی اولوب اقسام اصلیه سی بشدن  
عبارتدر .

برنجیسی : هویت، وحدت، کثرت، وفاق، خلاف،  
تضاد، قوت، فعل، علت، معلول کبی جمیع موجوداته  
شامل اولان معاینک معرفتنه نظردر .

ایکنجیسی : طبیعی، ریاضی، منطق کبی علومک  
اصول ومبادیسنه نظر وبونلرده اولان آرای فاسدهیه  
مناقضه در .

اوچنجیسی : واجب الوجودک اثبات وتوحیدندن  
وربوییت ایله تفرندنه ومزیت وجودنده برموجود آخرک  
حضرت حقہ مشارکتک امتناعندن وحق تعالی نک  
بذاته واجب الوجود اوله رق ماسوانک وجودی انک

وجودیله واجب اولدیغندن بحث ایتدکدن صکره جناب  
خالق مکنوناتک صفاتی وصفاتک نه وجهله کندی  
صفاتی اولدیغنی وهر صفتک نطقندن فهم اولنان شیئک  
نه اولدیغنی ؛ واحد، موجود، قدیم، عالم، قادر کی صفات  
آلهیه ده مستعمل الفاظک معنای آخره دلالت ایتدکلرینی  
وکندیسنده کثرت اولمیان شیء واحدک هر بریسی آخرك  
غیری اولق اوزره معانی کثیریه دلالت ایتسنک جائز  
اولوب اولدیغنی وشو صفاتک کندیسنه مخصوص اوله رق  
حتی ذاته غیری و کثرتی نه وجهله ایجاب ایتدیکنی  
و وحدانیت حقیقه ذاته سنده کی مطلقیتی بیان ایدر .

درنجیسی : مبدعاتدن وززیده منزله سی اولان  
واقرب مخلوقاتی بولنان جواهر اولای روحانیه دن و بونک  
کثرتیله اختلاف مراتب و طبقاتندن و ملائکه کرو پیوندن  
و جواهر اولی نک دوتنده بولنان جواهر روحانیه ثانیه دن  
و آنلرک طبقات و درجات و افعالنندن باخشدر .

بو جواهر روحانیه ثانیه سماواته مؤکل ملائکه و حمله  
العرش و مدبرات الطبیعه و کون و فسادده تولد و توالد  
ایلیمانلری تعداد ایدنلردر .

بشنجیسی : بعضی عامله محرکه و بعضی  
جناب حقک وحی و امرینی مؤدی اوله رق آمر بولنان



جواهر روحانیہ جواهر جسمانیہ سماویہ و ارضیہ نیک  
 کیفیت تسخر بینی و ارضیات و سماویاتک ملائکہ عاملہ  
 و ملائکہ عاملہ نیک ملائکہ مبلغہ مثلہ و بونلرک کلیسنک  
 واحد اولان آمر مطلقہ ارتباطی و ہر مبدعک تام اولہرق  
 اجرا آئندہ قصور و تفاوت بولندیغنی و مجرای حقیقیسی  
 مقتضای خیر محض اولہرق بعض شررک محض شر  
 اولدقدن بشقہ بلکہ خیر جہتندن بر حکمت و مصلحت  
 ایچون اولدیغنی بیلدیرر بوقسمی (ساطاطا فوسیقا)  
 یعنی (مابعد الطبیعہ) کتابی شاملدر و بونلرک ہدسی برا-  
 ہین یقینیہ ایلہ معلوم اولور .

### { فروع حکمت الہیہ }

وحي ونبوتدن وانسان موحى اليهك وحي تلقى  
 ابتدئى قوتله وحي تأديه ايدن جواهر روحانيه اوزرينه  
 دالالتندن بحث ايدر ؛ روحانيتندن صكره مبصر و مسموع  
 اوله يلمك ايچون وحيك نصل ندا اولنديغنى و نيينك  
 مجراى طبيعته مخالف معجزاتك صدورى قنغى خاصه ايله  
 اولوب غيبى نصل خبر و يردىكنى و ابرار اتقيا ايچون  
 شبه وحيك وشبه معجزه اولان كراماتك نصل وقوع

بولدیغنی وروح الامین وروح القدس کرو بیون طبقه-  
سندن اولدیغنی بیلدرر .

علم معاد دخی فروع حکمت آلهیه دن عد  
ایلمشدر .

ایشته استاذ الحکما ابن سینا مرحوم اقسام حکمتک  
او نجیسی اولان حکمت آلهیه نک اقسام اصلیه سنی بیان  
وفروع علمی دخی افاده واتیان ایلمدی .

معلوم اولق اقتضا ایدر که علوم شرعییه دن علم  
کلام یاخود علم اصول دین بعض متوغلین نظرند علم  
فلسفیه ایله هم موضوع اولدیغنی ذهبنده بولتمشلرایسده  
فلسفه ده یعنی حکمت آلهیه ده اجسام طبیعیه دن بحث  
اولتمقله علم کلامه مشابته حاصل اوله مرز؛ چونکه علم  
کلامک وضعی قدریه، جبریه، رافضیه مثللو فرق  
ضالهنک ظهوری و دائماً تزیادی حسبیه بونلرک رد مدعیات  
باطله سنه لزوم کورلدیکندن بو ابطال وردی کما یلیق ایفا  
وعقاید اهل سنتی ادله قویه عقلیه و براهین متینه نقلیه  
ایلّه تأیید وتشیید مقصودینه مبتنی اوله رق متکلمینک

کائناته نظر لری جناب حق و فعال مطلق حضرت تری نه  
استدلال ایچون بولمسندن ناشیدر .

حتی عصر حسن بصریده واصل بن عطاناک  
ظهور یله وجود بولمغه باشلایوب امام ابو الحسن اشعری،  
امام ابو منصور ماتریدی کی افانک اول امرده تنظیمه  
همت ایتدکاری علم کلام قاضی ابو بکر الباقلائی، ابن  
مجاهد، استاذ افخم غزالی، امام الحرمین ابو المعالی کی  
افانک توضیحات و تألیفات یله علی الدوام ترقی ایوب  
با خصوص علم منطقک ترقیدی اوزرینه امام غزالی،  
فخر رازی کی اعظمک تحقیقات یله انتظام تام بولمش  
و فلسفهده عقاید دینییه مخالف اولان مدعیاتک رد  
و ابطالی مباحثی دخی علم کلامه ادخال ایدلمشدر و ایشته  
علم مجوٹ عنہک فلسفهدهن غیری اولدیخی فلسفه  
علیهنده احتوای ردیات ایتسیله بسبتون متحقق  
اولمشدر .

حکمت آلهیه عنوانی دخی آلان فلسفهیه کلنجه بونک  
وضعی حقایق اشیا یی کشف و روحانیاتی ادراک ایچوندن  
یعنی محسوسات و ماورای محسوساته قوه عقلیه یله  
استحصال علم ووقوف مقصدینه مبتنی در .

فلسفهک موجدی اسک یونانلیلر اولوب فیلسوف

لسان یونانیده محب دیمک اولان (فیلسوس) ایله کمال  
معناسنی مفید بولنان (سوفیا) کلمه لرندن مر کبدر؛ شو  
حالده محب کمال دیمکدر .

برنجی فیلسوف عنوانسه مظهر اولان فیثاغورثله  
افلاطون، ارستاطاليس کی قدمای حکما فلسفه نی تنظیمه  
و بو بابده تألیفاته اقدام ایله بر علم مخصوص وجوده  
کثیر مشر در .

خلفاء عباسیه زمانده علوم وفنونک احداث و ترقیسنه  
صرف مساعی ایدایکی صروده فلسفه نک دخی نقله  
غیرت ونیجه کتب یونانیسه نک ترجمه سیله علم مذکورک  
تنظیم واصلاحنه همت اولندی . ابو نصر فارابی،  
ابوعلی ابن سینا کی برچوق ارباب کمال بو علمده  
تألیفات عدیده بر ایشلر وفلسفه نک شریعتیه مغایر مباحثی  
وار ایسه ده بونلر متشرعین جانندن کوسترلش وبو بابده  
امام غزالی بیوک همت ایشدر . علم مذکورک مباحث  
مذکوره سی ردیاتی مستحضر اولدن نظر تدقیقه التمز  
ودها طوغریسی اصول تحصیل علم وفنونه توفیقاً فقه  
وتفسیر واصول دین کی علوم شرعییه وقوف حاصل  
ایتدکن ومکارم اخلاق ایله تصفیة ذات وصفات  
ایدرك علوم وفنون سائرهی علی الترتیب کوردکن  
صکره حکمت الهیه تسلیم ویا مطالعه سی طریق

مستقیمه کیدیلوب وقتسز و یولسز حرکت ایدلمزسه  
منافع و محسناتدن غیر خالی اوله جنی اقامه برهانه لزوم  
حس ایتدیرمیه جک درجه ده ظاهر و باهردر .

محتاج عرض وایضاح اولمدیغی اوزره نوع بشره  
لطف جلیل ربانی اولان قوه عقلیه نیجه حقایق ماده  
و معنویه بی کشف ایده بیلورسه ده بونک دخی نهایت  
بردرجه سی واردر یعنی مدار شرف و امتیازمن اولان  
او قوه عقلیه نیجه حقایق اشیایی عارف نیجه روحانیاته  
بالاستمدلال واقف اولدیغی حالده البته هپسنی ادراکه  
قادر اوله میوب بر طاقنک کهنه وارمقدن عاجز و قاصر  
قالور . بوراده ادعایه پک حقویرکه بعضی مباحث  
و مسائلی فهم و ادراکدن عاجز قالدیغیمیزی کوروبده  
شکایت ایده جکمره و یا خود کشف ایتکه چالیشوب برالای  
اوهام باطله و خیالات عاطلهیه دوشه جکمره جناب حق  
بره بوقوه عقلیه بی ویرمنه و بزی بونجه کشفیاته موفق  
قیلمسنه مقابل عقلنک ایردیکی مواد و مسائلک تدقیقات  
و تحقیقاتنی اکماله چالشمق البته ده از یاده موافق حقیقتدر  
قوه دراکه مزک نافذ اوله بیلدیکی دائره خارجه چیقوبده  
بیابان حیرت و ضلالتده ذلیل و سرگردان قالمقدن مجانبت  
مطلقا مطابق قواعد حکمتدر .

فلسفه ده بو خطا و جرأتدن رهایاب اوله مامق هم  
 علمك قسماً مدخولیتنی و همده اربابك علی الا کثر مذمو-  
 میتنی موجب اولمشدر . انجق اکابر حکمائك بوندن  
 غافل اولمدقلری اثرلنده کوریلان رأیلریله مستدلدر  
 حتی افلاطون الهیاتده حکمتك خدمتی تحصیل ظندن  
 عبارت اولدیغنی بیان ایلمش و ترجمه ابن خلدونده مصرح  
 اولدیغنی اوزره رئیس اساتذه حکمای اسلام ابوعلی ابن  
 سینا علیه رحه العالم کتاب مبدأ و معادنده « حشر  
 روحانی و احوالی نسبت معینه معلومه و وتره واحده  
 اوزره اولدیغندن براهین عقلیه و اقیسه صحیحه ایله درك  
 اولنور شیلردن اولمغله بونك اوزرینه برهان اقامه سنه  
 قدرتمز واردر اما حشر جسمانی و احوالی نسبت واحده  
 اوزره اولمدیغندن برهان ایله ادراك اولنه من شریعت  
 حقه محمدیه ایسه بزه انی بسط و بیان ایتکله حشر  
 جسمانیك احوالنده شرع شریفه مراجعت اولنسون »  
 دیمشدر .

ایشته استاذك شو مقالی یوقاروده کی عرضك  
 اصابتنه صراحت دالدر یعنی قوه عقلیه حشر روحانیك  
 مطلق الوقوع اولدیغنی ادراکه و بوبابده برهان و دلیل  
 تدارکنه مقتدر ایسه ده حشر جسمانی ایله احوالنه علم

ووقوف حاصل ایتمکن عاجز قالمشدر دیمک که حشر روحانی قوه مدرکه منک نافذ اولدیغی دأره داخلنده قالان حقایق بدن اولوب فقط حشر جسمانی او دأره نك خارجنده قالمش و بناءً علیه عقل بشرانی ادراك وتمیزدن قاصر اولمشدر .

شونکله ظاهر و نمایان اولیور که حکما نظر عقلینک مشاهده ورؤیتنه قدرتیاب اوله میه جغی نقاطک تماشای احوالنه بوش بوشینه اوغراشوب اضاعه اوقات و مساعی ایتک و برطاقم خیالات و اوهامه فریفته اوله رق قعر عمیق خطایه دوشمک داهییه سندن مصون قالدیغی حالده محسنات و منافع باهر کشفیاته موفق اوله بیلشدر ایسه ده دواهی معروضیه کرفتار اولنجه نظر شریعتده مستهجن و یا مردود بعض افکار باطله ده بولمشدر .

بوده معلوم اولسون علماء اسلامیه دن غزالی، رازی، تفتازانی، جرجانی، جلال دوانی، خواجه زاده، ابن کمال کبی افخم شریعت و حکمت بیننی بولمش و پک چوق حقایق و دقائق کشف و تعیین و فلسفه نك مردوداتی ارأه و تبیین ایلشدر .

خلاصه کلام حکمة الهیه دن عقلنک ایردیکی مباحث نافع و مفید اولوب انحق نظر عقلی افقنک اوتیه سنده کی

نیجه حقایقك احوالنه دأر ایدیلان کشفیات و بوبابده  
و یردکلی معلومات اخبارات شرعیه مستند اولدقجه  
مقوله ظنیات اولدیندن وثوق و اعتماد غیر شایاندر یعنی  
اقسام حکمة التیهنك عرض اولنان اوچ برنجی قسملرنده  
مبحوث عنه مسائلك سرعه غیر مخالفلی اعتقادات حقه  
نك تأییدنی موجب اولوب دقایق روحانیه مباحثنی احتوا  
ایدن صوکنجی ایکی قسمی ایسه اکثریت اوزره خیالات  
دیمك اولدیندن بی فائده در زیرا دفعاتله بیان ایدلدیکی  
اوزره مابعد الطبیعیاتده عقل و ادراک و فکر چالاکلک دائرة  
نفوذی پك طاردر ابن سینا اقسام حکمت التیهیه  
بالاده عرض اولندیغی اوزره بیان ایلدکن صکره آلت  
حکمت اولان منطق حقننده بعض افاداتی مقتضی کو-  
روب شو یولده سوزده باشلامشدر :

«حکمتك اقسام اصلیه و فرعیه سنی بسط و بیان ایلدک  
شمی انسانك حکمت نظریه و عملیه بی کسب و تحصیانی  
و بحث و رده سهو و غلطیدن توقیسنی موجب  
و هر بحثده سلوکی واجب طریقه مرشد و حقیقت حد  
صحیح ایله برهاندن عبارت بولنان حقیقت دلیلی و برها-  
نی به مقارب اولان حقیقت جدلی و انلردن قاصر بولنان  
حقیقت اقتناعیه ایله مغالطه بی و تخیله توقع ایدن حقیقت



شعری بی مبین آلتی تعریف ایتک زمانی حلول ایلدی .  
ایمدی معلوم اولسونکه اشبو آلت حکمت یعنی علم  
منطق طقوز قسمدن مر کبدر .

برنجیسی : کلیات خمس مباحثی متضمن و بوحیثیتله  
الفاظ و معانیکن اقسامی مبین اولوب علم منطق مدخلی  
مقامنده در و بونی فرفورورسک تصنیعاندن (ایساغوجی)  
کتابی مشتمدر .

ایکنجیسی : عقلده قوامی و وجودده تحصیل مشروط  
اولیان و بالعموم موجوداته من جهة ماهی شامل اولان  
متعدد معانی مفردة ذاتیه دن باحث در . بونی ارسطاطالا  
لیسک (قاطیغور یا) یعنی (مقولات، عشر) نامنده کی کتابی  
محتویدر .

اوچنجیسی : صادق و یا کاذب اولق اوزره قضیه و یا  
خبر اولسی ایچون معانی مفرده کنک ایجاب و سلبله نصل  
ترکیب اولنسی لازم کله جکنی بیان ایدر . بو قسمک  
شامل اولدیغی مباحثی ارسطاطالیسک (باریدمینا) یعنی  
(عباره) دنیلان اثری متضمندر .

دردنجیسی : مجهولاه علم حصولنجه دلیل مفید  
تألیف اولنق ایچون فضایانک نصل ترکیب اولندیغی  
بیلدیرر بوده قیاس اولوب مباحثی ارسطاطالیسک (آنو-

لوطیقا) یعنی (تحلیل بالعکس) دینیلان کتابی حاویدر .  
 بشنجیسی : حین ترتیبده قیاسک شرائطنی وکند-  
 یسیله شکسز یقین اثبات اولنق اوزره مقدمه دیمک اولان  
 قضایاسنی میندر . بوده قیاس برهانی اولوب مباحثنی  
 ارسطاطالیدسک (انولوطیقا الثانیه) و (افوقیطی) یعنی  
 (کتاب برهان) نام اثری شاملدر .

التجیدی : هرشیده علم وفهمی تبیین برهانیدن  
 قاصر اولان کسهک مخاطبه سنده، وجدلده حجج نافعده  
 اکتساب اولنان مواضعده، الزامدن احترازمراد اولنان  
 محاوراتده، مجیب وسائله ایجاب ایدن شیلیری تعریف  
 ایدر . بو قسمک مباحثنی ارسطاطالیدسک (طویقا) یعنی  
 (مواضع) دینیلان اثری مبین اولوب بعض کره (جدلی)  
 دیمکلهده تعریف اولنور .

یدمجیسی : حجج ودلائلده وقوعبولان غلطاتک وسهو  
 وذهدن تجانبک تعریفنی وبا سرها آنلرک اعدادینی وآندن  
 تحرز وتوقینک وجهی اوزره تنبیهی مشتملدر . بونی ینه  
 ارسطاطالیدسک (اسوفستیقا) یعنی (نقض شبه المغالطین)  
 دینیلان کتابی حاویدر .

سکرنجیسی : مشاولات، مخاصات و مشاجرات

طریق اوزره جمهور ايله مخاطباتده نافع اولان مقایس  
خطابه ايله مدح و ذم، استعطاف و استمالت، اغراب،  
تصغیر و یا تعظیم و غیر، وجوه مقادیر و معاتبات و هر بر  
قضیه و خطبه ده کلامک ترتیب و جوهری اصول و تعریفاتی  
تضمن ایدر. قسم مذکورک مباحثی ارسطاطالیسک (رتو-  
ریق) یعنی (خطاب) نام اثرنده در .

طقوزنجیدی: هر فنده فنک و انواع تقصیر و تنقیصک  
نصل لازم کله جکی حقنده در قسم مذکورک مباحثی  
ارسطاطالیسک (قوانتبی) نام کتابی شاملدر و بوکا  
(رتوریق) یعنی (شعری) دخی تسمیه اولنور .

شیخ الرئیس آلت حکمت اولان منطقک اقسامی  
حقنده بالاده عرض اولنان معلوماتی سرد و اتیاندر نصکره  
رساله سنه ختام و یرمک قصد ایدوب مقال آتی بی خاتمه  
اتخاذ ایلشدر .

«ایشته آلت حکمتک اقسامی اوزرینه دلالت ایتدک  
بوندن ظاهر اولدیکه علم مذکورده شریعتیه مخالف هیچ  
برشی یوقدر اولدیخی ادعاسنده بولنوبده منهج شریعتدن  
ازلاف ایدنلر عجز و تقصیرلری جهتله خطایه دوشرلر  
صناعت نفس بونی ایجاب ایتز؛ زیرا نفس بولنلردن  
بر یدر .

ایمدی بو رساله عزیزی جناب و اهاب العقل والتوفیقہ  
 حمد ایدرک ختم ایدرز . »



حضرت شیخک شو خاتمه سنده علم منطقک شریعتہ  
 عدم مغایرتی اخطار و ارأه ایتسی علم مذکورک بین  
 الاسلام اوائل انتشارنده ردی جهتنه کیدلسندن ایلرو  
 کلشدر .

تاریخ علوم و فنونه واقف اولانلر ایچون خفی بو-  
 لندیغی اوزره متقدمین علما علم منطق فلسفه دن عدایله  
 قبول ایتیوب تحصیلنه مانع اولدقلری جهتنه طرفداران  
 منطق بو علمک مخالف شریعت اولندیغی ارأه و اثباته  
 مقدم و ساعی بولنشلردر .

استاذک عرض اولندیغی طرزده ختم مقال ایتسی  
 روش افاده و حاله نظراً بو سببه مبتنیدر .

فحولیندن بعض ذوات متقدمین علمانک علم منطق  
 مغایر شریعت کوردرک تحصیلنی منعه اهتمام ایتلری  
 اسبابیله متأخرین فضلائک علم مذکورده اویله بر مخالف  
 بولمقدن بشقه تحصیل فرض کفایه درجه سنده اولدیغنه  
 قناعت حاصل ایتدیره چک قدر ترقیدی وسائل و وسائطنی

استکماله همت ایتلری اسبابی تحری و تدقیق ایشلر ،  
وفی الحقیقه موفق اولملردر .

مشار الیهک بیانلرینه نظراً دلائل عقلیه ایله تأیید  
عقاید دینییه سعی و همتله علم کلامی وجوده کتورن  
و بونکله ابطال مدعیات مخالفینه چالیشان قدمای  
متکلمین کتب کلامیهده تسطیر ایتدکلری بعض ادا  
بطلانک ظهور و ترقی منطقله تین ایتدی استعداد  
و تمایلی کورملری اوزرینه عقاید دینییه تشدید و تأییدینه  
مدار اولان ادا له مجتو عنانک دوام مرعیتی تأمین  
ایچون علم منطق رد و تزئیف ایتشلر و تحصیلنه خواهشکر  
اولانلر ایچون احداث مشکلات ایشلردر .

انجق مؤخرأ حجة الاسلام امام غزالی و امام فخرالدین  
رازی رحمهما الله حضراتنده کی غیرت علمیه و حجت دینییه  
برقاچ فن و علم ایله قناعتی تجویز ایتدیرمیوب عصرلرنده  
مدون بتون علوم و فنونک کشف مزایا و استخراج  
غوامضنه چالشلرینی مجبر اولمسایله هر ایکیسی علوم  
عقلیه و نقلیهده صاحب کمال اولملشلر و بوصرهده علم  
منطقک حقیقت و منفعتنه دخی کندیلرنجه قناعت  
حصولندن نشأت ایش اولملیدرکه مغایر شریعت عد  
ایدلسنی باعث اولان اسباب معروضهینی ازالهیه دخی

همت ايدوب کتب کلاميه ده کی قوانین منطقيه منافی  
 دلائل مقامنده هم قوانین مذکوریه مطابق وهمده  
 مقتضیات مدعیاته دهها موافق براهین قاطعه ودلائل  
 ساطعه وضع واقسام ایتک وبوصورتله برطرفدن علم  
 منطق حقننده کی مغایرت شریعت ظنی ابطال واحما  
 ایدرک بو علم نافعک عامهجه مظهر حسن قبول اولسی  
 وقوانین وقواعدندن علماً استفاده ایدلسی یولنی بولق  
 وهمده دیگر طرفدن ادله کلامیه نک تشدید وتقویتنه غیرتله  
 مترتب عهدئ اسلامیتلری اولان خدمت دینییه یی ایفا  
 ایلک کی موفقیتلره ابدی بر امتیاز وشرف بولمشلردر .  
 ارتق بوندن صکره سرفرازان علما هپ علم منطقی  
 قبول ایدوب رد ومنعندن صرفنظر تدریسات وتالیفات  
 ایله ترقیسنه خدمت ایتشلردر . شوقدرکه ارباب فنک  
 تکتیری آرانک تزییدینی ، بو علم منطقک تغیرات کثیریه  
 اوغرایه رق مباحثنک چوغالمسینی ودور ودداز  
 تدقیقات وتوضیحات یوللرینه کیدیله رک نهایت تحصیل  
 خیلی مشکل حالی بولسینی ایجاب ایلشدر اکثر مدققین  
 نفعی مطلق اولان علم مذکورک شو صورتله صعوبت  
 تحصیلنی وحقیقت ومحسنات علمی مفید وشامل اولان  
 کتب قدماک نظر اعتباردن سقوطنی و مفصلاتک

ترویجی خشنود سزاقله تلقی ایلد کیری حقایقش ناسان  
متوغلین عندنده معلومدر .

شوراسی شایان تعجبدر که منطق مباحثی تکثیر وتو-  
فیر وشروح و حواشی تحریر وتسطیر ایلد یکی حالده  
مدخل فن اولان کتابک نامی نه دیمک اولدیغنی تعیینده  
همانده اکثریت اوزره اختلاف ایدیلرک ایشک طوغریسی  
بو آرای متضاده اراسنده قلش وایساغوجی بش یپراقلی  
بر کلک اسمیدر دینه جک قدر ایلرو کیدیلوب پک چوق  
آرای غریبه بسط ایدلش ونام مذکورک بونان قدیم لسا-  
نده مدخل دیمک اولدیغنی حقنده کی اخبار پک کوچ  
ایشیدلمشدر .

بو حقیقی عدم استماع حالی ظن ایدرز که الآن  
جاری دکلدر .

تمه اوله رق شوراسنی عرض ایدهلمکه ذکر اولنسان  
ایساغوجینک مؤلفی میلادک ایکی یوز اوتوز ایکی تاریخنده  
بریه الشامده طوغمش بر حکیم یونانیدر .

ایمدی شیخ الرئيس رحمة الله علیهم اقسام الحکمه  
نام رساله عربیه سی ترکیبیه بالترجه اساس اتخاذ اولنه رق  
تحریرینه چالیشیلان (لطائف النعمه فی اقسام الحکم)  
نامنده کی شورساله مزک زمان ختم واکمالی حلول ایتش

اولدیغندن خطیبات و نواقصی نظر عفو ایله کورلمک  
قارئین کرامدن رجا ایدیله رک اختیار سکوت اولندی .  
الحمد لله رب الموفق والصلوة والسلام علی رسوله المشفق  
وعلی آله واصحابه اجمعین .

( انتهى )





## مقالات

صحيفة نومرولرى

١	١٨ و	م.
١٤ و ٢١	{	كتاب كشف الازهار عن حكم الطيور والازهار دن
٤٥ و ٧٨		اشارت الكلب، اشارت الجمل، اشارة الفرس،
٩٤ و ١٨٨		مقدمه، اشارة النسيم، اشارت الورد: «كل» .
٣٣ و ٩٧		اسلاميتده امرسى، نهي بطانت .
٤٧ و ٦٤		ابن كمال مرحومك آتارندن «طبقات الفقهاء» .
٤٩ و ٦٥		حافظك «پرما كفت الخ» بيتنى جلال دوانينك
		شرحى .
٨١ و ١١٣		شرح مذكورك ذيلى .
١٢٩		فضائل قرآنيه .
١٣٦ و ٢٠٥		توكل، تسليم، رضا .
١٤٠ و ٢١٧	{	اسرار نورانية قرآنيه ترجمه سى .
٢٧١ و ٣٢٥		
١٧٣ و ٢٣٩	{	لطائف التعمد فى اقسام الحكمه رساله سى .
٢٩٧ و ٣٦٦		
١٩٣		صيام .
٢٥٧		خير .
٢٥٠ و ٣٠٩		مدنيت اسلاميه «كتاب مخصوص» .
٣٢١		مقامه شكران .

## مقتطفات منشوره :

صحیفہ نومرولری

۴ الی ۸

امام قشیرینک اسماء الحسنی شرحنک اسم رازق  
بمحدثن، حسن بصیرینک بر صالحہ ایلہ مکملہ سی،  
موسی، یوسف علیہما السلام حضراتنک، امام  
علی، امام حسن (رضی) حضرتلرینک، مأمون  
خلیفہ ایلہ بعض حکمانک، اقول علیہ سی .

۲۰ » ۲۰

امام جعفر، امام اعظم، جنید بغدادی، سید  
شریف، جلال دوانی، ارسطو، بقراط ایلہ  
بعض حکمانک کفتارلری .

۳۷ » ۴۱

امام علی، ابن عباس رضی او عنہما، بعض  
کلام حقیقت انسجامی، امام اعظم، امام  
شافعی، امام محمد، امام یوسف حضراتنک  
خاتملری، ابن سینا، ابو عبدہ السائلی، فیثا  
غورث، افلاطون، بعض حکما اقوالی .

۵۳ » ۵۸

مضمون حدیث حضرت رسالت پناهی . حدیث  
شریف دیگر . عیدہ ابن مسعود رضی،  
بایزید بسطامی، محفوظ بن محمد حضراتنک  
اقوالی، امام قشیرینک اسماء الحسنی شرحنک  
اسم خالق بمحدثن . منہادن، عہدہ دن، مطا  
بیات عیدزاکانیدن، بعض منقولات . حکمتہ  
دائر بر ایکی سوز، امام اعظمک اسمی تلا  
مبذی . لطیفہ .

۶۹ » ۷۲

مضامین احادیث نبویہ . امام علی رضی،  
عبد الرحمن جامینک رح اقوالی . اسماء الحسنی

## صحیفہ نومروری

شرحہنک (امم ملک) بخشیدن. ابو یزید  
بسطاہنک بر سوزی.

۸۵ الی ۹۰ مضمون حدیث پیغمبری. جلال دوانینک  
لوامع الاشرافندن. جاراہ زمخشرینک اطواق  
الذهبنک. عمر ابن عثمان المہدی الیہ عمر ابن  
فارضنک اقوالی. بعض حکم.

۱۰۱ » ۱۰۸ مضامین احادیث جلیلہ. اصحاب جناب رسا-  
لت پناہیدن صاحب التفسیر اولانلر. ابراہیم  
القصار، شیخ عبیدہ المعزی، ابن سینانک  
اقوالی. جاراہ الزمخشرینک اطواق الذہبنک،  
جلالک بعض حکمایہ دائر لوامع الاشرافندہ کی  
افادہ می، بر مکلمہ حکمیہ.

۱۱۹ » ۱۲۴ مضامین احادیث شریفہ. امام علی (رضی)،  
جنید بغدادی حضراتنک اقوالی. حکمت  
حقندہ ابن سینا و جلال دوانینک بعض  
تعریفات.

۱۴۷ » ۱۵۹ عثمان زادہ ثابتنک صحت اباد رسالہ سندن او-  
چنچی و اوتوز برنجی احادیث جلیلہ. مضمون  
حدیث شریف دیگر. امام حسن بن علی  
(رضی) حضرتلرینک اقوالی. رسالہ قشیریہ دہ  
ابو طیب مراعیندن مروی قول جلیل الیہ  
رجا حقندہ افادہ. اسماء الحسنی شرحنک اسم  
اہ بخشندن؛ اسم قدوس بخشندن. ابراہیم بن  
ادہم، فضیل رحمۃ اہ علیہمانک اقوالی. حسین

## صحیفہ نومروری

کاشفینک اخلاق محسنی نام اثر بلہ ذیلندن فقرات . خالد بن عبداه القشیرینک واسط شهرنده ایراد ایندیکی نطق .

۲۲۶ الی ۲۳۰ امام علی رضی اه عنک قول عالیسی . اسماء الحسنی شرحنک الوهاب ، السلام مجتزلندن . رسالہ قشیریہنک استقامت بایندن (الواحد الاحد) حقنده امام قشیرینک بعض توضیحاتی . اخلاق محسنی ذیلندن فقرات .

۲۷۷ \* ۲۸۷ مضامین احادیث شریفه . بعض اقوال خلفای راشدین وامامین (رضی) . انتخاب اسناد خصوصنده امام اعظمک رأیی . اتخاذ رفقایه دائر بر قاج سوز . حسن بصری (رضی) نک مناجات و بعض افاداتی . صبر و محبت و تمکین حقنده امام شافعیدن بر سوال وجوابی . ذوالنون مصری و سمری سقطی نک اقوالی . جلال دوانینک عدالت حقنده ، سقراطک حسن و سوء خلقه دائر افاده لری . حله دائر بر قاج سوز .

۳۶۱ \* ۳۵۶ (ان الدین نصیحة) حدیث شریفنک شرحی . تلاوت قرآن حقنده شیخین حضراتندن سوال رسالت پناهی . حضرت عمر (رضی) نک عزات حقنده کی قول جمیلی (صحیح) — عزات همنشینان بددن راحتی استلزام ایدر — . امام عمر (رضی) نک اقوال علیہ سی . امام

صحیفه نومرولی

اعظمك داود طاقیه پند و نصیحتی، امام  
حنبلك اخلاص حقنده افاده سی . سری  
سقطی ایله معروف کرخینك بر حکایه سی .  
فخر الدین رازی ایله شیخ نجم الدینك بر  
مکالمه سی . شیخ شهاب الدین سیواسی و سار  
افانك اقوالی .

مقتطفات منظومه :

۸      الی ۱۸      ابن راوندینك بر قطعه سی ایله جوابلری .  
عبداه ابن عباس رضی، ابو السعد، ابو  
اسحق، عرفی، احد پاشا و بحییك بعض  
اشعارى . سهواً طالبه اسناد اولشمش فضو .  
ایلك بر بیقى .

۲۰      ۳۱      ابو الفتح البستیك (قصیده الحكم والامثال) ندن .  
محمود ابن شیخ، مأمونك جاریه سی عریب، ام  
النہاء، صائب و سید نسیمیك اشعارى .  
بعض ابیات .

۴۱      ۴۰      قصیده الحكمدن . امام علی رضی، میرزا  
مهدی، ملهمی، ابن کمال، نابی حضراتك  
اشعارى . موزون بر نصیحت .

۵۸      ۶۶      قصیده دن . چهار یارك رضی، شیخ الاسلام  
اسبقی عارف حکمت بلك بعض ابیاتى .

## صحیفہ نومروری

کلم ہمدانیک ( قصیدہ نعتیہ ) سندن،  
سائر اشعارندن . فصیح، بلیغ، حلیم کرای،  
سنبل زادہ وہی نک ایاتی، بریت .

قصیدہ دن . امام علی نک (رضی) اشعارندن . ۷۶ الی ۷۲  
منظوم ترجمہ لریلہ برابر اوج بیت فارسی .  
عدد آیات جلیلہی متضمن ابن کمال اثر  
منظومی . بعض ایات .

قصیدہ دن . جامی، سلطان، سنبل زادہ، فہمیک ۹۰ » ۹۴  
اشعارندن . آثار منظومہ ابن کمال (حرف  
الالف) .

قصیدہ دن . امام علی رضی، امام اعظم (رح) ۱۰۸ » ۱۱۲  
حضراتنک اشعار برکذیدہ سندن . بعض  
ایات . پنج کنجیدن شیخ نجم الدین، معروف  
کرخی، شبلی حضراتنک گفتار منظومی .

تعجید جناب بلال حبشی رضی . امام شافعی ۱۲۴ » ۱۲۸  
وابن سکیتک منظوماتندن . کریمہ سبخرخان  
ایچون عمق بخارینک مرثیہ سندن . تحقیقنک بر  
خوش غزلی .

قصیدہ دن . روضۃ الناظرین سکریت . امام ۱۶۰ » ۱۷۳  
علی رضی وابن معزک آثارندن . آثار منظومہ  
ابن کمال (حرف الباء والفاء) . کلم ہمدانی،  
برائی، انطاکیہ مفتیسی مرحوم عاکف افندینک  
اشعارندن .

روضۃ الناظرین طقوز بیت . آثار منظومہ ۲۳۸ » ۲۴۲

## صحیفه نومروری

ابن کمال (حرف الدال والراء). شاعر باخرزی،  
انوری، بی دلاک منظوماتندن .

۲۸۷ الی ۲۹۷ امام علی ناک (رضی) ایی قطعه سیله ترجمه

منظومه سی . روضه الناظر دن یدی بیت .

آثار منظومه ابن کمال (حرف الراء). حرفینک

ایاتندن . سلمان فارایینک قصیده موسندن،

بی دل، ریاضی، روحی بغدادی، ساغرینک

اشعاریه ایات سائره .

۳۵۶ » ۳۶۵ روضه الناظر دن اوچ قطعه ایله بر بیت .

آثار منظومه ابن کمال ( حرف الراء نهایتله

حرف السین). حرفی، اسحق افندی قدیم،

جوری، طالب، آلهی، نتاری، نفی، خسروی

صبری نام شعرای مشهوره انارندن ایات ایله

ناظمی مجهول بر قاج بیت .



## (مهران) مطبعه سی طرفندن نشر اولنان کتابلر

- ۳ مؤلف قاموس فیروز آبادی  
وسلطان اورخان غازی  
۴ سلطان محمود غزنوی  
۵ حجاج  
۶ امام مطهر

جب کتبخانه سنک شمعی به قدر  
نشر اولنان عددلری

هر بر عددینک فیناتی ۴ فروشدر

۱ مدنیت اسلامیه محرری ش. سامی

۲ اساطیر » »

۳ قادیلر » »

۴ کوک » »

۵ یر » »

۱۰ انسان » »

۱۱ امثال جلد ۱ » »

۱۲ » » ۲ » »

۱۳ » » ۳ » »

۱۴ » » ۴ واخیری

۱۷ لطائف ۱ محرری ش. سامی

۱۸ » » ۲ » »

۶ نمونه ادبیات ۱

۷ » » ۲

۸ » » ۳

۹ » » ۴

۱۵ اختراعات و کشفیات م. نعیم

۱۶ فصول اربعه »

۱۹ اصول بدایع در دست طبعدر

فروش

۷۵ شیطانک یادکارلری حکایه

۸۰ سفیلر حکایه ۷۸ جزو چیقدی

۴۰ هفته متوع ۲۰ »

۵ اولیا چلبی حکایه

۱۷- نوای شوق یا خود صدای عشق

شرقی مجموعده سی

۱۵ نظری و عملی نحو فرانسوی

پواتونک مترجی رفیق بک مجلد

۱۰۸ قاموس فرانسوی برنجی

نوع مجلد

۶۵ قاموس فرانسوی ایکنجی

نوع مجلد

۴۲ ترکیبدن فرانسه زجه به اولان

قاموس فرانسوی نک ۲۸ نجی

جزو نشر اولندی بهر جزو

۶۰ پاره

۵ مبادی قانون جزا

۵ مبادی اصول دفتری

۷۲ مونته قریستوار منی حروف ترکیبه

عباره

مشاهیر اسلامک شمعی به قدر نشر

اولنان عددلری بهری ۲ فروش

۱ ار طغرل غازی

۲ سلطان عثمان غازی



